

## ZEREMI

<sup>1</sup> Ko pape umume'u Zeremi ize'eg awer a'e, hemiapo kwer a'e no. Wiko Iwki ta'yr romo. Iwki wiko xaxeto romo Anatot tawhu Mezàmi Izaew ta'yr izuapyapyr waiwy rehe har pe. <sup>2</sup> Zuzi Amon ta'yr Zuta ywy rehe har wanuwihawete romo heko mehe 13 haw kwarahy rehe Tupàn Tuweharupi Wiko Ma'e uze'eg Zeremi pe a'e kury. <sup>3</sup> Uze'eg wi izupe Zeoaki Zuzi ta'yr tuwiawete romo heko mehe no. A'e re Tupàn uze'eg tetea'u Zeremi pe. Te amo 'ar mehe zauxiapekwer amo ae ywy rehe har weraha teko Zeruzarez pe har a'e wi wemipyhyk kwer romo wà. Zeneki Zuzi ta'yr tuwiawete romo heko mehe 11 haw kwarahy rehe 5 haw zahy rehe uzeapo a'e ma'e.

### *Tupàn wenoz Zeremi*

<sup>4</sup> Tupàn Tuweharupi Wiko Ma'e uze'eg ihewe.

<sup>5</sup> — Nezexak kar 'ym mehe we nehy hie pupe nerekò mehe we uruexak ihe, nemonokatu pà hezeupe ihe, teko ywy nànànar wanupe heze'eg imume'u har romo nemuigo kar pà ihe, i'i ihewe.

<sup>6</sup> Na'e aze'eg izupe kury.

— Tupàn Tuweharupi Wiko Ma'e hezar. Nakwaw kwaw heze'egatu haw ihe. Ta'e kwàkwàmo ipyahu ma'e romo aiko ihe xe, a'e izupe.

<sup>7</sup> Nezewe rehe we Tupàn Tuweharupi Wiko Ma'e uwazar heze'eg ihewe a'e.

— Eze'eg zo nezewe nehe. Oromono kar putar amo teko wanupe nehe. Eze'eg echo wanupe nehe. Amume'u putar ma'e newe nehe. Emume'u a'e ma'e paw wanupe nehe no. <sup>8</sup> Ekyze zo amo wanuwi nehe. Ta'e aiko putar nerehe

we ihe nehe xe. Azekaiw putar nerehe nehe. Ihe Tupàn Tuweharupi Wiko Ma'e newe uze'eg ma'e romo aiko ihe.

<sup>9</sup> Na'e Tupàn Tuweharupi Wiko Ma'e opoe'eg hekutyr kury. Opokok hereme rehe ihewe uze'eg pà. — Einu katu heze'eg nehe kury. Amume'u putar heze'eg newe nehe. Eremume'u putar a'e heze'eg purupe nehe no.

<sup>10</sup> Kutàri amono putar hepuner haw nerehe nehe kury. Erepuner putar teko wyzài ywy rehe har wanenuhemaw rehe waneitykaw rehe nehe. Erepuner wamumaw paw rehe nehe no. Erepuner waneko haw iapo wi haw nehe. Erepuner ma'e itymaw rehe waiwy kwer rehe nehe no.

<sup>11</sup> Tupàn Tuweharupi Wiko Ma'e upuranu herehe.

— Ma'e erexak iko ne. — Amen i'yw hàkà aexak teko ihe, a'e izupe.

<sup>12</sup> Tupàn Tuweharupi Wiko Ma'e uze'eg ihewe.

— Azeharomoete aipo. Ame'egatu teko wanehe ihe no. Azapo tuwe heze'eg awer ihe nehe, i'i Tupàn ihewe.

<sup>13</sup> Uze'eg wi Tupàn Tuweharupi Wiko Ma'e ihewe herehe upuranu pà.

— Aipo erexak amo ma'e iko ne, i'i ihewe. Awazar ize'eg izupe.

— Kwarahy heixe haw awyze har kutyr heme'e mehe aexak zapepo ipupur mehe. Uzeakook ipupe har iko xe kutyr a'e, a'e izupe.

<sup>14</sup> Na'e i'i Tupàn Tuweharupi Wiko Ma'e kury.

— Puruzuka haw ma'e imumaw paw rehe we har ur putar kwarahy heixe haw awyze har kutyr har wi nehe. Uzakook putar teko ko ywy rehe har nànàn wanehe nehe.

<sup>15</sup> Aenoz putar teko kwarahy heixe haw awyze har kutyr har paw wamuwà ihe wà nehe. Wanuwihawete uhem putar xe a'e wà nehe. Umuapyk putar wenaw Zeruzarez tawhu hukenaw henataromo wà nehe, ipàrirogawtâtà ma'e izywyr wà nehe no, amo tawhu Zuta ywy rehe

har waiwyr wà nehe no. <sup>16</sup> Azepyk putar a'e tawhu pe har wanehe ihe nehe, ta'e ikatu 'ym ma'e iapo har romo wanekon a'e wà xe. Hereityk a'e wà. Wapy yhyk zàwenugar waiko amo tupàn wamuwete pà wà. Umuwete katu tupàn a'ua'u wanagapaw opo pupe wemiapo kwer wà. <sup>17</sup> Zeremi, ezemuàgà'ym neho àwàm rehe nehe kury. Emume'u heze'eg paw echo wanupe nehe. Ekyze zo wanuwi nehe kury. Aze erekycle wanuwi ko 'ar rehe nehe, urumukyze kar wera'u putar wainuinuromo nerekò mehe ihe nehe. <sup>18-19</sup> Einu heze'eg nehe, Zeremi. Teko ko ywy rehe har wiko putar neàmàtyry'ymar romo a'e wà nehe: Zuta ywy rehe har wanuwhawete wà, amogwer tuwhaw wà, xaxeto wà, teko wà. Paw rupi wiko putar neàmàtyry'ymar romo wà nehe. Nezewe rehe we kutàri amonohekàgaw teko newe. Nezewe mehe erepuner putar a'e teko wanenataromo neze'egaw rehe nehe. Ereiko putar tawhu pàrirogawtàma'e tetea'u hereko har ài nehe, izyta itaper iapo pyrer ài nehe no, pàrirogawtàma'e itazu morog iapo pyrer ài nehe no. Nanereityk kwaw wà nehe. Ta'e aiko putar neruwake ihe nehe xe, nerehe hezekaiw pà ihe nehe xe. Ihe Tupàn Tuweharupi Wiko Ma'e aze'eg kwez kury, i'i Tupàn ihewe.

## 2

*Izaew weruzar Tupàn ize'eg wà*

<sup>1-2</sup> Tupàn Tuweharupi Wiko Ma'e hemur kar a'e. — Emume'u ko heze'eg Zeruzarez tawhu pe har paw nehe.

- Heremiaihu, hema'enukwaw 'ar kwàkwàmo romo nerekò mehe har rehe ihe.  
Ereruzar tuwe heze'eg hereityk 'ym pà.  
Heamutar katu pe uzerekò romo ma'e kwer ài zanerekò mehe.

Ereho heraikweromo ywyxiguhu rupi. Hema'enukwaw  
peho awer rehe.

Ereho heraikweromo ywy rehe ma'etymaw heta 'ymaw pe  
no.

<sup>3</sup> Teko Izaew izuapyapyr wà, peiko heremaihu romo a'e  
'ar mehe.

Napezawy kwaw arozràn  
izypy mehe ipo'o pyrer  
ihewe imur pyrer.

Aze amo upuraraw kar ma'erahy newe, azepyk wanehe.  
Amu'ar kar ikatu 'ymaw wanehe no. Ihe Tupàn Tuwe-  
harupi Wiko Ma'e aze'eg kwez kury, i'i ihewe.

### *Izaew izuapyapyr wanemiapo kwer ikatu 'ygwer*

<sup>4</sup> Zako izuapyapyr wà, teko Izaew waànàm wà no, peinu  
katu Tupàn Tuweharupi Wiko Ma'e ize'eg nehe kury.

<sup>5</sup> Nezewe uze'eg iko.

— Ma'e ikatu 'ymaw peipy wexak herehe wà.

Màràzàwe tuwe hereityk wà.

Umuwete tupàn a'ua'u ma'e iapo 'ymar wà.

A'e ae uzeapo ikatu ma'e iapo 'ymar romo wà.

<sup>6</sup> — Ikatu 'ym ma'e, i'i ihewe wà.

Nezewe rehe we aiko Ezit ywy wi wamuhem kar arer romo  
ihe.

Araha ywyxiguhu rehe ihe wà.

Heta tetea'u ywytyr a'e ywy rehe. Heta tetea'u  
iàpy'àmahy haw a'e ywy rehe no.

Naheta kwaw 'y a'e ywy rehe. Na'ikatuahy kwaw teko  
wanupe.

Ni amo nuwata kwaw a'e ywy rehe wà.

Ni amo nuiko kwaw a'e pe wà.

<sup>7</sup> Arur ywy ikatu ma'e rehe ihe wà.

— Uzutym putar ma'e wà nehe, u'u putar wemipo'o kwer wà nehe, a'e wanupe.

U'u putar ma'e a'e ywy rehe har ikatu wera'u ma'e wà nehe no.

Nezewe rehe we ur  
heywy imuaiw pà wà.

Uzapo ywy heremimono kwer purumuhuhuk kar haw romo wà.

<sup>8</sup> Xaxeto nupuranu kwaw uzehezehe wà.

— Ma'e pe hekon Tupàn Tuweharupi Wiko Ma'e, ni'i kwaw wà.

Heze'eg rehe uzekaiw ma'e nahekaww kwaw wà.

Ywy pehegweruhu rehe har wanuwhihaw heàmàtyry'ym wà.

Heze'eg imume'u har uze'eg tupàn Ma'aw her rehe wà.

Umuwete tupàn a'ua'u wà.

Tupàn a'ua'u nupuner kwaw teko wapytywà haw rehe wà.

### *Tupàn umume'u wemiaihu wanemiapo kwer*

<sup>9</sup> Tupàn Tuweharupi Wiko Ma'e uze'eg a'e kury.

— Amume'u wi putar heremaihu wanemiapo kwer ihe nehe kury.

Amume'u putar penemiapo kwer herenataromo arer nehe,

pezuapypywanemiapo kwer imume'u pà ihe nehe no.

Ihe Tupàn Tuweharupi Wiko Ma'e aiko uze'eg ma'e romo ihe.

<sup>10</sup> Peho yryppypo'o Xip her ma'e pe nehe. Kwarahy heixe haw ikutyr tuz. Pexak ma'e a'e pe har nehe.

Pemono kar amo Kenar kwarahy ihemaw kutyr har pe nehe.

Peme'egatu nehe.

Ta'e agwer ma'e nuzeapo pixik kwaw ko 'ar 'ym mehe we a'e xe.

<sup>11</sup> Ni amo teko nomono kwaw amo ae tupàn tupànete romo wiko 'ym ma'e wà, tupàn uzar wanekuzaromo wà.

Nezewe rehe we heremaihu omono amo ae tupàn herekuzaromo a'e wà.

Aiko wazar Upuner Wera'u Ma'e Ipuràg Wera'u Ma'e romo ihe.

Nezewe rehe we omono amo herekuzaromo wà.

Wazar ipyahu ma'e nupuner kwaw ma'e iapo haw rehe waptywà pà wà.

<sup>12</sup> A'e rupi ihe Tupàn Tuweharupi Wiko Ma'e ihe, amuryryryryz kar putar ywak ko iaiw paw hexak mehe ihe nehe.

Tynehem putar kyze haw pupe nehe, pytuhegatu haw pupe nehe no.

<sup>13</sup> Heremaihu uzapo mokoz ikatu 'ym ma'e wà.

Aiko 'ytyzuzàmaw zàwenugar romo.

Nezewe rehe we hereityk wà.

Uhàwykàz amo 'ytyzuzàmaw hekar pà wà.

Oxorok a'e 'ytyzuzàmaw.

Te àmàn imono'og pyrer uhem wanuwi.

*Izaew nuweruzar kwaw Tupàn ze'eg, a'e rupi upuraraw ma'erahy tetea'u wà*

<sup>14</sup> Tupàn Tuweharupi Wiko Ma'e uze'eg kury.  
— Teko Izaew nuiko kwaw amo pe uma'ereko e ma'e romo wà.

Nuzexak kar kwaw uma'ereko e ma'e romo wà.

Màràzàwe tuwe waàmàtyry'ymar umuigo kar uma'ereko e ma'e romo wà.

<sup>15</sup> Okororo zàwàruhu iriàw ài Izaew ikutyr wà.  
Okororoahy wà.

Uzapò Izaew waiwy ywyxiguhu romo wà.

Tawhu uezapo heityk pyrer romo wà.

Ni amo nuiko kwaw wapupe wà.

<sup>16</sup> Azeharomoete Men pe har wà, Tapinez pe har wà no,  
upin wemipyhyk kwer teko Izaew ywy rehe har wa'aw wà.

<sup>17</sup> Teko Izaew wà,  
pe ae pezapo ikatu 'ym ma'e pe.  
A'e rupi a'e ma'e paw uezapo peme.  
Aiko Tupàn Tuweharupi Wiko Ma'e pezar romo ihe, hereityk pe.

Pe rupi peneraha mehe hereityk pe pe.

<sup>18</sup> Peho putar Ezit ywy rehe 'y Niru yrykaw pupe pei'u pà  
nehe kury.

Ma'en peputar nezewe iapo pà ko 'ar rehe nehe kury.

Peho putar Axir ywy rehe 'y Ewparat yrykaw pupe pei'u  
pà nehe kury.

Ma'en peputar nezewe iapo pà ko 'ar rehe nehe kury.

<sup>19</sup> Pekatu 'ymaw ae uzepyk putar penehe nehe.

Umume'u putar ikatu 'ym ma'e penemiapo kwer nehe,  
penehe uzepyk pà nehe, ta'e hereityk pe xe.

Aiko Tupàn Tuweharupi Wiko Ma'e pezar romo ihe.

Na'ikatu kwaw hereitykaw. Iro hereitykaw.

Pekwaw putar iro haw nehe kury.

Ihewi pekyze re pepytu'u haw iro a'e no. Pekwaw putar  
iro haw nehe no.

Ihe Tupàn Tuweharupi Wiko Ma'e Upuner Wera'u ma'e  
aze'eg kwez ihe kury.

### *Tupàn hemiaihu nupurumuwete wer kwaw hehe wà*

<sup>20</sup> Tupàn Tuweharupi Wiko Ma'e uze'eg kury.

— Teko Izaew izuapypy wà,  
kwehe mehe pepytu'u hereruzar ire.  
Napepureruzar wer kwaw herehe. Napepureruzar wer  
kwaw herehe no.  
Ywytyr aiha ma'e nànàn,  
ywyra u'ágaw hereko har nànàn,

pe'aw kuzà wyzài wapuhe tupàn a'ua'u wamuwete pà.

<sup>21</sup> Aputym uwà 'yw heremixamixak kwer ài,

uwà 'yw ikatu wera'u ma'e ài.

Peme'e pezehezehe nehe kury.

Uwà 'yw inem ma'e kwer romo peiko kury.

Uwà 'yw ikatu 'ym ma'e romo peiko kury.

<sup>22</sup> Aze mo pezuhez katu zamaw tetea'u pupe,

zamaw katu wera'u ma'e pupe,

apuner penemiapo kwer ikatu 'ym ma'e izipiw haw  
zàwenugar hexakaw rehe a'e re no.

Ihe Tupàn Tuweharupi Wiko Ma'e aze'eg teko ihe.

<sup>23</sup> — Nuruzapo kwaw ikatu 'ym ma'e ure, napepuner kwaw  
peze haw rehe.

— Nurumuwete pixik kwaw tupàn Ma'aw her ma'e ure,  
napepuner kwaw peze haw rehe.

Pezapo ikatu 'ym ma'e ywyàpyznaw pupe.

Pema'enukwaw katu penemiapo kwer rehe nehe. Peme'e  
penemiapo kwer rehe nehe.

Peiko kawaru kupewa'a kuzà imupuru'a kar haw 'ar rehe  
wiko ma'e ài.

Uzàn e oho iko kwe rupi a'e.

<sup>24</sup> Peiko zumen kuzà hehaite ma'e ywyxiguhu rehe wiko  
ma'e imupuru'a kar haw 'ar rehe wiko ma'e ài.

Mo upuner imupytu'u kar haw rehe. Ni amo wà.

Oho putar zumen awa pe nehe.

Aze zumen awa uputar, nuekar kwaw.

A'e zumen kuzà oho izupe.

Na'arewahy zumen awa upuner a'e zumen kuzà hexakaw  
rehe imupuru'a kar haw 'ar rehe.

<sup>25</sup> Teko Izaew izuapyapyr wà.

Pema'emua'u katu nehe.

Nezewé mehe napezepyapi kwaw nehe.

Ta'e peata tetea'u amo tupàn a'ua'u wanekar pà pe xe.

Pema'emua'u katu nehe.

Nezewe mehe pe'az na'ixinigahy kwaw nehe. — Nan, peze peiko.

— Nezewe rehe we aha putar tupàn a'ua'u amo ywy rehe har wanekar pà ihe nehe, ta'e azamutar katu ihe wà xe, peze peiko.

*Tupàn uzepyk Izaew ywy rehe har wanehe*

<sup>26</sup> Tupàn Tuweharupi Wiko Ma'e uze'eg kury.

— Aze tekó upyhyk imunar ma'e wà, imaranugar a'e. Nezewegatete tekó Izaew izuapyapyr imaranugar putar wà nehe no. Pe paw rupi nehe: Penuwihawete wà, wana'yr wà, xaxeto penekuzaromo herenataromo har wà, heze'eg imume'u har pepyr har wà. <sup>27</sup> — Ereiko heru romo, aze amo i'i ywyra pehegwer pe wà nehe, — Ereiko hehy romo, aze i'i ita pe wà nehe, paw rupi imaranugar putar wà nehe. A'e ma'e uzeapo putar nehe, ta'e pewak pekupe hexak kar pà ihewe xe. Napewak kwaw penuwa hexak kar pà ihewe. Nezewe rehe we, ma'e zawaiw katu mehe peme nehe, pezur putar ihewe pepyro àwàm henoz tetea'u pà ihewe nehe. <sup>28</sup> Ma'e pe tupàn a'ua'u penemiapo kwer wanekon wà kury. Peneko haw zawaiw katu mehe nehe, tuwe tupàn a'ua'u pepyro wà nehe, aze upuner wà nehe. Zuta, tawhu nerehe har nànàn pitàitàigatu heta tupàn a'ua'u wà, i'i Tupàn. <sup>29</sup> Ihe Tupàn Tuweharupi Wiko Ma'e apuranu penehe ihe kury. — Aipo azapo ikatu 'ym ma'e peme. Màràzàwe tuwe pepytu'u heze'eg heruzar ire. <sup>30</sup> Azepyk penehe ihe. Nezewe rehe we napekatu wera'u kwaw. Napepurukwaw wer kwaw ihewe pezur àwàm rehe. Peiko zàwàruhu iriàw wikwahy ma'e ài. Pezuka heze'eg peme imume'u har wà. <sup>31</sup> Peinu katu ko heze'eg nehe, pe paw rupi. Teko Izaew izuapyapyr wà. Aipo aiko ywyxiguhi ài peme. Aipo aiko ywy teko wazuka har ài. Màràzàwe tuwe peze'eg nezewe. — Uruzapo putar

ureremimutar ure nehe, peze peiko. — Nuruzewyr kwaw newe nehe, peze ihewe. Màràzàwe tuwe peze'eg nezewe. <sup>32</sup> Aipo kuzàwaza heharaz uma'e ita hekuzar katu ma'e wi. Aipo kuzà imen ma'e ràm heharaz uwa imimaw wi. Nezewe rehe we heremiaihu umumaw 'ar tetea'u ihewi weharaz pà wà. Teko nupuner kwaw a'e 'ar wapapar haw rehe wà. <sup>33</sup> Pekwaw katu penemiamutar wanekar haw. Te kuzà wyzài upuner a'e ma'e rehe uzemu'e haw rehe peinuinuromo wà. <sup>34</sup> Hemetarerer 'ym ma'e ikatu 'ym ma'e iapo pixik 'ymar wà, na'imunar pixik kwaw ma'e penàpuz pe har rehe wà. Nezewe rehe we wanuwy kwer umupinipinim pekamir. Nezewe rehe we heremiaihu uze'eg nezewe wà. <sup>35</sup> — Nazapo kwaw ikatu 'ym ma'e ihe, i'i wà.

— Azeharomoete Tupàn Tuweharupi Wiko Ma'e nuik-wahy kwaw ihewe a'e, i'i wà. Ihe Tupàn Tuweharupi Wiko Ma'e ihe, azepyk putar penehe ihe nehe. Ta'e — Nazapo kwaw ikatu 'ym ma'e ihe, peze mua'u pe xe. <sup>36</sup> Màràzàwe tuwe peiko e ikatu 'ym ma'e romo. Pepytu'u Axir ywy rehe pezeruzar ire. Nezewegatete pepytu'u putar Ezit ywy rehe pezeruzar ire nehe no. <sup>37</sup> Pezewyr Axir wi ikàg 'ym ma'e romo. Nezewegatete pezewyr putar Ezit wi pemaranugar romo nehe no. Pezeruzar amo wanehe. Ihe Tupàn Tuweharupi Wiko Ma'e aityk a'e teko ihe wà. Aze pepytu'u wainuinuromo nehe, napepyhyk kwaw ikatu ma'e nehe.

## 3

*Teko nuweruzar kwaw Tupàn wà*

<sup>1</sup> Tupàn Tuweharupi Wiko Ma'e uze'eg kury.

— Aze awa upuir wemireko wi nehe, aze hemireko weityk umen amo awa hereko pà nehe, imen ipy nupuner kwaw hereko wi haw rehe nehe. Agwer ma'e iapo haw

umuaiw Izaew ywy rehe azeharomoete. Pe heremaiihu pe. Peho awa tetea'u wapuhe. Peho kuzà tetea'u wapuhe no. Ko 'ar rehe pezewyr wer ihewe. Ihe Tupàn Tuweharupi Wiko Ma'e aiko ko ma'e imume'u har romo xe ihe. <sup>2</sup> Eme'e ywytyr apyr nehe. Ereiko kuzà wyzài romo ywytyr nànàn. Aipo heta we amo ywytyr penemimuaw 'ym. Pepyta pe iwyr pema'e ime'eg àràm wanàro pà. Awa Àràw ywy rehe arer upyta pe iwyr wata ma'e wanàro pà a'e wà. Ta'e imunar wama'e rehe wà xe. Peiko agwer imunar ma'e wazàwe. Pemuaiw Izaew ywy kuzà wyzài wazàwe peneko haw pupe, iaiw ma'e penemiapo kwer pupe. <sup>3</sup> A'e rupi àmàn umumaw 'ar tetea'u ukyr 'ym pà. Ni àmàn u'ar mehe har izypy mehe har nukyr kwaw. Te peneko haw nuzawy kwaw kuzà wyzài waneko haw. Pexak kar pemaranugar 'ymaw purupe wazàwe.

<sup>4</sup> Ko 'ar rehe peze'eg nezewe ihewe.

— Ereiko heru romo. Heamutar katu pe hekwarer mehe arer we. <sup>5</sup> Nereikwahy kwaw ihewe tuweharupi nehe, peze ihewe. Teko Izaew ywy rehe har wà, peze'eg nezewe ihewe. Nezewe rehe we pezapo ikatu 'ym ma'e peho peiko. Aze pepuner amo ikatu 'ym ma'e iapo haw rehe, pezapo a'e ma'e, i'i Tupàn Tuweharupi Wiko Ma'e.

### *Pezewyr Tupàn pe nehe*

<sup>6</sup> Zuzi tuwhawete romo heko mehe Tupàn Tuweharupi Wiko Ma'e uze'eg wi ihewe. — Erexit Izaew wanemiapo kwer iko. Nuzawy kwaw kuzà umen 'ym puhe oho ma'e. Uzewyr ihewi ukupe hexak kar pà ihewe. Uzeupir ywytyr aiha ma'e nànàn. Upyta ywyra i'ágaw hereko har nànàn no. Nuzawy kwaw kuzà wyzài. <sup>7</sup> Ihe Tupàn Tuweharupi Wiko Ma'e aze'eg nezewe hezeupe. — A'e ma'e paw iapo re azeharomoete uzewyr putar ihewe nehe, a'e izupe. Nuzewyr kwaw. Tyker Zuta a'e, umen heitykar a'e, wexak

izewyr 'ym awer a'e. <sup>8</sup> Zuta ukwaw Izaew wi hepuir awer a'e no. Hereityk a'e. Nuzawy kwaw kuzà wyzài. A'e rupi amono kar hezewi ihe. Nezewe rehe we tyker Zuta nukyze kwaw. Uzeapo kuzà wyzài romo a'e no. <sup>9</sup> Na'imaranugar kwaw. Umuaiw uiwy, ta'e uker umen 'ym puhe a'e xe. Umuwete ita. Umuwete ywyra no. <sup>10</sup> Ko ma'e iroahy wera'u ihewe. Zuta Izaew tyker umen 'ym ipuhe oho ma'e kwer a'e, uzewyr mua'u ihewe. Nuzewyr kwaw azeharomoete. Iro ihewe. Ihe Tupàn Tuweharupi Wiko Ma'e aze'eg kwez kury, i'i ihewe.

<sup>11</sup> Na'e Tupàn uze'eg wi ihewe kury. — Izaew upuir ihewi a'e. Nezewe rehe we Zuta herehe uzeruzar ire upytu'u ma'e kwer a'e, iaiw wera'u ihewe a'e. <sup>12</sup> Eho kwarahy heixe haw awyze har kutyr nehe, teko wanupe ko heze'eg imume'u pà nehe. — O Izaew ihewi upuir ma'e kwer, ezewyr ihewe nehe. Ihe Tupàn Tuweharupi Wiko Ma'e aiko uze'eg ma'e romo. Ikatuahy ma'e romo aiko. A'e rupi naikwahy kwaw newe nehe. Naikwahy kwaw tuweharupi nehe. Ihe Tupàn Tuweharupi Wiko Ma'e aiko uze'eg ma'e romo. <sup>13</sup> — Aiko ikatu 'ym ma'e iapo har romo, ere ihewe nehe. — Azàmàtyry'ym Tupàn Tuweharupi Wiko Ma'e hezar, ere ihewe nehe. — Ywyra u'ágaw hereko har nànàn amuwete katu tupàn a'ua'u amo ywy rehe har ihe wà. Nureruzar kwaw ihe, ere ihewe nehe. Ihe Tupàn Tuweharupi Wiko Ma'e aiko uze'eg ma'e kwer romo, i'i Tupàn. Amume'u ize'eg aha wanupe.

*Pepytu'u ikatu 'ym ma'e iapo re nehe, i'i wanupe kury*

<sup>14</sup> Tupàn Tuweharupi Wiko Ma'e uze'eg wi kury.

— Pezewyr ihewe nehe, teko herehe upuir ma'e kwer wà. Ta'e peiko heremiaihu romo xe. Apupyhyk putar nehe. Apyhyk putar pitài tawhu nànànar ihe wà nehe. Apyhyk putar mokoz teko uzeànàànàm ma'e nànànar ihe wà nehe no. Amuzewyr kar putar waneraha Xiàw ywytyr

pe ihe wà nehe. <sup>15</sup> Amono kar putar tekò hereruzar ma'e penuwihaw romo wà nehe. Upureruze'eg putar ma'e kwaw katu haw rupi wà nehe. Wiko putar ma'e kwaw katu har romo wà nehe. <sup>16</sup> A'e ywy rehe tekò tetea'u romo peneko mehe ni amo nuze'eg kwaw heze'eg hyru rehe wà nehe. Napeze'eg kwaw heze'eg hyru rehe nehe. Napema'enukwaw kwaw hehe nehe. Napeputar kwaw nehe. Napezapo kwaw amo nehe. <sup>17</sup> 'Ar ikatu ihem mehe — Tupàn Tuweharupi Wiko Ma'e henaw, i'i putar tekò Zeruzarez rehe wà nehe. Ywy nànànar uzemono'og putar a'e pe herer rehe wà nehe. Izypy mehe wapy'a uzeruzar 'ym ma'e ikatu 'ym ma'e uzapo kar ma'e wanupe. A'e 'ar ikatu ma'e rehe nuzapo kwaw a'e ma'e wà nehe. <sup>18</sup> Tekò Izaew ywy rehe har uzemono'og putar Zuta ywy rehe har wanehe we wà nehe. Uzewyr putar ywy kwarahy heixe haw awyze har kutyr har wi uzeinuinuromo wà nehe, ywy waipy wanupe heremimono kwer pe wà nehe, i'i Tupàn.

*Upytu'u putar tupàn a'ua'u rehe uzeruzar ire wà nehe*

- <sup>19</sup> Uze'eg wi Tupàn Tuweharupi Wiko Ma'e kury.
- Tekò Izaew izuapyapyr wà.
- Hepurumuawyze wer zepe penehe hera'yr romo.
- Heporomono wer zepe amo ywy pemurywete kar har rehe peme.
- Ipuràg eteahy amo ywy wanuwi paw rupi.
- Heru, peze putar ihewe nehe, a'e zepe hezeupe.
- Napepuir pixik kwaw ihewi nehe, a'e hezeupe.
- <sup>20</sup> Napezawy kwaw kuzà umen 'ym puhe oho ma'e.
- Peiko nezewe nugar romo ihewe.
- Ihe Tupàn Tuweharupi Wiko Ma'e aiko uze'eg ma'e romo, i'i Tupàn.
- <sup>21</sup> Ywytyr apyr uzenu wànoànog ma'e iko.
- Izaew izuapyapyr uzai'o waiko wà.
- Nereharaz ureremiapo kwer wi nehe, i'i waiko wà.

Ta'e wiko ikatu 'ym ma'e iapo har romo wà xe.  
Heharaz uzar Tupàn Tuweharupi Wiko Ma'e wi wà.

<sup>22</sup> Pe Tupàn Tuweharupi Wiko Ma'e wi upuir ma'e kwer  
paw wà, pezewyr izupe nehe.  
Pemukatu putar pezeruzar 'ym awer wi nehe.

— Azeharomoete uruzewyr uruiko Tupàn Tuweharupi Wiko Ma'e pe ure. Ta'e wiko Tupàn Tuweharupi Wiko Ma'e urezar romo a'e xe, peze peiko. <sup>23</sup> — Uru-muwete tupàn a'ua'u nerehe useruzar 'ym ma'e wazar ure wà, wanupe urererekupakaz pà ywytyr apyr ure wà. Na'urepytwà kwaw wà. Xo Tupàn Tuweharupi Wiko Ma'e urezar zo upuner Izaew izuapyapyr wapytwà haw rehe a'e. <sup>24</sup> Ureru omono'og ikatu ma'e tetea'u urekwarer henataromo wà: àràpuhàràñ wà, tapi'ak wà, urera'yr wà, urerazyr wà. Urumuwete Ma'aw maranugar haw izar ure. A'e rupi a'e ma'e paw uhem urewi wà. <sup>25</sup> Uruzemuigo kar putar ikàg 'ym ma'e romo nehe. Uretynehem putar maranugar haw pupe nehe no. Kwehe mehe Tupàn Tuweharupi Wiko Ma'e upyro ureipy Ezit wi wà. A'e 'ar henataromo a'e wà, ure no, uruzapo ikatu 'ym ma'e henataromo ure. Nureruzar kwaw ize'eg ure.

## 4

*Pezewyr ihewe nehe, i'i Tupàn Izaew wanupe*

<sup>1</sup> Tupàn Tuweharupi Wiko Ma'e uze'eg wi kury.

— Teko Izaew izuapyapyr wà. Aze pezewyr nehe, pezewyr ihewe nehe. Naheakatuwawahy kwaw tupàn a'ua'u wanehe. Pezukazuka wamumamumaw pà pe wà nehe. Hereruzar pe nehe. <sup>2</sup> Xo nezewe haw iapo mehe peiko putar azeharomoete har romo ikatu ma'e romo imunar 'ym ma'e romo nehe, herer rehe ma'e imume'uhah mehe nehe. Teko ywy nànànar wenoz putar

heze'egatu wà nehe. Umume'u putar hekatu haw wà nehe no.

<sup>3</sup> Tupàn uze'eg awa Zuta izuapyapyr wanupe a'e, Zeruzarez tawhu pe har wanupe a'e no.

— Pewykawyka ywy ma'etym àwàm rehe imuàgà'ym 'ym awer nehe, iwykawyka haw pupe nehe. Pezutym zo ma'eà'yz xu myter pe nehe. <sup>4</sup> Teko Zuta ywy rehe har wà, Zeruzarez pe har wà no, peruzar peze'eg awer herehe we penemiapo katu kwer nehe. Aiko Tupàn Tuweharupi Wiko Ma'e romo. Pezemur katu tuwe ihewe pep'y'a nànàn nehe. Aze nan kwaw nehe, hekwahy haw ukaz putar tata ài nehe. Pezapo ikatu 'ym ma'e tetea'u. A'e rupi hepuruzukaiw haw nuzawy kwaw tata nehe. Ni amo nupuner kwaw imuwe haw rehe wà nehe.

*Tupàn werur putar iaiw paw kwarahy heixe haw awyze har kutyr har wi nehe*

<sup>5</sup> Pezupy xi'äm ma'e'ak kwer iapo pyrer ywy nànàn nehe.

Pehapukazahy peze'eg imume'u katu pà nehe.

Pemume'u ko ze'eg teko Zuta ywy rehe har wanupe nehe, Zeruzarez tawhu pe har wanupe nehe no.

— Pezàwehem tawhu pàrirogawtâtà ma'e pupe pezepyro pà nehe.

<sup>6</sup> Pexak kar Xiàw piar purupe nehe.

Pezàn pezeàmim àwàm me nehe.

Pezàn na'arewahy nehe.

Tupàn werur putar iaiw paw kwarahy heixe haw awyze har kutyr har wi nehe.

Werur putar ma'e tetea'u imumaw paw a'e wi nehe no.

<sup>7</sup> Teko waiwy imumaw har ur iko.

Nuzawy kwaw zàwàruhu iriàw uker haw wi uhem ma'e kwer.

Umumaw putar teko Zuta ywy rehe har wà nehe.

Weityk putar tawhu Zuta ywy rehe har wà nehe.

Ni amo nuiko kwaw a'e tawhu wapupe wà nehe.

<sup>8</sup> A'e rupi, pemunehew ma'eryru pàn iànàm ma'e iapo  
pyrer nehe, pezemumikahy haw pexak kar putar  
nehe.

Pemume'uahy pezemumikahy haw pezai'o pà nehe.

Ta'e Tupàn ikwahy haw tata zàwenugar nuhem kwaw  
Zuta piar wi xe.

<sup>9</sup> Uze'eg Tupàn Tuweharupi Wiko Ma'e kury.

— A'e 'ar mehe tuwhiwete a'e wà nehe, amo tuwhiwaw  
a'e wà nehe no, wakàgaw uhem putar wanuwi nehe.  
Xaxeto uzemumikahy putar wà nehe. Heze'eg imume'u  
har ipytuhegatu putar wà nehe, i'i ihewe.

<sup>10</sup> Na'e aze'eg izupe kury.

— O Tupàn Tuweharupi Wiko Ma'e, neremu'em tuwe  
teko Zeruzarez pe har wanupe. — Heta putar zeàmà-  
tyry'ym 'ymaw nehe, ere mua'u wanupe. Heta takihep-  
uku wa'az rehe uzekok ma'e.

<sup>11</sup> Eremume'u putar ma'e teko Zeruzarez pe har wà  
nehe. Uhem imume'u haw i'ar iko. — Ywyxiguhu rehe  
amo ywytu hakuahy ma'e ur putar neremiaihu wanupe  
nehe. Nan kwaw ywytu ikàg 'ym ma'e arozràn iapirer  
wi henuhemar a'e. <sup>12</sup> Ywytu neremimur ràm iaiw putar  
nehe. Ko 'ar rehe ne ae eremume'u neremiaihu wanehe  
nezepyk àwàm iko no, a'e izupe.

### *Zuta waàmàtyry'ymar ur waiko wakutyr wà*

<sup>13</sup> Aze'eg Zuta ywy rehe har wanupe kury. —  
Peme'egatu nehe. Peàmàtyry'ymar ur waiko ywàkun ài  
wà. Wama'e ywyramawa nuzawy kwaw ywytuaiw wà.  
Waneimaw kawaru iàkwen wera'u wiràhu wanuwi wà.  
Zanezuka putar wà nehe. Zanemumaw putar wà nehe.

<sup>14</sup> Zeruzarez, emukatu ikatu 'ymaw nepy'a pe har nehe. Nezewé nepyro putar nehe. Mâràn kwarahy eremumaw ikatu 'ymaw rehe nema'enukwaw pà nehe.

<sup>15</sup> Nà izuapyapyr umur kar uze'eg herur har wà. Eparai izuapyapyr ywytyr rehe wiko ma'e umur kar uze'eg herur har wà no. Uzeapo ma'e kwer iro ma'e umume'u zanewe wà. Zauxiapekwer tetea'u wixe kwez waiwy rehe wà kury.

<sup>16</sup> — Peho teko ywy nànànar wanupe Zeruzarez tawhu pe har wanupe nehe, ko ze'eg imume'u pà wanupe nehe. — Zaneàmàtyry'ymar ur waiko ywy muite har wi wà. Uzàmàtyry'ym putar tawhu Zuta ywy rehe har wà nehe, uhapukaz pà wà nehe. <sup>17</sup> Umàmàn putar Zeruzarez izywyr wà nehe. Nuzawy kwaw awa ma'etymaw rehe uzekaiw ma'e wà. Ta'e zapytu'u Tupàn heruzar ire zane xe.

<sup>18</sup> — Zuta, ne ae eremur kar a'e iaiw haw nezeupe ne. Ta'e ereiko ikatu 'ym ma'e romo ne xe. Erezapo iaiw ma'e. Neremiapo kwer werur ko ma'erahy newe. Ùkutuk nepy'a. Ihe Tupàn Tuweharupi Wiko Ma'e aiko ko ma'e imume'u har romo ihe, i'i Tupàn.

### *Zeremi uzemumikahy teko wanehe*

<sup>19</sup> Hahy ihewe.

Napuner kwaw agwer ma'erahy ipuraraw haw rehe.  
Uhua'u.

A, hepy'a.

Hepy'a unununukahy iko.

Napuner kwaw heze'eg 'ymaw rehe.

Ta'e ainu xi'am ma'e'ak kwer iapo pyrer ihe xe. Aenu zauxiapekwer zeàmàtyry'ymawhu pe oho ma'e wanehapukaz mehe ihe wà.

<sup>20</sup> Iaiw haw tetea'u ur.

Ummumaw ywy paw rupi wà.

Na'arewahy umumaw zanerekohaw tòpuzràn wà.

Umu'i pàntòpuz pupe imuzaikaw pyrer wà.

<sup>21</sup> Màràn zahy amumaw putar pàn zaneàmàtyry'ymar her hereko har hexak pà nehe.

Màràn 'ar amumaw putar xi'äm ma'e'ak kwer iapo pyrer ipy haw henu pà zeàmàtyry'ymawhu pe nehe.

<sup>22</sup> Uze'eg Tupàn kury.

— Heremiaihu he'o wà.

Nahekaww kwaw wà.

Nuzawy kwaw kwarer iranaiwahy ma'e wà.

Nukwaw kwaw ma'e wà.

Ukwaw katu ikatu 'ym ma'e iapo haw wà.

Nukwaw kwaw ikatu ma'e iapo haw wà, i'i Tupàn.

### *Teko wamumaw pàwàm*

<sup>23</sup> Na'e ame'e kury.

Naheta kwaw ma'e iapo katu haw ywy rehe. Naheta kwaw wikuwe ma'e wà no.

Naheta kwaw tatain ywak rehe.

<sup>24</sup> Ame'e ywytyruhu wanehe.

Uryryryryrz waiko wà.

Ywytyr uzeapawypawyw kwe rupi wà, ko rupi wà.

<sup>25</sup> Aexak teko waneta 'ymaw ihe.

Te wiràmìri uwewe oho wà.

<sup>26</sup> Ywy ikatu ma'e uzeapo ywyxiguhu romo. Aexak izeapo awer.

Tupàn weityk tawhu wà.

Ta'e wikwahy wera'u a'e xe. Aexak waneityk awer.

<sup>27</sup> — Ywy paw uzeapo putar ywyxiguhu romo nehe, i'i Tupàn.

Nezewe rehe we numumaw kwaw paw rupi nehe.

<sup>28</sup> Ywy uzai'o putar nehe.

Ywak ipihun putar nehe no.

Ta'e Tupàn uze'eg a'e xe.

Numume'u kwaw amo ae wemiapo ràm nehe.

Umume'u a'e ma'e.

Nuzewyr kwaw izuwi nehe.

<sup>29</sup> Kawaru wànoànogaw henu mehe wà nehe,  
u'yw pupe puruzywà haw henu mehe wà nehe,  
paw rupi uhem putar uzàn pà wà nehe.  
Amo uzàwehem putar oho ka'a pe wà nehe.  
Amo uzeupir putar itahu rehe wà nehe.  
Tawhu paw upyta putar teko heta 'ym pà wà nehe.  
Ni amo nuiko kwaw wapupe wà nehe.

<sup>30</sup> Zeruzarez, Tupàn umume'u nerehe uzepykaw a'e.  
Màràzàwe tuwe eremunehew kamir ipiràg ma'e.  
Màràzàwe tuwe eremunehew ita hekuzar katu ma'e.  
Màràzàwe tuwe eremupinim nereha.  
Nerekö wer ipuràg eteahy ma'e romo.  
Nezewe rehe we nepuhe oho ma'e kwer upuir newi wà.  
Ipuruzuka wer nerehe wà kury.  
<sup>31</sup> Aenu amo heiheihem mehe ihe.  
Nuzawy kwaw kuzà imemyr zexak kar ma'e.  
Heiheihem kuzà umemyr ipy imuzexak kar har ài.  
Zeruzarez a'e heiheihem ma'e romo hekon a'e.  
Zawaiw katu ipytuhemaw izupe kury.  
Upyho opo uez'eg pà.  
— Àmàno putar kury.  
Ur waiko hezuka pà wà kury, i'i uezupe.

## 5

*Zeruzarez pe har ikatu 'ymaw*

<sup>1</sup> Zeruzarez pe har wà. Peho nahu rupi nehe.  
Peme'e ma'e tawhu pupe har paw wanehe nehe.  
Pexak ma'e peneha pupe nehe.  
Pekar teko ikatu pe har wà nehe.  
Aipo pepuner amo ikatu ma'e iapo har hexakaw rehe.  
Aipo pepuner pitài ikatu ma'e iapo pà uezagaw ma'e  
hexakaw rehe.

Aze pexak pitài nehe, Tupàn umunàn putar Zeruzarez  
wanemiapo kwer wanehe uzepyk 'ym pà nehe.

<sup>2</sup> Pemume'uhay penemiapo ràm Tupàn Tuweharupi Wiko  
Ma'e her rehe.

Nezewe rehe we penemu'e.

<sup>3</sup> Tupàn uputar pezeruzar ire pepytu'u 'ymaw a'e.

Uzepyk penehe.

Nezewe rehe we napezekaiw kwaw hehe.

Pekamikamik a'e.

Nezewe rehe we napekwaw kwaw ikatu 'ymaw wi  
petyrykaw.

Pezàmàtyry'ym heruzar 'ym pà. Napezewyr wer kwaw  
izupe.

<sup>4</sup> Na'e aze'eg hezeupe.

— Xo ma'e kwaw 'ymar zo wiko nezewe wà.

Nukwaw katu kwaw ma'e wà.

Nukwaw kwaw Tupàn Tuweharupi Wiko Ma'e hemimutar  
wà.

Nukwaw kwaw uzar hemiapo putar haw wà.

<sup>5</sup> Aekar putar awa upuner ma'e ihe wà kury.

Aze'eg putar wanupe nehe.

Azeharomoete ukwaw Tupàn Tuweharupi Wiko Ma'e  
hemiapo putar haw wà.

Ukwaw uzar hemiapo kar haw wà, a'e hezeupe.

Nezewe rehe we paw rupi weityk Tupàn teko wazar heko  
haw wà.

Na'ipureruzar wer kwaw hehe wà.

<sup>6</sup> A'e rupi zàwàruhu iriàw ka'a pe har uzuka putar a'e awa  
a'e wà nehe.

Awarahu ywyxiguhu pe har upei'ài'àg putar wà nehe.

Zàwàrun uzeàmim putar wà nehe, tawhu a'e awa waneko  
haw iàmàtyry'ym pà wà nehe.

Aze uhem tawhu wi wà nehe, upei'ài'àg putar wà nehe.

Ta'e wanemiapo kwer ikatu 'ym ma'e heta tetea'u wà xe.

Tuweharupi weityk Tupàn wà no.

<sup>7</sup> Tupàn upuranu kury.

— Mâràzàwè tuwe amunàn putar heremaiihu wanemiapo  
kwer ikatu 'ym ma'e ihe.

Hhereityk a'e wà.

Umume'uahy wemiapo ràm tupàn a'ua'u waner rehe wà.  
Azeharomoete a'e tupàn nuiko kwaw tupànete  
romo wà.

Amono temi'u heremaiihu wanupe ihe.

Uhyk wanupe.

Nezewé rehe we nuzawy kwaw wemireko 'ym puhe oho  
ma'e wà.

Umumaw u'ar kuzà wyzài wanehe we wà.

<sup>8</sup> Nuzawy kwaw kawaru ma'e tetea'u i'u har wà.

Iho wer tuwe amo ipuhe wà.

Pitàitaigatu oho uzeake har hemireko hekar pà wà.

<sup>9</sup> Aipo napuraraw kar kwaw ma'erahy wanupe agwer ma'e  
hekuzaromo nehe.

Aipo nazepyk kwaw agwer teko wanehe nehe.

<sup>10</sup> Aze'eg putar waàmàtyry'ymar wanupe nehe.

— Peityk wanemitygwer ma'ywa tyw nehe, a'e putar  
wanupe nehe.

Nezewé rehe we namumaw kar kwaw paw rupi nehe.

— Pezo'ok a'e ma'ywa 'yw ywy wi nehe, a'e putar wanupe  
nehe.

Ta'e nuiko kwaw hema'e romo a'e wà xe.

<sup>11</sup> Teko Zuta ywy rehe har a'e wà, Teko Izaew ywy rehe har  
a'e wà no,

hereityk wà, amo hekar pà uzar romo wà.

Ihe Tupàn Tuweharupi Wiko Ma'e aze'eg kwez kury.

### *Tupàn weityk Izaew wà*

<sup>12</sup> — Tupàn Tuweharupi Wiko Ma'e hemu'em urewe a'e,  
i'i Tupàn Tuweharupi Wiko Ma'e pe wà.

— Tupàn Tuweharupi Wiko Ma'e nuzapo kwaw ma'e a'e nehe. Ni amo ikatu 'ym ma'e nuzeapo kwaw zanewe nehe. Naheta kwaw zeàmàtyry'ymawhu nehe. Naheta kwaw ma'uhez haw nehe, i'i uezupeupe wà.

<sup>13-14</sup> — Tupàn ze'eg imume'u har nuzawy kwaw ywytu wà. Numume'u kwaw Tupàn ze'eg purupe wà, i'i teko wà. Tupàn Tuweharupi Wiko Ma'e Upuner Wera'u Ma'e uez'eg ihewe.

— Zeremi, i'i ihewe. — Amume'u putar 'aw teko wanupe uezapo ma'e ràm ihe nehe kury, ta'e umume'u a'e ma'e a'e wà xe. Amuhem kar putar heze'eg nezuru wi tata àì ihe nehe, Zeremi. 'Aw teko wiko putar zepe'aw àì wà nehe. Tata ukaz putar wamumaw pà nehe, i'i ihewe.

<sup>15</sup> Peinu katu Tupàn Tuweharupi Wiko Ma'e ize'eg nehe kury, teko Izaew izuapyapyr wà.

— Ihe Tupàn Tuweharupi Wiko Ma'e ihe, arur putar teko amo ywy muite har rehe har xe ihe wà nehe. Peàmàtyry'ym putar wà nehe. Ikàg a'e wà. Kwehe mehe ikàg wà. Napekwaw kwaw waze'eg. Peinu katu waze'eg mehe, napekwaw kwaw nehe. <sup>16</sup> Zauxiapekwer a'e ywy rehe har ipuruzukaiwahy wà. Uzywà teko u'yw pupe wazuka pà wapuhareko 'ym pà wà. <sup>17</sup> U'u putar arozràn penemipo'o kwer wà nehe. U'u putar penemi'u ràm wà nehe no. Uzuka putar pena'yr wà nehe. Uzuka putar penazyr wà nehe no. U'u putar peneimaw àràpuhàràñ imono'og pyrer wà nehe. U'u putar peneimaw tapi'ak wà nehe no. U'u putar ma'ywa i'a kwer uwà penemitygwer wà nehe, pi 'yw i'a kwer wà nehe no. Zauxiapekwer weityk putar tawhu pàrirogawtâtà ma'e pupe uzepyro ma'e wanuwi nehe. Pezeruzar e a'e tawhu rehe. Úmumaw putar wà nehe.

<sup>18</sup> Nezewe rehe we ihe Tupàn Tuweharupi Wiko Ma'e amume'u ko ma'e ihe kury.

— A'e 'ar mehe namumaw kar kwaw heremaihu paw rupi ihe wà nehe. <sup>19</sup> Teko upuranu putar nerehe wà nehe.

— Màràzàwe tuwe Tupàn uzapo a'e ma'e paw a'e, i'i putar newe wà nehe. Eze'eg nezewé wanupe a'e 'ar mehe nehe, Zeremi. — Peityk Tupàn pe. Pemuwete tupàn amo ywy rehe har ko ywy rehe wanerur ire. Ko 'ar rehe pema'erekò putar amo ae ywy rehe har wanupe nehe. Nuiko kwaw peywy rehe har romo wà, ere wanupe nehe, i'i Tupàn.

### *Tupàn umumuranu wemiaihu wà*

<sup>20</sup> Uze'eg wi Tupàn.

— Emume'u ko ma'e Zako izuapyapyr wanupe nehe, Zuta ywy rehe har wanupe nehe no. <sup>21</sup> — Pezekaiw katu ko ze'eg rehe nehe, teko iranaiwahy ma'e wà, teko ma'e kwaw par 'ym wà. Heta peneha peme. Napeixak kwaw ma'e. Heta peapyakwar peme no. Napeinu kwaw ma'e. <sup>22</sup> Aiko Tupàn Tuweharupi Wiko Ma'e romo ihe. Mâràzàwe tuwe napekyze kwaw ihewi. Mâràzàwe tuwe naperyryryryz kwaw herenataromo. Ihe amono ywyx-iguhu ywyzaw romo yryhu rehe ihe. Nupuner pixik kwaw hahaw paw rehe. Wikwahy yryhu. Nezewé rehe we nupuner kwaw hahaw paw rehe. 'Ykotok tyapu. Nuhem kwaw a'e wi wà. <sup>23</sup> Peiko teko hereruzar 'ymar romo heremiaipo putar haw iapo 'ymar romo. Heàmàtyry'ym pe kury hereityk pà. <sup>24</sup> — Zakyze Tupàn Tuweharupi Wiko Ma'e Zanezar wi nehe, napeze kwaw ihewe pep'y'a pupe. — Umugyr kar àmàn 'ar ikatu ma'e rehe, arozràn ipo'o re, ipo'o zanune no. Kwarahy nànàn werur ma'e ipo'o haw 'ar zanewe. Nezewé rehe we — Tuwe zakyze izuwi nehe, napeze kwaw izupe. <sup>25</sup> Penemiaipo kwer ikatu 'ym ma'e a'e, peaiw haw a'e, umunyryk kar a'e ikatu ma'e pewi a'e. Napepuner kwaw a'e katu haw ipyhykaw rehe.

<sup>26</sup> Heta awa ikatu 'ym ma'e heremiaihu wainuinuromo wà. Nuzawy kwaw teko wiràmiri pyhykaw iapo har wà. Nupyhyk kwaw wiràmiri wà. Upyhyk teko wà. <sup>27</sup> Pexak amo wiràmiri wamunehew paw tynehem ma'e. Nezewegatete wanàpuz tynehem ma'e pupe. Imunar a'e ma'e rehe paw rupi wà. A'e rupi upuner wà. Hemetarer katu wà no. <sup>28</sup> Ikyra katu wà no. Uhyk wanemi'u wanupe. Wakatu 'ymaw uhua'u. Nupytywà kwaw tu 'ym ma'e wà ihy 'ym ma'e wà no. Nuzeikaiw kwaw hemetarer 'ym ma'e wanehe wà. <sup>29</sup> Azepyk putar wanehe wanemiacpo kwer hekuzaromo nehe. Azepyk putar 'aw teko wanehe nehe. Ihe Tupàn Tuweharupi Wiko Ma'e aiko ko ma'e imume'u har romo ihe.

<sup>30</sup> Amo ma'e iaiw ma'e purumupytuhegatu kar haw uzeapo iko ywy rehe. <sup>31</sup> Heze'eg imume'u har numume'u kwaw ze'eg azeharomoete har waiko wà. Upytywà xaxeto wà. A'e rupi xaxeto wiko teko wanuwiaw romo wà. Nezewe haw ikatu heremiaihu wanupe. Ma'e uzapo putar agwer ma'e izeapo haw ipaw ire wà nehe.

## 6

### *Waàmàtyry'ymar umàmàn Zeruzarez tawhu wà*

<sup>1</sup> Teko Mezàmi izuapyapyr wà, pezàwehem peho Zeruzarez wi pezeàmim àwàm ikatu ma'e pe nehe. Pezupy xi'äm ma'e ak iapo pyrer tawhu Tekoa her ma'e pe nehe. Pemuapyk pàn ze'eg imume'u har Mete-Akerez tawhu pe nehe no. Iaiw paw a'e, ma'e imumaw pawhu a'e no, uhem wà waiko kwarahy heixe haw awyze har kutyr har wi a'e wà kury, i'i a'e pàn rehe har ze'eg. <sup>2</sup> Zeruzarez, tawhu ipuràg eteahy ma'e, teko wamurywete kar har. Nemumaw pàwàm uhem etea'i iko kury. <sup>3</sup> Tuwihawete upytu'u putar zauxiapekwer tetea'u wanehe we neruwake wà nehe. Umupu'äm putar uker haw neywyr wà nehe

no. Pitàitìagatu upyta putar wemimutar pe wà nehe.  
<sup>4</sup> Uze'eg putar nezewe wà nehe. — Pezemuàgà'ym tawhu iàmàtyry'ymaw rehe nehe ty wà, i'i putar wà nehe. — Pezemuàgà'ym nehe. Zaha ikutyr kwarahy wapyter pe hin mehe nehe, i'i putar wà nehe. A'e re uze'eg putar nezewe wà nehe. — Upaw etea'i 'ar. Kwarahy wixe etea'i oho. I'ágaw ipukua'u kury. <sup>5</sup> Pezemuàgà'ym nehe. Xiàmàtyry'ym kutàri pyhaw nehe. Ximumaw tåpuztatà ma'e Zeruzarez pe har nehe, i'i putar wà nehe.

<sup>6</sup> Tupàn Tuweharupi Wiko Ma'e Upuner Wera'u Ma'e umume'u ko uze'eg tuwihawete wanupe.

— Pemonohok ywyra tawhu pe pezeupir haw iapo pà nehe, Zeruzarez iàmàtyry'ym àwàm rehe pezemuàgà'ym pà nehe, i'i wanupe. Uze'eg wi kury. — Azepyk putar 'aw tawhu rehe ihe nehe, ta'e tynehem puruzuka haw pupe a'e xe, i'i Tupàn. <sup>7</sup> — 'Y uehem ytyzuzàmaw wi a'e. Nezewegatete ikatu 'ym ma'e iapo haw uehem Zeruzarez wi a'e no. Tawhu pupe teko uze'eg puruzuka haw rehe wà, ma'e imumaw paw rehe wà no. Xo ma'eahy haw zo aexak. Purukutukaw, purukixi haw, xo a'e zo aexak. <sup>8</sup> Teko Zeruzarez pe har wà. Tuwe a'e ma'e umume'u uzeapo ma'e ràm ikatu 'ym ma'e peme nehe. Aze napezekaiw kwaw a'e ma'e rehe nehe, apuityk putar ihe nehe. Azapo putar tawhu ywyxiguhu romo ihe nehe, teko heta 'ymaw romo ihe nehe, i'i Tupàn.

*Tupàn uzepyk Izaew wanehe, ta'e uzapo ikatu 'ym ma'e wà*

<sup>9</sup> Tupàn Tuweharupi Wiko Ma'e Upuner Wera'u Ma'e uze'eg ihewe.

— Izaew ywy rehe naheta kwaw ni pitài teko wà nehe. Nuzawy kwaw ma'ywa 'yw i'a kwer mokoz haw ipo'o pyrer nehe. Uma'erekò ma'e omono'og ma'ywa oko pe har a'e.

Nezewegatete erepyro amo teko pe wà nehe, aze erepuner nehe, i'i ihewe.

<sup>10</sup> Awazar ize'eg izupe ihe.

— Mo pe aze'eg putar nehe. Aze aze'eg nehe, ni amo nuzekaiw kwaw heze'eg rehe wà nehe. Upyk wapyakwar wà. Ta'e na'izekaiw wer kwaw hehe wà xe. Na'ipurenu wer kwaw neze'eg rehe wà. Upuka neze'eg rehe wà. <sup>11</sup> O Tupàn Tuweharupi Wiko Ma'e, nekwahy haw wiko hezar romo. Hekene'o nekwahy haw hepupe imonokatu re, a'e izupe. Na'e Tupàn uze'eg ihewe. — Emu'ar kar hekwahy haw kwarer nahu rupi har wanehe nehe, kwàkwàmo wanehe wazemono'og mehe nehe no. Zauxiapekwer weraha putar awa wà nehe, weraha putar wanemireko wà nehe no, ipyhyk pyrer romo wà nehe. Weraha putar tua'uhez ma'e wà nehe no. <sup>12</sup> Amo wiko putar wanàpuz pupe wà nehe. Amo upyhyk putar waiwy wà nehe, wanemireko wà nehe no. Azepyk putar teko ko ywy rehe har wanehe ihe nehe. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>13</sup> Hemetarerer katu ma'e wà, hemetarerer 'ym ma'e wà no, uezagaw temetarer imono'ogaw rehe amo wanehe imunar pà wà. Te heze'eg imume'u har a'e wà no, xaxeto a'e wà no, hemu'em teko wanupe a'e wà. <sup>14</sup> Teko upuraraw ma'erahy wà. Wanuwhaw nuzekaiw kwaw wanemipuraraw rehe wà. — Ikatuahy paw rupi, i'i wà. Azeharomoete paw rupi iaiw. <sup>15</sup> Uzapo ikatu 'ym ma'e wà. Iro a'e ma'e ihewe. Aipo imaranugar iapo re wà. Nan. Na'imaranugar pixik kwaw wà. Nukwaw pixik kwaw imaranugar ma'e romo weko haw wà. A'e rupi u'ar putar amogwer imaranugar 'ym ma'e wazàwe wà nehe. Wanehe hezepyk mehe upuraraw putar ma'erahy wà nehe. Ihe Tupàn Tuweharupi Wiko Ma'e aze'eg kwez kury, i'i Tupàn.

*Izaew na'iata wer kwaw Tupàn rape rupi wà*

<sup>16</sup> Tupàn Tuweharupi Wiko Ma'e uze'eg wemiaihu wanupe kury.

— Pepyta pe za'akaw pe nehe. Pekar pe ikatu wera'u ma'e nehe. Pekwaw pe peho àwàm ikatu wera'u ma'e nehe. Peata a'e pe rupi nehe. Nezewe mehe peiko putar zeàmàtyry'ym 'ymaw rehe nehe, i'i wanupe. Uwazar ize'eg izupe wà. — Nuruata kwaw a'e pe rupi ure nehe, i'i izupe wà.

<sup>17</sup> Tupàn omono kar amo awa a'e wà.

— Pezekaiw xi'äm ma'e'ak iapo pyrer ipy haw rehe nehe, i'i wanupe. Uzekaiw ma'e uze'eg izupe wà. — Nuruzekaiw kwaw ipy haw rehe nehe, i'i izupe wà.

<sup>18</sup> Na'e uze'eg wi Tupàn kury.

— Teko ywy nànànar wà, pezeapyaka katu nehe. Pexak heremaihu wanupe uezapo ma'e ràm nehe. <sup>19</sup> O ywy, einu katu ma'e nehe. Arur putar iaiw paw 'aw teko wanupe nehe. Ikatu nezewe izeapo àwàm, ta'e nuweruzar kwaw heze'eg a'e wà xe. Hepurumu'e haw nuzawy kwaw heityk pyrer wanupe. <sup>20</sup> Werur yhyk zàwenugar hyàkwegatu ma'e Xama parer ihewe wà. Nazekaiw kwaw hehe. Werur ka'a hyàkwegatu ma'e muite arer ihewe wà no. Nazekaiw kwaw hehe. Umur ma'e ihewe wà. Namuawyze kwaw ihe. Uzuka ma'ea'yr herenataromo wà. Nezewe rehe we naherurywete kwaw ihe. <sup>21</sup> Nezewe mehe ihe Tupàn Tuweharupi Wiko Ma'e amuzepyapi kar putar 'aw teko wamu'ar kar pà ihe wà nehe. Kwarer wanu umàno putar wà nehe. Wana'yr umàno putar wà nehe no. Wamyrypar wà nehe no, wanuwake wiko ma'e wà nehe no, i'i Tupàn.

*Waàmàtyry'ymar ur kwarahy heixe haw awyze har kutyr  
wi wà*

<sup>22</sup> Tupàn Tuweharupi Wiko Ma'e uze'eg wi kury.

— Amo teko muite har ur waiko wà. Amo ywy kwarahy heixe haw awyze har kutyr har rehe har romo wanekon

wà. Teko amo ywy rehe har ikàg ma'e uzemuàgà'ym waiko zeàmàtyry'ymawhu rehe wà. <sup>23</sup> Omono'og puruzuka haw wà: ywyrapar, u'yw, takihepuku. Purupe ma'erahy ipuraraw kar e har romo wanekon wà. Nupuruhareko kwaw wà. Ur kawaru ku'az wà. Wànoànogaw nuzawy kwaw yryhu wikwahy ma'e iànoànogaw. Uzemuaàgà'ym kwez Zeruzarez tawhu iàmàtyry'ymaw rehe wà.

<sup>24</sup> Zeruzarez pe har uze'eg nezewe wà. — Urenu wanur haw imume'u haw ure. Na'e urepo ipyw. Urekyze haw wiko urezar romo. Hahy haw wiko kuzà izar romo imemyr zexak kar mehe. Nezewegatete urekyze haw wiko urezar romo. <sup>25</sup> Noroho kwaw katu pe tawhu wi nehe. Nuruata kwaw pe rupi nehe. Ta'e ureàmàtyry'ymar wereko puruzuka haw a'e wà xe. Teko paw ukyzeahy wanuwi wà.

<sup>26</sup> Tupàn uze'eg wemiaihu wanupe.

— Pemunehew ma'eryru pàn iànàgatu ma'e iapo pyrer pezemumikahy haw hexak kar pà nehe. Pezeruwaruwak tanimuk rehe nehe no. Aze pitài zo pena'yr, aze umàno, pezai'oahy. Pezai'o nezewegatete nehe kury. Pezakook penehaykwer iro ma'e nehe. Ta'e ma'e imumaw par peàmàtyry'ym putar na'arewahy nehe xe. <sup>27</sup> Zeremi, eagaw heremiaihu ne wà nehe kury, itatàtà hagaw haw zàwe ne wà nehe kury. Eme'egatu wanehe nehe. Ezeagaw wanemiaipo hexak pà nehe. <sup>28</sup> A'e paw wiko hereruzaraby 'ymar romo wà. Umume'u temu'emaw oho waiko wà. Paw rupi iaiw wà. Tàtìàahy itamorog ài wà, itaper ài wà. <sup>29</sup> Zàpehe hakuahy ma'e nupuner kwaw parat imupyrànaw rehe a'e, ikatu 'ymaw wi imunyryk pà a'e. Nezewegatete namukatu kwaw heremiaihu ihe wà nehe no. Ta'e ikatu 'ym ma'e wiko ikatu ma'e wainuinuromo wà xe. <sup>30</sup> — Parat ikatu 'ym ma'e, i'i putar ikatu 'ym ma'e

wanupe wà nehe. Ta'e ihe Tupàn Tuweharupi Wiko Ma'e aityk ihe wà xe, i'i Tupàn.

## 7

*Zeremi oho Tupàn Hàpuzuhu pe*

<sup>1-3</sup> Tupàn Tuweharupi Wiko Ma'e hemono kar tàpuzuhu hukenaw huwake a'e. Teko Zuta ywy rehe har oho a'e pe tuweharupi Tupàn imuwete katu pà wà. — Epyta a'e pe nehe, i'i ihewe. — Aiko Tupàn Tuweharupi Wiko Ma'e Upuner Wera'u Ma'e Izaew wazar romo ihe. Emume'u heze'eg wanupe nehe. Amuapyk putar a'e ze'eg xe ko pape rehe ihe nehe kury. — Pepytu'u ikatu 'ym ma'e iapo re nehe. Pezapo xo ikatu ma'e zo nehe. Peiko amo ae romo nehe. Aze peruzar ko heze'eg nehe, apumuigo kar wiwi xe nehe. <sup>4</sup> Amo hemu'em peme wà. — Ni amo nazanezuka kwaw wà nehe. Ta'e Tupàn Tuweharupi Wiko Ma'e 'àg tàpuzuhu izar romo hekon a'e xe. Tupàn Tuweharupi Wiko Ma'e 'àg tàpuzuhu izar romo hekon a'e xe. Tupàn Tuweharupi Wiko Ma'e 'àg tàpuzuhu izar romo hekon a'e xe, i'i waiko peme wà. Pezeruzar zo waze'eg rehe nehe, a'e wanupe Tupàn ze'eg imume'u pà teko wanupe. <sup>5</sup> Pepytu'u ikatu 'ym ma'e iapo re nehe. Pepytu'u penemi-apo iapo re nehe. Pepytu'u pema'e rehe pemunamar ire nehe. Pepytu'u pezeupeupe penemu'em ire nehe no. <sup>6</sup> Pepytu'u amo ywy rehe arer wama'e rehe pemunar ire nehe. Pepytu'u tu 'ym ma'e wama'e rehe pemunar ire nehe. Pepytu'u imen umàno ma'e kwer wama'e rehe pemunar ire nehe. Pepytu'u teko ikatu ma'e wazuka re xe nehe. Pepytu'u amo tupàn a'ua'u wamuwete re nehe. Ta'e wamuwete haw pemumaw putar a'e nehe xe. <sup>7</sup> Aze pepytu'u agwer ma'e iapo re nehe, apumuigo kar wiwi xe ko ywy rehe ihe nehe. Izypy mehe amono ko ywy peipy wanupe ihe.

<sup>8</sup> Pezekaiw ko ze'eg rehe nehe. Pezeruzar peiko ze'eg ikatu 'ym ma'e rehe temu'emaw rehe. <sup>9</sup> Pemunar amo wama'e rehe. Pezuka amo pe wà. Peker penemireko 'ym wapuhe, pemen 'ym wapuhe. — Azeharomoete heze'eg, peze penemu'emaw ipyk pà. Pezuka ma'ea'yr Ma'aw henataromo wà. Pemuwete amo tupàn a'ua'u kwehe mehe penemigwaw 'ym wà. <sup>10</sup> Aze naheakatuwawahy kwaw amo ma'e rehe, pezapo a'e ma'e. A'e re pezur herenataromo pepyta pà, heràpuzuhu pupe ihewe peze'eg pà. Nuzeapo kwaw ikatu 'ym ma'e zanewe a'e nehe, peze pezeupeupe. <sup>11</sup> — 'Àg tàpuzuhu uzeapo imunar ma'e wazeàmimaw romo, aipo peze peiko. Aexak penemiapo ihe. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>12</sup> Peho Xiro ywytyr rehe nehe. Kwehe mehe aexaexak Xiro ihe, hemuwete katu haw ipy romo ihe. Heremaihu Izaew iaiw a'e wà. A'e rupi amumaw Xiro ihe. Pexak heremiapo kwer peho nehe. <sup>13</sup> Pezapo a'e ikatu 'ym ma'e heremimume'u kwer paw rupi pe. — Pezapo zo agwer ma'e nehe, a'e tetea'u peme. Nezewe rehe we napepurenu wer kwaw herehe. Penenoz mehe napewazar kwaw heze'eg ihewe. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>14</sup> Pezeruzar 'àg tàpuzuhu rehe. A'e rupi amumaw putar 'àg heràpuzuhu ihe nehe, Xiro imumaw pawer ài ihe nehe. Xiro pe heremiapo kwer azapo wi putar 'àg tàpuzuhu peme peipy wanupe heremimono kwer heremiapo kwer zàwenugar nehe no. <sup>15</sup> Kwehe mehe amono kar hyahy peànàm ywy kwarahy heixe haw awyze har kutyr har herenatar wi ihe wà. Apomono kar hyahy putar herenatar wi nezewegatete ihe nehe no.

### *Teko nuweruzar kwaw wà*

<sup>16</sup> Uze'eg wi Tupàn. — Zeremi. Enoz zo ikatu ma'e 'aw teko wanupe àràm ihewe nehe. — Epytywà ne wà

nehe, ere zo ihewe nehe. — Epyro ne wà nehe, ere zo ihewe nehe. Enoenoz zo ihewe nehe. Ta'e nurenu kwaw ihe nehe xe. <sup>17</sup> Aipo nerexak kwaw tawhu Zuta ywy rehe har wanupe wanemiacpo ne, Zeruzarez tawhu pe har wanupe wanemiacpo ne. <sup>18</sup> Kwarearer omono'og zepe'aw oho wà. Awa umunyk tata wà. Na'e kuzà uzapo tapi'ak tupàn Kuzà Ywak Rehe har Wanuwihawete her ma'e pe wà. Uzakook win amo tupàn a'ua'u wanenataromo wà no. Uzapo agwer ma'e hemuikwahy kar pà wà. <sup>19</sup> Aipo ihe aiko wanemikutuk romo. Nan, a'e newe. Uzekutuk waiko wà. Wiko putar maranugar haw rehe wà nehe no. <sup>20</sup> Nezewe mehe ihe Tupàn Tuweharupi Wiko Ma'e wazar ihe, azakook putar hekwahy haw 'àg tàpuzuhu rehe ihe nehe. Azuhen putar hekwahy haw iaiw ma'e hehe nehe. Amu'ar putar hekwahy haw teko wanehe nehe, ma'ea'yr wanehe nehe no. Te ywyra wanehe te ma'etymaw wanehe amu'ar putar hekwahy haw nehe. Hekwahy haw nuzawy kwaw tata. Ni amo nupuner kwaw imuwekar haw rehe wà nehe.

<sup>21</sup> Amo ihewe imur pyr ukaz paw rupi ma'ea'yr hapy haw rehe wà. Amo ae ma'ea'yr ho'o kwer rehe pepuner i'u haw rehe. Ihe Tupàn Tuweharupi Wiko Ma'e Upunner Wera'u Ma'e Izaew wazar ihe amume'u ko ma'e ihe. Pepuner ma'ea'yr wano'o kwer paw i'u haw rehe. Nazekaiw kwaw penemiacpo rehe kury. <sup>22</sup> Apyro peipy Ezit ywy wi kwehe mehe ihe wà. A'e 'ar mehe naze'eg kwaw ma'ea'yr ukaz paw ma'e wanehe ihe. Naze'eg kwaw amo ma'e ihewe imur pyràm rehe no. <sup>23</sup> Xo pitài ma'e azapo kar wanupe. — Hereruzar pe nehe, a'e wanupe. Nezewe mehe aiko pezar romo ihe. Wiko heremaihu romo wà no. — Pezapo putar heremiacpo kar haw tuweharupi pe nehe. Nezewe mehe penekuwe haw ikatuahy putar peme nehe, a'e wanupe, i'i Tupàn. <sup>24</sup> Nezewe rehe we nuzekaiw kwaw

herehe wà. Nahereruzar kwaw wà. Nan. Aze wapy'a hereruzar 'ymar ikatu 'ym ma'e ipurapo wer amo ma'e rehe, uzapo a'e ma'e wà. Nezewe mehe wanemiacpo ikatu wera'u 'ym ma'e uzapo wà izypy mehe arer wi wà. <sup>25</sup> Peipy Ezit ywy wi wahem ipy arer we te ko 'ar rehe amono kar heremiruze'eg peme ihe, heze'eg imume'u har peme ihe wà. <sup>26</sup> Napezekaiw kwaw wanehe. Naperuzar kwaw wà no. Pezaezarahy wiwi ikatu 'ym ma'e iapo pà. Pezapo wera'u peipy wanuwi pe kury.

<sup>27-28</sup> — Peiko tekó Tupàn heruzar 'ymar romo, ere wanupe nehe. Aiko Tupàn Tuweharupi Wiko Ma'e romo. — Emume'u ureremiacpo kwer ikatu 'ym ma'e urewe nehe, ni'i kwaw a'e tekó ihewe kury. Hemu'em ihewe wà. Nuzeagaw kwaw ikatu ma'e iapo pà wà kury.

*Tupàn uzepyk wanehe ta'e nuweruzar kwaw ize'eg wà xe*

<sup>29</sup> Uze'eg wi Tupàn.

— Pezai'o nehe, tekó Zeruzarez pe har wà.  
Pemonohok pe'aw heityk pà nehe.  
Pemuzàg zegar haw purumuzemumikahy kar haw ywytyr  
apyr nehe.  
Ta'e ihe Tupàn Tuweharupi Wiko Ma'e aikwahy peme ihe  
xe.  
Apuityk kwez ihe kury.

<sup>30</sup> Tekó Zuta ywy rehe har uzapo ma'e wà. A'e ma'e na'ikatu kwaw ihewe. Naheakatuwawahy kwaw tupàn a'ua'u wanehe ihe. Nezewe rehe we umupu'äm tupàn a'ua'u heràpuzuhu pupe wà. Nezewe mehe umuaiw heràpuzuhu wà. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>31</sup> Uzapo ma'ea'yr hapy haw Topet her ma'e ywyàpyznaw Men-Inom her ma'e rehe wà. Uzuka wa'yr wazyr wanehe we a'e pe

wanapy pà tata pupe wà, tupàn a'ua'u wamuwete haw romo wà. Nazapo kar pixik kwaw agwer ma'e wanupe ihe. Nahema'enukwaw pixik kwaw agwer ma'e rehe. <sup>32</sup> A'e rupi uhem putar amo 'ar nehe. A'e 'ar mehe — Topet, ni'i kwaw teko a'e taw pe wà nehe. — Men-Inom ywyàpyznaw, ni'i kwaw izupe wà nehe. — Ywyàpyznaw Puruzuka Awer, i'i putar izupe wà nehe. Uzutym putar teko Topet pe wà néhe, ta'e naheta kwaw amo watymaw wanupe wà nehe xe. <sup>33</sup> Umàno ma'e kwer uzeapo putar wiràmiri wanemi'u romo wà nehe, miar wanemi'u romo wà nehe no. Naheta kwaw wamuzàñ kar har wà nehe. <sup>34</sup> Naheta kwaw teko a'e ywy rehe wà nehe. Amumaw putar wanurywete haw rehe wanehapukaz haw ihe nehe. Teko heiheihem uzereko haw pe urywete haw rehe wà. Amumaw putar waneiheiham haw nehe, tawhu Zuta ywy rehe nehe, Zeruzarez pe nahu rupi nehe no.

## 8

<sup>1</sup> A'e 'ar mehe teko ozo'ok putar tuwihaw umàno ma'e kwer wàkàgwer wamuwà wà nehe:

Tuwihawete wàkàgwer, tuwihaw Zuta ywy rehe har wàkàgwer, xaxeto wàkàgwer, heze'eg imume'u har wàkàgwer, Zeruzarez pe har wàkàgwer.

Ihe Tupàn Tuweharupi Wiko Ma'e aiko ko ma'e imume'u har romo ihe. <sup>2</sup> Umuhàmuhàz putar wàkàgwer ywy rehe kwarahy iwy pe wà nehe, zahy iwy pe wà nehe no, zahytata iwy pe wà nehe no. A'e 'ym mehe a'e umàno ma'e kwer umuwete katu a'e kwarahy, zahy, zahytata wà no. Uma'erekwanupe wà no. Upuranu wanehe wà. Uzamutar katu tuwe wà no. Umuhàmuhàz putar wàkàgwer wà nehe. Ni amo nomono'og kwaw wà nehe. Nuzutym wi kwaw wà nehe. Upyta putar ywy rehe katu pe. Nuzawy kwaw ma'ea'yr hepuxi nehe. <sup>3</sup> Amo a'e teko iaiw ma'e numàno kwaw wà nehe. Amuhàmuhàz putar

ihe wà nehe. Wiko putar ywy nànàn wà nehe. Imàno wer putar zepe wà nehe. — Naherekò wiwi wer kwaw ihe, i'i putar wà nehe. Ihe Tupàn Tuweharupi Wiko Ma'e aze'eg kwez ihe kury.

*Ikatu 'ym ma'e, zepykaw no*

<sup>4</sup> Tupàn Tuweharupi Wiko Ma'e uze'eg wi ihewe. — Emume'u ko heze'eg heremaihu wanupe nehe, i'i ihewe. — Amo u'ar mehe, aipo nupu'am wi kwaw. Aze upiaw, aipo nuzewyr kwaw. <sup>5</sup> Heremaihu wà. Màràzàwe tuwe pewak pekupe hexak kar pà ihewe. Màràzàwe tuwe petyryk ihewi tuweharupi. Penemiawy kwer hete katu peme. Napezewyr wer kwaw ihewe. <sup>6</sup> Azeapyaka katu peze'eg rehe. Napemume'u kwaw azeharomoete har. Ni amo nuzemumikahy kwaw wemiapo kwer ikatu 'ym ma'e rehe wà. — Ma'e ikatu 'ym ma'e azapo ihe, ni'i kwaw amo wà. Pitaitàigatu wata oho wape rupi wà. Nuzawy kwaw kawaru zeàmàtyry'ymawhu pe uzàn ma'e wà. <sup>7</sup> Pykahù wà, hoko wà no, wiriri wà no, ukwaw amo ywy kutyr uwewe haw 'ar wà. Hokoxig ukwaw uzewyr haw 'ar wà no. Pe heremaihu wà, naperuzar kwaw heze'eg peme heremimono kwer.

<sup>8</sup> Màràzàwe tuwe pemume'u penemigwaw katu. — Zaiko ma'e kwaw katu har romo, ta'e xiriko Tupàn Tuweharupi Wiko Ma'e ze'eg zane xe, peze peiko. Màràzàwe tuwe peze'eg e nezewe. Peinu katu ko ma'e nehe. Heze'eg rehe purumu'e ma'e a'e wà, heze'eg pape rehe imuapyk wi mehe uzawy wà. Uzapo heze'eg amo ae ma'e romo wà. Nezewe mehe teko nukwaw kwaw heze'eg azeharomoete har wà. <sup>9</sup> Ma'e kwaw katu har imaranugar putar wà nehe. Upaw putar ima'e kwaw paw wanuwi nehe. Nukwaw kwaw ma'e wà nehe. Weityk heze'eg wà. Aipo wiko ma'e kwaw katu har romo azeharomoete wà. <sup>10</sup> A'e rupi amono putar wanemireko amo awa wanupe ihe wà nehe. Amono

putar waiwy amo ywy zar wanupe nehe no. Ta'e upuner ma'e wà, upuner 'ym ma'e wà no, paw rupi uezagaw temetarer imono'ogaw rehe amo wanehe imunar pà wà xe. Te heze'eg imume'u har wà, xaxeto wà no, paw rupi wiko imunar ma'e romo wà. <sup>11</sup> Wanemiruze'eg upuraraw ma'erahy waiko wà. Nuzekaiw kwaw wanehe wà. — Ikatu paw rupi, i'i mua'u wà. Azeharomoete na'ikatu kwaw. <sup>12</sup> Uzapo ihewe iro ma'e waiko wà. Aipo imaranugar putar agwer ma'e rehe wà nehe. Nan. Na'imaranugar pixik kwaw wà nehe. Nukwaw kwaw umaranugar haw wà. A'e rupi u'ar putar amo wazàwe wà nehe no. Wanehe hezepyk mehe nehe, uzemumikahy putar tuwe wà nehe. Ihe Tupàn Tuweharupi Wiko Ma'e aïko ko ma'e imume'u har romo ihe.

<sup>13</sup> Ma'e tymar omono'og wemitygwer a'e. Nezewegatete heporomono'og wer heremaihu wanehe ihe no. Namono'og kwaw ihe wà nehe. Ta'e nuzawy kwaw ma'ywa 'yw i'a 'ym ma'e a'e wà xe. Nuzawy kwaw ma'ywa uwà i'a 'ym ma'e a'e wà no xe. Te huwer uxinig. A'e rupi apyhyk kar putar waiwy amo ywy rehe har wanupe nehe.

<sup>14</sup> — Màràzàwe tuwe zapytu'u zaiko xe, i'i Tupàn hemiaihu uezhezehé upuranu pà wà. — Zaha ty wà. Zàzàn tawhu pàrirogwtàtà hereko har pupe nehe, a'e pe zanemàno pà nehe. Tupàn Tuweharupi Wiko Ma'e Zanezar umume'u zanerehe uzepyk àwàm zanemàno àwàm a'e. Umur 'y puruzuka ma'e zanewe i'u kar pà. Ta'e xiapo ikatu 'ym ma'e henataromo zane xe.

<sup>15</sup> Xiàro zeàmàtyry'ym 'ymaw zane. Nur kwaw ikatu ma'e. Xo purumukyzeahy kar haw zo ur zanewe. <sup>16</sup> Zaneàmàtyry'ymar wixe Nà tawhu pupe kwez wà kury. Xinu waneimaw kawaru waze'eze'eg mehe wà. Waze'eg mehe ywy paw uryryryryz. Zaneàmàtyry'ymar ur zanema'e paw imumaw pà wà: zaneywy, hehe har paw,

tawhu zanerekohaw, ipupe wiko ma'e wà.

<sup>17</sup> — Peme'egatu nehe, i'i Tupàn Tuweharupi Wiko Ma'e. Amono kar putar mozaiw peinuinuromo ihe wà nehe. Napepuner kwaw waneruze'egaw rehe nehe. Pexi'u putar wà nehe, i'i Tupàn.

*Zeremi uzemumikahy teko wanehe*

<sup>18</sup> Ni amo nupuner kwaw hezemumikahy haw henuhemaw rehe ihewi wà.

Hepy'a ima'eahy.

<sup>19</sup> Pezeapyaka katu nehe. Heremiaihu uhapukaz waiko ko ywy nànàn wà. Aenu wanehapukaz mehe wà.

Nezewe uze'eg waiko wà.

— Aipo Tupàn Tuweharupi Wiko Ma'e nuiko kwaw Xiàw pe kury.

Xiàw pe har wanuwhawete nuiko kwaw a'e pe kury, i'i wà. Wanuwhawete Tupàn Tuweharupi Wiko Ma'e uwazar waze'eg wanuope.

— Màràzàwe tuwe hemuikwahy kar pe tupàn a'ua'u imuweste pà.

Màràzàwe tuwe pemuwete tupàn amo ywy rehe har wà, na'ikatu kwaw wà, i'i Tupàn.

<sup>20</sup> Na'e teko uhapukaz wà.

— Upaw ma'e hezuz haw zahy kury.

Upaw ma'e ipo'o haw 'ar no.

Nezewe rehe we Tupàn nazanepyro kwaw a'e, i'i wà.

<sup>21</sup> Hepy'a nuzawy kwaw ikutuk pyrer a'e.

Ta'e heànàm wiko ikutuk pyrer romo wà xe.

Azai'o hezemumikahy pà.

<sup>22</sup> Aipo naheta kwaw muhàg Zireaz pe kury.

Aipo naheta kwaw muhàg kwaw par a'e pe. Heta.

Màràzàwe tuwe numukatu kar kwaw

heànàm wà.

## 9

<sup>1</sup> Aze mo heàkàg nuzawy iwer yzygwar, ikatu mo ihewe. Nezewe mehe hereha nuzawy iwer mo tehaykwer tetea'u imuhem kar haw.

Nezewe mehe apuner mo hezai'o tetea'u haw rehe, 'aromo, pyhaw, heànàm izuka pyrer wanehe.

<sup>2</sup> Aputar zepe hereko haw ywyxiguhu pe har.

Nezewe mehe mo apuner mo muite hereko haw rehe heànàm wanuwi.

Paw rupi nuzawy kwaw wemireko 'ym puhe oho ma'e wà. Wiko uwihaw izuka haw iputar har uzemono'og ma'e romo wà.

<sup>3</sup> Tuweharupi ipurumume'u wer temu'emaw rehe wà.

Munar haw wiko ko ywy rehe har wanuwhaw romo.

Ze'eg azeharomoete har nuiko kwaw wanuwhaw romo.

Tupàn Tuweharupi Wiko Ma'e uze'eg kury.

— Heremiahu uzapo ikatu 'ym ma'e amo ikatu 'ym ma'e rehe we wà.

Naheputar kwaw wà.

<sup>4</sup> Pitàitàigatu uzemupy'a umyrypar rehe wà.

Ni amo nupuner kwaw uwyywyr rehe uzeruzar haw rehe wà.

Ta'e tywyr paw hemu'em umunar pà Zako ài wà xe.

Paw rupi hemu'em oho waiko umyrypar wanehe wà.

<sup>5</sup> Paw rupi hemu'em wemigwaw wanupe wà.

Ni amo numume'u kwaw ze'eg azeharomoete har wà.

Umu'e wapeku temu'emaw rehe wà.

Uzapò ikatu 'ym ma'e wà. Nuityk kwaw ikatu 'ym ma'e wemiapo wà.

<sup>6</sup> Upuraraw kar ma'erahy tetea'u amo wanupe wà.

Imunar tekotetea'u wama'e rehe wà no.

— 'Aw tekonaheputar kwaw wà, i'i Tupàn.

<sup>7</sup> A'e rupi Tupàn Tuweharupi Wiko Ma'e Upuner Wera'u  
Ma'e uze'eg nezewe.

— Teko umupyràn itatàtakatu 'ymaw henuhem pà izuwi  
wà.

Nezewegatete azo'ok putar ikatu 'ymaw heremaiihu  
wanuwi ihe nehe no.

Agaw putar ihe wà nehe.

Heremaiihu uzapo ikatu 'ym ma'e wà.

Ma'e azapo putar wanupe nehe.

<sup>8</sup> Wapeku nuzawy kwaw u'yw puruzuka haw iapyr hereko  
har wà.

Wazuru umume'u temu'emaw wà.

Pitàitàigatu uze'egatu mua'u uezake har wanupe wà.

Azecharomoete umuàgà'ym miar pyhykaw zàwenugara  
waiko uezake har wanupe wà.

<sup>9</sup> Aipo nazepyk kwaw wanehe agwer wanemiacpo kwer  
hekuzaromo nehe.

Aipo nazepyk kwaw agwer tekowanehe nehe.

Ihe Tupàn Tuweharupi Wiko Ma'e aiko ko ma'e imume'u  
har romo ihe, i'i Tupàn.

<sup>10</sup> Ihe Zeremi aze'eg ihe kury.

— Azai'o putar ywytyruhu rehe nehe.

Azemumikahy putar nehe, ta'e ka'api'i àràpuhàràñ  
wanemi'u uxinig a'e xe.

Ni amo nuwata kwaw hupi wà.

Ni amo nuenu kwaw tapi'ak waze'egaw wà.

Wiràmiri wà, miar wà no, uzàwehem oho a'e wi a'e wà.

<sup>11</sup> Uze'eg Tupàn.

— Azapo putar Zeruzarez ywytyr ita tetea'u iapo pyrer  
romo ihe nehe.

Awarahu wiko putar a'e pe wà nehe.

Tawhu Zuta ywy rehe har uzeapo putar ywyxiguhu romo  
wà nehe no.

Ni amo nuiko kwaw a'e pe wà nehe, i'i Tupàn.

<sup>12</sup> Apuranu ihe.

— O Tupàn Tuweharupi Wiko Ma'e, màràzàwe tuwe ureywy iaiw a'e. Màràzàwe tuwe uxinig ywyxiguhu ài. Màràzàwe tuwe teko nuwahaw kwaw wà. Mo upuner ko ma'e ikwaw paw rehe wà. Aipo eremume'u ko ma'e amo pe. A'e teko upuner putar imume'u haw rehe amogwer wanupe nehe, a'e Tupàn pe hehe hepuranu pà.

<sup>13</sup> Tupàn Tuweharupi Wiko Ma'e uwazar heze'eg ihewe.

— Agwer ma'e uzeapo a'e, ta'e heremaihu weityk hepurumu'e haw wanupe heremimono kwer a'e wà xe. Nahereruzar kwaw wà. Nuzapo kwaw heremiacpo kar haw wà. <sup>14</sup> Nan. Upytu'u hereruzar ire Ma'aw hagapaw imuweste pà wà. Wanu umu'e Ma'aw imuweste haw rehe wà. <sup>15</sup> Ihe Tupàn Tuweharupi Wiko Ma'e Upuner Wera'u Ma'e Izaew wazar ihe azapo putar ma'e ihe nehe. Einu katu nehe. Amono putar ka'a iro ma'e heremaihu wanupe i'u kar pà ihe nehe. Amono putar 'y puruzuka ma'e wanupe nehe no. <sup>16</sup> Amuhàmuhàz putar heremaihu ywy nànànar wainuinuromo ihe wà nehe.

Ni a'e ni waipy nukwaw kwaw a'e teko wà. Amur kar putar zauxiapekwer tetea'u heremaihu wakutyr ihe wà nehe. Te umumaw kar putar tuwe wà nehe.

### *Zeruzarez pe har wenoz upytywà haw wà*

<sup>17</sup> Uze'eg Tupàn Tuweharupi Wiko Ma'e Upuner Wera'u Ma'e a'e kury.

— Peinu katu ko heze'eg nehe.

Teko omono temetarer amo kuzà wanupe wà. A'e kuzà uzai'o waànàm wamàno awer rehe wà.

Ukwaw zegar haw uzemumikahy ma'e wà. Penoz a'e kuzà wamuwà pe wà nehe kury, i'i Tupàn.

<sup>18</sup> Uze'eg teko wà.

— Tuwe a'e kuzà ur na'arewahy wà nehe.

Tuwe umuzàg amo zegar haw teko wazemumikahy mehe  
har zanewe wà nehe,  
zanereha imumynehem kar pà tehaykwer pupe wà nehe.  
Tuwe zanereha iàkym zanezai'o tetea'u haw rehe nehe, i'i  
wà.

<sup>19</sup> Peinu teko Xiàw pe har wazai'o mehe pe wà nehe.  
Uze'eg nezewe wà:

— Iaiw zanerekò haw kury.

Zanemaranugarahy zane kury.

Weityk zaneràpuz wà.

Zaha putar zaneywy wi nehe kury, i'i wà.

<sup>20</sup> Aze'eg ihe.

— Kuzà wà, peinu katu Tupàn Tuweharupi Wiko Ma'e  
ize'eg nehe.

Pezekaiw katu ize'eg rehe nehe.

Pemu'e pememyr wazai'o haw rehe pe wà nehe.

Pemu'e pemyrypar zegar haw uzemumikahy ma'e imuzà  
gaw rehe pe wà nehe no.

<sup>21</sup> Mànò haw uzeupir pàrirogaw rupi,

zанерàпуzuhu pupe wixe pà.

Umumaw kwarearer nahu rupi har wà.

Umumaw kwàkwàmo ma'eme'egaw pe har katu pe har wà  
no.

<sup>22</sup> Umànò ma'e kwer wanetekwer u'ar putar wà nehe.

Nuzawy kwaw ma'ea'yr hepuxi kaiwer pe imuhàmuhàz  
pyrer wà nehe.

Nuzawy kwaw haryw ipo'o har wapo wi u'ar ma'e kwer wà  
nehe no.

Ni amo nomono'og kwaw a'e haryw wà.

Tupàn umume'u kar a'e ze'eg ihewe a'e, a'e wanupe.

<sup>23</sup> Uze'eg Tupàn Tuweharupi Wiko Ma'e kury.

— Tuwe ma'e kwaw katu har nuiko wera'u kwaw amo wanuwi uma'e kwaw paw rehe nehe. Tuwe ikàg ma'e nuiko wera'u kwaw amo wanuwi ukàgaw rehe nehe. Tuwe hemetarer katu ma'e nuiko wera'u kwaw amo wanuwi wemetarer rehe nehe. <sup>24</sup> Aze amo heko wera'u wer nehe, tuwe wiko wera'u hekwaw paw rehe nehe, hekwaw katu haw rehe nehe. Ta'e ihe Tupàn Tuweharupi Wiko Ma'e aiko puruamutar haw izar romo ihe xe. Azapo ikatu ma'e. Nazapo kwaw ikatu 'ym ma'e ywy rehe. Agwer ma'e ikatu ihewe. Ihe Tupàn Tuweharupi Wiko Ma'e aze'eg kwez kury, i'i Tupàn.

<sup>25-26</sup> Uze'eg wi Tupàn a'e.

— Uhem purehe hezepyk àwàm 'ar iko: Ezit ywy rehe har wà, Zuta ywy rehe har wà, Enom ywy rehe har wà, Amon ywy rehe har wà, Moaw ywy rehe har wà, ywyxiguhu rehe har 'aw ipinar wà. Wanehe paw azepyk putar nehe. A'e teko paw omonohok kwarer wapirera'i wà. Nezewe rehe we nuweruzar kwaw uze'eg pirer monohokaw inuromo har wà. A'e teko paw wà, teko Izaew izuapyapyr paw wà no, uzapokatu uze'egaw herehe we wà. Nuzapo kwaw ma'e a'e uze'eg rupi wà, i'i a'e.

## 10

*Tupàn a'ua'u wamuwete haw, Tupànete imuwete haw no*

<sup>1</sup> Teko Izaew izuapyapyr wà. Peinu Tupàn Tuweharupi Wiko Ma'e ze'eg peme imur pyrer nehe kury. <sup>2</sup> — Pezapo zo amo ywy rehe har wanemiaipo nehe.

Ipytuhegatu ma'e hexak pyr 'ym  
ywak rehe izexak kar mehe wà.

Pepytuhegatu zo hexak mehe nehe.

<sup>3</sup> Watupàn wamuwete haw nuzawy kwaw heityk pyrer.  
Omonohok ywyra ka'a pe wà.

Na'e ipuràg ma'e iapo har upyhyk utakihe inugwer iapo  
haw rehe we. Na'e ukixikixi a'e ywyra tupàn  
a'ua'u iapo pà.

<sup>4</sup> Na'e umupuràg parat pupe or pupe.

Umupu'ágatu itaxu pupe.

Nezewe tupàn a'ua'u nuzepei'ài'ág kwaw.

<sup>5</sup> Agwer tupàn a'ua'u nupuner kwaw uze'egaw rehe wà.  
Nuzawy kwaw awa hagapaw wiràmiri imukuhem kar har  
pipin hezuz haw rehe har wà.

Teko upir heraha pà wà, ta'e nupuner kwaw wata haw  
rehe wà xe.

Pekye zo wanuwi nehe.

Nupuner kwaw ikatu 'ym ma'e iapo haw rehe wà.

Nupuner kwaw ikatu ma'e iapo haw rehe wà no, i'i Tupàn.

<sup>6</sup> O Tupàn Tuweharupi Wiko Ma'e. Naheta kwaw amo  
nezewe nugar wà.

Nekàga'u no.

Nerer upuner wera'u no.

<sup>7</sup> Mo nuzeruze'eg kwaw nerehe wà nehe,  
o ywy nànànar wanuwiwahete.

Tuwe teko paw uzeruze'egatu nerehe wà nehe.

Naheta kwaw amo ma'e kwaw katu har  
nezàwenugar ywy nànànar wà.

<sup>8</sup> Ma'e kwaw katu har ywy nànànar wiko ma'e kwaw 'ymar  
romo wà.

Iranaiwahy paw rupi wà. Aipo tupàn a'ua'u ywyra iapo  
pyrer upuner wamu'e haw rehe amo ma'e rehe wà.

<sup>9</sup> Umupuràg a'e tupàn a'ua'u parat Epàn ywy wi herur  
pyrer pupe wà, itazu or Upaz ywy wi herur pyrer  
pupe wà no.

Xo ipuràg ma'e iapo har uzapo a'e ma'erekò haw wà.

Umunehew hopoz ipiràg wewer ma'e wanehe wà.  
Umunehew hopoz ipiràg ma'e wanehe wà no.

Pàn iapo haw ikwaw katu har uzapo hopoz wà.

<sup>10</sup> Tupàn Tuweharupi Wiko Ma'e wiko Tupàn Azeharo-moete har romo a'e.

Wiko Tupàn Wikuwe Ma'e romo, Umàno 'Ym Ma'e romo no.

Tupàn Tuweharupi Wiko Ma'e ikwahy mehe ywy uryryryryrz a'e.

Teko ywy rehe har nupuner kwaw ikwahy haw rehe wà.

<sup>11</sup> Peze'eg nezewe teko ywy rehe har wanupe nehe.

— Tupàn umumaw putar

tupàn ywy iapo 'ymar wà nehe, ywak iapo 'ymar wà nehe.

Ukàzym putar ywy wi paw rupi wà nehe.

### *Zegar haw Tupàn imuweste haw*

<sup>12</sup> Tupàn Tuweharupi Wiko Ma'e uzapo ywy upuner haw rupi.

Uma'e kwaw katu haw pupe uzapo ywy paw rupi.

Uma'e kwaw paw pupe upupirar ywak pàn teko izewàñaw ài.

<sup>13</sup> Aze Tupàn uze'eg,

'y ywak rehe har okororo zàwàruhu ài.

Umuzeupir kar ywàkun ywy iahykaw rehe.

Uzapo àmàn iweraw paw.

Umuhem kar ywytu imonokatu haw wi.

<sup>14</sup> Henataromo teko paw wiko iranaiw ma'e romo wà, ma'e kwaw par 'ym romo wà.

Ipuràg ma'e iapo har paw imaranugar wemiapo kwer tupàn a'ua'u wanehe wà.

Ta'e nuiko kwaw Tupàn azeharomoete har romo wà xe.

Nuikuwe kwaw wà.

<sup>15</sup> Heityk pyràm romo wanekon wà. Wiko purupe temu'emaw romo wà.

Tupàn Tuweharupi Wiko Ma'e ur putar wanehe uzepyk pà nehe. A'e 'ar mehe umumaw putar a'e tupàn a'ua'u a'e wà nehe.

<sup>16</sup> Tupàn Zako izar nuiko kwaw wazàwe a'e.

A'e ae uzapo ma'e paw rupi a'e.

Wexaexak Izaew izuapyapyr wemiaihu romo wamuigo kar  
pà a'e.

Tupàn Tuweharupi Wiko Ma'e Upuner Wera'u Ma'e her  
romo a'e.

*Tupàn omono kar hyahy teko waiwy wi wà*

<sup>17</sup> Zeruzarez pe har wà, peàmàtyry'ymar umàmàn  
tawhu peneko haw izywyr a'e wà kury.

Pemono'og pema'e peata àwàm rehe har nehe.

<sup>18</sup> Ta'e Tupàn Tuweharupi Wiko Ma'e  
pemuhem kar putar ko ywy wi a'e nehe xe.

Nezewe mehe pezypyrog putar ma'e ikwaw pà nehe.

Ihe Tupàn Tuweharupi Wiko Ma'e aiko ko ma'e imume'u  
har romo ihe.

<sup>19</sup> Teko Zeruzarez pe har uhapukaz wà.

— Urekutuk urekixi pà wà, urumàno etea'i kury, i'i wà.

— Urekixi awer na'ike'e wer kwaw.

— Urupuner agwer ma'e rehe nehe, uru'e zepe. Nu-  
rupuner kwaw.

<sup>20</sup> Umumaw putar ureràpuzràn wà nehe.

Ureràpuzràn ihàm ohok a'e.

Urera'yr uhem oho wà.

Paw rupi oho xe wi wà.

Nupyta kwaw teko ureràpuzràn imupu'àm wi àràm wà.

Naheta kwaw amo pànuhu imuzaiko àràm wà no, i'i wà.

<sup>21</sup> Awazar waze'eg wanupe ihe.

— Tuwihaw wiko iranaiw ma'e romo wà.

— Exak kar urerape ràm urewe nehe, ni'i kwaw Tupàn pe  
wà.

A'e rupi u'ar wà.

A'e rupi zauxiapekwer umuhàmuhàz zaneànàm a'e wà no.

<sup>22</sup> Pezeapyaka katu nehe. Uhem ze'eg herur pyrer kwez kury.

Teko amo ywy kwarahy heixe haw awyze har kutyr har uzemuàgà'y mahy waiko amo ma'e rehe wà.

Zauxiapekwer a'e wi ur ma'e ràm uzapo putar tawhu Zuta ywy rehe har ywyxiguhu romo a'e wà nehe, awarahu waneko haw romo a'e wà nehe, a'e wanupe.

*Zeremi uze'eg Tupàn pe teko wanehe a'e*

<sup>23</sup> O Tupàn Tuweharupi Wiko Ma'e. Akwaw ko ma'e ihe. Teko nuiko kwaw weko àwàm izar romo wà. Ni amo nupuner kwaw ma'e weko àwàm rehe imuzeapo kar haw rehe wà.

<sup>24</sup> O Tupàn Tuweharupi Wiko Ma'e, emu'e ureànàm ne wà nehe.

Ezepykahy zo wanehe nehe.

Ezepyk zo urerehe nekwahy mehe nehe.

Aze mo erezepyk urerehe nekwahy mehe, urenumaw pe mo paw rupi.

<sup>25</sup> Ezakook nekwahy haw ywy nànànar nemuwete 'ymar wanehe nehe, teko nereitykar wanehe nehe.

Ta'e urezuka a'e wà xe.

Uruiko Zako izuapyapyr romo ure.

Umumaw urewyw y wà no.

*Zeremi, ze'egaw iapo katu pyrer no*

<sup>1</sup> Tupàn Tuweharupi Wiko Ma'e uze'eg ihewe. <sup>2</sup> — Ezekaiw katu ko ze'egaw iapo katu pyrer rehe nehe. Emume'u ko ze'eg teko Zuta ywy rehe har wanupe nehe, Zeruzarez tawhu pe har wanupe nehe no. <sup>3</sup> — Ihe Tupàn Tuweharupi Wiko Ma'e Izaew wazar ihe, amono putar heze'egaiw wyzai teko wanehe ihe nehe, aze a'e teko nuweruzar kwaw ko ze'egaw iapo katu pyrer wà nehe. <sup>4</sup> Ko

ze'egaw nuzawy kwaw waipy wanehe we heze'egaw iapo katu haw a'e. Azapokatu a'e heze'egaw wanehe we Ezit ywy wi wamuhem kar mehe ihe. A'e ywy nuzawy kwaw tatahu wanupe. Nezewe aze'eg wanupe.

— Aze hereruzar pe nehe, aze pezapo heremiapo kar haw paw rupi nehe, peiko putar heremaihu romo nehe, aiko putar pezar romo ihe nehe no.<sup>5</sup> Nezewe mehe azapo putar ma'e heze'eg peipy wanupe heremimume'u kwer rupi katete ihe nehe. Amume'u ywy ikatu ma'e, ma'e tetea'u imuezuz kar har wanupe. Peiko a'e ywy rehe ko 'ar rehe kury, ere wanupe nehe, i'i ihewe. Aze'eg izupe kury. — Azeharomoete, o Tupàn Tuweharupi Wiko Ma'e.

<sup>6</sup> Na'e Tupàn uze'eg wi kury.

— Echo tawhu Zuta ywy rehe har nànàn nehe, Zeruzarez tawhu rupi nahu rupi nehe no, heze'eg imume'u pà nehe. — Peinu ze'egaw iapo katu pyrer nehe. Peruzar nehe, ere wanupe nehe.<sup>7</sup> Waipy Ezit ywy wi wapyro mehe aruzar kar heze'eg wanupe. A'e 'ar henataromo te ko 'ar rehe aze'eg nezewe tekoh heremaihu wanupe.<sup>8</sup> Nuenu kwaw wà. Nuweruzar kwaw heze'eg wà. Pitàitàigatu wiko wiwi hereruzar 'ymar romo wà, ikatu 'ym ma'e romo wà. — Pezapo ma'e heze'egaw penehe we iapo katu pyrer rupi katete nehe, a'e wanupe. Na'ipureruzar wer kwaw hehe wà. A'e rupi azepyk wanehe zepykaw a'e ze'egaw rehe imuapyk pyrer paw pupe ihe.

<sup>9</sup> Tupàn Tuweharupi Wiko Ma'e umume'u wi ko ma'e ihewe. Teko Zuta ywy rehe har wà, Zeruzarez tawhu pe har wà no, upytu'u hereruzar ire heàmàtyry'ym pà wà kury. <sup>10</sup> Uzewyr uwipy wanemiapo kwer pe wà. Na'ipurapo wer kwaw heremiapo kar awer rehe wà. Umuwete amo tupàn oho waiko wà. Teko Izaew ywy rehe har wà, Zuta ywy rehe har wà no, uzuhaw ze'egaw uwipy wanehe we heremiapo katu kwer wà.<sup>11</sup> A'e rupi

ihe Tupàn Tuweharupi Wiko Ma'e ihe, amume'u ma'e kwez kury. U'ar putar amo iaiw paw wanehe nehe. Nuhem kwaw izuwi wà nehe. — Urepytywà pe nehe, i'i putar ihewe uhapukaz pà wà nehe. Nainu kwaw waze'eg mehe ihe wà nehe. <sup>12</sup> Na'e teko Zuta ywy rehe har wenoz putar upytywà àwàm tupàn a'ua'u wanupe wà nehe. Tuweharupi uzuka ma'ea'yr hapy haw pe a'e tupàn a'ua'u wanenataromo wà. Iaiw paw ihm mehe a'e tupàn nupuner kwaw wapyro haw rehe wà nehe. <sup>13</sup> Teko Zuta ywy rehe har umuwete tupàn a'ua'u tetea'u wà. Pitaitàigatu tawhu waneko pe heta tupàn a'ua'u wà. Zeruzarez pe har uzuka ma'ea'yr tetea'u Ma'aw henataromo wà. Nahu tawhu pe har rupi pitaitàigatu heta ma'ea'yr hapy haw wà. <sup>14</sup> Zeremi, eze'eg zo ihewe 'aw teko wanehe nehe. Enoz zo ma'e wanupe heremimono ràm ihewe nehe. Weko haw zawaiw katu mehe wenoz putar upyro àwàm ihewe wà nehe. Nainu kwaw ihe wà nehe, i'i ihewe.

<sup>15</sup> Uze'eg wi Tupàn ihewe kury.

— Teko heremiamutar katu a'e wà, uzapo ikatu 'ym ma'e waiko wà. Mo umur kar heràpuzuhu pe wà. — Zapuner iaiw haw imuhem kar haw rehe zanezewi nehe, aze xiuka ma'ea'yr tetea'u xe nehe, aipo i'i waiko uzeupeupe wà. Aipo hurywete putar nezewe haw iapo re wà nehe. Aipo uhyk putar wanupe nehe. <sup>16</sup> — Uri 'yw huwy ma'e, a'e wanupe amo 'ar mehe. Nuzawy kwaw uri 'yw i'a katu ma'e wà. Ko 'ar rehe, amuànoànog putar àmàn ihe nehe. A'e 'ar mehe we apy putar tata pupe huwer rehe nehe, hàkà imonohok pà nehe.

<sup>17</sup> Ihe Tupàn Tuweharupi Wiko Ma'e Upuner Wera'u Ma'e azutym Izaew Zuta rehe we ma'eà'yz àì ihe wà. Ko 'ar rehe amume'u iaiw haw wanehe i'ar àwàm ihe kury. A'e ae umu'ar kar a'e iaiw haw uezhe wà. Ta'e uzapo ikatu

'ym ma'e wà xe. Heputupyk Ma'aw pe ma'ea'yr wazuka pà wà, i'i ihewe.

*Uze'eg waiko Zeremi izuka àwàm rehe wà*

<sup>18</sup> Tupàn Tuweharupi Wiko Ma'e umume'u ma'e ihewe kury. Neàmàtyry'ymar uzapo putar ikatu 'ym ma'e newe wà nehe, i'i ihewe. <sup>19</sup> Nazawy kwaw àràpuhàràn hawitu ma'e hehaite 'ym ma'e uzezuka haw pe heraha pyr ihe. Umume'u ikatu 'ym ma'e ihewe wemapiro ràm waiko wà. Nakwaw kwaw wanemimume'u ihe. Nezewe i'i wà. — Ximonohok ywyra heityk pà ikàg mehe we nehe. Xiuka Zeremi nehe. Nezewe mehe teko na'imáenukwaw pixik kwaw hehe wà nehe.

<sup>20</sup> Na'e aze'eg Tupàn pe kury.

— O Tupàn Tuweharupi Wiko Ma'e Upuner Wera'u Ma'e, ereiko teko wanemapiro kwer imume'u har ikatu ma'e romo ne. Ereme'e urema'enukwaw paw rehe. Erek-waw ureremimutar no. Tuwe aexak wanehe nezypyk àwàm nehe. Amono hereko haw kwez nepo pe kury.

<sup>21</sup> Awa Anatot tawhu pe har ipurexak wer herehe umàno ma'e kwer romo a'e wà. — Aze eremume'u wiwi ma'e Tupàn her rehe nehe, uruzuka putar ure nehe, i'i ihewe wà. <sup>22</sup> Na'e Tupàn Tuweharupi Wiko Ma'e Upuner Wera'u Ma'e uze'eg nezewe wanehe kury. — Azepyk putar wanehe nehe. Zauxiapekwer uzuka putar kwàkwàmo zeàmàtyry'ymawhu pe a'e wà nehe. Wana'yr wà, wanazyr wà no, umàno putar uma'uhez romo wà nehe. <sup>23</sup> Teko Anatot pe har wanehe iaiw haw imu'ar mehe ni pitài a'e pe har nuikuwe kwaw wà nehe, i'i ihewe.

<sup>1</sup> — O Tupàn Tuweharupi Wiko Ma'e, aze mo apuranu nerehe a'e ma'e rehe, eremume'u katu mo ihewe. Apuranu putar nerehe purehe nezepykaw imume'u kar pà newe ihe nehe kury. Màràzàwe tuwe ikatu 'ym ma'e uzeapo hemetarer katu ma'e romo wà. Màràzàwe tuwe imunar ma'e waneko haw ikatu wanupe. <sup>2</sup> Erezutym ma'eà'yz ài ne wà. Wanapo ohoete. Hezuz katu wà. I'a katu wà no. Uze'egatu mua'u waiko nerehe wà. Nuzekaiw kwaw nerehe azeharomoete wà. <sup>3</sup> Ne Tupàn Tuweharupi Wiko Ma'e hekwaw pe no. Erexak heremiapo. Uruamutar katu ihe. Erekwaw hereko haw. O Tupàn Tuweharupi Wiko Ma'e, emutyk 'aw teko àràpuhàràn hawitu ma'e wazuka haw pe oho ma'e ài ne wà nehe. Emonokatu wazuka àwàm 'ar pe nehe. <sup>4</sup> Màràn 'ar urewyw upyta typaw haw romo nehe. Màràn zahy ka'api'i umumaw putar uxinig pà urereimaw wanawi nehe. Ma'ea'yr a'e wà, wiràmiri a'e wà no, umàno oho waiko wà. Ta'e ko wyw rehe har uzapo ikatu 'ym ma'e waiko wà xe. — Tupàn nuexak kwaw wanemiapo a'e, i'i uzeupeupe wà, a'e Tupàn pe.

<sup>5</sup> Uwazar Tupàn heze'eg ihewe.

— Nekene'o awa wanupi nezàn ire. Aipo erepuner putar kawaru wanupi nezàn àwàm rehe nehe. Nerezepyro kwaw ywy zeàmàtyry'ym 'ymaw heta haw pe, aipo erepuner nerekohaw rehe ka'a Zotàw yrykaw iwyr har rehe nehe. <sup>6</sup> Te nerywyr wà, neànàm wà, wiko neàmàtyry'ymar romo wà. Uze'eg zemueteahy nerehe nekupe kutyr wà. Ezeruzar zo wanehe nehe. Aze ur nemyrypar ài newe uze'eg pà wà nehe, nezwewe rehe we ezeruzar zo wanehe nehe, i'i ihewe.

### *Tupàn uzemumikahy wemiaihu wanehe*

<sup>7</sup> Uze'eg Tupàn Tuweharupi Wiko Ma'e kury.

— Aityk heremiaihu ihe wà.

Apuir teko heremixamixak kwer wanuwi no.  
 Amono teko heremimutar katu  
 waàmàtyry'ymar wapo pe ihe wà.  
<sup>8</sup> Teko heremixamixak kwer  
 wiko heàmàtyry'ymar romo zàwàruhu iriàw ka'a pe har  
 ài wà.  
 Uhapukaz hekutyr wà.  
 A'e rupi iro ihewe wà.  
<sup>9</sup> Teko heremixamixak kwer nuzawy kwaw wiràmiri wà.  
 Wiràhu tetea'u umàmàn izywyr hehe ipuruzuka wer pà  
 wà.  
 Pezur nehe, miar wà.  
 Pezur mynykaw pe nehe.  
<sup>10</sup> Tuwhihaw amo ywy rehe har tetea'u umumaw ma'ywa  
 tyw heremitygwer wà.  
 Upyropyprog heko pe wà no.  
 Uzapo heywy ipuràg eteahy ma'e ywyxiguhu romo wà no.  
<sup>11</sup> Umuaiw ywy wà.  
 Teko weityk a'e ywy herenataromo wà.  
 Uzeapo ywyxiguhu romo.  
 Ni amo nuzekaiw kwaw hehe wà.  
<sup>12</sup> Ywytyr ywyxiguhu rehe har nànàn uzexak kar awa wà.  
 Uzuka wata ma'e wama'e rehe imunar pà wà.  
 Amono kar zeàmàtyry'ymawhu ywy rehé imumaw kar pà  
 paw rupi ihe.  
 Ni amo nupuner kwaw zeàmàtyry'ym 'ymaw rehe weko  
 haw rehe wà.  
<sup>13</sup> Heremialihu uzutym arozràn wà. Xo xu zo omono'og  
 wà.  
 Uma'erekò tetea'u wà. Nezewé rehe we nupyhyk kwaw  
 ma'e wà.  
 Hekwahy haw nuzawy kwaw tata.  
 A'e rupi naheta kwaw arozràn ipo'o pyr wanupe, i'i  
 Tupàn.

*Izaew wanuwake wiko ma'e wà*

<sup>14</sup> Uze'eg wi Tupàn Tuweharupi Wiko Ma'e.

— Aze'eg putar Izaew wanuwake wiko ma'e ikatu 'ym ma'e wanehe ihe nehe kury. Umuaiw ywy heremiaihu wanupe heremimono kwer wà. Araha putar a'e teko muite waiwy wi ka'a ipo'o pyrer ài ihe wà nehe. Amuhem kar putar Zuta ywy rehe har a'e teko wainur wi ihe wà nehe. <sup>15</sup> Muite waneraha re apuhareko putar ihe wà nehe. Arur wi putar ywy rehe har pitàitìagatu waiwy rehe ihe wà nehe. <sup>16</sup> Aze hemuwete katu heremiaihu wazàwe wà nehe, ikatuahy putar ihewe wà nehe. — Amume'eahy heremiapo ràm Tupàn Tuweharupi Wiko Ma'e Tupàn Wikuwe Ma'e her rehe ihe, aze i'i nezewe wà nehe, ikatuahy putar ihewe wà nehe. Kwehe mehe a'e teko umu'e heremiaihu Ma'aw her rehe wemiapo ràm imume'u haw rehe wà. Aze hemuwete katu wà nehe, uezapo putar heremiaihu wainuinromo har romo wà nehe. Waneko haw ikatu putar wanupe nehe. <sup>17</sup> Azo'ok putar te wanapo nehe. Amumaw wyzài teko ihe wà nehe, aze na'ipureruzar wer kwaw herehe wà nehe. Ihe Tupàn Tuweharupi Wiko Ma'e aze'eg nezewe ihe.

## 13

*Temyhar ikatu 'ym ma'e*

<sup>1</sup> Tupàn Tuweharupi Wiko Ma'e uze'eg ihewe.

— Eme'eg kar neremyhar nehe. Na'e emunehew nehe. Eputuka zo imunehew 'ym mehe nehe, i'i ihewe. <sup>2</sup> Azapo ma'e Tupàn Tuweharupi Wiko Ma'e ize'eg rupi katete ihe. Ame'eg kar heremyhar, amunehew no. <sup>3</sup> Na'e Tupàn Tuweharupi Wiko Ma'e uze'eg wi ihewe kury.

<sup>4</sup> — Echo yrykawhu Ewparat her ma'e pe nehe. Ezumim neremyhar itakwar pupe nehe.

<sup>5</sup> Azumim aha Ewparat yrykawhu huwake kury, Tupàn Tuweharupi Wiko Ma'e hemiapo kar haw iapo pà. <sup>6</sup> Amo 'ar pawire uze'eg wi ihewe. — Azumim kar neremyhar newe ihe. Ezewyr echo yrykawhu pe ipyhyk wi pà nehe kury, i'i ihewe. <sup>7</sup> Azewyr a'e pe. Aekar imim awer. Aexak. Heremyhar inem kury. Na'ikatu kwaw kury.

<sup>8</sup> Na'e Tupàn Tuweharupi Wiko Ma'e uze'eg wi ihewe kury.

<sup>9</sup> — Nezewegatete amumaw putar Zuta ywy rehe har waneko wera'u haw ihe nehe, Zeruzarez heko wera'u haw nehe no. <sup>10</sup> Aw teko na'ipurenu wer kwaw heze'eg rehe wà. Tuweharupi nahereruzar kwaw wà. Oho tupàn a'ua'u wanaikweromo wamuwete pà wà. A'e rupi wiko putar ko temyhar ài wà nehe. Na'ikatu pixik kwaw izàwe wà nehe. <sup>11</sup> A'e temyhar neku'azàwegatu a'e. Nezewegatete aputar Izaew ywy rehe har heruwakea'i ihe wà, aputar Zuta ywy rehe har heruwakea'i ihe wà no. Aputar mo heremiaihu romo ihe wà. Nezewe mehe mo umupuràg eteahy mo herer wà. Na'ipureruzar wer kwaw herehe wà.

### *Win hyru*

<sup>12</sup> Uze'eg wi Tupàn ihewe.

— Zeremi, i'i ihewe. — Ihe Tupàn Tuweharupi Wiko Ma'e ihe, aze'eg teko Izaew wanupe ihe kury. Emume'u ko heze'eg echo wanupe nehe.

— Tuwe y'a win hyru paw tynehem nehe. — Aze pa. Ikatu y'a win hyru paw tynehegatete haw, i'i putar newe wà nehe. <sup>13</sup> Na'e emume'u ko ze'eg wanupe nehe. — Tupàn Tuweharupi Wiko Ma'e umynehem putar teko ko ywy rehe har paw rupi win pupe wà nehe. Te uka'u paw rupi wà nehe: tuwihawete Tawi izuapyapyr wà, xaxeto wà, ize'eg imume'u har wà, teko Zeruzarez pe har paw wà. <sup>14</sup> Aze y'a u'ar amo y'a i'aromo nehe, uzeka putar nehe. Nezewegatete azuhazuhaw putar a'e teko paw rupi

ihe wà nehe, tua'uhez ma'e wà nehe, kwàkwàmo wà nehe no, y'a uzeka ma'e ài ihe wà nehe. Amumaw putar 'aw teko wapuhareko 'ym pà ihe wà nehe. Napuhareko kwaw ihe wà nehe. Napuhareko kwaw wamumaw mehe ihe wà nehe.

*Izaew wiko wera'u wà, a'e rupi Tupàn uzepyk wanehe*

<sup>15</sup> Teko Izaew izuapyapyr wà.

Tupàn wiko uze'eg ma'e romo a'e.

Peiko ikàg 'ym ma'e romo henataromo nehe. Pezekaiw ize'eg rehe nehe.

<sup>16</sup> Pemume'u penemiapo kwer ikatu 'ym ma'e Tupàn Tuweharupi Wiko Ma'e pezar pe nehe, pytunahy haw imur 'ym mehe we nehe.

Aze ipytunahy nehe, pezepyapi putar ywytyruhu rehe nehe.

Peàro tatainny peiko.

Nezewé rehe we uzapo putar tatainny ma'e'ágaw ipytun ma'e romo nehe.

Uzapo putar ipytunahy haw romo nehe.

<sup>17</sup> Aze napezekaiw kwaw hehe nehe, azai'o putar hezeàmim pà peneko wera'u haw rehe nehe. Azai'oahy putar nehe.

Azuhen putar herehaykwer nehe.

Ta'e zauxiapekwer weraha Tupàn hemiaihu wemipyhyk kwer romo wà xe.

<sup>18</sup> Tupàn umume'u ko ma'e a'e no.

— Eze'eg echo tuwihawete pe nehe, ihy pe nehe no. — Pewezyw tuwihawete henaw wi nehe. Ta'e peàkàg rehe har ipuràg eteahy ma'e tuwihawete romo peneko haw hexak kar haw u'ar peàkàg wi a'e xe. <sup>19</sup> Zauxiapekwer umàmàn tawhu kwarahy ihemaw awyze har kutyr har waiwyr wà. Ni amo nupuner kwaw a'e pe uhemaw rehe

wà kury. Weraha Zuta ywy rehe har paw wemipyhyk romo wà no. Weraha ko ywy wi wà.

<sup>20</sup> Peme'e nehe, Zeruzarez pe har wà. Peàmàtyry'ymar ur waiko kwarahy heixe haw awyze har kutyr har wi wà. Tupàn umur amo teko peme a'e wà. — Pezekaiw ko teko wanehe nehe, i'i newe. Ma'e pe a'e teko wanekon wà kury. Wiko peneimaw àràpuhàràn hawitu ma'e ài peme wà. Peiko wanehe uzekaiw ma'e romo wà. Ma'e pe wanekon wà kury. <sup>21</sup> — Uremyrypar, peze amo wanupe. Amo 'ar mehe a'e teko wiko putar penuwihaw romo wà nehe. Ma'e peze putar a'e 'ar mehe nehe. Hahy putar peme nehe. Peiko putar kuzà imemyr zexak kar ma'e ài nehe. <sup>22</sup> Zeruzarez, erepuner nezehe nepuranu haw rehe nehe. — Màràzàwe tuwe nezewe haw uzeapo ihewe. Màràzàwe tuwe wenuhem hekamir wà. Màràzàwe tuwe upuraraw kar ma'erahy ihewe wà, peze putar pezeupe nehe. A'e 'ar mehe pekwaw putar ko ma'e nehe. Agwer ma'e uzeapo peme a'e, ta'e penemiapo kwer ikatu 'ym ma'e heta tetea'u wà xe.

<sup>23</sup> Aipo awa pàrànà upuner upir pe amo ae hexakaw imono haw rehe. Aipo zàwàruhu upuner upinipinimaw imuhem kar haw rehe. Aze mo upuner wà, pe ikatu 'ym ma'e iapo haw ikwaw par, pepuner mo ikatu ma'e iapo haw rehe pezemu'e haw rehe no. <sup>24</sup> Ywyty ywyxiguhu wi ur ma'e umuhàmuhàz ka'a uxinig ma'e kwer a'e. Nezewegatete Tupàn pemuhàmuhàz putar a'e nehe no. <sup>25</sup> — Nezewe amekuzar putar penemiapo kwer peme ihe nehe, i'i Tupàn Tuweharupi Wiko Ma'e. — A'e ma'e pepyhyk putar nehe, ta'e peneharaz ihewi pe xe. Pezeruzar tupàn a'ua'u wanehe pe. <sup>26</sup> Tupàn ae wenuhem putar pekamir pewi a'e nehe, pemumaranugar kar pà a'e nehe. <sup>27</sup> Tupàn penexak ma'e iapo mehe a'e. A'e ma'e iro izupe. Amo awa oho uezake har hemireko puhe a'e. Peiko agwer awa

ài. Kawaru awa wekar kawaru kuzà a'e. Nezewegatete pekar tupàn a'ua'u amo ywy rehe har wanemimuwepe wà, ywytyruhu rehe pe wà, kaiwer rehe pe wà no. Tupàn umume'u Zeruzarez pe har wanehe uzepyk àwàm a'e. Mèràn mehe pezemukatu kar putar henataromo nehe.

## 14

### *Àmàn ikyr 'ym àwàmuhu*

<sup>1</sup> Tupàn Tuweharupi Wiko Ma'e uze'eg àmàn ikyr 'ym àwàmuhu rehe ihewe.

<sup>2</sup> — Teko Zuta ywy rehe har nuzawy kwaw umàno ma'e kwer rehe uzai'o ma'e wà. Uzai'o waiko wà. Waneko haw tawhu umàno waiko wà.

Uzemumikahy ukene'o pà wà.

Zeruzarez uhapukaz uzepyro àwàm henoz pà wà.

<sup>3</sup> Hemetarerer katu ma'e omono kar uma'erekò ma'e 'y hekar kar pà wanupe wà.

Oho yzygwar pe wà.

Nezewe rehe we nuekak kwaw 'y wà.

Weruzewyr y'a ipor 'ym pà wà.

Pezupyk peàkàg nehe.

Pezemumikahy awyzewyze haw 'ym rehe nehe.

<sup>4</sup> Uma'erekò ma'e upyk wàkàg a'e wà no.

Hehaite wà, ta'e nukyr kwaw àmàn xe.

Uxinig ywy.

<sup>5</sup> Kaiwer pe arapuha weityk umemyr wà.

Naheta kwaw ka'api'i wanupe.

<sup>6</sup> Zumen hehaite ma'e upyta ywytyr apyr wà.

Nur kwaw ywytu wanupe, a'e rupi ipytuhem awarahu ài wà.

Nuekak katu kwaw ma'e  
ta'e naheta kwaw temi'u wanupe xe.

<sup>7</sup> Hemiaihu uze'eg wà kury.

— O Tupàn Tuweharupi Wiko Ma'e. Ureremiapo kwer ikatu 'ym ma'e umume'u urekatu 'ymaw.

Urenoz urepytywà àwàm newe.

Ta'e eremume'u urepytywà àwàm urewe kwehe mehe ne xe.

Urutyryk tetea'u newi ure.

Uruzapo ikatu 'ym ma'e tetea'u nerenataromo no.

<sup>8</sup> Xo nerehe zo Izaew uzeruzar wà.

Ereiko urepyro har romo

urerekohaw zawaiw katu mehe.

Màràzàwe tuwe ereiko

amo ae ywy rehe har ài ureywy rehe.

Màràzàwe tuwe ereiko wata ma'e ài pitài haw uker ma'e ài.

<sup>9</sup> MÀràzàwe tuwe ereiko

awa imukuhemahy kar pyrer ài.

Màràzàwe tuwe ereiko zauxiapekwer ikàg 'ym ma'e ài, amogwer wapytywà har 'ym ài.

Ereiko ureinuinuromo ne, o Tupàn Tuweharupi Wiko Ma'e.

Uruiko neremiaihu romo ure no.

Urereityk zo pe nehe, i'i hemiaihu ihewe wà.

<sup>10</sup> Tupàn Tuweharupi Wiko Ma'e uze'eg nezewe a'e teko wanehe.

— Wata e kwe rupi wà. Ikatu wata e haw wanupe. Nukwaw kwaw uzeruze'egaw rehe wà. A'e rupi na'ikatu kwaw ihewe wà. Hema'enukwaw putar wanemiapo kwer ikatu 'ym ma'e rehe ihe nehe. Azepyk putar wanehe hekuzaromo ihe nehe, i'i Tupàn.

<sup>11</sup> Na'e Tupàn Tuweharupi Wiko Ma'e uze'eg ihewe kury.

— Epytywà 'aw teko ne wà nehe, ere zo ihewe nehe, i'i ihewe. <sup>12</sup> Aze uzekwaku wà nehe, umai'u 'ym pà wà nehe, aze uze'eg tetea'u ihewe wà nehe, nezewe rehe we nainu

kwaw ihe wà nehe. Aze uzuka ma'ea'yr herenataromo wà nehe, aze werur arozràn ihewe wà nehe, nezewe rehe we namuawyze kwaw ihe wà nehe. Nan. Azuka kar zauxiapekwer wanupe zeàmàtyry'ymawhu pe ihe wà nehe. Azuka putar ma'uhez hawhu pupe ihe wà nehe, ma'eahy haw tetea'u pupe ihe wà nehe no, i'i ihewe.

<sup>13</sup> Na'e aze'eg izupe ihe kury.

— O Tupàn Tuweharupi Wiko Ma'e hezar. Amo neze'eg imume'u har uze'eg waiko nezewe teko wanupe wà. — Naheta kwaw zeàmàtyry'ymawhu nehe, i'i wanupe wà. — Naheta kwaw ma'uhez hawhu nehe, i'i wanupe wà. — Xo zeàmàtyry'ym 'ymaw zo heta putar peywy rehe nehe, i'i waiko teko wanupe wà, a'e Tupàn pe.

<sup>14</sup> Tupàn Tuweharupi Wiko Ma'e uwazar a'e ze'eg ihewe a'e kury.

— A'e heze'eg imume'u har umume'u temu'emaw waiko herer rehe wà. Namono kar kwaw ihe wà. Nazapo kar kwaw ma'e wanupe. Namume'u kwaw ma'e wanupe. — Tupàn wexak kar ma'e urewe urepuahu mehe a'e, i'i mua'u wà. Umume'u uezapo ma'e ràm teko wanupe. Nukwaw pixik kwaw uezapo ma'e ràm wà. Ima'enukwaw e uezapo ma'e ràm rehe wà. Na'e umume'u mua'u a'e ma'e teko wanupe wà, ta'e hemu'em wer wanupe wà xe.

<sup>15</sup> Ihe Tupàn Tuweharupi Wiko Ma'e amume'u putar a'e heze'eg imume'u mua'u har wanupe heremiacpo ràm ihe nehe kury. Namono kwaw teko wanupe ihe wà. Nezewe rehe we umume'u ma'e herer rehe wà. — Naheta kwaw zeàmàtyry'ymawhu nehe, i'i mua'u wà. — Naheta kwaw ma'uhez hawhu nehe, i'i mua'u wà. Azuka kar putar a'e ma'e imume'u har zeàmàtyry'ymawhu pe ihe wà nehe, ma'uhez hawhu pupe ihe wà nehe no. <sup>16</sup> Umume'u a'e ma'e amo teko wanupe wà. Azuka kar putar a'e teko zeàmàtyry'ymawhu pe ihe wà nehe, ma'uhez hawhu pupe

ihe wà nehe no. Zauxiapekwer weityk putar wanetekwer pe rupi Zeruzarez tawhu pupe wà nehe. Naheta kwaw wanetekwer watymar wà nehe. Uzeapo putar wanupe paw rupi nehe: wanemireko wanupe, wana'yr wanupe, wanazyr wanupe. Umekuzar putar ukatu 'ymaw wà nehe.

<sup>17</sup> — Emume'u nezemumikahy haw teko wanupe nehe, i'i Tupàn ihewe. Aze'eg nezewe wanupe.

— Tuwe hereha uzakook herehaykwer tuweharupi nehe, 'aromo nehe, pyhaw nehe no. Tuwe nupytu'u kwaw uzai'o re nehe.  
Ta'e heremiaihu ikàg 'ym ma'e upuraraw ma'erahy tetea'u wà xe.

Nuzawy kwaw teko ikutuk pyrer ikixi pyrer wà.

<sup>18</sup> Kaiwer pe heho mehe  
aexak awa zeàmàtyry'ymawhu pe izuka pyrer wanetekwer ihe wà.

Tawhu pupe hereixe mehe  
aexak teko ma'uhez haw wi umàno etea'i ma'e ihe wà.  
Tupàn ze'eg imume'u har a'e wà, xaxeto a'e wà no, uzapo wi wi uma'ereko haw wà.

Nezewe rehe we nukwaw kwaw wemiapo wà.

*Teko umume'u wemiapo kwer ikatu 'ym ma'e Tupàn pe wà*  
<sup>19</sup> O Tupàn Tuweharupi Wiko Ma'e, aipo ereityk tuwe Zuta ywy rehe har wà.

Aipo teko Xiàw rehe har iro tuwe newe wà.

Màràzàwe tuwe urekutuk pe ne.

Nurupuner kwaw urekatu haw rehe kury.

Uruàro zeàmàtyry'ym 'ymaw.

Nezewe rehe we nuzeapo kwaw ikatu ma'e.

— Uremukatu putar a'e nehe, uru'e urezeupe.

Ur purumukyzeahy haw.

<sup>20</sup> O Tupàn Tuweharupi Wiko Ma'e, urumume'u ureremi-apo kwer ikatu 'ym ma'e newe ure kury, ureipy wanemiacpo kwer ure no.

Azeharomoete uruzapo ikatu 'ygwer neruwa rupi ure.

<sup>21</sup> Nema'enukwaw neremimume'u kwer rehe nehe. Urereityk zo pe nehe.

Eityk kar zo Zeruzarez tawhu zauxiapekwer wanupe nehe. Ta'e nerenaw ipuràg eteahy ma'e a'e pe hin a'e xe.

Nema'enukwaw neze'eg awer neremiaihu wanehe we neremiacpo katu kwer rehe nehe.

Epytu'u zo ma'e iapo re a'e ze'eg rupi nehe.

<sup>22</sup> Ni amo tupàn a'ua'u amo ywy rehe har wazar nupuner kwaw àmàn imugyr kar haw rehe wà.

Ni ywak nupuner kwaw àmàn imu'ar kar haw rehe.

Uruzeruzar nerehe,

o Tupàn Tuweharupi Wiko Ma'e urezar.

Ta'e ereiko ma'e paw iapo har romo ne xe, i'i teko Tupàn pe wà.

## 15

### *Zuta ywy rehe har wanehe izepyk àwàm*

<sup>1</sup> Na'e Tupàn Tuweharupi Wiko Ma'e uze'eg ihewe kury.

— Aze mo Moizez wiko xe Xamuew rehe we ihewe uze'eg pà wà, napuhareko iwer mo 'aw teko ihe wà. Emono kar 'aw teko xe wi wà nehe. Tuwe ukàzym herenatar wi wà nehe. <sup>2</sup> — Ma'e pe oroho putar nehe, aze i'i newe nerehe upuranu pà wà nehe,

— Tupàn uze'eg nezewa a'e, ere wanupe nehe.

— Amume'u amo wamàno àwàm ihe.

Ma'eahy haw uzuka putar wà nehe, a'e wanupe.

Uzeapo putar nezewa nehe.

Amo umàno putar zeàmàtyry'ymawhu pe wà nehe, a'e wanupe.

Uzeapo putar nezewe nehe.

Ma'uhez hawhu uzuka putar amo wà nehe, a'e wanupe.

Uzeapo putar nezewe nehe.

Zauxiapekwer weraha putar amo wemipyhyk romo wà nehe, a'e wanupe.

Uzeapo putar nezewe nehe, ere wanupe nehe, i'i Tupàn ihewe.

<sup>3</sup> — Ihe Tupàn Tuweharupi Wiko Ma'e amume'u a'e iaiw ma'e uzeapo àwàm ihe. Uzeapo putar nehe. Umàno putar zeàmàtyry'ymawhu pe wà nehe. Zawar umutyk putar wanetekwer wà nehe. Wiràmìri u'u putar wà nehe no. Miar u'u putar ikurer wà nehe no. <sup>4</sup> Amume'e kar putar teko ywy nànànar a'e wanetekwer wanehe ihe wà nehe. Ta'e Manaxe Ezeki ta'yr uzapo iaiw ma'e Zeruzarez pe Zuta ywy rehe har wanuwhawete romo wiko mehe a'e xe.

<sup>5</sup> Uze'eg wi Tupàn.

— Mo pepuhareko putar wà nehe, Zeruzarez pe har wà.

Mo uzekaiw putar penehe wà nehe.

Mo upytu'u a'u putar upuranu re wà nehe.

— Pekatu aipo, aipo i'i putar amo peme wà nehe.

<sup>6</sup> Hereityk pe.

Pewak pekupe hexak kar pà ihewe.

Na'e aupir hepo

pekamikamik pà.

Ta'e hekene'o penemiapo kwer ikatu 'ym ma'e imunàn ire ihe xe.

Ihe Tupàn Tuweharupi Wiko Ma'e aiko ko ma'e imume'u har romo ihe.

<sup>7</sup> Teko omomor arozràn ywytu ikutyr wà, henuhenuhem pà iapirer wi wà.

Pe tawhu ko ywy nànànar pe wà, apomomor peàmàtyry'ymar wakutyr nezewegatete ihe no.

Apumumaw ihe, heremaihu wà.

Azuka pena'yr wà.

Ta'e napezar kwaw penape ikatu 'ym ma'e pe xe.

<sup>8</sup> Amueta tetea'u kar kuzà imen umàno ma'e kwer peinuinuromo har ihe wà.

Waneta haw nuzawy kwaw ywyxig yryhu iwyr heta haw.

Azuka pena'yr wakàg mehe wapuràg mehe ihe wà.

Apuraraw kar ma'erahy wahy wanupe no.

Na'arewahy amu'ar kar zemumikahy haw wanehe, ma'e wi kyzeahy haw wanehe no.

<sup>9</sup> Amo kuzà heta 7 umemyr umàno ma'e wà. Iàkàzym wahy.

Ipytuhemaw zawaiw katu izupe.

'Ar uzeapo pytun romo izupe.

Uzemumikahy.

Wiko ma'e hàro 'ym pà kury.

Apuzuka kar putar peàmàtyry'ymar wanupe ihe nehe, aze heta we wikuwe ma'e wà nehe.

Ihe Tupàn Tuweharupi Wiko Ma'e aze'eg kwez ihe kury, i'i Tupàn.

<sup>10</sup> Aze'eg ihe kury.

— Zawaiw katu hereko haw ihewe kury. Màràzàwe tuwe hehy hemuzexak kar a'e. Azàmàtyry'ym ko ywy rehe har paw rupi ihe wà. Namono kwaw temetarer amo pe imuzewyr àwàm iputar pà ihe. — Emur temetarer ihewe nehe, na'e kwaw amo wanupe. Nezewe rehe we teko paw umur uze'egaiw herehe wà. <sup>11</sup> O Tupàn Tuweharupi Wiko Ma'e. Ama'erekò katu newe. Aenoz ikatu ma'e neàmàtyry'ymar wanupe neremimono ràm ihe, waneko haw zawaiw katu mehe ma'erahy ipuraraw

mehe ihe. Aze naiko kwaw agwer ma'e iapo har, tuwe waze'egaiw u'ar herehe nehe. <sup>12</sup> Ni amo nupuner kwaw itaper ika haw rehe wà. Nupuner kwaw ita per kwarahy heixe haw awyze har kutyr har ika haw rehe azeharamoete a'e wà, ta'e imukatu har omono itazu morog inuinuromo wà xe. Tàtàahy tuwe a'e, a'e Tupàn pe.

<sup>13</sup> Uze'eg Tupàn ihewe.

— Zeremi, azapo kar putar ma'e peàmàtyry'ymar wanupe nehe. Weraha putar heremaihu wama'e ikatu ma'e paw rupi wà nehe. Weraha putar wanemetarer paw rupi wà nehe no. Nezewe azepyk putar wanehe wanemapiro kwer ikatu 'ym ma'e ko ywy rehe iapo pyrer paw hekuzaromo ihe nehe. <sup>14</sup> Amuigo kar putar waàmàtyry'ymar wanupe uma'erek e ma'e romo ihe wà nehe, amo ywy rehe ihe wà nehe. Nukwaw kwaw a'e ywy wà nehe. Azapo putar agwer ma'e wanupe ihe nehe, ta'e hekwahy haw nuzawy kwaw tata uwew 'ym ma'e ràm a'e xe, i'i Tupàn ihewe.

<sup>15</sup> Na'e awazar ize'eg izupe kury.

— O Tupàn Tuweharupi Wiko Ma'e. Ne erekwaw ma'e paw rupi ne. Nema'enukwaw herehe nehe. Heptytwà pe nehe. Ezepyk herehe ipuruzuka wer ma'e wanehe nehe, herekuzaromo nehe. Aze nerezepyk kwaw wanehe na'arewahy nehe, hezuka putar wà nehe. Nema'enukwaw ko ma'e rehe nehe. Uze'eg zemueteahy herehe wà, ta'e amume'u neze'eg wanupe ihe xe. <sup>16</sup> Ereze'eg ihewe. Neze'eg mehe azekaiw neze'eg paw rehe nànàn ihe. O Tupàn Tuweharupi Wiko Ma'e Upuner Wera'u Ma'e, aiko neremiruze'eg romo ihe. A'e rupi neze'eg umynehem hepy'a turywete haw pupe a'e. <sup>17</sup> Naiko e kwaw hepuka pà. Naiko e kwaw teko wainuinuromo. Eremur ma'erek haw ipuhuz katu ma'e ihewe. A'e rupi naheta kwaw hemyrypar ihewe wà. Azemumikahy hekwahy

pà. <sup>18</sup> Màràzàwe tuwe apuraraw wiwi ma'erahy teko ihe. Màràzàwe tuwe hekutuk awer hahy ihewe upytu'u 'ym pà. Màràzàwe tuwe nuke'e kwaw. Aipo napuner kwaw nerehe hezeruzar haw rehe. Aipo ereiko yrykaw kwarahy mehe typaw ma'e ài, a'e izupe.

<sup>19</sup> Tupàn Tuweharupi Wiko Ma'e uwazar heze'eg ihewe. — Aze erezewyr nehe, urumuawyzè putar ihe nehe. Ereiko wi putar heremiruze'eg romo nehe. Aze eremume'u ikatu ma'e nehe, aze neremume'u kwaw ze'eg ikatu 'ym ma'e nehe, ereiko wi putar heze'eg imume'u har romo nehe. Teko uzewyr putar newe wà nehe. Nezewe rehe we ezewyr zo wanupe nehe. <sup>20</sup> Urumuigo kar putar pàrirogawtàtà itazu morog iapo pyrer zàwenugar nehe, 'aw teko wanupe nehe. Neàmàtyry'ym putar wà nehe. Nezewe rehe we nanereityk kwaw wà nehe. Ta'e aiko putar nerehe we nerehe hezekaiw pà ihe nehe xe, nepyro pà ihe nehe xe. <sup>21</sup> Urupyro putar teko iaiw ma'e wapo wi ihe nehe, teko puruzuka ma'e wapuner haw wi ihe nehe.

## 16

### *Zeremi wekwe haw pupe umumuranu amo wà*

<sup>1</sup> Uze'eg wi Tupàn Tuweharupi Wiko Ma'e ihewe.

<sup>2</sup> — Ereko zo kuzà neremireko romo xe nehe. Emuzàg zo nera'yr xe ne wà nehe no. <sup>3</sup> Uzeapo putar ikatu 'ym ma'e teko wana'yr xe uzexak kar ma'e ràm wanupe nehe, wanazyr xe uzexak kar ma'e ràm wanupe nehe no, wahy wamuzexak kar har wanupe nehe no, wanu wamuzàgar wanupe nehe no. Amume'u putar a'e ma'e newe nehe.

<sup>4</sup> Umàno putar ma'eahy haw iaiw ma'e wi wà nehe. Ni amo nuzai'o kwaw wamàno awer rehe wà nehe. Ni amo nuzutym kwaw wanetekwer wà nehe. Uhàuhàz putar tepuxi kwer ài ywy rehe wà nehe. Zauxiapekwer uzuka putar a'e teko zeàmàtyry'ymawhu pe wà nehe. Aze ru'u,

umàno ma'uhez taw wi wà nehe. Wiràmiri wà nehe, miar hehaite ma'e wà nehe no, u'u putar wanetekwer wà nehe.

<sup>5</sup> Eixe zo tàpuz me teko uzai'o ma'e wapyr nehe. Eze-mumikahy zo nehe. Ezai'o zo amo wanehe nehe. Ta'e ihe namono kwaw heze'egatu 'aw teko wanehe ihe nehe xe. Nuiko kwaw zeàmàtyry'ym 'ymaw rehe wà nehe. Napuruamutar kwaw nehe. Napupuhareko kwaw nehe no. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>6</sup> Hemetarerer katu ma'e wà nehe, hemetarerer 'ym ma'e wà nehe no, umàno putar ko ywy rehe wà nehe. Nezewe rehe we ni amo nuzutym kwaw wanetekwer wà nehe. Ni amo nuzai'o kwaw wamàno awer rehe wà nehe. Ni amo nuzekixi kwaw uzemumikahy haw hexak kar pà wà nehe. Ni amo nupin kwaw u'aw uzemumikahy haw hexak kar pà wà nehe no. <sup>7</sup> Ni amo numai'u kwaw amo wanehe we imurywete kar pà iànàm imàno awer rehe wà nehe. Nu'u kwaw win hehe we wà nehe no. Ni amo numurywete kar kwaw amo wà nehe, ni tu umàno ma'e kwer imurywete kar pà wà nehe, ni ihy umàno ma'e kwer imurywete kar pà wà nehe.

<sup>8</sup> Eixe zo tàpuz me mynykaw pupe nehe. Eapyk zo a'e pe nehe, emai'u zo wapyr nehe. E'u zo win wapyr nehe.

<sup>9</sup> Ihe Tupàn Tuweharupi Wiko Ma'e Upuner Ma'e Izaew wazar amume'u ma'e teko newe. Einu katu nehe. Teko uhapukaz urywete pà zerekò haw pe wà. Urywete mehe heiheihem wà. Amumaw putar wanehapukaz haw nehe, wanurywete haw heiheihem mehe har nehe no. Pexak putar a'e ma'e paw izeapo mehe xe nehe.

<sup>10</sup> A'e ma'e teko wanupe imume'u mehe nehe, upuranu putar nerehe wà nehe. — Màràzàwe tuwe Tupàn uzepyk putar urerehe nezewe a'e nehe, i'i putar newe wà nehe. — Ma'enugar iaiw ma'e uruzapo ure. Ma'enugar ikatu 'ym ma'e uruzapo Tupàn Tuweharupi Wiko Ma'e urezar ikutyr ure, i'i putar newe wà nehe. <sup>11</sup> Na'e eremume'u putar ko

heze'eg wanupe nehe. — Peipy hereityk a'e wà. Oho amo tupàn a'ua'u wanaikweromo wà. Uzapo ma'e wanupe wà. Umuwete katu wà no. Upuir ihewi wà. Nuweruzar kwaw hepurumu'e haw wà. <sup>12</sup> Peaiw wera'u peipy wanuwi. Paw rupi peiko heàmàtyry'ymar romo heze'eg heruzar 'ymar romo. <sup>13</sup> A'e rupi apumuhem kar hyahy putar ko ywy wi ihe nehe. Apuityk putar amo ywy rehe nehe. Napekwaw kwaw a'e ywy. Peipy nukwaw kwaw a'e ywy a'e wà no. A'e ywy rehe pemuwete putar amo tupàn pe wà nehe, 'aromo pe wà nehe, pyhaw pe wà nehe no. Ta'e nahekatu kwaw peme ihe nehe xe, ere wanupe nehe, i'i Tupàn ihewe.

### *Uzewyr putar uiwy pe wà nehe*

<sup>14</sup> Uze'eg Tupàn Tuweharupi Wiko Ma'e kury.

— Aiko Tupàn Wikuwe Ma'e teko Izaew wazuapyapyr Ezit ywy wi wapyro arer romo ihe. Uhem a'e 'ar iko a'e. A'e 'ar mehe ni amo numume'u kwaw wemiapo ràm herer rehe wà nehe, Izaew wapyro arer her rehe wà nehe.

<sup>15</sup> Aiko Tupàn Wikuwe Ma'e teko Izaew wazuapyapyr ywy kwarahy heixe haw awyze har kutyr har wi wanerur arer romo ihe, amo ywy wi heremimuhàz kwer ihe wà. Teko umume'u putar wemiapo ràm herer rehe wà nehe, Izaew kwarahy heixe haw awyze har kutyr har wi wapyro arer wi wà nehe. Arur wi putar waiwy rehe ihe wà nehe, ywy waipy wanupe heremimono kwer pe ihe wà nehe. Ihe Tupàn Tuweharupi Wiko Ma'e aze'eg kwez kury.

### *Tupàn a'ua'u wamuwete haw rehe izepyk àwàm*

<sup>16</sup> Uze'eg wi Tupàn Tuweharupi Wiko Ma'e kury.

— Amur kar putar pira pyhykar zàwenugar tetea'u ihe wà nehe. Upyhyk putar 'aw teko pira ài wà nehe. A'e re amur kar putar uzemi'ikar ma'e zàwenugar tetea'u ihe wà nehe no. Wekar putar 'aw teko miar ài ywytyruhu nànànywytyr nànànyànehe, te itakwar pupe wà nehe,

wazuka pà wà nehe. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>17</sup> Aexak wanemiapo paw rupi ihe. Ni amo ma'e nuzemim kwaw ihewi wà. Wanemiapo kwer ikatu 'ym ma'e nuzemim kwaw ihewi. <sup>18</sup> Amekuzar kar putar wakatu 'ymaw wanupe mokoz haw ihe nehe, wanemiapo kwer ikatu 'ym ma'e imekuzar kar pà wanupe nehe no. Umuaiw heywy Tupàn a'ua'u wapupe wà. A'e tupàn a'ua'u wiko umàno ma'e kwer wazàwe wà. Umynehem heywy watupàn mua'u wapupe wà, i'i ihewe.

*Ywy nànànar uzeruzar Tupàn rehe wà nehe*

<sup>19</sup> Na'e aze'eg Tupàn pe kury.

— O Tupàn Tuweharupi Wiko Ma'e, hepyro pe ne. Ere-mur nekàgaw ihewe no. Heptytwà pe ma'erahy ipuraraw mehe. Ywy muite wera'u har nànànar ur putar newe uze'eg pà wà nehe. — Xo tupàn a'ua'u zo ureipy wereko wà. Xo tupàn ikatu 'ym ma'e zo wereko wà. <sup>20</sup> Aipo teko upuner utupàn iapo haw rehe wà, uzar iapo haw rehe wà. Nan. Nuiko kwaw tupàn azeharomoete har romo wà.

<sup>21</sup> Uze'eg Tupàn ihewe kury.

— A'e rupi akwaw kar putar hekàgaw wanupe ihe nehe, hepuner haw wanupe ihe nehe no. Ukwaw putar tuweharupi wà nehe. Nupytu'u kwaw ikwaw ire wà nehe. Tupàn Tuweharupi Wiko Ma'e herer romo ihe. Ukwaw putar herer wà nehe, i'i Tupàn.

## 17

*Zuta ywy rehe har ikatu 'ygwer wanehe izepyk àwàm*

<sup>1</sup> Uze'eg wi Tupàn Tuweharupi Wiko Ma'e kury.

— Teko Zuta ywy rehe har wà, pemuapyk penemi-apo kwer ikatu 'ym ma'e kair haw itaper iapo pyrer hakwa katu ma'e pupe. Pemuapyk ita hakwa katu ma'e tàtàahy ma'e niàmà her ma'e pupe pep'y'a pe. Pemuapyk

pema'ea'yr hapy haw hakwa iapyr wà no. <sup>2</sup> Pena'yr ima'enukwaw ma'ea'yr hapy haw rehe wà. Ima'enukwaw ywyra imupu'äm pyrer tupàn a'ua'u romo iapo pyrer wanehe wà no. Pemupu'äm tupàn kuzà Azera her ma'e henataromo pe wà, ywyra ikyr katu ma'e wanuwake pe wà, ywytyr apyr wà, <sup>3</sup> ywytyruhu peywy imyter pe har rehe pe wà. Ama'ereko putar peàmàtry'yamar wapy'a pupe ihe nehe. Na'e weraha putar penemetarer paw pewi wà nehe. Weraha putar pema'e hekuzar katu ma'e paw pewi wà nehe no. Ta'e pezapo ikatu 'ym ma'e ko ywy nànàn pe xe. <sup>4</sup> Pehem putar peho ywy peme heremimur kwer wi nehe. Apumuigo kar putar amo wanupe uma'ereko e ma'e romo ihe nehe no, ywy pene-migwaw 'ym rehe ihe nehe no. Ta'e hekwahy haw nuzawy kwaw tata a'e xe. Nuwew pixik kwaw nehe, i'i Tupàn.

*Ma'e kwaw katu haw rehe ima'enukwaw paw*

<sup>5</sup> Uze'eg wi Tupàn Tuweharupi Wiko Ma'e kury.

— Aze amo utyryk ihewi nehe,  
aze uzeruzar amo wanehe nehe,  
aze uzeruzar teko ikàg 'ym ma'e wakàgaw rehe nehe,  
amono putar heze'egaiw hehe nehe.

<sup>6</sup> Nuzawy kwaw ka'a ywyxiguhu pe har.

Nuzawy kwaw ma'e ywyxinig rehe hezuz ma'e,

ywy xa heta haw pe

amo ma'e hezuz 'ymaw pe hezuz ma'e.

Nuzeapo kwaw ikatu ma'e izupe.

<sup>7</sup> Aze amo uzeruzar herehe nehe, aze heta Tupàn Tuwe-harupi Wiko Ma'e rehe izeruzar haw izupe nehe, amono putar heze'egatu hehe nehe.

<sup>8</sup> Nuzawy kwaw ywyra 'y huwake izutym pyrer.

Umuhàmuhàz wapo te yrykaw pe.

Haku haw ihm mehe

nuxinig kwaw.

Huwer huweramukyr katu tuweharupi.  
 Àmàn ikyr 'ym mehe  
 nuzekaiw kwaw hehe.  
 I'a wiwi a'e.

<sup>9</sup> Mo upuner teko wapy'a ikwaw paw rehe wà.  
 Naheta kwaw purupe hemu'em ma'e wazàwenugar wà.  
 Nuzawy kwaw ima'eahy tetea'u ma'e. Naheta kwaw  
 imukatu àwàm.

<sup>10</sup> Ihe Tupàn Tuweharupi Wiko Ma'e ihe, ame'e teko  
 wama'enukwaw paw rehe.  
 Agaw teko wapy'a.  
 Areko teko wanerekö hexak ire ihe wà,  
 wanemiapo hexak ire wà.

<sup>11</sup> Aze awa omono'og temetarer amo wanehe umunar pà,  
 nuzawy kwaw wiràmiri amo wiràmiri hupi'a ikwaku har  
 a'e.  
 Wikuwe mehe hemetarer uhem izuwi.

Iahykaw rehe, — Iranaiw ma'e, i'i teko izupe wà.

<sup>12</sup> Tupàn Hàpuzuhu zanemyter pe har a'e, Nuzawy kwaw  
 tuwhawete henaw ipuràg eteahy ma'e a'e.

Izypy mehe arer we ywytyr iaiha ma'e rehe hin a'e no.

<sup>13</sup> O Tupàn Tuweharupi Wiko Ma'e, ereiko teko Izaew  
 izuapyapyr wanemiaro romo ne.

Nereitykar paw wiko putar ikàg 'ym ma'e romo wà nehe.  
 Ukàzym putar her ywyxig rehe imuapypyr ài wà nehe.  
 Ta'e nereityk a'e wà xe, Tupàn Tuweharupi Wiko Ma'e,  
 'ytyzuzàmaw 'y ikatu ma'e imur har zàwenugar.

### *Zeremi wenoz upytywà àwàm Tupàn pe a'e*

<sup>14</sup> O Tupàn Tuweharupi Wiko Ma'e, hemukatu pe nehe.  
 Nezewe mehe hekatu putar nehe. Hepyro pe nehe

no. Nezewe mehe amuzàg putar zegar haw nekatu haw imume'u har ihe nehe no.

<sup>15</sup> Amogwer uze'eg nezewe ihewe wà.

— Tupàn Tuweharupi Wiko Ma'e umume'u ikatu 'ym ma'e urewe wemapiro ràm a'e. Màràzàwe tuwe nuzapo kwaw. Tuwe uzapo na'arewahy nehe kury, i'i wà.

<sup>16</sup> Hezar. — Emu'ar kar neze'egaiw wanehe nehe, na'e pixik kwaw newe ihe. — Tuwe zawaiw katu waneko àwàm nehe, na'e kwaw newe. O Tupàn, erekwaw ko ma'e ne. Erekwaw heremimume'u kwer. <sup>17</sup> Eiko zo hemukyzeahy kar har romo nehe. Ereiko putar hemimaw romo iaiw paw 'ar tur mehe nehe. <sup>18</sup> Tuwe ma'erahy ihewe ipuraraw har wiko ikàg 'ym ma'e romo wà nehe. Tuwe ihe naiko kwaw ikàg 'ym ma'e romo wazàwe nehe. Tuwe tynehem ma'e wi kyzeahy haw pupe wà nehe. Tuwe nuzeapo kwaw nezewe haw ihewe nehe. Emu'ar kar iaiw paw wanehe nehe. Emumaw tuwe ne wà nehe.

### *Mytu'u haw 'ar a'e*

<sup>19</sup> Tupàn Tuweharupi Wiko Ma'e uze'eg ihewe.

— Zeremi, i'i. — Epyta echo ukenawhu Teko her ma'e huwake nehe. Zuta ywy rehe har wanuwhawete wixe Zeruzarez pupe a'e ukenawhu rupi wà. Uhem a'e wi hupi wà no. A'e re echo amogwer Zeruzarez pàrirogawtàà hukenawhu pe nehe no. <sup>20</sup> — Peinu Tupàn ze'eg nehe, ere ukenawhu rupi wixe ma'e paw wanupe nehe: tuwhawete wanupe, tekò Zuta ywy rehe har paw wanupe, Zeruzarez pe har paw wanupe. <sup>21</sup> Eze'eg nezewe wanupe nehe, — Aze peikuwe wiwi nehe, peraha zo ipuhuz ma'e mytu'u haw 'ar mehe nehe. A'e 'ar mehe perur zo ma'e Zeruzarez hukenawhu rupi nehe. <sup>22</sup> Peraha zo ma'e penàpuw wi nehe. Pema'ereko zo mytu'u haw 'ar Tupàn pe nehe, ize'eg awer peipy wanupe imume'u pyrer rupi katete nehe. <sup>23</sup> Peipy

nuenu kwaw heze'eg wà. Nuzekaiw kwaw hehe wà. Wiko hereruzar 'ymar romo wà. Na'ipureruzar wer kwaw heze'eg rehe wà. Na'izemu'e wer kwaw wà, ere wanupe nehe, i'i ihewe.

<sup>24</sup> — Peruzar Tupàn pepy'a nànàn nehe. Mytu'u haw 'ar mehe perur zo ipuhuz ma'e 'aw tawhu hukenawhu rupi nehe. Pemonokatu mytu'u haw 'ar Tupàn pe nehe. Pema'ereko zo a'e 'ar mehe nehe. <sup>25</sup> Aze peruzar ko Tupàn ze'eg nehe, penuwhawete a'e wà nehe, wana'yr a'e wà nehe no, wixe putar Zeruzarez hukenawhu rupi a'e wà nehe. Upuner putar tuwhawete Tawi ài wà nehe. Wata putar ywyramawa pupe wà nehe. Wata putar kawaru kupe pe wà nehe no, Zuta ywy rehe har wanupi wà nehe, Zeruzarez pe har wanupi wà nehe no. Tuweharupi heta putar teko Zeruzarez tawhu pupe wà nehe no. <sup>26</sup> Ur putar tawhu Zuta ywy rehe har wanuwi wà nehe, taw Zeruzarez izywyr har wanuwi wà nehe no, Mezàmi ywy wi wà nehe no, ywytyr heta 'ymaw wà nehe no, ywytyr kwarahy ihmaw awyze har kutyr har wanuwi wà nehe no. Werur putar ma'e hapy pyràm heràpuzuhu pe wà nehe. Werur putar ma'ea'yr izuka pyràm wà nehe no. Werur putar arozràñ wà nehe, yhyk zàwenugar wà nehe no, hekatu haw hekuzar ràm wà nehe no. <sup>27</sup> Aze nahereruzar kwaw wà nehe, aze nomonokatu kwaw mytu'u haw 'ar ihewe wà nehe, aze werur ipuhuz ma'e tawhu hukenawhu rupi wà nehe, amunyk putar tata a'e ukenawhu rehe ihe nehe. A'e tata wapy putar tàpuzuhu Zeruzarez pe har paw nehe. Ni amo nupuner kwaw imuwe kar haw rehe wà nehe, i'i Tupàn ihewe.

<sup>2</sup> Ewezyw tāpuz y'a ywyzuwa iapo pyrer iapo haw pe nehe. A'e pe nehem mehe amono putar heze'eg newe nehe, i'i ihewe. <sup>3</sup> Na'e aha kury. Aexak ywyzuwa ima'ema'e har ima'ereko mehe. Uma'ema'e ywyzuwa iko ywyramawa ywyra iapo pyrer rehe. <sup>4</sup> Aze y'a na'ikatu kwaw izupe, upyhyk wi ywyzuwa amo y'a iapo pà wemimutar rupi.

<sup>5</sup> Na'e Tupàn Tuweharupi Wiko Ma'e uze'eg ihewe kury.

<sup>6</sup> — Y'a iapo har uma'ema'e ywyzuwa y'a ikatu 'ym ma'e rehe arer y'a ikatu ma'e iapo pà a'e. Aipo napuner kwaw nezewe haw iapo haw ihe no. Y'a iapo har upyhyk ywyzuwa opo pe. Nezewegatete apupyhyk hepo pe no. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>7</sup> Wyzài 'ar mehe apuner wyzài ywy rehe har amo ywy rehe wamono kar haw rehe, waneitykaw rehe, wamumaw paw rehe. <sup>8</sup> Aze a'e teko utyryk ukatu 'ymaw wi wà nehe, a'e mehe amume'u putar amo ae ma'e heremiapo ràm ihe nehe. Nazapo kwaw heremimume'u kwer izypy mehe arer nehe. <sup>9</sup> — Azapo putar amo teko amo ywy rehe har ihe wà nehe, apuner he'e haw rehe nehe. — Amuigo kar putar amo awa amo teko wanuwihawete romo ihe nehe, apuner he'e haw rehe nehe. <sup>10</sup> Aze a'e teko uzapo ikatu 'ym ma'e hereruzar 'ym pà wà nehe, a'e mehe amume'u putar amo ae heremiapo ràm ihe nehe no. <sup>11</sup> A'e rupi, Zeremi, emume'u ko ma'e Zuta ywy rehe har wanupe nehe, Zeruzarez pe har wanupe nehe no. — Tupàn uzapo putar ikatu 'ym ma'e peme a'e nehe. Uzemuguàgà'ym penehe uzepyk pà a'e nehe no. Pepytu'u ikatu 'ym ma'e iapo re nehe. Peiko ikatu ma'e romo nehe, ere wanupe nehe, i'i Tupàn ihewe. <sup>12</sup> Uwazar putar neze'eg newe wà nehe. — Na'ikatu kwaw ize'eg urewe. Uruzapo putar tuwe ureremiapo ràm nehe. Uruzàmàtyry'ym wiwi putar Tupàn ure nehe. Uruzapo wiwi putar ikatu 'ym

ma'e nehe, ta'e urepy'a na'ikatu kwaw a'e wà xe, i'i newe wà nehe.

*Teko utyryk Tupàn wi wà*

<sup>13</sup> A'e rupi ihe Tupàn Tuweharupi Wiko Ma'e aze'eg putar ihe nehe kury.

— Epuranu teko ywy nànànar wanehe nehe.

— Aipo pexak agwer ma'e amo 'ar mehe.

Teko Izaew izuapyapyr uzapo iaiw ma'e wà.

<sup>14</sup> Aipo amo 'ar mehe naheta kwaw àmàn tátà tuwixàg ma'e

itahu Irimano ywytyruhu apyr har rehe.

Aipo 'y a'e ywytyruhu wi uwypyryk ma'e uxinig.

<sup>15</sup> Nezewe rehe we teko heremaihu heharaz ihewi wà.

Umunyk tata yhyk zàwenugar rehe tupàn a'ua'u wane-nataromo wà.

Pe rupi wata mehe uzepyapi wà.

Nuwata kwaw pe kwehe arer ikatu ma'e rupi wà.

Wata e ka'a rupi pe ikatu 'ym ma'e rupi wà.

<sup>16</sup> Uzapo ko ywy iaiw ma'e romo wà.

Tuweharupi teko uze'eg zemueteahy putar ko ywy rehe wà nehe.

Hupi wata ma'e ràm paw ipytuhegatu putar hexak mehe wà nehe.

Weruwaruwak putar wàkàg wà nehe.

<sup>17</sup> Amuhàmuhàz putar heremaihu waàmàtyry'ymar wanenataromo ihe wà nehe.

Nuzawy kwaw ywyku'i ywytyu kwarahy ihmaw wi ur ma'e hemirur wà nehe.

Aexak kar putar hekupe wanupe nehe.

Iaiw haw ihm mehe napytywà kwaw ihe wà nehe.

*Ipuruzuka wer Zeremi rehe wà*

<sup>18</sup> Na'e uze'eg teko wà kury.

— Zazeagaw Zeremi heityk pà nehe. Tuweharupi heta putar xaxeto zanemu'e àràm romo wà nehe. Tuweharupi heta putar ma'e kwaw katu har zanereruze'eg àràm romo wà nehe no. Heta putar awa Tupàn ze'eg imume'u har romo wà nehe no. Ximume'u hemiapo kwer ikatu 'ym ma'e nehe. Zapytu'u ize'eg henu re nehe no, i'i wà. <sup>19</sup> Na'e aze'eg Tupàn pe ihe.

— O Tupàn Tuweharupi Wiko Ma'e, einu heze'eg nehe. Einu heàmàtyry'ymar waze'eg hekutyr har nehe no. <sup>20</sup> Heàmàtyry'ymar umekuzar ikatu ma'e ikatu 'ym ma'e rupi wà. Aipo ikatu nezewe haw. Uhàwykàz ywykwar wà. — Aze ru'u Zeremi u'ar putar ipupe nehe, i'i wà. Nema'enukwaw ko ma'e rehe nehe. Azur newe heze'eg pà wapytywà àwàm henoz pà newe. — Ezepyk zo wanehe nekwahy mehe nehe, a'e newe. <sup>21</sup> Amuzewyr kar heze'eg ihe kury. Tuwe wana'yr umàno uma'uez pà wà nehe. Tuwe zauxiapekwer uzuka zeàmàtyry'ymawhu pe wà nehe no. Tuwe wamen umàno kuzà wanuwi wà nehe. Tuwe wamemyr umàno wanuwi wà nehe no. Tuwe awa umàno ma'eahy wi wà nehe. Tuwe zauxiapekwer uzuka kwàkwàmo zeàmàtyry'ymawhu pe wà nehe. <sup>22</sup> Emono kar amo zauxiapekwer wanàpuz me ne wà nehe. — Pezàmàtyry'ym na'arewahy ma'e imume'u 'ym pà wanupe nehe, ere wanupe nehe. Tuwe heiheihem ukyze pà zauxiapekwer wanexak mehe wà nehe. Ta'e uhàwykàz ywykwar wà xe. — Aze ru'u Zeremi u'ar putar ipupe nehe, i'i wà. Uzapo miar pyhykaw zàwenugar hepyhyk pà wà no. <sup>23</sup> Ne Tupàn Tuweharupi Wiko Ma'e erekwaw hezuka àwàm rehe wazemugeta awer paw rupi ne. Nereharaz zo wakatu 'ymaw wi nehe. Emunàn zo wanemiano kwer ikatu 'ym ma'e nehe. Eityk ywy rehe wamumaw pà ne wà nehe. Eiko nezewe wanupe nekwahy mehe nehe.

*Ywy'a ika pyrer*

<sup>1</sup> — Eme'eg kar amo ywy'a nehe, i'i Tupàn Tuweharupi Wiko Ma'e ihewe. — Eraha amo tuwihaw nerupi ne wà nehe no. Eraha xaxeto tua'uhez wera'u ma'e ne wà nehe no. <sup>2</sup> Echo ywyàpyznaw Men-Inom her ma'e pe ukenawhu Kak her ma'e huwake nehe. A'e pe nehem mehe emume'u ze'eg heremimono ràm wahy haw rupi nehe, i'i ihewe. <sup>3</sup> Na'aw ize'eg awer ihewe imume'u kar pyrer xe kury. — Zuta ywy rehe har wanuwhawete wà, teko Zeruzarez pe har wà no, ihe Tupàn Tuweharupi Wiko Ma'e upuner wera'u ma'e Izaew izuapyapyr wazar ihe, aze'eg putar peme ihe nehe kury. Pezeapyaka heze'eg rehe nehe. Amu'ar putar iaiw haw uhua'u wera'u ma'e ko ywy rehe ihe nehe. I'ar awer henu har paw ukyzeahy putar wà nehe. <sup>4</sup> Azapo putar nezewehaw ihe nehe, ta'e heremiaihu hereityk a'e wà xe. Umuaiw ko ywy a'e wà no. Wapy yhyk zàwenugar amo tupàn a'ua'u wanenataromo xe wà. Nezewehaw we ni 'aw teko wà, ni waipy wà, ni Zuta ywy rehe har wanuwhawete wà, nukwaw pixik kwaw a'e tupàn a'ua'u wà. A'e teko umynehem ko ywy teko ikatu ma'e wanuwykwer pupe wà. <sup>5</sup> Uzapo ma'ea'yr hapy haw Ma'aw henataromo wà. Uzuka wa'yr wanapy pà henataromo wà. Nazapo kar pixik kwaw a'e ma'e wanupe herenataromo ihe. Naze'eg pixik kwaw a'e ma'e iapo haw rehe. Nahema'enukwaw pixik kwaw hehe. <sup>6</sup> A'e rupi ihe Tupàn Tuweharupi Wiko Ma'e amume'u ko ma'e ihe kury. Uhem putar amo 'ar nehe. A'e 'ar mehe — Topet, ni'i kwaw teko ko taw pe wà nehe. — Ywyàpyznaw Men-Inom, ni'i kwaw wà nehe. — Puruzuka haw, i'i putar izupe wà nehe. <sup>7</sup> 'Aw taw pe amumaw putar teko Zuta ywy rehe har wanemiapo ràm ihe nehe, Zeruzarez pe har wanemiapo ràm ihe nehe no. Aityk kar putar

waàmàtyry'ymar wanupe zeàmàtyry'ymawhu pe ihe wà nehe. Azuka kar putar wanupe nehe no. Amono putar wanetekwer wiràmiri wanupe ihe wà nehe, miar hehaite ma'e wanupe ihe wà nehe no. <sup>8</sup> Amumaw putar 'aw tawhu ihe nehe. Iaiw putar tuwe heityk àwàm nehe. Huwake ukwaw ma'e ràm ipytuhegatu putar wà nehe. Ukyzeahy putar uzeapo ma'e kwer hexak mehe wà nehe no. <sup>9</sup> Waàmàtyry'ymar umàmàn putar tawhu izywyr wà nehe. Uzeagaw putar ipupe har wazuka pà wà nehe. Umumaw putar 'ar tetea'u izywyr upyta pà wà nehe. Iaiw putar nehe. Zeruzarez pe har u'u putar wa'yr wano'o kwer wà nehe, wanazyr wano'o kwer wà nehe no. U'u putar uzeake wiko ma'e wano'o kwer wà nehe no, ere wanupe nehe, i'i Tupàñ ihewe.

<sup>10</sup> Na'e uze'eg wi Tupàñ ihewe.

— Ezukazuka ywy'a awa nerupi ur ma'e kwer wane-nataromo nehe, i'i ihewe. <sup>11</sup> — Emume'u ko heze'eg wanupe nehe no, i'i ihewe. — Tupàñ Tuweharupi Wiko Ma'e upuner wera'u ma'e umume'u kar ko ze'eg peme a'e, ere wanupe. Na'aw a'e ze'eg xe kury. — Aze xiukauka ywy'a, nazapuner kwaw iapo katu haw rehe. Nezewegatete azuhazuhaw putar teko 'aw tawhu pe har ihe wà nehe no. Uzutym putar wanetekwer Topet pe wà nehe. Ta'e naheta kwaw amo watymaw wanupe nehe xe. <sup>12</sup> Nezewe haw azapo putar 'aw tawhu pe nehe. Nuzawy kwaw ywyàpyznaw Topet her ma'e nehe. Ihe Tupàñ Tuweharupi Wiko Ma'e aiko ko ma'e imume'u har romo ihe. <sup>13</sup> Zeruzarez pe har wanàpuz wà, Zuta ywy rehe har wanuwhawete wanàpuz wà no, Izipiw putar ywyàpyznaw Topet her ma'e ài wà nehe. Teko wapy yhyk zàwenugar zahytata wamuwete pà wà. A'e tàpuz izipiw putar wà nehe no. Uzakook win tupàñ a'ua'u wanenataromo amo tàpuz pupe wà no. A'e tàpuz izipiw putar wà nehe no, i'i

Tupàn iko wanupe.

<sup>14</sup> Na'e azewyr Topet wi. Tupàn umume'u kar uze'eg ihewe a'e pe. Aha tàpuzuhu pe katu pe hepyta pà. Apu'am a'e pe teko wanupe heze'eg pà. <sup>15</sup> — Amume'u putar Tupàn Tuweharupi Wiko Ma'e upuner wera'u ma'e Izaew wazar ize'eg peme ihe nehe kury, a'e wanupe. — Peiko hereruzar 'ymar romo. Napepurenu wer kwaw heze'eg rehe. Amume'u iaiw haw 'aw tawhu rehe tawhu nànàn heremimu'ar ràm ihe. Amu'ar kar putar azeharomoete ihe nehe, i'i Tupàn peme.

## 20

### *Zeremi, xaxeto Pazur no*

<sup>1</sup> Pazur Imer ta'yr wiko xaxeto romo ma'erekò haw tàpuzuhu pe har rehe uzekaiw ma'e romo a'e. Herenu a'e ma'e paw imume'u mehe. <sup>2</sup> A'e rupi uze'eg zauxiapékwer wanupe kury. — Pepetek Zeremi nehe. A'e re peàpixipixi kyhàhàm tàtà pupe ukenawhu Mezàmi her ma'e rehé nehe. Aze teko iho wer tàpuzuhu pe wà, wixe a'e ukenawhu rupi wà. <sup>3</sup> Iku'egwer pe Pazur hemuhem kar kyhàhàm tàtà wi. Na'e aze'eg izupe kury. — Tupàn Tuweharupi Wiko Ma'e o'ok nerer newi. Nereiko kwaw Pazur her ma'e romo kury. — Kyzeahy haw uhàuhàz ma'e kwer, nerer romo kury, a'e izupe. <sup>4</sup> Tupàn Tuweharupi Wiko Ma'e uze'eg izupe no. — Pazur, Urumuigo kar putar nemukyzeahy kar har romo ihe nehe, nemypyrapar wamukyzeahy kar har romo ihe nehe no. Waàmàtyry'ymar uzuka putar nemypyrapar paw rupi wà nehe. Erexa putar wazuka mehe wà nehe. Mawiron wanuwihawete wiko putar Zuta ywy rehe har paw wazar romo a'e nehe. Weraha putar amo Mawiron pe wemipyhyk romo wà nehe. Uzuka kar putar amo wà nehe no. <sup>5</sup> Araha kar putar temetarer 'aw tawhu pe har paw peàmàtyry'ymar

wanupe nehe. Upyhyk putar ma'e hekuzar katu ma'e paw rupi wà nehe. Upyhyk putar Zuta ywy rehe har wanuwihawete wanemetarer paw wà nehe, Mawiron pe heraha pà wà nehe. <sup>6</sup> Nepyhyk putar wà nehe. Upyhyk putar neànàm paw wà nehe no. Peneraha putar a'e pe wà nehe. Eremàno putar a'e pe nehe. Uzutym putar neretekwer nemyrypar wainuinuromo wà nehe. Eremume'u temu'emaw tetea'u wanupe. Nezutym putar wainuinuromo wà nehe, i'i Tupàn Pazur pe.

*Zeremi umume'u uzemumikahy haw Tupàn pe*

<sup>7</sup> O Tupàn Tuweharupi Wiko Ma'e, neremu'em ihewe. Azeruzar neremu'em awer rehe. Nekàg wera'u ihewi.

Ereiko hezar romo.

Teko paw upuka herehe wà.

Ummaw u'ar paw herehe uze'eg urywahyahy pà wà.

<sup>8</sup> Tuweharupi heze'eg mehe ahapukaz ze'eg imume'u pà ihe.

— Puruzuka haw, a'e wanupe. — Ma'e imumaw paw, a'e wanupe.

O Tupàn Tuweharupi Wiko Ma'e, aiko ikàg 'ym ma'e romo wanupe.

Uze'eg uryweteahy herehe tuweharupi wà.

Ta'e amume'u neze'eg wanupe ihe xe.

<sup>9</sup> — Hereharaz putar Tupàn Tuweharupi Wiko Ma'e wi nehe,  
a'e hezeupe.

— Namume'u pixik kwaw her ihe nehe, a'e hezeupe.

Nezewe haw rehe hema'enukwaw mehe neze'eg uzemu-  
nehew hepupe a'e.

Ukaz tata ài hepy'a pupe.

Hekene'o hepupe ipyhyk ire.

Napuner kwaw hehe kury.

- <sup>10</sup> Aenu tekotetea'u wanewowo mehe ihe wà.  
 — Heta tetea'u kyzeahy haw zaneywyr, i'i wà.  
 — Zazepyk Zeremi rehe nehe.  
 Ximume'u hemiapo kwer nehe, i'i wà.  
 Te hemryryparete wàro hezepyapi àwàm he'ar àwàm wà.  
 — Aze ru'u u'ar putar miar zuka haw zàwenugar pupe  
 nehe.  
 A'e mehe zazepyk putar hehe nehe, i'i wà.
- <sup>11</sup> Ne Tupàn Tuweharupi Wiko Ma'e ereiko herehe we.  
 Nekàg.  
 Erepuner katu no.  
 Herehe ipuruzuka wer ma'e uzepyapi putar wà nehe.  
 Nuityk kwaw wàmàtyry'ymar wà nehe.  
 Imaranugar tuwe u'ar awer rehe wà nehe.  
 Waìiw paw nupaw pixik kwaw wanuwi nehe.  
 Teko naheharaz pixik kwaw izuwi wà nehe.
- <sup>12</sup> Nezewé mehe, o Tupàn Tuweharupi Wiko Ma'e Upuner  
 Wera'u ma'e, nekatu haw rupi ureagaw pe ne.  
 Ta'e erekwaw urema'enukwaw paw ne xe.  
 Erekwaw urepy'a pe har no.  
 Tuwe aexak heàmàtyry'ymar wanehe nezepyk àwàm  
 nehe.  
 Amono herekuwe haw nepo pe.
- <sup>13</sup> Pezegar Tupàn Tuweharupi Wiko Ma'e pe nehe.  
 Pemume'u ikatu haw nehe.  
 Ta'e upyro hemetarer 'ym ma'e ikatu 'ym ma'e wapo wi  
 a'e wà xe.
- <sup>14</sup> Heta ze'egaiw hezexak kar awer 'ar rehe.  
 Peneharaz 'ar hehy hemuzexak kar awer wi nehe.
- <sup>15</sup> — Awa a'e, eremuzàg awa ne,  
 i'i amo awa heru imurywete kar pà hezexak kar mehe a'e.  
 Tuwe Tupàn omono uze'egaiw a'e awa rehe nehe.

<sup>16</sup> Tupàn Tuweharupi Wiko Ma'e umuaiw amo tawhu  
wapuhareko 'ym pà a'e wà.

Tuwe a'e awa wiko a'e tawhu wazàwe nehe.

Tuwe wenu teko wahy haw rehe wakuhemaw ku'em mehe  
wà nehe.

Tuwe wenu zauxiapékwer waàmàtyry'ym mehe kwarahy  
wapytepe hin mehe wà nehe no.

<sup>17</sup> Ta'e nahezuka kwaw hezexak kar 'ym mehe we a'e xe.  
Nezewe mehe mo hehy hie uezapo mo heretekwer itym  
awer romo.

Nazexak kar iwer mo.

<sup>18</sup> Mâràzàwe tuwe azexak kar.

Aipo xo zemumikahy haw hereko haw rehe zo azexak kar.

Aipo xo tahi haw hereko haw rehe zo azexak kar.

Aipo xo hereko haw iaiw paw rehe zo azexak kar.

## 21

### *Zeruzarez rehe zepykaw*

<sup>1</sup> Zeneki Zuta ywy rehe har wanuwhawete umur kar  
Pazur Mawki ta'yr ihewe. Umur kar Xoponi Mazez ta'yr  
hupi a'e no. — Enoz ma'e Zeremi pe nehe, i'i wanupe.

<sup>2</sup> Nezewe uez'eg ihewe wà.

— Zeremi, enoz urepytywà àwàm Tupàn Tuweharupi  
Wiko Ma'e pe nehe. Ta'e Mawiron ywy rehe har wanuwhawete  
Namukononozor ureàmàtyry'ym iko a'e xe. Aze  
ru'u Tupàn Tuweharupi Wiko Ma'e uzapo putar pu-  
rumupyтуhegatu kar haw zanewe nehe, Namukonono-  
zor imuzewyr kar pà nehe, peze Zeremi pe nehe, i'i  
wanupe. <sup>3</sup> Na'e Tupàn Tuweharupi Wiko Ma'e uez'eg  
ihewe. Amume'u ize'eg wanupe. <sup>4</sup> — Aiko Tupàn  
Tuweharupi Wiko Ma'e Izaew izuapyapyr izar romo ihe.  
Peraha Zeneki ze'eg iwazar haw izupe nehe kury. —  
Zauxiapékwer Mawiron wanuwhawete wiko Zeruzarez

huwake pàrirogawtà huwake katu pe wemiruze'eg zauxiapekwer wanehe we a'e. Zeneki omono kar putar zauxiapekwer waàmàtyry'ym pà a'e wà nehe. Zauxiapekwer Zeneki hemiruze'eg uzàn putar Namukononozor wi wà nehe. Amono'og putar wapuruzuka haw tawhu myter pe ihe nehe. <sup>5</sup> Ihe Tupàn ihe, apuàmàtyry'ym putar hekàgaw nànàn ihe nehe, hekwahy haw nànàn ihe nehe no, hepuruzukaiwahy haw nànàn nehe no. <sup>6</sup> 'Aw tawhu pupe azuka putar wikuwe ma'e paw rupi ihe wà nehe. Teko a'e wà nehe, ma'ea'yr a'e wà nehe no, umàno putar ma'eahy haw iaiwahy ma'e wi a'e wà nehe. <sup>7</sup> Amo numàno kwaw zeàmàtyry'ymawhu pe wà, ni ma'uhez romo wà, ni ma'eahy haw pupe wà: tuwihawete Zeneki, amo tuwihaw hehe we har wà, amo teko wà. A'e teko paw apyhyk kar putar tuwihawete Namukononozor pe ihe wà nehe, amogwer waàmàtyry'ymar wanupe wanehe ipuruzuka wer ma'e wanupe ihe wà nehe. Namukononozor uzuka kar putar wà nehe. Nupuhareko kwaw wà nehe. Nupuhareko kwaw ni pitài wà nehe. Ihe Tupàn Tuweharupi Wiko Ma'e aze'eg nezewe ihe, i'i Tupàn ihewe, a'e wanupe.

<sup>8</sup> — Emume'u amo ma'e teko wanupe nehe no, i'i Tupàn ihewe kury. — Pezeapyaka katu nehe. Ihe Tupàn Tuweharupi Wiko Ma'e aexak penape ràm peme: penekuwe haw piar, aze ru'u, pemàno àwàm piar. <sup>9</sup> Aze amo upyta 'aw tawhu pupe wà nehe, zauxiapekwer uzuka putar a'e teko zeàmàtyry'ymaw pe wà nehe. Aze ru'u, ma'uhez haw uzuka putar wà nehe. Aze ru'u, ma'eahy haw uzuka putar wà nehe. Aze amo uhem tawhu wi wà nehe, Mawiron parer tawhu izywyr umàmàn ma'e wanupe uzemono pà wà nehe, numàno kwaw wà nehe. Uzepyro putar wekuwe haw ipyhyk pà wà nehe. <sup>10</sup> Ta'e napyro kwaw 'aw tawhu ihe nehe xe. Amumaw putar nehe. Amono putar Mawiron wanuwiawete pe nehe. Umunyk putar tata hehe nehe.

Ukaz paw putar nehe. Ihe Tupàn Tuweharupi Wiko Ma'e aze'eg kwez kury.

*Zeremi uze'eg Zuta wanuwiyawete iànàm wanehe a'e*

<sup>11-12</sup> — Zeremi, eze'eg tuwihawete Tawi izuapyapr wanupe nehe, Zuta wanuwiyawete waànàm wanupe nehe. — Ihe Tupàn Tuweharupi Wiko Ma'e amume'u ko ma'e peme ihe kury. — Pereko katu teko tuweharupi pe wà nehe. Imunar ma'e imunar waiko wama'e rehe wà. Pepyro imunar ma'e wanuwi pe wà nehe. Aze naperuzar kwaw ko ze'eg nehe, penemiano ikatu 'ym ma'e umukaz kar hekwahy haw tata ài nehe. Teko nupuner kwaw imuwe kar haw rehe wà nehe. <sup>13</sup> <sup>13</sup> Zeruzarez, ereiko ywytyr aiha ma'e rehe. Ereiko ywyapypnaz i'aromo. Ereiko itahu ywyapypew i'aromo har ài. Nezewe rehe we ihe Tupàn Tuweharupi Wiko Ma'e uruàmàtyry'ym putar ihe nehe. — Ni amo naheàmàtyry'ym kwaw wà, ta'e ukyze ihewi wà xe, ere iko. — Ni amo nahereityk kwaw wà nehe, ere iko. <sup>14</sup> Ihe Tupàn Tuweharupi Wiko Ma'e azepyk putar nerehe ihe nehe, neremiano kwer hekuzaromo ihe nehe. Amunyk putar tata tàpuzuhu nepupe har rehe nehe. Ukaz putar nehe. Huwake har paw ukaz putar nehe no. Ihe Tupàn Tuweharupi Wiko Ma'e aze'eg kwez kury, ere wanupe nehe, i'i ihewe.

## 22

<sup>1-2</sup> Uze'eg Tupàn ihewe.

— Echo Zuta ywy rehe har wanuwiyawete hàpuzuhu pe nehe kury. Tawi izuapyr romo hekon a'e. Eze'eg a'e pe har wanupe nehe: Tuwihawete, tuwihaw hehe we har wà, teko Zeruzarez pe har wà. — Peinu katu Tupàn Tuweharupi Wiko Ma'e ize'eg nehe kury, ere wanupe nehe, i'i ihewe. <sup>3</sup> — Ihe Tupàn Tuweharupi Wiko Ma'e amume'u ko ma'e peme kury. — Pezapo ikatu ma'e wanupe nehe.

Pemunar zo wama'e rehe nehe. Imunar ma'e imunar waiko wama'e rehe wà. Pepyro imunar ma'e wanuwi pe wà nehe. Pepuraraw kar zo ma'erahy amo ywy rehe arer peywy rehe har wanupe nehe, tu 'ym ma'e wanupe nehe no, kuzà imen umàno ma'e kwer wanupe nehe no. Pezuka zo teko ikatu ma'e 'aw tàpuz ihewe imur katu pyrer pe wà nehe. <sup>4</sup> Aze peruzar tuwe ko heze'eg nehe, a'e mehe Tawi izuapyapyr wiko wiwi putar penuwihawete romo wà nehe. Wixe wiwi putar 'àg ukenawhu rupi ywyramawa rehe wapyk pà wà nehe, kawaru kupe pe wà nehe no, tuwihaw uzehe we har wanupi wà nehe, wemiruze'eg wanupi wà nehe no. <sup>5</sup> Aze naperuzar kwaw heze'eg nehe, a'e mehe amume'uhay ko ma'e herer rehe ihe kury. 'Àg tàpuzuhu uzeapo putar ywytyra'i ita iapo pyrer romo nehe. Ihe Tupàn Tuweharupi Wiko Ma'e aiko ko ma'e imume'u har romo ihe.

<sup>6</sup> Tuwihawete hàpuzuhu Zuta ywy rehe har ipuràg eteahy Zireaz ywy ài a'e, ywytyr Irimano ywy rehe har ài no. Nezewe rehe we azapo putar ywyxiguhu romo ihe nehe. Ni amo nuiko kwaw a'e pe wà nehe. <sup>7</sup> Amono kar putar awa a'e pe ihe wà nehe. Umumaw putar a'e tawhu wà nehe. Paw rupi werur putar utazy wà nehe. Uhaw putar izyta ipuràg eteahy ma'e ywyràkàxigyw iapo pyrer wà nehe, tata pupe waneityk pà wà nehe. <sup>8</sup> A'e re teko amo ywy rehe har tetea'u ukwaw putar huwake uzehezehe upurantu pà wà nehe. — Màràzàwe tuwe Tupàn Tuweharupi Wiko Ma'e uzapo agwer ma'e 'aw tawhu uhua'u ma'e pe a'e, i'i putar wà nehe. <sup>9</sup> Amo umume'u putar wanupe wà nehe. — Hemiaihu upytu'u uze'egaw Tupàn rehe we wemiapo katu kwer heruzar ire wà. Umuwete amo tupàn wà. Uzapò ma'e wanupe wà. Omono ma'e wanupe wà.

*Ze'eg Zeoakaz rehe har*

<sup>10</sup> Teko Zuta ywy rehe har wà, Pezai'o zo tuwihawete Zuzi  
rehe nehe.

Pezemumikahy zo imàno awer rehe nehe.

Pezai'oahy ta'yr Zeoakaz rehe nehe.

Weraha putar xe wi wà no.

Nuzewyr pixik kwaw xe nehe.

Nuxak pixik kwaw ywy uzexak kar awer nehe.

<sup>11</sup> Zeoakaz Zuzi ta'yr upyta u hekuzaromo Zuta ywy rehe  
har wanuwihawete romo a'e.

Tupàn Tuweharupi Wiko Ma'e uze'eg nezewe Zeoakaz  
rehe.

— Oho tuwe xe wi.

Nuzewyr pixik kwaw nehe.

<sup>12</sup> Zauxiapekwer weraha putar amo ae ywy rehe wà nehe.

Umàno putar a'e ywy rehe nehe.

Nuxak wi pixik kwaw ko ywy nehe.

### *Ze'eg Zeoaki rehe har*

<sup>13</sup> Aze amo uzapo tawhu purupe ma'erahy ipuraraw kar  
pà wà nehe, ma'e rehe imunar pà wà nehe,  
aze numekuzar kwaw uwake har wama'erekò haw nehe,  
aze umuma'erekò e kar wà nehe, uzemumikahy putar wà  
nehe, ta'e azepyk putar wanehe nehe xe.

<sup>14</sup> — Azapo putar tawhu uhua'u ma'e ihe nehe,

aze amo i'i nehe.

Azapo putar ipupyakaikaw pyrer uhua'u ma'e i'aromo nehe,  
aze i'i nehe, uzemumikahy putar nehe, ta'e azepyk  
putar hehe nehe xe.

Uzapo putar mèràmèràn ukenaw ywate no.

Upyao putar pàrirogaw ywyràkàxigyw pupe nehe.

Umupiràg putar nehe no.

<sup>15</sup> Erezapo tàpuzuhu ywyràkàxigyw pupe ipyao pyrer ne.  
Ikatu amo tàpuzuhu wi.

Aipo xo a'e rupi zo ereiko tuwihawete romo.

Zuzi neru wiko wyzài tuwihawete ài.

Ikatu a'e. Na'imunar kwaw.

Hemiapo kwer paw ikatu.

<sup>16</sup> Wereko katu hemetarerer 'ym ma'e wà, ma'e hereko  
'ymar wà no.

Heko awer ikatu.

Agwer ma'e iapo har wexak kar hekwaw haw purupe wà.

Ihe Tupàn Tuweharupi Wiko Ma'e aiko ko ma'e imume'u  
har romo ihe.

<sup>17</sup> Xo neremetarerer neremimono'og ràm zo erexak iko.

Erezuka ikatu 'ym ma'e iapo 'ymar ne wà.

Erepuraraw kar ma'erahy teko wanupe wama'e rehe ne-  
munar pà, i'i Tupàn tuwihawete pe.

<sup>18</sup> A'e rupi Tupàn umume'u ko ma'e Zeoaki Zuzi ta'yr  
Zuta ywy rehe har wanuwihawete pe uezapo ma'e ràm xe  
kury.

— Ni amo nuzai'o kwaw Zeoaki imàno awer rehe wà nehe.

— Iaiw imàno awer, hemryrypar, Iaiw imàno awer, ni'i  
kwaw wà nehe.

Ni amo nuzai'o kwaw hehe wà nehe.

Ni amo nuhapukaz kwaw izupe wà nehe.

— Hezar, heruwihawete, ni'i kwaw wà nehe.

<sup>19</sup> Uzutym putar hetekwer zumen umàno ma'e kwer het-  
ekwer ài wà nehe.

Umutyk putar ukenawhu rupi tawhu wi heityk pà katu pe  
wà nehe, i'i Tupàn.

### *Ma'e uezapo ma'e ràm Zeruzarez pe har wanupe*

<sup>20</sup> Teko Zeruzarez pe har wà.

— Peho Irimano ywy rehe penehapukaz pà nehe.

Peho Màxà ywy rehe penehapukazahy pà nehe.

Tuwe teko wenu peze'eg mehe wà nehe, Te ywytyruhu  
Moaw ywy rehe har pe wà nehe.

Ta'e zauxiapekwer weityk ywy rehe har penuwake har  
pemyrypar paw rupi wà xe.

<sup>21</sup> Tupàn uze'eg peme a'e, Peneko haw ikatu mehe a'e.

Nezewe rehe we napecpurenu wer kwaw hehe.

Pekwàkwàmo mehe arer we peiko nezewe.

Naperuzar pixik kwaw Tupàn.

<sup>22</sup> Ywytu umuhàmuhàz putar penuwihaw wà nehe.

Zauxiapekwer weraha putar pemyrypar wemipyhyk kwer  
romo wà nehe.

Uzapo putar tawhu peneko awer ikàg 'ym ma'e romo wà  
nehe, Imaranugar ma'e romo wà nehe no.

Ta'e ikatu 'ym ma'e tetea'u pezapo pe xe.

<sup>23</sup> Peiko ywyràkàxigyw Irimano wi herur pyrer wamtyer  
pe.

— Ni amo nuzapo kwaw ikatu 'ym ma'e zanewe wà nehe,  
peze peiko.

Ma'erahy ihm mehe pekuhegatu putar nehe.

Peiko putar kuzà umemyrzxak kar ma'e ài nehe. Hahy  
putar tuwe peme nehe.

### *Tupàn uzepyk tuwihawete Zoaki rehe*

<sup>24</sup> Tupàn Tuweharupi Wiko Ma'e uze'eg Zoaki Zuta  
ywy rehe har wanuwhawete Zeoaki ta'yr pe kury. —

Amume'eahy ko ma'e hereko haw rehe ihe kury. — Aze  
mo ereiko tuwihawete ikwà ku'aw har hepo awyze har

pe har romo, urenuhem mo ihe. <sup>25</sup> Amo teko ipuruzuka  
wer nerehe wà: Mawiron pe har wanuwhawete Na-

mukononozor, zauxiapekwer hehe we har wà no. Erekyze  
wanuwi. Oromono putar a'e teko wanupe ihe nehe.

<sup>26</sup> Oromono kar putar ywy neremigwaw 'ym pe nehy rehe  
we nehe. Napezexak kar kwaw a'e pe. Pemàno putar a'e

pe nehe. <sup>27</sup> Pemonokatu putar peneha peywy rehe nehe.  
Nezewe rehe we napezewyr kwaw a'e pe nehe, i'i Tupàn.

<sup>28</sup> Na'e aze'eg ihe kury.

— Aze ywy'a uzeka, izar weityk. Nuputar kwaw. Aipo Zoaki wiko ywy'a ài. Zauxiapekwer weraha ywy ikwaw pyr 'ym pe ta'yr wanehe we wà. Mèràzàwe tuwe weraha wà.

<sup>29</sup> O ywy, ywy, ywy.

Einu katu Tupàn hemimume'u kwer nehe.

<sup>30</sup> Tupàn umume'u a'e awa heko àwàm a'e.

— Ereiko putar nera'yr 'ym pà nehe.

Ikàg 'ym ma'e romo ereiko putar nehe.

Naheta kwaw nera'yr Zuta ywy rehe har wanuwhawete  
romo wiko ma'e ràm Tawi zàwenugar wà nehe.

Ihe Tupàn Tuweharupi Wiko Ma'e aze'eg kwez kury.

## 23

### *'Ar ikatu ma'e uhem putar nehe*

<sup>1-2</sup> Tupàn Tuweharupi Wiko Ma'e Izaew wazar umume'u ko ma'e tuwhaw hemiaihu wanehe uzekaiw ma'e wanehe kury. — Pezemumikahy nehe, tuwhaw, aze pezuka kar penemiaihu pe wà nehe, aze pemuhàmuhàz kar pe wà nehe. Napezekaiw kwaw heremiaihu wanehe. Pemuhàmuhàz pe wà. Pemuzàn kar pe wà no. Azepyk putar penehe ihe nehe kury, ikatu 'ym ma'e penemiapo kwer hekuzaromo ihe nehe kury. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>3</sup> Amono'og putar teko wakurer ihe wà nehe, ywy wamuhàz tawer wi ihe wà nehe. Arur wi putar waiwy pe ihe wà nehe. Ta'yr tetea'u putar wà nehe. Heta tetea'u putar wà nehe. <sup>4</sup> Amono putar tuwhaw a'e teko wanupe ihe wà nehe. A'e tuwhaw uzekaiw putar wanehe wà nehe. Nukyze wi kwaw wà nehe. Nukyzeahy kwaw wà nehe. Ni amo nukàzym kwaw wà nehe. Ihe Tupàn Tuweharupi Wiko Ma'e aze'eg kwez kury. <sup>5</sup> Uze'eg wi

Tupàn Tuweharupi Wiko Ma'e kury. — Uhem amo 'ar iko. A'e 'ar mehe amur kar putar amo Tawi izuapyr ihe nehe. Tuwhihawete purereko katu ma'e romo hekon putar nehe. Ma'e kwaw katu haw rupi upureruze'eg putar nehe. Uzapo putar ikatu ma'e ko ywy rehe nehe. Na'imunar kwaw purehe nehe.<sup>6</sup> A'e ma'e izeapo mehe teko Zuta ywy rehe har wiko putar ukyze 'ym pà wà nehe. Izaew ywy rehe har wiko putar zeàmàtyry'ym 'ymaw rehe wà nehe no. Na'aw a'e tuwhihawete her xe: Tupàn Tuweharupi Wiko Ma'e zanepyro haw, i'i putar teko izupe wà nehe.

<sup>7</sup> Uhem a'e 'ar iko kury, i'i Tupàn Tuweharupi Wiko Ma'e. — Aiko Izaew wazar romo. Apyro izuapyapyr Ezit ywy wi ihe wà. A'e 'ar ur ma'e ràm mehe teko numume'eahy kwaw wemiapo ràm Ezit wi teko wamuhem kar arer rehe wà nehe.<sup>8</sup> Umume'eahy putar wemiapo ràm ywy kwarahy heixe haw awyze har kutyr har wi wamuzewyr kar har rehe wà nehe, herer rehe imume'eahy rehe wà nehe. Amuzewyr kar putar ywy wamuhàmuhàz tawer nànàñ ihe wà nehe no. Wiko putar uiwy rehe wà nehe.

*Zeremi uze'eg Tupàn ze'eg imume'u har wanehe*

<sup>9</sup> Amume'u ko ma'e Tupàn ze'eg imume'u har wanehe no.

— Hepy'a uzemumikahy.

Aryryryryrz.

Aiko uka'u ma'e ài.

Nazawy kwaw awa win tetea'u i'u romo arer romo ihe,

Ta'e Tupàn Tuweharupi Wiko Ma'e uze'eg ihewe a'e xe.

Ize'eg ikatuahy ma'e hemukyze kar a'e.

<sup>10</sup> Ko ywy tynehem wemireko 'ym puhe wiko ma'e pupe.

Teko wiko ikatu 'ym ma'e iapo pà wà.

Ummaw e ukàgaw wà.

Tupàn umur uze'egaiw ywy rehe. A'e rupi ywy uzai'o.

Uxinig ka'api'i ma'ea'yr wanemi'u, a'e ihe.

<sup>11</sup> Na'e Tupàn Tuweharupi Wiko Ma'e uze'eg kury.

— Heze'eg imume'u har wà, Xaxeto wà no, na'ipurukwaw  
wer kwaw herehe wà.

Aexak ikatu 'ym ma'e iapo mehe tàpuzuhu pupe ihe wà.

<sup>12</sup> Wanape ipytunahy putar wanupe nehe.

Nazawaiw kwaw wazepytyrykahy haw nehe.

Amuzepyapi kar putar ihe wà nehe. Amu'ar kar putar ihe  
wà nehe no.

Amur kar putar iaiw paw wanehe nehe.

Ta'e wanehe hezepyk àwàm uhem wà iko a'e xe.

Ihe Tupàn Tuweharupi Wiko Ma'e aiko ko ma'e imume'u  
har romo ihe.

<sup>13</sup> Aexak heze'eg imume'u har Xamari pe har ikatu 'ym  
ma'e iapo mehe ihe wà.

Umume'u Ma'aw ze'eg teko wanupe wà.

Uzapo kar ikatu 'ym ma'e Izaew wanupe wà.

<sup>14</sup> Aexak heze'eg imume'u har Zeruzarez pe har ihe wà no.

Iaiw wera'u ma'e uzapo waiko wà.

Uker wemireko 'ym puhe wà. Hemu'em wà.

Upytwà amo ikatu 'ym ma'e iapo mehe wà.

Nezewé mehe ni amo nupytu'u kwaw ikatu 'ym ma'e iapo  
re wà.

Paw rupi wiko Xotom tawhu kwehe mehe arer wazàwe  
herenataromo wà.

Iaiw teko Komor parer wazàwe wà.

<sup>15</sup> A'e rupi ihe Tupàn Tuweharupi Wiko Ma'e upuner  
wera'u ma'e ihe, Amume'u ko ze'eg heze'eg  
imume'u har Zeruzarez pe har wanehe ihe.

A'u kar putar ka'a iro ma'e wanupe ihe nehe.

A'u kar putar 'y puruzuka ma'e wanupe nehe no.

Ta'e umuhàmuhàz herehe uzeruzar 'ymaw ko ywy nàñàñ  
a'e wà xe.

<sup>16</sup> Tupàn Tuweharupi Wiko Ma'e upuner wera'u ma'e uze'eg teko Zeruzarez pe har wanupe kury.

— Peinu zo heze'eg imume'u har waze'eg nehe. Ta'e hemu'em peme a'e wà xe. Umume'u ikatu ma'e uzeapo ma'e ràm peme wà. Nuzeapo kwaw a'e ikatu ma'e nehe. A'e ae ima'enukwaw e ma'e rehe imume'u pà peme wà. Numume'u kwaw heze'eg awer peme wà.

<sup>17</sup> Uze'eg wiwi heze'eg rehe uzekaiw 'ym ma'e wanupe wà. — Xo ikatu ma'e zo uezapo putar nehe, i'i mua'u wà. Uze'eg hereruzar 'ymar wanupe wà no. — Iaiw haw nu'ar kwaw penehe nehe, i'i mua'u wà.

<sup>18</sup> Na'e aze'eg ihe.

— Aipo amo Tupàn ze'eg imume'u har ukwaw tuwe Tupàn Tuweharupi Wiko Ma'e ima'enukwaw paw a'e. Aipo amo wexak ize'eg. Aipo amo wenu ize'eg. Aipo amo uzekaiw hehe. Aipo amo weruzar, a'e ihe.

<sup>19</sup> Aze'eg wi.

— Tupàn Tuweharupi Wiko Ma'e ikwahy haw nuzawy kwaw ywytuaiw. Nuzawy kwaw ywytu uzewara ma'e ikatu 'ym ma'e waàkàg wanehe. <sup>20</sup> Tupàn uzapo putar wemimume'u kwer paw rupi katete nehe. Xo a'e mehe zo ikwahy haw upytu'u putar nehe. Amo 'ar mehe hemiaihu ukwaw katu putar ko ma'e a'e wà nehe, a'e ihe.

<sup>21</sup> Tupàn Tuweharupi Wiko Ma'e uze'eg kury.

— Namono kar kwaw 'aw heze'eg imume'u har purupe ihe wà. Nezewe rehe we uzàn oho purupe herer rehe uze'eg pà wà. <sup>22</sup> Aze mo ukwaw hem'enukwaw paw wemigwaw 'ym wà, upuner mo imume'u haw rehe purupe wà. A'e mehe mo weityk kar mo ikatu 'ym ma'e iapo haw heremiaihu wanupe. Umupytu'u kar mo ikatu 'ym ma'e romo waneko re wà nehe. <sup>23</sup> Aiko Tupàn ywy nànàñ wiko ma'e romo taw nànàñ wiko ma'e romo ywak nànàñ wiko ma'e romo ihe. Naiko kwaw pitài taw pe ihe. Ihe Tupàn

Tuweharupi Wiko Ma'e aiko ko ma'e imume'u har romo ihe.<sup>24</sup> Ni amo nupuner kwaw uzemimaw rehe wà. Aexak putar ihe wà nehe. Aipo napekwaw kwaw ywy nànàn ywak nànàn hereko haw.<sup>25</sup> Akwaw a'e heze'eg imume'u har hemu'em ma'e herer rehe waze'eg mehe ihe. — Tupàn umume'u uze'eg ihewe hepuahu mehe a'e, i'i mua'u wà.<sup>26</sup> Màràn 'ar a'e heze'eg imume'u har umumaw putar heremiaihu wanupe wemu'em pà wà nehe, wemu'emaw imume'u pà wanupe wà nehe.<sup>27</sup> — Wanu heharaz Tupàn wi Ma'aw imuweste mehe wà. Aze ximume'u zanepuahu temu'emaw tekò wanupe nehe, heharaz putar Tupàn wi wà nehe no, wàmuz wazàwe wà nehe no, i'i uezupe wà.<sup>28</sup> Aze heze'eg imume'u har upuahu e nehe, — Apuahu e ihe, tuwe i'i nehe. Aze wenu tuwe heze'eg nehe, tuwe umume'u katu purupe nehe. Aipo iapirer ikatu wera'u aroz wi.<sup>29</sup> Heze'eg nuzawy kwaw tata. Nuzawy kwaw itahu izukazuka haw. Ihe Tupàn Tuweharupi Wiko Ma'e aiko ko ma'e imume'u har romo ihe.<sup>30</sup> Amo heze'eg imume'u har imunar amo ze'eg rehe uzewizewi wà. — Tupàn ze'eg, i'i mua'u uezupeupe wà.<sup>31</sup> Amo numume'u kwaw heze'eg wà. Umume'u uze'eg wà. Nezewe rehe we — Tupàn ze'eg, i'i uze'eg pe wà. Agwer awa na'ikatu kwaw ihewe wà.<sup>32</sup> Peinu katu ko ze'eg heremimume'u nehe. Aiko Tupàn Tuweharupi Wiko Ma'e romo ihe. Amo heze'eg imume'u har upuahu wà. Wapuahu haw tynehem temu'emaw pupe. Nezewe rehe we umume'u tekò wanupe wà. Umume'u a'e upuahu awer wà, temu'emaw imume'u pà ukatu haw imume'u pà heremiaihu wanupe pe iawy kar pà wà. Ihe namono kar kwaw a'e awa tekò wanupe. Naiko kwaw wamono kar har romo. Nupytywà pixik kwaw heremiaihu wà. Ihe Tupàn Tuweharupi Wiko Ma'e aze'eg nezewe kury.

*Aipo ipuhuz katu Tupàn hemiapo kar*

<sup>33</sup> Tupàn Tuweharupi Wiko Ma'e uze'eg ihewe kury.

— Zeremi, i'i. — Amo upuranu putar nerehe wà nehe: heremaihu wà, heze'eg imume'u har wà, xaxeto wà. — Ma'enugar ipuhuz ma'e Tupàn Tuweharupi Wiko Ma'e uzapo kar putar urewe nehe, aze i'i newe wà nehe, — Peiko ipuhuz ma'e Tupàn Tuweharupi Wiko Ma'e pe, peneityk putar a'e nehe, ere wanupe nehe. <sup>34</sup> — Amo uze'eg putar nezewe wà nehe: heremaihu wà, heze'eg imume'u har wà, xaxeto wà. — Tupàn Tuweharupi Wiko Ma'e ize'eg ipuhuz katu urewe a'e, aze i'i wà nehe, azepyk putar imume'u arer rehe nehe. Azepyk putar iànàm ihe wà nehe no. <sup>35</sup> Na'ikatu kwaw agwer ma'e imume'u haw. — Ma'in Tupàn Tuweharupi Wiko Ma'e ureze'eg iwazar mehe, aze i'i umyrypar wanupe wàñàm wanupe nehe, — Ma'in Tupàn Tuweharupi Wiko Ma'e a'e, aze i'i nehe, a'e mehe ize'eg ikatu putar ihewe nehe. <sup>36</sup> — Tupàn Tuweharupi Wiko Ma'e ize'eg ipuhuz katu urewe, tuwe ni'i pixik kwaw wà nehe. Aze amo uze'eg nezewe nehe, azapo putar heze'eg ipuhuz katu ma'e romo izupe azeharomoete ihe nehe. Teko uzapo heze'eg amo ma'e romo a'e wà. Ihe aiko Tupàn Tuweharupi Wiko Ma'e romo wazar romo Tupàn Wikuwe Ma'e romo upuner wera'u ma'e romo ihe. <sup>37</sup> Zeremi. Epuranu heze'eg imume'u har nàñàñ nehe. — Ma'enugar iwazar haw Tupàn Tuweharupi Wiko Ma'e umume'u newe a'e, ere wanàñàñ. — Ma'in Tupàn Tuweharupi Wiko Ma'e a'e, ere wanehe nepuranu pà. <sup>38</sup> — Tupàn Tuweharupi Wiko Ma'e ize'eg ipuhuz katu a'e, aze i'i newe wà nehe, a'e mehe azepyk putar wanehe nehe, ta'e umume'u a'e ze'eg a'e wà xe, ta'e — Pemume'u zo a'e ze'eg nehe, a'e wanupe ihe xe. <sup>39</sup> Azeharomoete apyhyk putar ihe wà nehe. Aityk putar muite hezewi nehe. Kwehe mehe amumaw waipy ihe wà. Amumaw

putar tawhu wanupe heremimono kwer ihe nehe no.  
<sup>40</sup> Amu'ar putar maranugar haw upaw pixik 'ym ma'e ràm wanehe ihe nehe. Amu'ar putar iaiw haw upaw pixik 'ym ma'e ràm wanehe ihe nehe no. Naheharaz pixik kwaw izuwi wà nehe.

## 24

*Mokoz kok ipor pi i'a kwer*

<sup>1-2</sup> Aexak ma'e hepuahu haw zàwenugar ihe. A'e ma'e uzeapo Namukononozor Mawiron ywy rehe har wanuwihawete iho re. Weraha Izaew izuapyapyr wemipyhyk kwer romo wà, Zeruzarez tawhu wi uiwy pe wà. Weraha teko tetea'u wà: Zuta ywy rehe har wanuwihawete Zuaki Zeoaki ta'yr, amo tuwhiaw Zuta ywy rehe har wà, ywyra kixi har wà, amo ma'e zawaiw ma'e iapo haw kwaw par wà. A'e puahu zàwenugar hexak mehe Tupàn Tuweharupi Wiko Ma'e wexak kar mokoz kok ipor pi i'a kwer tàpuzuhi henataromo har. Kok ipy pupe heta pi i'a kwer ikatuahy ma'e hete na'arewahy ma'e. Inugwer kok pupe heta pi i'a kwer iaiw ma'e. Iaiw tuwe a'e. Teko nupuner kwaw i'u haw rehe wà. <sup>3</sup> Na'e Tupàn Tuweharupi Wiko Ma'e upuranu herehe.

— Zeremi, ma'e erexak iko, i'i ihewe. — Pi i'a kwer, a'e izupe. — Ikatu ma'e ikatuahy a'e. Iaiw ma'e iaiwahy a'e. Teko nu'u kwaw wà, a'e izupe. <sup>4</sup> Na'e Tupàn uze'eg ihewe.

<sup>5</sup> Ihe Tupàn Tuweharupi Wiko Ma'e Izaew wazar ihe, amume'u ko ma'e newe ihe kury. Izaew izuapyapyr Mawiron pe heraha pyrer nuzawy kwaw pi i'a kwer ikatu ma'e wà. Apuhareko putar ihe wà nehe. <sup>6</sup> Azekaiw putar wanehe nehe. Aruzewyr putar ko ywy rehe ihe wà nehe no. Azapo wi putar teko imono'og pyrer romo ihe wà nehe. Namumaw kwaw ihe wà nehe. Azutym putar ma'eà'yz ài ihe nehe. Nazo'ok kwaw nehe. <sup>7</sup> Amono putar

heputar haw wapy'a pupe nehe. A'e mehe ipurukwaw wer putar Tupàn Tuweharupi Wiko Ma'e romo hereko haw rehe wà nehe. A'e mehe wiko putar heremiaihu romo wà nehe. Aiko putar wazar romo ihe nehe no. Ta'e uzewyr putar tuwe ihewe wà nehe xe. <sup>8</sup> Ihe Tupàn Tuweharupi Wiko Ma'e areko putar amo teko pi i'a kwer iaiw ma'e ài ihe wà nehe. Teko nu'u kwaw a'e pi i'a kwer wà. Nezewegatete nazapo kwaw ikatu ma'e a'e teko wanupe nehe no: Zuta ywy rehe har wanuwhawete Zeneki, tuwhaw hehe we har wà, teko Zeruzarez pe har ko ywy rehe wikuwe ma'e wà, teko Zeruzarez pe har Ezit pe oho ma'e kwer wà. <sup>9</sup> Amu'ar putar iaiw haw uhua'u ma'e wanehe ihe nehe. Teko ywy nànànar ipytuhegatu putar ukyze pà hexak mehe wà nehe. Teko upuka putar wanehe wà nehe. Umume'u putar purumupuka kar haw wanehe uze'eg uryweteahy pà wà nehe. Amuhàmuhàz putar ywy tetea'u rehe ihe wà nehe. Teko a'e ywy rehe har umume'eahy iaiw haw a'e teko waner rehe we wà nehe. <sup>10</sup> Amono kar putar ikatu 'ym ma'e wakutyr ihe nehe: zeàmàtyry'ymawhu, ma'uhez haw, ma'eahy haw. Te ukàzym putar a'e ywy wi wà nehe, ywy wanupe waipy wanupe heremimono kwer wi wà nehe.

## 25

*Mawiron wanuwhawete weraha teko wemipyhyk romo wà*

<sup>1</sup> Zeoaki Zuzi ta'yr Zuta ywy rehe har wanuwhawete romo heko mehe 4 haw kwarahy mehe Tupàn Tuweharupi Wiko Ma'e umume'u uze'eg ihewe, teko Zuta ywy rehe har rehe uze'eg pà a'e kury. A'e ma'e uzeapo Namukononozor Mawiron ywy rehe har wanuwhawete romo heko mehe pitài haw kwarahy mehe no. <sup>2</sup> Na'e amume'u a'e ma'e Zuta ywy rehe har nànàn Zeruzarez pe har nànàn no.

<sup>3</sup> — Tupàn Tuweharupi Wiko Ma'e umumaw 23 kwarahy ihewe uze'eg pà a'e. Uzypyrog ihewe uze'eg pà Zuzi Amon ta'yr tuwihawete romo heko mehe Zuta ywy rehe. Uze'eg tuweharupi ihewe te ko 'ar rehe. Tuweharupi amume'u ize'eg peme. Nezewe rehe we napezekaiw kwaw ize'eg rehe. <sup>4</sup> Tuweharupi Tupàn Tuweharupi Wiko Ma'e umur kar wemiruze'eg uze'eg imume'u har peme a'e wà. Nezewe rehe we napeinu kwaw. Napezekaiw kwaw ize'eg rehe. <sup>5</sup> — Peityk peneko haw ikatu 'ym ma'e nehe, i'i zepe peme wà. — Pepytu'u ikatu 'ym ma'e iapo re nehe, i'i zepe peme wà. Aze mo peruzar waze'eg, pepuner mo ko ywy peme peipy wanupe Tupàn hemimur kwer rehe peneko haw rehe. Peiko mo ko ywy izar romo tuweharupi no. <sup>6</sup> — Pekar zo amo tupàn penemimuwe ràm romo pe wà nehe, i'i peme wà. — Pezapo zo tupàn a'ua'u Tupàn Tuweharupi Wiko Ma'e imuikwahy kar pà pe wà nehe, i'i peme wà. <sup>7</sup> Tupàn Tuweharupi Wiko Ma'e a'e ae uze'eg nezewe a'e. — Na'ipurenu wer kwaw herehe wà, i'i. Pemuikwahy kar Tupàn Tuweharupi Wiko Ma'e tupàn a'ua'u wamuwete pà. A'e rupi uzepyk penehe.

<sup>8</sup> Napepurenu wer kwaw ize'eg rehe. A'e rupi Tupàn Tuweharupi Wiko Ma'e upuner wera'u ma'e umume'u uze'eg kury. <sup>9</sup> — Arur kar putar teko kwarahy heixe haw awyze har kutyr har paw rupi ihe wà nehe. Arur kar putar heremiruze'eg Namukononozor Mawiron pe har nehe no. Arur putar a'e teko Zuta ywy rehe har waàmàtyry'ym kar pà wanupe ihe wà nehe, ywy ko ywy huwake har waàmàtyry'ym kar pà wanupe ihe wà nehe no. Amumaw putar paw rupi ihe wà nehe. Nuzeupir pixik kwaw wà nehe. — Iaiw wà, i'i putar teko a'e teko wanexak mehe wà nehe. Ipytuhegatu putar wanexak mehe wà nehe. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>10</sup> Pehapukaz penurywete pà. Penurywete

penehapukaz pà. Penurywete zerekò haw pe. Amumaw putar penurywete haw ihe nehe. Naheta kwaw penemi'u ràm nehe. Naheta kwaw uri kawer tatainny ipor romo peme nehe.<sup>11</sup> Amumaw putar ko ywy paw rupi ihe nehe. — Iaiw, i'i putar teko hexak mehe wà nehe. Mawiron wanuwhawete umumaw putar 70 kwarahy teko paw wazar romo wiko pà nehe.<sup>12</sup> A'e re azepyk putar Mawiron ywy rehe har wanehe ihe nehe, wanuwhawete rehe ihe nehe no, wanemipa kwer ikatu 'ym ma'e hekuzaromo ihe nehe. Amumaw putar waiwy nehe. Na'ikatu wi pixik kwaw nehe. Ihe Tupàn Tuweharupi Wiko Ma'e aiko ko ma'e imume'u har romo ihe.<sup>13</sup> Amume'u wanehe hezepyk àwàm tetea'u ihe. Amuapyk kar a'e ma'e ko pape rehe. Zeremi umume'u a'e ma'e paw purupe no. Azapo putar a'e ma'e paw rupi katete ihe nehe.<sup>14</sup> Wiko putar ywy tetea'u wanehe har wanupe uma'erekò e ma'e romo wà nehe. Tuwhawete upuner ma'e wiko putar wazar romo wà nehe no. Nezewe umekuzar putar wanemipa kwer paw ihewe wà nehe.

*Tupàn uzepyk putar ywy nànànar wanehe nehe*

<sup>15</sup> Tupàn Tuweharupi Wiko Ma'e Izaew wazar uze'eg ihewe.

— Nako kanek puku hekwahy haw win zàwenugar pupe tynehem ma'e xe kury. Epyhyk kury. Oromono kar putar teko tetea'u wanupe ihe nehe. E'u kar ipor wanupe paw rupi nehe.<sup>16</sup> I'u mehe uryryryryz putar wà nehe. He'o putar wà nehe no. Ta'e amono kar putar zeàmàtyry'ymawhu wanupe ihe nehe xe. Iaiw putar wanupe nehe, i'i ihewe.

<sup>17</sup> Na'e apyhyk kanek puku Tupàn Tuweharupi Wiko Ma'e ipo wi ihe kury. Tupàn hemono kar teko tetea'u wanupe. A'u kar ipor wanupe paw rupi ihe.<sup>18</sup> Teko

Zeruzarez pe har wà, Zuta ywy rehe har wà no, wanuwhawete wà, wanuwhawete wà no, paw rupi u'u wà. I'u re waiwy uezapo ywyxiguhu romo. — Iaiw, i'i teko hexak mehe wà. Ukyzeahy hexak mehe wà. Ze'egaiw purehe imono mehe teko umume'u a'e ma'e her wà. Ko 'ar rehe nezewe hekon a'e no. <sup>19-26</sup> Teko tetea'u u'u a'e kanek por Tupàn ikwahy haw win zàwenugar a'e wà. Na'aw waner xe wà:

Ezit ywy rehe har wanuwhawete wà.  
 Tuwhihaw hehe we har wà.  
 Amo tuwhihaw a'e ywy rehe har wà.  
 Ezit ywy rehe har paw wà.  
 Amo ywy rehe arer Ezit ywy rehe wiko ma'e wà.  
 Uz ywy rehe har wanuwhawete paw wà.  
 Tawhu Piri ywy rehe har waiwy rehe har wanuwhawete wà.  
 Na'aw a'e tawhu waner xe wà:  
 Akerom, Kaz, Akerom, Azenoz ikurer.  
 Enom ywy rehe har paw wà.  
 Moaw ywy rehe har paw wà.  
 Amon ywy rehe har paw wà.  
 Xir tawhu wanuwhawete paw wà.  
 Xitom tawhu wanuwhawete paw wà.  
 Ywy Mezitehàn ryhyu izywyr har rehe har wanuwhawete  
     paw wà.  
 Nenà tawhu pe har paw wà.  
 Tema tawhu pe har paw wà.  
 Muz tawhu pe har paw wà.  
 Teko u'aw iaikwer ma'e romo imonohokar paw wà.  
 Araw ywy rehe har wanuwhawete paw wà.  
 Ywyxiguhu rehe har wanuwhawete paw wà.  
 Ziniri wanuwhawete paw wà.  
 Eràw wanuwhawete paw wà.  
 Mez wanuwhawete paw wà.

Kwarahy heixe haw awyze har kutyr har wanuwhawete  
paw wà.

Muite har wanuwhawete paw wà.

Muite 'ymar wanuwhawete paw wà.

Pitaitaigatu u'u kanek puku ipor wà.

Pitaitaigatu Tupàn uzepyk wanehe.

Ywy nànànar u'u wà.

Iahykaw rehe Mawiron ywy rehe har wanuwhawete u'u  
putar nehe.

<sup>27</sup> Na'e Tupàn uze'eg ihewe kury.

— Emume'u ko heze'eg teko wanupe nehe. — Ihe Tupàn Tuweharupi Wiko Ma'e upuner wera'u ma'e Izaew wazar ihe, a'u kar a'e kanek por teko wanupe kury. Amono kar putar zeàmàtyry'ymawhu wanupe kanek por romo nehe. U'u tetea'u putar wà nehe, te uka'u pà wà nehe, te uhuhuk pà wà nehe, te u'ar pà wà upu'äm wi haw rehe upuner 'ym pà wà nehe. <sup>28</sup> Aze na'ipurupyhyk wer kwaw kanek rehe opo pupe wà nehe, Zeremi, — Nuru'u kwaw nehe, aze i'i wà nehe, eze'eg nezewe wanupe nehe. — Tupàn Tuweharupi Wiko Ma'e upuner wera'u ma'e u'u kar putar peme a'e nehe, ere wanupe nehe. <sup>29</sup> Azypyrog putar ma'e imumaw pà tawhu herenaw heityk pà ihe nehe. — Zazepyro putar heityk àwàm wi nehe, aipo i'i uzeupeupe wà. Nan. Azepyk putar wanehe nehe. Ta'e amono kar putar zeàmàtyry'ymawhu teko ywy nànànar wanupe ihe nehe xe. Ihe Tupàn Tuweharupi Wiko Ma'e upuner wera'u ma'e aze'eg nezewe ihe kury.

<sup>30</sup> Ne Zeremi, emume'u ko heze'eg paw teko wanupe nehe.

— Tupàn Tuweharupi Wiko Ma'e wànoànog putar 'a pe ywak rehe a'e nehe.

Uze'eg putar weko haw pe wiko mehe nehe.

Wànoànog putar wemiaihu wakutyr nehe.

Teko uhapukaz ma'ywa ikamik mehe wà. Heremaihu uhapukaz putar nezewe wanehe heànoànog mehe wà nehe no.

Teko ywy nànànar paw wenu putar wà nehe.

<sup>31</sup> Paw rupi wenu putar iànoànog mehe wà nehe.

Ta'e Tupàn ipurumume'u wer teko ywy nànànar wanemapo kwer ikatu 'ym ma'e rehe a'e xe.

Umume'u putar teko paw wanemapiro kwer nehe.

Uzuka putar ikatu 'ym ma'e wà nehe.

Tupàn Tuweharupi Wiko Ma'e uze'eg kwez kury.

<sup>32</sup> Tupàn Tuweharupi Wiko Ma'e Upuner Wera'u Ma'e uze'eg nezewe. — Iaiw haw uhem amo ywy wi amo pe nehe. Na'e oho putar a'e ywy wi amo ywy rehe nehe no. Ywy nànàn oho putar nehe. Ywytuaiw zàwenugar uzemuàgà'ym iko ywy iahykaw rehe. <sup>33</sup> A'e 'ar mehe Tupàn Tuweharupi Wiko Ma'e umuhàmuhàz putar teko wanetekwer wemizuka kwer ywy nànàn wà nehe. Ni amo nuzai'o kwaw wanehe wà nehe. Weityk e ywy rehe tepuxipuxi kwer ài wà nehe.

<sup>34</sup> Pe tuwihaw wà. Peneiheihem nehe. Peiko heremaihu wanehe uzekaiw ma'e romo. Peneiheihemahy nehe. Pezai'o ywy rehe pewapewak nehe no. Pezuka haw 'ar uhem kwez kury. Pe'ar putar nehe, ta'e pezuka putar àràpuhàràn hexaexak pyrer ài a'e wà nehe xe.

<sup>35</sup> Teko wanuwihaw nuhem kwaw umàno haw wi wà nehe, nuzepyro kwaw wà nehe. <sup>36-37</sup> Heiheihem putar ukuhem pà ma'erahy ipuraraw mehe wà nehe. Ta'e Tupàn umumaw waànàm a'e wà xe. Ta'e wikwahy a'e xe. Waiwy tynehem zeàmàtyry'ym 'ymaw pupe. Nezewe rehe we umumaw. <sup>38</sup> Zàwàruhu iriàw weityk weko awer. Nezewegatete Tupàn weityk wemiaihu wà. Puruzuka haw

zeàmàtyry'ymawhu pe har a'e nehe, Tupàn ikwahy haw a'e nehe, ipuruzukaiwahy haw a'e nehe, uzapo putar ko ywy ywyxiguhu romo a'e nehe.

## 26

### *Ipuruzuka wer Zeremi rehe wà*

<sup>1</sup> Zeoaki Zuzi ta'yr wiko Zuta ywy rehe har wanuwihawete romo. <sup>2</sup> A'e 'ar mehe we Tupàn Tuweharupi Wiko Ma'e uze'eg ihewe.

— Epyta tàpuzuhu huwake katu pe nehe. Teko ur tawhu Zuta ywy rehe har wi hemuwete pà tàpuzuhu pupe wà. Emume'u heze'eg heremimume'u karer paw a'e teko wanupe nehe. Emume'u paw rupi nehe. Eityk zo ni pitài ze'eg nehe. <sup>3</sup> Aze ru'u uzekaiw putar neze'eg rehe wà nehe. Aze ru'u upytu'u pe ikatu 'ym ma'e rupi wata re wà nehe. — Amu'ar putar iaiw haw wanehe ihe nehe, ta'e uzapo ikatu 'ym ma'e herenataromo a'e wà xe. Aze wezar wape ikatu 'ym ma'e wà nehe, namu'ar kwaw nehe.

<sup>4</sup> — Emume'u amo ma'e teko wanupe nehe kury, i'i Tupàn ihewe. — Ihe Tupàn Tuweharupi Wiko Ma'e amume'u ko ma'e peme kwehe mehe ihe. — Hereruzar pe nehe, peata peho hepurumu'e haw peme heremimur kwer rupi nehe, a'e peme. <sup>5</sup> — Peinu heremiruze'eg heze'eg imume'u har waze'eg nehe. Tuweharupi amono kar pepyr ihe wà. Naperuzar kwaw waze'eg. <sup>6</sup> Kwehe mehe amumaw Xiro taw ihe. Aze napeinu kwaw nehe, amumaw putar 'àg tàpuzuhu nezewegatete ihe nehe no. A'e mehe teko ywy nànànar umume'u putar 'aw tawhu her ze'egaiw imono mehe amo rehe wà nehe. <sup>7</sup> Xaxeto a'e wà, Tupàn ze'eg imume'u har a'e wà, teko paw a'e wà no, herenu ko ma'e imume'u mehe tàpuzuhu huwake katu pe a'e wà.

<sup>8</sup> Tupàn Tuweharupi Wiko Ma'e ze'eg hemimume'u karer paw imume'u pawire xaxeto wà, Tupàn ze'eg imume'u har wà no, teko wà no, hepyhyk uhapukaz pà wà kury. — Eremàno putar na'arewahy a'e ze'eg imume'u haw rehe nehe kury, i'i ihewe wà. <sup>9</sup> Tupàn uze'eg nezewe a'e, ere urewe. — Kwehe mehe amumaw Xiro taw ihe. Amumaw putar 'àg tàpuzuhu nezewegatete ihe nehe no. Amumaw putar 'aw tawhu ihe nehe no. Ni amo nuiko kwaw ipupe wà nehe, ere urewe Tupàn her rehe. Màràzàwe tuwe ereze'eg nezewe, i'i ihewe wà. Na'e teko uzemono'og heywyr tàpuzuhu huwake katu pe wà kury.

<sup>10</sup> Amo umume'u a'e ma'e tuwhihaw Zuta ywy rehe har wanupe kury. A'e rupi uhem tuwhihawete hàpuzuhu wi wà wenaw rehe wapyk pà wà kury, tàpuzuhu hukenawahu ipyahu ma'e pe wà kury. <sup>11</sup> Na'e xaxeto wà, Tupàn ze'eg imume'u har wà no, uze'eg tuwhihaw wanupe wà, teko wanupe wà no. — Xiuka 'aw awa nehe, ta'e uze'eg zemueteahy tawhu zanerekohaw rehe a'e xe. Peinu izel'eg mehe.

<sup>12</sup> Na'e aze'eg ihe kury.

— Tupàn Tuweharupi Wiko Ma'e hemur kar a'e ma'e 'àg tàpuzuhu rehe har 'aw tawhu rehe har paw imume'u kar pà ihewe a'e. <sup>13</sup> Petyryk ikatu 'ym ma'e iapo haw wi nehe. Peruzar Tupàn ze'eg nehe, a'e peme. Aze pezapo nezewe haw nehe, Tupàn uzewyr putar uze'eg awer wi nehe, Numur kar kwaw a'e iaiw haw penehe nehe. <sup>14</sup> Ihe aiko pepo pe. Aze amo penemiapo ràm ikatu peme nehe, pezapo a'e ma'e ihewe nehe. <sup>15</sup> Xo pitài ma'e zo pekwaw nehe. Aze hezuka pe nehe, pe nehe, teko 'aw tawhu pe har wà nehe no, peiko putar awa ikatu ma'e izuka arer romo nehe. Ta'e Tupàn wiko a'e ma'e paw imume'u kar har romo a'e xe.

<sup>16</sup> Na'e tuwihaw wà, teko wà no, uze'eg xaxeto wanupe wà, Tupàn ze'eg imume'u har wanupe wà no. — Pezuka zo 'aw awa nehe. Ta'e uze'eg Tupàn Tuweharupi Wiko Ma'e Zanezar her rehe a'e xe.

<sup>17</sup> Na'e amo tuwihaw tua'uhez wera'u ma'e upu'äm wà kury, teko uzemono'og ma'e kwer wanupe uze'eg pà wà kury.

<sup>18</sup> — Ezeki Zuta ywy rehe har wanuwhawete romo heko mehe Tupàn ze'eg imume'u har Mikez her ma'e Morezet pe har umume'u Tupàn Tuweharupi Wiko Ma'e upuner wera'u ma'e ize'eg teko wanupe a'e. Na'aw a'e ze'eg xe.

— Zeruzarez uzeapo putar ywytyr ita iapo pyrer romo nehe.

Uma'erekò ma'e uwykawyka putar Xiàw ywytyr ko àì wà nehe.

Tàpuzuahu henaw uzeapo putar ka'a romo nehe, i'i.

<sup>19</sup> Uze'eg wi tuwihaw wà kury.

— Tuwihawete Ezeki a'e, teko Zuta ywy rehe har a'e wà no, aipo uzuka Mikez a'e wà. Nan. Ezeki ukyze Tupàn Tuweharupi Wiko Ma'e wi a'e. Uzeagaw hemimutar iapo pà. Tupàn Tuweharupi Wiko Ma'e uzewyr iaiw haw wanehe imu'ar pyràm wemimume'u kwer wi a'e. Aze xiuka 'aw awa nehe, aipo ximu'ar kar putar iaiw haw zanezehe nehe, i'i wà.

<sup>20</sup> — Amo awa uze'eg Tupàn Tuweharupi Wiko Ma'e her rehe a'e no. Uri her romo a'e. Xemai ta'yr romo Kiriat-Zeàri tawhu pe har romo hekon. Uze'eg 'aw tawhu kutyr, ko ywy rehe har wakutyr no, Zeremi zàwegatete no. <sup>21</sup> Amo umume'u Uri hemimume'u kwer tuwihawete Zeoaki pe, zauxiapekwer wanupe no, tuwihaw wanupe no. Henu mehe tuwihawete uzuka kar Uri kury. Uri ukwaw uzuka àwàm. Ukyze. A'e rupi uzàn oho Ezit pe. <sup>22</sup> Nezewé

rehe we tuwihawete Zeoaki omono kar Ewnàtà Akimor ta'yr Ezit pe a'e. Omono kar amo awa wà no. — Pepyhyk Uri nehe, i'i wanupe. <sup>23</sup> Werur Uri Ezit wi wà. Omono Zeoaki pe wà. Uzuka kar wanupe a'e. — Peityk hetekwer tywypaw pe nehe, i'i wanupe.

<sup>24</sup> Nahemono kwaw teko wanupe hezuka kar pà a'e wà, ta'e Àikà Xàpà ta'yr nahemono kwaw wanupe a'e xe.

## 27

### *Ma'e kawaru kupe pe har ywyra iapo pyrer*

<sup>1</sup> Zeneki Zuzi ta'yr wiko Zuta ywy rehe har wanuwihawete romo kury. Nan kwehe tete Tupàn Tuweharupi Wiko Ma'e <sup>2</sup> uzapo kar ma'e kawaru kupe pe har ywyra iapo pyrer ihewe a'e kury. Uzapo kar iàpixipixi haw ma'epirer iapo pyrer no. — Emono neatuwa rehe nehe, i'i ihewe. <sup>3</sup> Amo tuwihaw umur kar uze'eg herur har Zeruzarez pe a'e 'ar mehe a'e wà: Enom ywy rehe har wanuwihawete, Moaw ywy rehe har wanuwihawete, Amon ywy rehe har wanuwihawete, Xir tawhu pe har wanuwihawete, Xitom tawhu pe har wanuwihawete. — Peze'eg peho tuwihawete Zeneki pe Zeruzarez tawhu pe nehe, i'i wanupe wà. <sup>4</sup> Na'e Tupàn Tuweharupi Wiko Ma'e upuner wera'u ma'e Izaew wazar uze'eg ihewe. — Emume'u heze'eg a'e awa wanupe nehe. Weraha putar uwihawete wanupe wà nehe no. Na'aw a'e ze'eg xe kury.

<sup>5</sup> — Apuner katu ihe. Hekàg katu no. Azapo ma'e paw hepuner haw rupi ihe wà: ywy, teko wà, miar ywy rehe wiko ma'e paw wà. Apuner wamono haw rehe wyzài amo wanupe heremimutar rupi ihe wà. <sup>6</sup> Ihe amono ywy paw heremiruze'eg Mawiron wanuwihawete Namukononozor pe ihe wà. Te miar uma'erekò e izupe wà. <sup>7</sup> Wiko putar ywy paw wazar romo nehe. A'e re ta'yr wiko putar wazar nehe. A'e re hemimino wiko putar wazar romo nehe no.

Te amo 'ar mehe hemiruze'eg u'ar putar a'e wà nehe no. A'e mehe teko ywy tetea'u rehe har wiko putar Mawiron wazar romo wà nehe. Tuwihawete upuner ma'e tetea'u wiko putar wazar romo wà nehe.

<sup>8</sup> Amo teko a'e wà nehe, amo tuwihawete wanemiruze'eg a'e wà nehe, aze naheko wer kwaw Mawiron wanuwhawete hemiruze'eg romo a'e wà nehe, aze na'ipureruzar wer kwaw hehe wà nehe, a'e mehe azepyk putar a'e teko wanehe nehe, zeàmàtyry'ymawhu pupe nehe, ma'uhez haw pupe nehe no, ma'eahy haw pupe nehe no. Iahykaw rehe amumaw kar putar a'e teko Namukononozor pe ihe wà nehe. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>9</sup> — Apuner uezapo ma'e ràm imume'u haw rehe ihe, hepuahu pe ihe, aze i'i amo heze'eg imume'u har wà, aze i'i wyzài teko wà, pezekaiw zo waze'eg rehe nehe. — Umàno ma'e kwer wanekwe umume'u uezapo ma'e ràm ihewe a'e wà, aze i'i wà nehe, ezekaiw zo wanehe nehe. — Aiko paze ma'e romo ihe, a'e rupi akwaw uezapo ma'e ràm ihe, aze i'i wà nehe, nezewegatete nehe no. — Pezemono zo Mawiron wanuwhawete pe nehe, i'i peme paw rupi wà. <sup>10</sup> Hemu'em waiko peme wà. Pemuhem kar putar peywy wi wà nehe. Zauxiapekwer peneraha putar muite xe wi wà nehe. Pemumaw putar wà nehe. <sup>11</sup> Aze teko amo ywy rehe har weruzar Mawiron wanuwhawete wà nehe, aze uma'ereko izupe wà nehe, amupyta kar putar a'e teko waiwy rehe ihe wà nehe. Azutym kar putar ma'e wanupe a'e ywy rehe nehe. Amuigo kar putar a'e ywy rehe ihe wà nehe no. Ihe Tupàn Tuweharupi Wiko Ma'e aze'eg kwez kury.

<sup>12</sup> Aze'eg nezewe Zeneki Zuta ywy rehe har wanuwhawete pe ihe no. — Ezemono Mawiron wanuwhawete pe nehe. Eiko hemiruze'eg romo nehe. Ema'ereko hemi-

aihu wanupe nehe no. Aze erezapo nezewe haw nehe, ereikuwe putar nehe. <sup>13</sup> Ne nehe, neremaihu wà nehe no, màràzàwe tuwe pemàno putar zeàmàtyry'ymawhu pe nehe, ma'uhez haw inuromo nehe, ma'eahy haw inuromo nehe. — Agwer ma'e uezapo putar amo teko wanupe nehe, aze a'e teko nuweruzar kwaw Mawiron ywy rehe har wanuwhawete wà nehe, i'i Tupàn Tuweharupi Wiko Ma'e. <sup>14</sup> — Peruzar zo Mawiron wanuwhawete nehe, aze amo Tupàn ze'eg imume'u har i'i peme wà nehe, pezekaiw zo wanehe nehe. Hemu'em waiko peme wà. <sup>15</sup> — Ihe naiko kwaw 'aw ze'eg imume'u har wamur kar har romo ihe, i'i Tupàn Tuweharupi Wiko Ma'e. — Hemu'em waiko herer rehe wà, i'i. Nezewe haw uezapo putar nehe. Pemuhem kar putar ko ywy wi a'e nehe. Pe nehe, a'e temu'emaw imume'u har wà nehe no, pemàno putar nehe.

<sup>16</sup> — Amume'u putar Tupàn Tuweharupi Wiko Ma'e hemimume'u kwer peme ihe nehe kury, a'e xaxeto wanupe kury, teko wanupe no. — Na'arewahy zauxiapekwer umuzewyr kar putar temetarer tåpuzuhu parer imuwa Mawiron wi wà nehe, i'i putar amo heze'eg imume'u mua'u har wà nehe. Pezekaiw zo wanehe nehe. Hemu'em waiko peme wà. <sup>17</sup> Peinu zo waze'eg nehe. Peruzar Mawiron wanuwhawete nehe, nezewe mehe peikuwe putar nehe. Màràzàwe tuwe pezapo putar 'aw tawhu ywytyr heityk pyrer iapo pyrer romo nehe. <sup>18</sup> Aze wiko heze'eg imume'u har romo azeharomoete wà, aze wereko heze'eg azeharomoete wà, a'e mehe penoz ma'e ihewe nehe. Aiko Tupàn Tuweharupi Wiko Ma'e upuner wera'u ma'e romo ihe. — Zauxiapekwer wezar amo temetarer neràpuzuhu pupe wà, tuwhawete hàpuzuhu pupe wà no. Eraha kar zo a'e temetarer xe wi Mawiron pe a'e zauxiapekwer wanupe nehe, peze ihewe nehe, a'e ma'e henoz pà ihewe nehe.

<sup>19-20</sup> Tuwihawete Namukononozor weraha teko uezupi a'e: Zuta ywy rehe har wanuwhawete Zoaki Zeoaki ta'yr her ma'e, teko ikàg ma'e Zuta ywy rehe har wà, teko ikàg ma'e Zeruzarez pe har wà. Waneraha mehe wezar amo ma'e Tupàn Hàpuzuahu pupe: izyta, kawawhu, ma'erenaw, 'yryru morog iapo pyrer, amo hekuzar katu ma'e.

<sup>21</sup> Ihe Tupàn Tuweharupi Wiko Ma'e upuner wera'u ma'e Izaew wazar aze'eg hekuzar katu ma'e heràpuzuahu pupe tuwihawete hàpuzuahu pupe hezar pyrer rehe teko ihe kury. Pezekaiw katu heze'eg rehe nehe.

<sup>22</sup> Zauxiapekwer weraha putar a'e hekuzar katu ma'e Mawiron pe wà nehe. Upyta putar a'e pe nehe. Amo 'ar mehe hema'enukwaw putar hehe nehe. A'e mehe amuzewyr kar putar xe ihe nehe. Ihe Tupàn Tuweharupi Wiko Ma'e aze'eg kwez kury.

## 28

### *Zeremi, Tupàn ze'eg imume'u har Anani a'e no*

<sup>1</sup> A'e kwarahy rehe Zeneki tuwihawete romo heko mehe 4 haw kwarahy rehe 5 haw zahy rehe Anani Azur ta'yr uez'eg ihewe tòpuzuahu huwake katu pe a'e kury. Anani wiko Zimeàw tawhu pe har romo. Uze'eg ihewe xaxeto wanenataromo teko wanenataromo a'e. <sup>2</sup> — Tupàn Tuweharupi Wiko Ma'e upuner wera'u ma'e Izaew wazar uez'eg nezewe a'e kury, i'i. — Amumaw Mawiron wanuwhawete ipuner haw kwez ihe, i'i. <sup>3</sup> — Namukononozor weraha hekuzar katu ma'e tetea'u 'àg tòpuzuahu wi Mawiron pe heraha pà a'e. Mokoz kwarahy ipaw 'ym mehe we amuzewyr kar putar a'e ma'e paw rupi ihe nehe. <sup>4</sup> Arur putar Zuta ywy rehe har wanuwhawete Zoaki Zeoaki ta'yr ihe nehe no. Arur putar amogwer Mawiron pe Zuta wi heraha pyrer ihe wà nehe no. Azeharomoete amumaw putar Mawiron wanuwhawete ihe nehe kury. Ihe Tupàn

Tuweharupi Wiko Ma'e aze'eg kwez kury, i'i Tupàn, i'i Anani.

<sup>5</sup> Na'e aze'eg xaxeto wanenataromo teko tåpuzuhu huwake katu pe uzemono'og ma'e kwer paw wane-nataromo ihe kury, Tupàn ze'eg imume'u har Anani pe ihe kury.

<sup>6</sup> — Aze mo uzeapo nezewe haw, ikatu mo a'e. Tuwe Tupàn Tuweharupi Wiko Ma'e uzapo nezewe haw nehe. Tuwe uzapo ma'e paw neze'eg rupi katete nehe. Tuwe werur temetarer paw Mawiron wi nehe. Tuwe werur teko ipyhyk pyrer paw wà nehe no. <sup>7</sup> Pezeapyaka katu ko heze'eg newe teko wanupe heremimume'u ràm rehe nehe kury. <sup>8</sup> Kwehe mehe nezexak 'ym mehe we hezexak 'ym mehe we Tupàn ze'eg imume'u har uze'eg nezewe wà. — Ur putar zeàmàtyry'ymawhu nehe, ur putar ma'uhez haw nehe, ur putar ma'eahy haw nehe, teko ywy tetea'u rehe har wanupe nehe, tuwihawete upuner ma'e wanemiruze'eg wanupe nehe no. <sup>9</sup> Aze amo umume'u zeàmàtyry'ym 'ym àwàm wà nehe, aze uzeapo ma'e waze'eg rupi nehe, xo a'e mehe zo pepuner wamuawyze haw rehe Tupàn hemimono kar romo nehe, a'e Anani pe.

<sup>10</sup> Na'e Anani wenuhem kawaru kupe pe har zàwenugar heatuwa rehe har ihewi kury, ipei'ài'ág pà kury.

<sup>11</sup> Uze'eg teko paw wanenataromo kury. — Tuwihawete Namukononozor omono kar kawaru kupe pe har zàwenugar teko ywy tetea'u rehe har watuwa rehe a'e. Nezewe azuhazuhaw putar ihe nehe. Mokoz kwarahy ipaw 'ym mehe we azapo putar ko ma'e ihe nehe, i'i Tupàn, i'i Anani. Na'e aha a'e wi ihe kury.

<sup>12-13</sup> Nezewe Anani azuhazuhaw kawaru kupe pe har zàwenugar heatuwa pe har a'e. Amo 'ar pawire Tupàn Tuweharupi Wiko Ma'e umume'u kar ko ze'eg Anani pe

a'e kury. — Erezuhaw kawaru kupe pe har zàwenu-gar ywyra iapo pyrer. Amono putar amo itaper iapo pyrer ywyra iapo pyrer hekuzaromo ihe nehe.<sup>14</sup> Tupàn Tuweharupi Wiko Ma'e upuner wera'u ma'e Izaew wazar omono putar kawaru kupe pe har zàwenugar itaper iapo pyrer 'aw teko nànàn nehe. Mawiron wanuwhawete Namukononozor wiko putar wazar romo a'e nehe. Te miar hehaite ma'e uma'ereko putar Namukononozor pe wà nehe.

<sup>15</sup> Ezeapyaka katu nehe, Anani. Tupàn Tuweharupi Wiko Ma'e nanemur kar kwaw a'e. Eremuzeruzar kar 'aw teko temu'emaw rehe ne wà. <sup>16</sup> A'e rupi — Aityk putar Anani ihe nehe, i'i Tupàn Tuweharupi Wiko Ma'e. Eremàno putar ko kwarahy rehe nehe. Ta'e — Pepytu'u Tupàn Tuweharupi Wiko Ma'e heruzar ire nehe, ere teko wanupe ne xe.

<sup>17</sup> Na'e Tupàn ze'eg imume'u har Anani umàno 7 haw zahy mehe a'e kwarahy rehe kury.

## 29

*Zeremi omono kar uze'eg pape rehe imuapyk pyrer Zutew Mawiron pe wiko ma'e wanupe*

<sup>1</sup> Kwehe mehe Namukononozor weraha amo Zutew Mawiron pe wemipyhyk kwer romo a'e wà. Azapo amo pape a'e Zutew wanupe ihe kury: tuwhaw wà, xaxeto wà, Tupàn ze'eg imume'u har wà, teko paw wà. <sup>2</sup> Uhem teko tetea'u Zeruzarez wi wà: tuwhawete Zoaki, ihy, tuwhaw uwihawete hàpuzu-hu pe har wà, tuwhaw Zuta ywy rehe har wà, tuwhaw Zeruzarez pe har wà, ywyra pinar wà, amo zawaiw ma'e iapo har wà. Ko ma'e uzeapo a'e ma'e izeapo re. <sup>3</sup> Tuwhawete Zeneki uze'eg Eraza Xàpà ta'yr pe Zemari Iwki ta'yr pe kury. — Peraha Zeremi pape Mawiron wanuwhawete Namukononozor pe nehe. Na'aw ze'eg a'e pape rehe imuapyk pyrer xe kury.

<sup>4</sup> — Tupàn Tuweharupi Wiko Ma'e upuner wera'u ma'e Izaew wazar a'e, umume'u ko ma'e peme a'e. Peiko Zutew Mawiron pe har romo pe. Namukononozor peneraha Zeruzarez wi a'e pe ipyhyk pyrer romo a'e. Nezewe ize'eg:  
<sup>5</sup> — Pezapo penàpuz nehe. Peiko ipupe nehe. Pezutym ma'ywa 'yw nehe. Pe'u i'a kwer nehe no. <sup>6</sup> Penemireko nehe. Pemen nehe. Pepurumuzàg nehe no. Tuwe pena'yr hemireko wà nehe. Tuwe penazyr imen wà nehe no. Tuwe upurumuzàg wà nehe no. Tuwe peneta tetea'u wera'u nehe. Na'ikatu kwaw peneta tete 'ymaw. <sup>7</sup> Apomono kar amo tawhu pe ipyhyk pyrer romo ihe. Pema'erekko katu a'e pe nehe. Peze'eg ihewe nehe, ikatu ma'e a'e tawhu pe heremiapo ràm henoz pà ihewe nehe. Aze ikatu nehe, pekatu putar nehe no. <sup>8</sup> Ihe Tupàn Tuweharupi Wiko Ma'e Izaew wazar ihe, pezekaiw zo heze'eg imume'u mua'u har peinuinuromo har wanehe nehe. — Apuner uzeapo ma'e ràm imume'u haw rehe ihe, aze i'i peme wà nehe, pezekaiw zo wanehe nehe. Pezekaiw zo wapuahu awer rehe nehe. <sup>9</sup> Hemu'em herer rehe wà. Namono kar kwaw peme ihe wà. Ihe Tupàn Tuweharupi Wiko Ma'e aze'eg kwez kury, i'i ze'eg a'e pape rehe imuapyk pyrer.

<sup>10</sup> Tupàn Tuweharupi Wiko Ma'e umume'u amo ma'e peme no. — Pemumaw putar 70 kwarahy Mawiron pe nehe. A'e kwarahy ipaw ire aexak kar putar hekatu haw peme nehe. Azapo putar ma'e heze'eg awer rupi ihe nehe. Apuerur putar peywy pe ihe nehe. <sup>11</sup> Xo ihe zo akwaw peme heremiapo ràm ihe. Peneko haw ikatuahy putar nehe. Narur kwaw iaiw haw peme nehe. Pepuner ikatu ma'e hàro haw rehe nehe. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>12</sup> Na'e herenoz putar pe nehe. Peze'eg putar ihewe nehe. Awazar putar peze'eg awer peme nehe. <sup>13</sup> Herekar putar pe nehe. Herexak putar pe nehe no. Ta'e herekar putar

pe pep'y'a nànàn nehe xe. <sup>14</sup> Azeharomoete amume'u ko ma'e, herexak putar pe nehe. Apueraha putar peywy pe ihe nehe. Apumuhàmuhàz ywy tetea'u wanehe ihe. Apomono'og putar a'e ywy nànàn nehe no. Apueraha amo ywy rehe ipyhyk pyrer romo ihe. Apumuhem kar putar a'e ywy wi nehe. Apueraha putar peywy pe nehe no. Ihe Tupàn Tuweharupi Wiko Ma'e aze'eg kwez kury.

<sup>15</sup> — Tupàn Tuweharupi Wiko Ma'e umur ize'eg imume'u har urewe xe Mawiron pe a'e wà, peze peiko. <sup>16</sup> Tupàn uze'eg tuwihawete Tawi henaw rehe wapyk ma'e rehe a'e. Uze'eg Zeruzarez pe har wanehe no. Ipyhyk pyrer romo heraha pyrer waànàm romo wanekon wà. Pezekaiw a'e ize'eg rehe nehe kury. <sup>17</sup> — Amono kar putar iaiw ma'e wakutyr ihe nehe: zeàmàtyry'ymawhu, ma'uhez haw, ma'eahy haw. Amuigo kar putar pi i'a kwer inem ma'e zàwe ihe wà nehe. Teko nu'u kwaw pi inem ma'e wà. <sup>18</sup> Apuraraw kar putar ma'erahy wanupe ihe nehe: zeàmàtyry'ymawhu pupe, ma'uhez haw pupe, ma'eahy haw pupe. Teko ywy nànànar ukyzeahy putar wanexak mehe wà nehe. Amuhàmuhàz putar ihe wà nehe. Waneko haw pe teko ipytuhegatu putar wanupe uzeapo ma'e kwer rehe wà nehe. Uze'eg uryweteahy putar wanehe wà nehe. Omono putar uze'egaiw purehe waner rehe wà nehe no. <sup>19</sup> A'e ma'e uzeapo putar nehe, ta'e nuweruzar kwaw heze'eg a'e wà xe. Tuweharupi amono kar heremiruze'eg heze'eg imume'u har heremaihu wanupe ihe wà. Na'ipurenu wer kwaw wanehe wà. <sup>20</sup> Apueraha kar Zeruzarez wi ipyhyk pyrer romo Mawiron wanuwiawete pe paw rupi ihe. Peinu heze'eg nehe kury. Ihe Tupàn Tuweharupi Wiko Ma'e amume'u ko ze'eg teko peme ihe kury.

<sup>21</sup> Tupàn Tuweharupi Wiko Ma'e upuner wera'u ma'e Izaew wazar uze'eg Akaw Korai ta'yur ikutyr a'e. Uze'eg

Zeneki Mazez ta'yr ikutyr no. A'e awa umume'u temu'emaw waiko Tupàn her rehe wà. — Amono putar Namukononozor Mawiron wanuwihawete ipo pe ihe nehe. Namukononozor uzuka kar putar a'e mokoz awa penenataromo a'e wà nehe. <sup>22</sup> Zeruzarez wi Mawiron pe heraha pyrer a'e wà, aze iporomono wer uze'egaiw amo rehe wà nehe, uze'eg putar nezewe wà nehe. — Tupàn wapy kar Zeneki Akaw rehe we wanekuve mehe we a'e wà, zauxiapkekwer wanupe teko wanenataromo a'e wà. Tuwe uzapo nezewegatete haw newe nehe no, i'i putar wà nehe. <sup>23</sup> A'e ma'e uzeapo putar Zeneki pe Akaw pe a'e nehe, ta'e uzapo purumumaranugar kar haw a'e wà xe. Uker wemireko 'ym wapuhe wà. Tupàn nuputar kwaw uwer rehe temu'emaw imume'u haw. Nezewe rehe we umume'u wà. Tupàn ukwaw wanemiapo kwer. Umume'u putar nehe. Tupàn Tuweharupi Wiko Ma'e umume'u ko ma'e a'e.

*Tupàn umume'u kar uze'eg Xemai pe a'e*

<sup>24-25</sup> Tupàn Tuweharupi Wiko Ma'e upuner wera'u ma'e Izaew wazar umume'u kar ko uze'eg Xemai Neeràw tawhu pe har pe a'e kury. — Eremono kar pape nerer rehe teko wanupe ne: Zeruzarez pe har paw wanupe, Xoponi Mazez xaxeto ta'yr pe, amogwer xaxeto paw wanupe. <sup>26</sup> — Tupàn Tuweharupi Wiko Ma'e nemuigo kar xaxeto romo Zoiaz hekuzaromo a'e. Ko 'ar rehe ereiko ma'erekò haw tåpuzuhu pe har rehe uzekaiw ma'e romo. Aze amo he'o ma'e uzemuigo kar Tupàn ze'eg imume'u har romo, ereiko zauxiapkekwer wanupe ipyhyk kar har romo ne. Eremono kar iazur rehe har ita per iapo pyrer hehe. <sup>27</sup> A'e rupi apuranu nerehe. Måràzàwe tuwe nerepyhyk kwaw Zeremi Anatot tawhu pe har. Uzemuigo kar Tupàn ze'eg imume'u har teko wamyteromo a'e, i'i Tupàn newe, a'e izupe. <sup>28</sup> Måràzàwe tuwe nerepyhyk kar kwaw. —

Pemumaw putar kwarahy tetea'u Mawiron pe nehe, i'i Zutew a'e pe ipyhyk pyrer wanupe. — Pezapo penàpuz nehe, peiko wapupe nehe, pezutym ma'e'yw nehe, pe'u i'a kwer nehe, i'i wanupe, i'i Tupàn newe, a'e izupe.

<sup>29</sup> Xaxeto Xoponi umugeta a'e pape ihewe. <sup>30-32</sup> Na'e Tupàn Tuweharupi Wiko Ma'e omono kar ko uze'eg Xemai rehe har Mawiron pe ipyhyk pyrer nànàn a'e kury. — Ihe Tupàn Tuweharupi Wiko Ma'e azepyk putar Xemai rehe ihe nehe, izuapyapyr paw wanehe nehe no. Namono kar kwaw peme ihe. Nezewe rehe we uze'eg peme heze'eg imume'u har ài. Pemuzeruzar kar temu'emaw rehe. A'e rupi naheta kwaw izuapyapyr izupe peinuinuromo wà nehe. Uzeagaw teko wamupytu'u kar pà hereruzar ire a'e wà. A'e rupi, ikatu ma'e heremiaihu wanupe iapo mehe nehe, nuexak kwaw nehe, ta'e umàno putar a'e 'ym mehe we a'e nehe xe. Ihe Tupàn Tuweharupi Wiko Ma'e aze'eg kwez kury.

## 30

### *Tupàn umume'u wemiapo ràm*

<sup>1-3</sup> Tupàn Tuweharupi Wiko Ma'e Izaew wazar umume'u ko ma'e ihewe kury. — Zeremi, i'i. — Emuapyk heze'eg awer paw amo pape rehe nehe. Ta'e uhem 'ar iko kury xe. A'e 'ar mehe amuzewyr kar putar heremiaihu ihe wà nehe: Izaew ywy rehe har wà, Zuta ywy rehe har wà no. Amono ko ywy waipy wanupe ihe. Arur wi putar xe ihe wà nehe no. Wiko wi putar izar romo wà nehe. Ihe Tupàn Tuweharupi Wiko Ma'e aze'eg kwez kury.

<sup>4</sup> Tupàn Tuweharupi Wiko Ma'e umume'u ko ma'e Izaew wanehe Zuta wanehe kury.

<sup>5</sup> — Aenu amo ukyze hawhu wi uhapukaz ma'e ihe wà.

Uhapukaz wà, ta'e ukyze wà xe. Nuhapukaz kwaw zeàmàtyry'ym 'ymaw rehe wà.

<sup>6</sup> Aipo awa upuner umemyr haw rehe a'e.

Màràzàwe tuwe aexak awa tetea'u opo wie pyhykar ihe wà.

Nuzawy kwaw kuzà imemyrahý ma'e wà.

Màràzàwe tuwe itawaahy paw rupi wà.

<sup>7</sup> Amo 'ar iaiw ma'e uhem iko kury.

Ni amo 'ar nahexakaw kwaw a'e 'ar ài a'e.

Zako izuapyapyr upuraraw putar ma'erahy a'e 'ar mehe wà nehe.

Nezewé rehe we apyro putar a'e 'ar wi ihe wà nehe.

<sup>8</sup> Tupàn Tuweharupi Wiko Ma'e upuner wera'u ma'e uze'eg wi kury.

— A'e 'ar ihem mehe azuhazuhaw kawaru kupe pe har zàwenugar watuwa rehe har ihe nehe. Azo'ok putar kyhàhàm tàtà wanuwi ihe nehe no. A'e mehe nuiko kwaw amo ywy rehe har wanupe uma'erekò e ma'e romo wà nehe. <sup>9</sup> Wiko putar heremiruze'eg romo wà nehe. Aiko Tupàn Tuweharupi Wiko Ma'e romo ihe wazar romo ihe. Wiko putar Tawi izuapyr hemiruze'eg romo wà nehe no. Amono putar a'e awa heremiaihu wanupe wanuwhawete romo ihe nehe.

<sup>10</sup> Heremiruze'eg Zako izuapyapyr wà, pekyze zo nehe.

Teko Izaew ywy rehe har wà, pepytuhegatu zo nehe.

Apupyro putar a'e ywy muite har wi ihe nehe,

ywy pepyhykaw wi ihe nehe.

Zako izuapyapyr uzewyr putar wà nehe.

Wiko putar zeàmàtyry'ym 'ymaw rehe wà nehe no.

Ni amo nupuner kwaw ikatu 'ym ma'e iapo haw rehe wanupe wà nehe.

Ni amo numukyze kar kwaw wà nehe.

Ihe Tupàn Tuweharupi Wiko Ma'e aiko ko ma'e imume'u  
har romo ihe.

<sup>11</sup> Aiko putar pepyr pepyro pà ihe nehe.

Apumuhàmuhàz ywy nànàn ihe.

Amumaw putar a'e ywy paw rupi ihe wà nehe.

Napumumaw kwaw nehe.

Nezewé rehé we azepyk putar penehe nehe.

Penehe hezepyk mehe

napuraraw kar wera'u kwaw ma'erahy peme nehe.

Ihe Tupàn Tuweharupi Wiko Ma'e aze'eg kwez kury.

<sup>12</sup> Tupàn Tuweharupi Wiko Ma'e uze'eg Zeruzarez tawhu  
pe kury.

— Naheta kwaw imukatu haw 'aw teko wama'eahy haw  
pe.

Waperew nuke'e kwaw.

<sup>13</sup> Naheta kwaw penehe uzekaiw ma'e wà.

Naheta kwaw muhàg peperew pe.

Naheta kwaw pemukatu àwàm hàro haw.

<sup>14</sup> Peamutar arer paw heharaz pewi wà.

Nuzeruzar kwaw penehe wà.

Apuàmàtyry'ym ihe, ta'e peiko heàmàtyry'ymar wazàwe  
pe xe.

Penehe hezepykaw tàtàahy a'e,

ta'e heta tetea'u penemiapo kwer ikatu 'ym ma'e xe.

Pekatu 'ymaw uhua'u a'e no.

<sup>15</sup> Pepytu'u pekutuk awer rehé peze'eg ire nehe.

Naheta kwaw imukatu àwàm.

Azepyk penehe ihe,

ta'e heta tetea'u penemiapo kwer ikatu 'ym ma'e xe.

Ta'e pekatu 'ymaw uhua'u a'e no xe.

<sup>16</sup> Ko 'ar rehé pemumaw arer amumaw putar paw rupi ihe  
wà nehe.

Amo zauxiapekwer weraha putar peàmàtyry'ymar paw  
wemipyhyk romo wà nehe no.

Amo pekar ma'erahy ipuraraw kar pà peme wà. Amo ae  
zauxiapekwer upuraraw kar putar ma'erahy peme  
ipuraraw kar arer wanupe wà nehe.

Uzuka putar amo wazuka arer wà nehe no.

<sup>17</sup> Peàmàtyry'ymar uze'eg nezewé wà.

— Xiàw uzeapo ikàg 'ym ma'e romo a'e.

Ni amo nuzekaiw kwaw hehe wà, i'i penehe wà.

Amono wi putar penuhàgaw peme nehe.

Amuke'e putar peperew nehe no.

Ihe Tupàn Tuweharupi Wiko Ma'e aze'eg kwez kury.

<sup>18</sup> Amuzewyr kar putar Zako izuapyapyr wamuwà waiwy  
pe ihe wà nehe.

Apuhareko putar uzeànàànàm ma'e imono'og pyr  
pitàitàigatu ihe wà nehe.

Uzapo wi putar Zeruzarez a'e wà nehe.

Teko wiko putar tuwihawete hàpuzuhu pupe wà nehe no.

<sup>19</sup> Teko a'e pe wiko ma'e uzegar putar hekatu haw  
imume'u pà wà nehe.

Uhapukaz putar urywete haw rehe wà nehe no.

Amueta tetea'u kar putar ihe wà nehe.

Areko katu kar putar a'e teko amo teko wanupe ihe wà  
nehe no.

<sup>20</sup> Teko ko ywy rehe har ikàg putar kwehe mehe arer zàwe  
wà nehe.

Hehe we har ikàg wi putar wà nehe no.

Azepyk putar wyzài heremiaihu wanupe ma'erahy ipu-  
raraw kar har wanehe ihe nehe no.

<sup>21-22</sup> Amo wainuinuromo har wiko putar wanuwihaw  
romo nehe.

Waànàm wiko putar wanuwihaw romo nehe.

Aze ainoz imuwà hezeupe nehe, Uhem putar heruwake a'e nehe.

Aze naenoz kwaw amo nehe, a'e teko nur kwaw heruwake nehe.

Ta'e ukylze putar a'e wà nehe xe.

Wiko putar heremaihu romo wà nehe.

Aiko putar wazar romo nehe no.

Ihe Tupàn Tuweharupi Wiko Ma'e aze'eg kwez kury.

<sup>23-24</sup> Tupàn Tuweharupi Wiko Ma'e ikwahy haw nuzawy kwaw ywytu àmàn inuinuromo har. Opok putar ikatu 'ym ma'e waàkàg i'aromo ywytuaiw ài nehe. Tupàn uzapo putar wemimume'u kwer paw rupi nehe. Xo a'e mehe zo ikwahy haw hakuir putar nehe. Amo 'ar mehe hemiaihu ukwaw katu putar ko ma'e paw rupi wà nehe.

## 31

### *Izaew uzewyr uiwy pe wà*

<sup>1</sup> Uze'eg Tupàn Tuweharupi Wiko Ma'e.

— Uhem amo 'ar iko. A'e 'ar mehe aiko putar Izaew ta'yr wazuapyapyr paw wazar romo ihe nehe. Wiko putar heremaihu romo wà nehe no. <sup>2</sup> Ywyxiguahu rehé apuhareko umàno haw wi uzepyro ma'e kwer ihe wà. Izaew izuapyapyr upytu'u àwàm hekar mehe <sup>3</sup> azexak kar wanupe ihe. Teko Izaew izuapyapyr wà, tuweharupi apuamutar katu ihe. Apuamutar katu putar ihe nehe no. Tuweharupi aexak kar peamutar katu haw peme ihe. <sup>4</sup> Amueta tetea'u wi putar heremaihu ihe wà nehe. Pepyhyk wi putar pema'e ipuipu ma'e nehe. Pepynyk putar penurywete haw rehe nehe no. <sup>5</sup> Pezapo wi putar uwà itymaw ywytyr Xamari rehe har rehe nehe. Izutymar upyhyk putar i'a kwer wà nehe. <sup>6</sup> Uhem amo 'ar iko. A'e 'ar mehe ume'egatu ma'e uhapukaz putar ywytyr Eparai ywy rehe har rehe wà nehe. — Pezur nehe. Zazeupir Xiàw

pe nehe, Tupàn Tuweharupi Wiko Ma'e Zanezar henaw pe nehe, i'i putar wà nehe.

<sup>7</sup> Uze'eg Tupàn Tuweharupi Wiko Ma'e.

— Pezegar penurywete haw rehe nehe.

Pezegar Izaew amo teko wanuwi uhua'u wera'u ma'e wanehe nehe.

Pemuzàg ko zegar haw Tupàn ikatu haw imume'u pà nehe.

— Tupàn Tuweharupi Wiko Ma'e upyro wemiaihu wà.

Upyro teko Izaew wakurer wà no, peze nehe.

<sup>8</sup> Arur putar kwarahy heixe haw awyze har kutyr har wi wà nehe.

Ywy muite wera'u har wanuwi amono'og putar ihe wà nehe.

Teko ur putar wanupi wà nehe.

Hehàpyhà 'ym ma'e wà, Wata 'ym ma'e wà, Kuzà ipuru'a ma'e wà, Kuzà imemyrzexak kar etea'l i ma'e wà.

Uzewyr putar teko tetea'u uzemono'og ma'e romo wà nehe.

<sup>9</sup> Wanerur mehe nehe, uzai'o putar wà waiko wà nehe.

Uze'eg putar wà waiko ihewe wà nehe.

Araha putar yrykaw uwryryk ma'e izywyr ihe wà nehe, pe ikatu ma'e rupi ihe wà nehe.

Nuzepyapi kwaw hupi wata mehe wà nehe.

Aiko Izaew wanu ài.

Eparai wiko hera'yr ipy romo a'e.

<sup>10</sup> Tupàn Tuweharupi Wiko Ma'e uze'eg wi kury.

— Teko ywy nànànar wà. Ihe Tupàn Tuweharupi Wiko Ma'e ihe, peinu heremimume'u nehe kury.

Pemume'u heze'eg yrypypo'o muite wera'u ma'e rehe nehe, ywy muite wera'u ma'e rehe nehe.

Ihe amuhàmuhàz teko Izaew izuapyapyr ihe wà.

Amono'og wi putar ihe wà nehe no.

Àràpuhàràñ wamono'ogar uzekaiw katu weimaw wanehe  
a'e.

Nezewegatete azekaiw katu putar heremaihu wanehe ihe  
wà nehe no.

<sup>11</sup> Amuhem kar Zako izuapyapyr ihe wà, wapyhyk arer  
wanuwi ihe wà.

Wapyhyk arer ikàg wera'u wanuwi wà. Nezewe rehe we  
apyro wanuwi ihe wà.

<sup>12</sup> Uhem putar Xiàw ywytyr pe  
urywete haw rehe uzegar pà wà nehe.

Hurywete putar ihewe imur pyr rehe wà nehe no:  
arozräñ, win, uri kawer, tapi'ak, àràpuhàràñ.

Nuzawy kwaw ma'etymaw imuàkygatu pyrer wà nehe.  
Uhyk putar ma'e paw wanupe nehe no.

<sup>13</sup> Na'e teko upynyk putar wà nehe, hurywete putar wà  
nehe no: Kuzàwaza kwer wà, kwàkwàmogwer wà,  
tua'uhez kwer wà.

Amurywete kar putar ihe wà nehe. Wazai'o haw azapo  
putar wanurywete haw romo ihe nehe.

Wazemumikahy haw azapo putar wanupe ikatuahy ma'e  
romo ihe nehe no.

<sup>14</sup> A'u kar putar temi'u ikatu ma'e tetea'u xaxeto wanupe  
ihe nehe. Aze amo ma'e ikatu heremaihu wanupe  
nehe, Amono putar a'e ma'e wanupe nehe.

Ihe Tupàñ Tuweharupi Wiko Ma'e aze'eg kwez kury.

### *Tupàñ upuhareko katu Izaew wà*

<sup>15</sup> Uze'eg wi Tupàñ Tuweharupi Wiko Ma'e kury.  
— Teko wenu amo ma'e Hama pe har wà.

Nuzawy kwaw teko wazai'oahy haw.

Hakew wiko a'e uzai'o ma'e romo a'e. Uzai'o umemyr awa  
wanehe.

— Hemurywete kar zo pe nehe, i'i.

Ta'e imemyr awa paw umàño wà xe.

<sup>16</sup> — Epytu'u nezai'o re nehe.  
Ezuhyw nerehaykwer nehe no.

Nememyr pe neremiapo kwer paw hekuzar erepyhyk  
putar nehe.

Uzewyr putar wàmàtyry'ymar waiwy wi wà nehe.  
Ihe Tupàn Tuweharupi Wiko Ma'e aiko ko ma'e imume'u  
har romo ihe.

<sup>17</sup> Pepuner ikatu ma'e uzeapo ma'e ràm hào haw rehe.  
Nememyr uzewyr putar weko haw pe wà nehe.

Ihe Tupàn Tuweharupi Wiko Ma'e aiko ko ma'e imume'u  
har romo ihe.

<sup>18</sup> Teko Izaew umume'u uzeapo ma'e kwer ikatu 'ym ma'e  
wà.

Aenu waze'eg mehe ihe wà.  
— O Tupàn, uruiko tapi'aka'yr imugakwaw pyr 'ym ài ure.

Ne uremu'e pe nereruzar haw rehe.  
Uremuzewyr kar pe nehe, o Tupàn.

A'e mehe uruzewyr putar newe nehe.

Ta'e ereiko Tupàn Tuweharupi Wiko Ma'e romo urezar  
romo ne xe.

<sup>19</sup> Urutyryk newi.

Na'arewahy uruzemumikahy.

Na'eerezepyk urerehe.

A'e rupi uruzeamumew nerena taromo urezemumikahy  
haw hexak kar pà newe, i'i wà.

<sup>20</sup> Teko Izaew wà.  
Ereiko hera'yr ihewe ikatu wera'u ma'e romo.  
Uruamutar wera'u amo wanuwi ihe.  
Nerer imume'u mehe  
tuweharupi hema'enukwaw nerehe neamutar katu pà ihe.  
Hepy'a uzemumikahy.  
Azecharomoete urupuhareko putar ihe nehe.

Ihe Tupàn Tuweharupi Wiko Ma'e aiko ko ma'e imume'u  
har romo ihe.

<sup>21</sup> Emuapyk ze'eg pape rehe katu pe nehe, pe hexak kar  
haw romo wata ma'e wanupe nehe.

Eme'egatu nerape ràm rehe nehe.

Pezewyr teko Izaew izuapyapyr wà.

Pezewyr tawhu peneko awer pe nehe.

<sup>22</sup> Teko hereruzar 'ymar. Mâràn 'ar pemumaw putar  
hereruzar haw ikwaw 'ym pà nehe.

Ihe Tupàn Tuweharupi Wiko Ma'e azapo amo ae ma'e  
ipyahu ma'e ywy rehe ihe.

Azapo amo kuzà awa rehe uzekaiw ma'e romo, i'i.

### *Heta putar ma'e tetea'u Tupàn hemiaihu wanupe*

<sup>23</sup> Tupàn Tuweharupi Wiko Ma'e upuner wera'u ma'e  
Izaew wazar uze'eg kury.

— Izaew waiwy pe wamuzewyr mehe uze'eg wi putar  
nezewe Zuta ywy rehe wà nehe, tawhu a'e ywy rehe har  
wanupe wà nehe no.

— Tuwe Tupàn Tuweharupi Wiko Ma'e omono uze'egatu  
Zeruzarez tawhu ywytyr Tupàn pe imonokatu  
pyrer rehe har rehe nehe.

Tupàn purerekò katu ma'e romo hekon a'e. A'e wiko a'e  
pe, i'i putar wà nehe.

<sup>24</sup> Teko wiko putar Zuta ywy rehe wà nehe, tawhu a'e ywy  
rehe har nànàn wà nehe no. Heta putar ma'etymar wà  
nehe. Heta putar àràpuhàràwamono'ogar wà nehe no,  
weimaw wanehe we wà nehe no. <sup>25</sup> Amurywete kar putar  
ikene'o ma'e ihe wà nehe. Amono putar temi'u uma'uhez  
haw rehe iagaiw ma'e wanupe ihe nehe no.

<sup>26</sup> Na'e teko i'i putar wà nehe.

— Aker katu ihe, herurywete kury, i'i putar wà nehe.

<sup>27</sup> — Ihe Tupàn Tuweharupi Wiko Ma'e amume'u ko ma'e ihe kury. — Uhem amo 'ar iko kury. A'e 'ar mehe amynehem putar Izaew ywy teko wapupe ihe nehe, ma'ea'yr wapupe ihe nehe no. Amynehem putar Zuta ywy ihe nehe no. <sup>28</sup> Azekaiw wanehe ikatu 'ym ma'e iapo pà wanupe: anuhem kar ihe wà, aityk ihe wà, amuaiw ihe wà, amumaw ihe wà, amumew ihe wà. Nezewegatete azekaiw katu putar ikatu ma'e iapo pà wanupe nehe no: Azutym putar ywyra ài ihe wà nehe, azapokatu wi putar tòpuz ài ihe wà nehe no. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>29</sup> A'e 'ar ihm mehe nehe, teko nuze'eg kwaw nezewe wà nehe.

— Wanu u'u uwà hazahy ma'e wà.  
A'e rupi wana'yr wanàz ikorozahy,  
ni'i kwaw wà nehe.

<sup>30</sup> Nan kwaw nezewe nehe. Uwà i'u har wanàz ikorozahy putar nehe. Pitàitàigatu umàno putar wemiapo kwer ikatu 'ym ma'e hekuzaromo wà nehe.

<sup>31</sup> Tupàn Tuweharupi Wiko Ma'e uze'eg kury.  
— Uhem putar amo 'ar nehe. A'e 'ar mehe azapokatu wi putar heze'egaw Izaew wanehe we ihe nehe, Zuta wanehe we ihe nehe no. <sup>32</sup> Kwehe mehe azapokatu heze'egaw waipy wanehe we ihe. Apyhyk wapo rehe ihe wà, Ezit ywy wi wapyro pà ihe wà. Heze'egaw ipyahu ma'e uzawy waipy wanupe heze'eg awer kwehe arer. Aiko wazar romo ihe. Nezewe rehe we uzuhaw a'e ze'egaw herehe we iapo pyrer wà. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>33</sup> A'e 'ar ihm mehe azapokatu putar ko heze'egaw teko Izaew izuapyapyr wanehe we ihe nehe. Na'aw heze'eg: Amono putar heze'eg wama'enukwaw paw pupe ihe nehe, wapy'a pupe ihe nehe no. Aiko putar wazar romo nehe. Wiko putar

heremaihu romo wà nehe no. Ihe Tupàn Tuweharupi Wiko Ma'e aiko ko ma'e imume'u har romo ihe.<sup>34</sup> Ni amo numu'e kwaw umyrypar wà nehe. Numu'e kwaw wàniàm wà nehe. — Ezeagaw Tupàn Tuweharupi Wiko Ma'e ikwaw pà nehe, ni'i kwaw wanupe wà nehe. Ta'e paw rupi katete hekwaw putar wà nehe xe. Teko hemetarer katu ma'e wà, teko hemetarer 'ym ma'e wà no. Ta'e amunàm putar wanemiapo kwer ihe nehe xe. Nahema'enukwaw pixik kwaw wakatu 'ymaw rehe ihe nehe no. Ihe Tupàn Tuweharupi Wiko Ma'e aze'eg kwez kury.

<sup>35</sup> Tupàn Tuweharupi Wiko Ma'e uzapo kwarahy tatainy 'aromo har romo a'e.

Uzapo zahy, uzapo zahytata no, wamuhyape katu kar pà pyhaw no.

Tupàn umuikwahy kar yryhu.

Omokororo kar ykotok no.

Tupàn Tuweharupi Wiko Ma'e upuner wera'u ma'e her romo a'e,

<sup>36</sup> Umume'eahy ko wemiapo ràm a'e.

Ma'e ywy rehe hekuwe mehe we Izaew izuapyapyr wiko putar teko uzemono'og ma'e romo a'e wà nehe no.

<sup>37</sup> Aze amo 'ar mehe pepuner ywak uhu haw hagaw paw rehe nehe,

aze pepuner ywy iwy pe har hexakaw rehe nehe,

xo a'e 'ar mehe aityk putar heremaihu Izaew ihe wà nehe, wanemiapo kwer hekuzaromo ihe wà nehe.

Tupàn Tuweharupi Wiko Ma'e uze'eg kwez kury.

<sup>38</sup> — Uhem amo 'ar iko, i'i Tupàn Tuweharupi Wiko Ma'e. — A'e 'ar mehe teko uzapo wi putar 'aw tawhu wà nehe. Uzypyrog putar tàpuzaiha Ananew her ma'e pe wà nehe. Oho putar te ukenawhu Lahykaw Rehe Har her ma'e pe wà nehe no. <sup>39</sup> A'e wi ywyzaw oho putar ywytyr

Zarew pe nehe. A'e wi uwak putar Goa kutyr nehe. <sup>40</sup> Teko weityk umàño ma'e kwer wanetekwer ywyàpyznaw pe wà. Weityk ity a'e pe wà no. A'e 'ar mehe amonokatu putar a'e ywyàpyznaw hezeupe nehe. — Ikatuahy, a'e putar izupe nehe. Heta amo kaiwer yrykaw Xenoron ikupe kutyr. Oho te ukenawhu Kawaru her ma'e pe. Amonokatu putar a'e ywy paw hezeupe ihe nehe no. — Ikatuahy, a'e putar izupe nehe. Kwarahy ihemaw kutyr tuz. Nuityk pixik kwaw Zeruzarez a'e wà nehe. Numumaw pixik kwaw nehe.

## 32

### *Zeremi ume'eg kar amo ywy ipehegwer*

<sup>1</sup> Zeneki Zuta ywy rehe har wanuwhawete romo heko mehe 10 haw kwarahy rehe, Namukononozor Mawiron ywy rehe har wanuwhawete romo heko mehe 18 haw kwarahy rehe, Tupàn Tuweharupi Wiko Ma'e uze'eg ihewe. <sup>2</sup> A'e 'ar mehe zauxiapekwer Mawiron hemiruze'eg umàmàgatu Zeruzarez izywyr wà. Tuwhawete hephyhyk kar wàpuz huwake katu pe zauxiapekwer wanupe. <sup>3</sup> — Amono putar 'aw tawhu Mawiron wanuwhawete pe ihe nehe. Upyhyk putar nehe, ere purupe, i'i tuwhawete Zeneki ihewe a'e. A'e rupi hephyhyk kar zauxiapekwer wanupe. <sup>4</sup> — Tuwhawete Zeneki nuzepyro kwaw Mawiron pe har wanuwi nehe. Zauxiapekwer omono putar uwihawete pe wà nehe. Zeneki wexak putar Mawiron wanuwhawete nehe, ta'e zauxiapekwer weraha putar henataromo a'e wà nehe xe. Uze'eg putar izupe nehe. <sup>5</sup> A'e re zauxiapekwer weraha putar Zeneki Mawiron pe wà nehe. Upyta putar a'e pe nehe. Amo 'ar mehe azekaiw putar hehe nehe. Aze uzàmàtyry'ym Mawiron pe har wà nehe, nezewe rehe we nupuner kwaw waneitykaw rehe nehe. Ihe Tupàn Tuweharupi Wiko Ma'e

aze'eg kwez kury, i'i Zeremi teko wanupe, i'i Zeneki. A'e rupi hepyhyk kar.

<sup>6</sup> Tupàn Tuweharupi Wiko Ma'e uze'eg ihewe kury.

<sup>7</sup> Anamew netutyr Xarum ta'yr nerekar putar nehe. — Eme'eg kar heywy Anatot pe har nehe, i'i putar newe nehe, i'i Tupàn ihewe. Aiko Anamew iàñàm romo ihe. A'e rupi apuner ime'eg kar haw rehe. <sup>8</sup> Na'e uzeapo ma'e Tupàn Tuweharupi Wiko Ma'e ize'eg rupi. Hetutyra'yr Anamew herekar wà zauxiapekwer waker haw pe a'e, ihewe uze'eg pà a'e.

— Eme'eg kar heywy Anatot tawhu pe har Mezàmi ywy rehe har nehe ty, i'i ihewe. Ereiko heàñàmete wera'u romo no. A'e rupi erepuner putar heywy ime'eg kar haw rehe nehe, izar romo nerekò pà nehe, i'i ihewe. — Tupàn uzapo kar ko ma'e iko ihewe a'e, a'e hezeupe. <sup>9</sup> A'e rupi ame'eg kar Anamew iziyw izuwi. Aexak heremetarer ipuhuz haw. Heta 200 kàràm parat. <sup>10</sup> Amuapyk herer ipape rehe. Awàptym amo huwàptymaw pupe no. A'e re ainoz teko ime'eg kar awer hexak arer wamuwà wà. Aexak kar hemetarer ipuhuz haw wanupe puhuz haw hexak kar haw pupe. <sup>11</sup> Na'e apyhyk pape ipupew paw pupe iwàptym pyrer ime'eg kar awer imume'u har ihe kury. Apyhyk pape iwàptym pyr 'ym no. <sup>12</sup> Amono a'e mokoz pape Maruk Neri ta'yr Mazez hemimino pe kury. Azapo a'e ma'e Anamew henataromo, a'e ma'e hexak arer a'e pape rehe uwer imuapyk arer wanenataromo, Zutew a'e pe wapyk ma'e paw wanenataromo no. <sup>13</sup> A'e teko paw wanenataromo aze'eg Maruk pe kury.

<sup>14</sup> — Tupàn Tuweharupi Wiko Ma'e upuner wera'u ma'e Izaew wazar upyhyk kar ko pape ywy ime'eg kar awer imume'u haw newe, pape iwàptymaw pupe iwàptym pyrer, pape iwàptym pyr 'ym no. Emono ywy'a pupe nehe. Nezewe mehe umumaw putar kwarahy tetea'u

upaw 'ym pà wà nehe. <sup>15</sup> Tupàn Tuweharupi Wiko Ma'e upuner wera'u ma'e Izaew wazar uze'eg nezewe a'e. — Ko ywy rehe teko ume'eg kar putar tàpuz wà nehe, ywy wà nehe no, uwà itymaw wà nehe no, i'i.

*Zeremi uze'eg Tupàn pe*

<sup>16</sup> A'e pape Maruk Neri ta'yr pe imono re aze'eg nezewe Tupàn pe.

<sup>17</sup> O Tupàn Tuweharupi Wiko Ma'e,erezapo ywy ywak rehe we nepuner haw uhua'u ma'e rupi ne, nekàgaw rupi ne no. Erepuner wyzài ma'e iapo haw rehe. Naheta kwaw ma'e iapo haw rehe nepuner 'ymaw. <sup>18</sup> Nekatuahy teko tetea'u wanupe. Erezepyk wana'yr wanehe wanu wanemiaipo kwer hekuzaromo no. Ereiko Tupàn uhua'u ma'e upuner ma'e romo. — Tupàn Tuweharupi Wiko Ma'e upuner wera'u ma'e, nerer romo a'e. <sup>19</sup> Nema'enukwaw uhua'u ma'e iapo àwàm rehe. Erezapo ikatuahy ma'e. Erexak teko wanemiaipo paw rupi. Ererekko teko wane-miaipo hekuzaromo waneko haw hekuzaromo ne wà. <sup>20</sup> Erezapo purumupytuhegatu kar haw Ezit ywy rehe. Erezapo wiwi ko 'ar rehe no, Izaew ywy rehe, amo ywy nànàn no. A'e rupi teko ywy nànànar nekwaw wà kury. <sup>21</sup> Erepyro Izaew izuapyapyr Ezit ywy wi nepuner haw rupi nekàgaw rupi ne wà. Erezapo purumupytuhegatu kar haw ureàmàtyry'ymar wanenataromo wamukyzeahy kar pà. <sup>22</sup> Eremur ko ywy ikatu ma'e ma'e imuezuz katu haw Izaew wanupe. Ta'e eremume'u ko ywy waipy wanupe ne xe. <sup>23</sup> Ywy rehe wixe mehe ipyhyk mehe nuweruzar kwaw neze'eg wà. Nuiko kwaw nepurumu'e haw rupi wà. Nuzapo kwaw neremiaipo kar kwer wà. A'e rupi eremu'ar kar ko iaiw haw wanehe.

<sup>24</sup> Mawiron ywy rehe har ur xe wà. Uzapo uzeupir àwàm 'aw tawhu ipàrirogawtâtà huwake wà. Ta'e heixe

wer tawhu pupe wà xe, ipyhyk pà wà xe. Uzeàmàtyry'ym 'aw tawhu pe har waiko wà kury. Zeàmàtyry'ymawhu a'e, ma'uhez haw a'e no, ma'eahy haw a'e no, omono putar tawhu wapo pe a'e wà nehe. Neremimume'u kwer paw uezapo kwez kury. Erexak izeapo mehe. <sup>25</sup> A'e rupi hezar Tupàn Tuweharupi Wiko Ma'e, — Eme'eg kar ywy amo teko wame'e mehe nehe, ere ihewe. Mawiron pe har upyhyk etea'i tawhu wà. Nezewe rehe we erezapo kar a'e ma'e ihewe, a'e izupe.

### *Tupàn uwazar Zeremi ize'eg izupe kury*

<sup>26</sup> Na'e Tupàn Tuweharupi Wiko Ma'e uwazar heze'eg ihewe a'e kury.

<sup>27</sup> — Aiko Tupàn Tuweharupi Wiko Ma'e teko paw wazar romo ihe. Apuner wyzai ma'e iapo haw rehe. <sup>28</sup> A'e rupi amono putar 'aw tawhu Namukononozor Mawiron wanuwhawete pe ihe nehe, hemiruze'eg zauxiapekwer wanupe nehe no. Upyhyk putar wà nehe. <sup>29</sup> Mawiron peàmàtyry'ymar wà, wixe putar tawhu pupe wà nehe. Umunyk putar tata hehe wà nehe. Wapy putar tàpuz wà nehe. Ta'e teko wapy yhyk zàwenugar a'e tàpuz wanuwake tupàn Ma'aw imuweste pà wà xe, hemuikwahy kar pà nezewe wà xe. Uzakook win izupe imono pyr romo wà, amo tupàn a'ua'u wanupe wà no. <sup>30</sup> Izypy mehe arer we teko Izaew ywy rehe har wà, Zuta ywy rehe har wà no, xo ikatu 'ym ma'e zo uzapo wà. Wakatu 'ymaw hemuikwahy kar. <sup>31</sup> Iapo haw har mehe arer we 'aw tawhu hemuikwahy kar a'e, hemuikwahy kar azeharomoete a'e. A'e rupi amume'u imumaw pàwàm ihe. <sup>32</sup> Ta'e paw rupi uzapo ikatu 'ym ma'e wà xe: Izaew ywy rehe har wà, Zuta ywy rehe har wà, wanuwhawete wà, wanuwhaw wà, xaxeto wà, heze'eg imume'u har wà, teko Zeruzarez pe har wà. <sup>33</sup> Uwak ukupe hexak kar pà ihewe wà.

Aze mo amu'e wiwi 'aw teko ihe wà, nezewe rehe we nahirenu iwer mo wà. Nuzemu'e kwaw a'e ma'e rehe wà. Nuzelei kwaw hezepyk àwàm rehe wà. <sup>34</sup> Te tupàn a'ua'u wanagapaw iro ma'e omono tòpuzuhu pupe wà. Kwehe mehe uzapo a'e tòpuzuhu herer rehe wà. Umuaiw heràpuz wà. <sup>35</sup> Ywyàpyznaw Men-Inom her ma'e rehe uzapo ma'ea'yr hapy haw tupàn Ma'aw her ma'e pe wà. Uzuka wa'yr wazyr wanehe we a'e pe tata imunyk pà wanehe a'e pe wà, tupàn Morok her ma'e imuweste pà wà. Nazapo pixik kwaw agwer ma'e wanupe ihe. — Nuzapo pixik kwaw agwer purumuhuhuk kar ma'e a'e wà nehe, a'e hezeupe. Nezewe rehe we uzapo wà. — Nuzapo kar pixik kwaw ikatu 'ym ma'e Zuta ywy rehe har wanupe wà nehe, a'e hezeupe.

*Tupàn umume'u wapyro àwàm wanupe*

<sup>36</sup> A'e re Tupàn Tuweharupi Wiko Ma'e Izaew wazar uze'eg ihewe kury.

— Zeremi, i'i ihewe. — Nezewe teko i'i oho waiko wà. — Zeàmàtyry'ymawhu a'e, ma'uhez haw a'e no, ma'eahy haw a'e no, omono putar tawhu Mawiron wanuwhawete ipo pe a'e wà nehe, i'i wà. Einu heremimume'u ràm nehe kury. <sup>37</sup> Aikwahy putar nehe. Aikwahy putar tuwe nehe. Hepuruzukaiwahy putar nehe. A'e rupi amuhàmuhàz putar 'aw teko ywy tetea'u rehe ihe wà nehe. Amo 'ar mehe amono'og wi putar ihe wà nehe. Amuzewyr kar putar xe ihe wà nehe. Amuigo kar putar katu haw rehe ihe wà nehe. Ni amo nuzapo kwaw ikatu 'ym ma'e wanupe nehe. <sup>38</sup> Wiko putar heremaihu romo wà nehe. Aiko putar wazar romo ihe nehe no. <sup>39</sup> Xo pitài ma'e azapo kar putar wanupe nehe. Tuweharupi ukyze putar ihewi wà nehe. Ta'e nezewe haw ikatu putar wanupe nehe xe, wazuapyapyr wanupe nehe no. <sup>40</sup> Azapokatu putar ko heze'egaw upaw pixik 'ym ma'e wanehe we ihe nehe:

Napytu'u pixik kwaw ikatu ma'e wanupe iapo re ihe nehe. Azemuawate katu kar putar wanupe nehe. Hemuwete katu putar upy'a pe azeharomoete wà nehe. Nutyryk pixik kwaw ihewi wà nehe.<sup>41</sup> Ikatu ma'e wanupe iapo haw ikatuahy putar ihewe nehe. Hepy'a nànàn herekwé nànàn amuigo kar putar ko ywy rehe ihe wà nehe.<sup>42</sup> Arur ko iaiw haw 'aw teko wanupe ihe. Nezewegatete amono putar ikatu ma'e paw heremimume'u kwer ihe nehe no, wanupe ihe nehe no.<sup>43</sup> Zeremi. — Ko ywy uzeapo putar ywyxiguhu zàwenugar romo nehe, i'i teko waiko wà. — Naheta kwaw teko wà nehe, naheta kwaw ma'ea'yr wà nehe. Mawiron pe har wiko putar izar romo wà nehe, i'i teko waiko wà. Ko ma'e amume'u newe kury. — Teko ume'eg kar putar ywy ko ywy rehe a'e wà nehe.<sup>44</sup> Ume'eg kar putar ywy wà nehe. Umuapyk putar uwer pape rehe wà nehe. Uwàpytym putar huwàpytymaw pupe wà nehe. Wenoz putar teko ime'eg kar haw hexakar romo wà nehe. Agwer ma'e uzeapo putar amo ywy rehe: Mezàmi ywy rehe, taw Zeruzarez izywyr har wanupe, tawhu Zuta ywy rehe har wanupe, tawhu ywytyruhu rehe har wanupe, ywytyr heta 'ymaw rehe nehe, ywy kwarahy ihmaw awyze har kutyr har rehe nehe. Ihe Tupàn Tuweharupi Wiko Ma'e aze'eg kwez kury.

### 33

#### *Uze'eg wi Tupàn Zeremi pe*

<sup>1</sup> Zauxiapekwer hemunehew kar wiwi weko haw pe wà. A'e pe hereko mehe Tupàn Tuweharupi Wiko Ma'e uze'eg wi ihewe kury.

<sup>2</sup> — Ihe Tupàn Tuweharupi Wiko Ma'e aiko ko ma'e imume'u har romo ihe. Azapo ywy imono pà henaw rehe. Tupàn Tuweharupi Wiko Ma'e herer romo ihe.<sup>3</sup> Zeremi. Aze herenoz pe nehe, awazar putar nehe. Amume'u putar

ma'e temigwaw 'ym ikatuahy ma'e newe nehe. Nerekwaw kwaw a'e ma'e. <sup>4</sup> Ihe Tupàn Tuweharupi Wiko Ma'e Izaew wazar amume'u ko ma'e. Zauxiapekwer Mawiron pe har uzapo putar pàrirogawtàtì rehe uezepir àwàm wà nehe, tawhu iàmàtyry'ym pà wà nehe. Upyhyk putar wà nehe. Na'e weityk putar tòpuz Zeruzarez pe har wà nehe. Weityk putar Zuta ywy rehe har wanuwhawete hàpuzuhu wà nehe no. <sup>5</sup> Amo awa uzàmàtyry'ym putar Mawiron pe har wà nehe. Aikwahy ihe, a'e rupi azuka putar a'e awa hepuruzukaiwahy haw rupi ihe wà nehe. Mawiron pe har umynehem putar tòpuz wanetekwer pupe wà nehe. Aityk 'aw tawhu kwez ihe. Ta'e heta tetea'u xe har wakatu 'ymaw xe. <sup>6</sup> Nezewe rehe we amukatu putar 'aw tawhu ihe nehe. Amukatu putar teko ipupe har ihe wà nehe no. Amumaw kar putar kwarahy tetea'u xe zeàmàtyry'ym 'ymaw rehe ihe wà nehe. Ni amo nuzapo kwaw ikatu 'ym ma'e wanupe wà nehe. <sup>7</sup> Arur putar ikatu haw Zuta ywy rehe har wanupe nehe, Izaew ywy rehe har wanupe nehe no. Azapo wi putar ma'e paw rupi ihe nehe. Nuzawy kwaw izypy mehe arer nehe. <sup>8</sup> Amukatu wanemiapo kwer ikatu 'ym ma'e wi upaw rupi ihe wà. Amunàn putar wakatu 'ymaw nehe. Hereharaz putar hereruzar 'ym awer wi nehe no. <sup>9</sup> Zeruzarez hemurywete kar putar nehe. Ikatuahy putar ihewe nehe no. — Ikatu wera'u, a'e putar izupe nehe. Ywy nànànar uryryryryz putar ikatu ma'e heremiapo imume'u haw henu mehe wà nehe. Azapo putar ikatu ma'e Zeruzarez pe har wanupe nehe. Arur putar katu haw 'aw tawhu pe nehe no. <sup>10</sup> Tupàn Tuweharupi Wiko Ma'e uez'eg wi kury.

— Ko ywy nuzawy kwaw ywyxigu, i'i waiko wà. Naheta kwaw teko wà. Naheta kwaw ma'ea'yr wà, i'i wà. Azeharomoete naheta kwaw teko tawhu Zuta ywy rehe har pupe wà. Naheta kwaw teko Zeruzarez pupe nahu

rupi wà no. Naheta kwaw ma'ea'yr wà no. <sup>11</sup> Nezewe rehe we peinu putar teko wanehapukaz mehe 'aw tawhu pupe pe wà nehe. Zerekò haw wànoànog putar wà nehe. Peinu putar pe wà nehe. Peinu putar teko wazegar mehe pe wà nehe, ma'e heràpuzuhu pe herur mehe pe wà nehe no. Ta'e ipurumume'u wer hekatu haw rehe ihewe a'e wà nehe xe. Nezewe uzegar putar wà nehe.

— Pemume'u Tupàn Tuweharupi Wiko Ma'e ikatu haw izupe nehe. Pemume'u upuner wera'u ma'e ikatu haw izupe nehe.

Ta'e ikatuahy a'e xe.

Ipruamutar katu haw nupaw pixik kwaw nehe, i'i putar wà nehe. Izypy mehe uhyk katu ma'e teko wanupe.

Amuhyk wi putar ma'e wanupe ihe nehe no. Ihe Tupàn Tuweharupi Wiko Ma'e aze'eg kwez kury.

<sup>12</sup> Tupàn Tuweharupi Wiko Ma'e uze'eg a'e kury.

— Ko ywy rehe naheta kwaw teko wà, ni ma'ea'yr wà.

Heta putar ka'api'i amo 'ar mehe nehe.

Àràpuhàràñ wamono'ogar upuner weimaw wanerur haw rehe xe wà nehe.

<sup>13</sup> Wamono'ogar upapar putar weimaw wamemyr tawhu ywytyruhu wanehe har wanupe wà nehe, tawhu ywyàpyznaw rehe har Zuta ywy rehe har wanupe wà nehe no, tawhu ywyàpyznaw rehe har ywy kwarahy ihemaw awyze har kutyr har wanupe wà nehe no, Mezàmi ywy rehe har wanupe wà nehe no, taw Zeruzarez izywyr har pe har wanupe wà nehe no, tawhu Zuta ywy rehe har wanupe wà nehe no.

Ihe Tupàn Tuweharupi Wiko Ma'e aze'eg kwez kury.

<sup>14</sup> Uze'eg wi Tupàn Tuweharupi Wiko Ma'e kury.

— Uhem etea'i amo 'ar kury. A'e 'ar mehe azapo putar Izaew wanupe Zuta wanupe heremimume'u kwer ihe nehe. <sup>15</sup> A'e 'ar mehe a'e kwarahy rehe amuzexak kar putar amo Tawi izuapyr ihe nehe. Wereko katu putar teko ko ywy rehe har a'e wà nehe. Uzapo putar ikatu ma'e ko ywy rehe a'e nehe. <sup>16</sup> A'e 'ar ihem mehe apyro putar teko Zuta ywy rehe har ihe wà nehe. Ni amo nuzapo kwaw ikatu 'ym ma'e teko Izaew ywy rehe har wanupe wà nehe. Omono putar amo her Zeruzarez pe wà nehe: — Tupàn Tuweharupi Wiko Ma'e zanepyro har, i'i putar izupe wà nehe. <sup>17</sup> Ihe Tupàn Tuweharupi Wiko Ma'e amume'uhay ko ma'e ihe kury: tuweharupi heta putar amo Tawi izuapyr Izaew wanuwiawete romo a'e nehe. <sup>18</sup> Tuweharupi heta putar xaxeto Erewi izuapyapyr wà nehe. Upyta putar herenataromo wà nehe. Werur putar ma'e ihewe teko wanekuzaromo wà nehe, hapy pyr herenataromo har wà nehe. Werur putar arozràñ ihewe wà nehe no. Uzuka putar ma'ea'yr herenataromo wà nehe no.

<sup>19</sup> Tupàn Tuweharupi Wiko Ma'e umume'u ko ma'e ihewe a'e kury.

<sup>20</sup> Izypy mehe amume'u 'ar wanur àwàm ihe, ipytunaw wanur àwàm ihe. Uhem 'ar. A'e re uhem ipytunaw. Uhem wi 'ar. A'e re uhem wi ipytunaw no. Tuweharupi ur nezewewe wà. Nupytu'u kwaw ur ire wà. <sup>21</sup> Nezewegatete ni amo nupuner kwaw heze'eg awer heremiruze'eg Tawi rehe we heremiapo katu kwer ihaw paw rehe wà nehe. — Tuweharupi amo nezuapyr wiko putar Izaew wanuwiawete romo a'e nehe. Azapokatu heze'egaw xaxeto Erewi izuapyapyr wanehe we kwehe mehe ihe no. Uma'erekoh iheheràpuzuhu pupe wà. Napuner kwaw a'e heze'eg awer izuhaw paw rehe ihe no. <sup>22</sup> Amueta tetea'u kar putar heremiruze'eg Tawi

izuapyapyr ihe wà nehe. Amueta tetea'u kar putar xaxeto Erewi izuapyapyr ihe wà nehe no. Amueta tetea'u kar azeharomoete ihe wà nehe. Teko nupuner kwaw zahytata ywak rehe har wapapar haw rehe wà. Nupuner kwaw ywyxig yryhu izywyr har wapapar haw rehe wà no. Nezewegatee nupuner kwaw a'e teko wapapar haw rehe wà nehe no.

<sup>23</sup> Tupàn Tuweharupi Wiko Ma'e upuranu herehe kury.

<sup>24</sup> Zeremi, teko uze'eg oho waiko nezewe wà. — Tupàn weityk Izaew a'e wà. Weityk Zuta a'e wà no, i'i ihewe wà. — Kwehe mehe waxaexak a'e teko wà. Weityk wà kury, i'i ihewe wà. Uze'eg zemueteahy heremaihu wanehe wà. — Nuiko kwaw teko pitai imono'og pyr romo uzemono'og ma'e wà kury, i'i wà. <sup>25</sup> Ihe Tupàn Tuweharupi Wiko Ma'e amume'u ko ma'e ihe. Kwehe amume'u 'ar ihmè àwàm pitaitàigatu ihe wà. Amume'u ipytunaw ihmè àwàm pitaitàigatu ihe wà no. Azapo kar ma'e ywy pe. Azapo kar ma'e ywak rehe no. <sup>26</sup> Namumaw kwaw a'e heze'eg awer ihe. A'e rupi namumaw kwaw heze'eg Zako izuapyapyr wanehe we heremiaipo katu kwer ihe nehe. Namumaw kwaw heze'eg heremiruze'eg Tawi rehe we heremiaipo katu kwer ihe nehe no. Aexaexak putar amo Tawi izuapyr Àmàrààw izuapyapyr wanuwiawete romo ihe nehe, Izak izuapyapyr wanuwiawete romo ihe nehe no, Zako izuapyapyr wanuwiawete romo ihe nehe no. Amuhyk wi putar ma'e heremaihu wanupe nehe. Apuhareko putar ihe wà nehe no.

## 34

### *Tupàn uze'eg tuwiawete Zeneki pe*

<sup>1</sup> Namukononozor Mawiron wanuwiawete a'e, hemiruze'eg zauxiapekwer a'e wà no, uzàmàtyry'ym Zeruzarez waiko ko pape iapo mehe a'e wà kury.

Uzàmàtyry'ym taw izywyr har wà no. Wiko ywy rehe har tetea'u wanuwhawete romo. Zauxiapekwer a'e ywy rehe har paw upytwà Zeruzarez iàmàtyry'ym mehe wà. A'e 'ar mehe Tupàn Tuweharupi Wiko Ma'e uze'eg ihewe.<sup>2</sup> — Eraha ko heze'eg Zuta wanuwhawete Zeneki pe nehe kury, i'i ihewe. — Tupàn Tuweharupi Wiko Ma'e Izaew wazar amono putar 'aw tawhu Mawiron wanuwhawete pe ihe nehe. Umumaw putar tata pupe a'e nehe.<sup>3</sup> Nerehem kwaw izuwi nehe. Zauxiapekwer nepyhyk putar izupe nemono pà wà nehe. Erexa putar Namukononozor nehe. Ereze'eg putar izupe nehe no. A'e re ereho putar Mawiron pe nehe.<sup>4</sup> Ihe Tupàn Tuweharupi Wiko Ma'e amume'u ma'e teko newe ihe. Tuwhawete Zeneki, einu katu ko heze'eg nerehe har nehe. Eremàno putar zeàmàtyry'ym 'ymaw rehe nehe. Neremàno kwaw zeàmàtyry'ymawhu pe nehe.<sup>5</sup> Tuwhawete neipy wamàno mehe teko wapy yhyk zàwenugar wazutym mehe wà. Nezewegatete wapy putar yhyk zàwenugar nezutym mehe wà nehe no. Uzai'o putar nerehe wà nehe. — Zaneruwhawete umàno a'e, i'i putar wà nehe. Ihe Tupàn Tuweharupi Wiko Ma'e aze'eg kwez kury.

<sup>6</sup> Na'e amume'u a'e ma'e paw aha tuwhawete Zeneki pe Zeruzarez pe ihe kury. <sup>7</sup> Mawiron wanuwhawete hemiruze'eg zauxiapekwer uzàmàtyry'ym Zeruzarez waiko a'e 'ar mehe wà. Uzàmàtyry'ym Araki tawhu a'e 'ar mehe wà. Uzàmàtyry'ym Azeka tawhu a'e 'ar mehe wà no. Xo a'e mokoz tawhu Zuta ywy rehe har pàrirogawtàà hereko har zo uzàmàtyry'ym we Namukononozor waiko wà rihi.

### *Umuhem kar uzeupe uma'erekò e ma'e uzewi wà*

<sup>8</sup> Zeneki uzapokatu uze'egaw Zeruzarez pe har wanehe we kury. — Pemuhem kar peme uma'erekò e ma'e pezewi pe wà nehe, i'i wanupe. Tupàn Tuweharupi Wiko Ma'e

uze'eg wi ihewe a'e ma'e izeapo re. <sup>9</sup> — Pitàitàigatu pemuhem kar peme uma'ereko e ma'e Emerew pezewi nehe, awa wà nehe, kuzà wà nehe no, i'i tuwihawete tekò wanupe. Nezewe mehe ni amo nuwereko kwaw wànàm uma'ereko e ma'e romo wà. <sup>10</sup> Ize'eg ikatu tekò paw wanupe, tuwihaw paw wanupe no. — Urumuhem kar putar ure wà nehe, i'i izupe wà. — Nurumuigo wi kar kwaw urewe uma'ereko e ma'e romo ure wà nehe, i'i izupe wà. Na'e umuhem kar wà. Wiko uezupe uma'ereko ma'e romo wà kury. <sup>11</sup> Na'e uzuhaw uze'eg wà. Umuzewyr wi kar wà. Umuigo wi kar uma'ereko e ma'e romo wà.

<sup>12-13</sup> Na'e Tupàn Tuweharupi Wiko Ma'e Izaew wazar umume'u kar ko ze'eg tekò wanupe a'e kury. — Peipy Ezit ywy wi wapyro mehe amuhem kar amo pe wama'ereko e haw wi ihe. Azapokatu heze'egaw wanehe we ihe. <sup>14</sup> Tuweharupi aze upaw 7 kwarahy wà nehe, pemuhem kar wyzàì Emerew penemime'eg kar kwer pe wà nehe, aze umumaw 6 kwarahy uma'ereko e ma'e romo wiko pà wà nehe, a'e wanupe. Nezewe rehe we peipy nuzekaiw kwaw herehe wà. Nahereruzar kwaw wà. <sup>15</sup> Karumehe peityk wanemiapo. Pezapo ihewe ikatuahy ma'e. — Urumuhem kar putar Emerew ureànàm ure wà nehe, peze tuwihawete pe herenataromo. Pemume'u a'e ma'e heràpuzuhu pe. Kwehe mehe peipy uzapo a'e tàpuzuhu hemuwete katu haw romo wà. <sup>16</sup> A'e re pezewyr peze'eg awer wi. Pemuaiw herer. Pemuzewyr kar peme uma'ereko e ma'e kwer wamuwà wà. — Peiko wi uma'ereko e ma'e urewe nehe, peze wanupe. <sup>17</sup> A'e rupi — Nahereruzar kwaw pe, a'e peme kury. Napemuhem kar kwaw peànàm Emerew penàpuz wi pe wà. A'e rupi apumuhem kar putar peneko haw wi ihe nehe kury. Pepuner pemàno haw rehe zeàmàtyry'ymawhu rehe nehe, ma'eahy haw rehe nehe no, ma'uhez haw rehe nehe no. Apumuigo kar

putar iaiw ma'e romo teko ywy nànànar wanenataromo ihe nehe. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>18-19</sup> Tuwihaw Zuta ywy rehe har wà, Zeruzarez pe har wà no, tuwihawete hàpuzuhu pe har wà no, Xaxeto wà, teko paw wà, uzapokatu uze'egaw herehe we a'e wà. Upeilàg tapi'ak mokoz pehegwer romo wà. Na'e wata a'e mokoz pehegwer wamyterupi wà. A'e re uzuhaw uze'eg awer herenataromo iapo pyrer wà. Nuzapo kwaw wemimume'u kwer wà. <sup>20</sup> A'e rupi amono putar waàmàtyry'ymar wanupe nehe. Ipuruzuka wer wanehe wà. Wiràmiri wà nehe, miar hehaite ma'e wà nehe no, u'u putar wanetekwer wà nehe. <sup>21</sup> Amono putar Zuta ywy rehe har wanuwhawete Zeneki ihe nehe, tuwihaw hehe we har ihe wà nehe no, waàmàtyry'ymar wanupe ihe wà nehe. Ipuruzuka wer wanehe wà. Mawiron wanuwhawete upytu'u peàmàtyry'ym ire a'e. Amono putar a'e teko izupe ihe wà nehe. <sup>22</sup> Aze'eg putar peàmàtyry'ymar wanupe nehe. Na'e uzewyr putar wà nehe. Uzàmàtyry'ym putar tawhu ipyhyk pà tata pupe imumaw pà wà nehe. Tawhu Zuta ywy rehe har azapo putar ywyxiguhi teko heta 'ymaw romo ihe wà nehe.

## 35

### *Zeremi weraha Hekaw iànàm tòpuzuhu pe wà*

<sup>1</sup> Zeoaki Zuzi talyr Zuta wanuwhawete romo heko mehe Tupàn Tuweharupi Wiko Ma'e uze'eg ihewe.

<sup>2</sup> — Zeremi, i'i. — Ekar Hekaw iànàm echo ne wà nehe, wanupe neze'eg pà nehe. Eraha amo ipupyaikaw pyrer tòpuzuhu pupe har pe ne wà nehe. E'u kar win wanupe nehe, i'i ihewe.

<sup>3-4</sup> Na'e aha Hekaw wapiaromo ihe kury. Araha tòpuzuhu pe paw rupi ihe wà. Zazani inugwer Zeremi ta'yr Amazini hemimino a'e, tywyr paw wà, ta'yr paw wà

no, paw rupi araha tàpuzuhu pe ihe wà. Araha ipupaikaw pyrer Tupàn ze'eg imume'u har Ànà hemiruze'eg waneko haw pe ihe wà. Ànà wiko Tupàn heruzar katu har romo. Zinari ta'yr romo hekon. A'e ipupaikaw pyrer upyta tuwihaw waneko haw huwake Mazez heko haw i'aromo. Mazez wiko Xaru ta'yr romo. Xaru wiko tuwihaw ikàg ma'e romo tàpuzuhu pupe.<sup>5</sup> Na'e amono ywy'a win pupe imynehem pyrer Hekaw wanenataromo ihe kury. Amono kanek wanupe no. — Pe'u win pixik nehe ty wà, a'e wanupe.

<sup>6</sup> Uwazar heze'eg ihewe wà.

— Nuru'u kwaw win ure, ta'e ureràmuz Zonanaw Hekaw ta'yr uze'eg nezewe upurumuzàmuzàg wanupe.  
 — Pe'u pixik zo win nehe. Ni pezuapyapyr wà nehe no, tuwe nu'u kwaw wà nehe no.<sup>7</sup> Pezapo zo tàpuz nehe. Pezutym zo ma'eà'yz nehe. Pezapo zo uwà tyw nehe. Peme'eg kar zo uwà tyw nehe no. Naheta kwaw peneko hawete peme nehe. Peiko tàpuzràn iapo pà tuweharupi nehe. Nezewe mehe pemumaw putar kwarahy tetea'u ko ywy rehe peneko pà nehe, i'i wa'yr wanupe.<sup>8</sup> Ure ureruzar katu ureràmuz Zonanaw Hekaw ta'yr ize'eg ure. Ni ure, ni ureremireko wà, ni urera'yr wà, ni urerazyr wà, nuru'u kwaw win ure.<sup>9-10</sup> Nuruzapo kwaw tàpuz urerekohaw romo. Uruiko tàpuzràn pupe. Naheta kwaw uwà tyw urewe, ni ywy, ni ma'eà'yz. Ureruzar katu ureràmuz Zonanaw hemiapo karer ure.<sup>11</sup> Mawiron wanuwihawete Namukononozor ko ywy rehe har waàmàtyry'ym mehe uruzur Zeruzarez pe zauxiapekwèr Mawiron pe har wanuwi Xir ywy rehe har wanuwi urehem pà ure. A'e rupi uruiko xe.

<sup>12-13</sup> Na'e Tupàn Tuweharupi Wiko Ma'e upuner wera'u ma'e Izaew wazar umume'u kar ko uze'eg teko Zuta ywy rehe har wanupe Zeruzarez pe har wanupe kury,

ihewe kury. — Ihe Tupàn Tuweharupi Wiko Ma'e apuranu penehe kury. — Màràzàwe tuwe napepurenu wer kwaw herehe. Màràzàwe tuwe napepureruzar wer kwaw heze'eg rehe. <sup>14</sup> Zonanaw izuapyapyr weruzar ize'eg wà. Nu'u kwaw win wà. Te kutàri ni amo nu'u kwaw wà. Ta'e paw rupi weruzar ize'eg imur pyrer wà xe. Tuweharupi aze'eg peme ihe. Naperuzar kwaw heze'eg. <sup>15</sup> Tuweharupi amono kar heremiruze'eg heze'eg imume'u har peme ihe wà. — Petyryk ikatu 'ym ma'e penemiapo wi nehe, i'i peme wà. — Pezapo ikatu ma'e nehe, i'i peme wà. — Pemuwete zo amo tupàn pe wà nehe. Pema'erekò zo wanupe nehe, i'i peme wà. Nezewe mehe pepuner putar ko ywy peipy wanupe heremimono kwer rehe peneko haw rehe nehe. Napepurenu wer kwaw waze'eg rehe. Napepureruzar wer kwaw waze'eg rehe. <sup>16</sup> Zonanaw izuapyapyr weruzar wàmuz ze'eg wanupe imono pyrer wà. Pe heremiaihu pe, nahereruzar kwaw pe. <sup>17</sup> A'e rupi ihe Tupàn Tuweharupi Wiko Ma'e upuner wera'u ma'e Izaew wazar amono kar putar pemumaw pàwàm heremimume'u kwer penehe ihe nehe, Zuta ywy rehe har wà, Zeruzarez pe har wà. Azapo putar nezewe haw nehe, ta'e napepureruzar wer kwaw heze'eg rehe pe xe. Napepuruwazar wer kwaw heze'eg rehe penenoz mehe no, i'i Tupàn.

<sup>18</sup> Na'e aze'eg Hekaw izuapyapyr wanupe kury. — Nezewe uze'eg Tupàn Tuweharupi Wiko Ma'e upuner wera'u ma'e Izaew wazar peme a'e. — Peruzar peipy Zonanaw ize'eg. Pezeruze'eg hemiapo karer rehe no. Pezapo hemiapo karer paw no. <sup>19</sup> A'e rupi ihe Tupàn Tuweharupi Wiko Ma'e upuner wera'u ma'e Izaew wazar amume'uahy ko ma'e Zonanaw Hekaw ta'y় pe ihe kury. Tuweharupi heta putar amo nezuapyr heremiruze'eg romo a'e nehe, a'e newe kury, i'i izupe.

## 36

*Maruk umugeta pape Tupàn hàpuzuhu huwake katu pe a'e*

<sup>1</sup> Zeoaki Zuzi ta'yr tuwiawete Zeruzarez pe heko mehe  
<sup>4</sup> haw kwarahy rehe, Tupàn Tuweharupi Wiko Ma'e  
 uze'eg ihewe.

<sup>2</sup> — Zeremi, i'i. — Epyhyk amo pape nehe. Amume'u ma'e tetea'u newe Izaew ywy rehe har wanehe ihe, Zuta ywy rehe har wanehe ihe no, amo ywy rehe har wanehe ihe no. Emuapyk a'e ma'e paw a'e pape rehe nehe. Azypyrog newe heze'eg pà Zuzi tuwiawete romo heko mehe ihe. A'e 'ar henataromo tuweharupi amume'u ma'e teko newe te ko 'ar rehe no. Emuapyk a'e ma'e a'e pape rehe paw rupi nehe. <sup>3</sup> Hema'enukwaw purumumaw paw tetea'u Zuta ywy rehe har wanehe imu'ar pyràm rehe. Ukwaw putar paw rupi wà nehe. Nezewe mehe aze ru'u weityk ikatu 'ym ma'e iapo haw wà nehe. Aze weityk wà nehe, amunàn putar wanemiacpo kwer ikatu 'ym ma'e wanuwi ihe nehe, hereharaz putar wakatu 'ymaw wi nehe no.

<sup>4</sup> Na'e ainoz Maruk Neri ta'yr imuwà kury. Amume'u Tupàn Tuweharupi Wiko Ma'e hemimume'u kwer paw izupe. Umuapyk a'e ma'e paw pape rehe. <sup>5</sup> Na'e azapo kar ko ma'e izupe kury.

— Tuwiaw nahe muixe kar kwaw Tupàn Hàpuzuhu pupe a'e wà. <sup>6</sup> Echo a'e pe teko mai'u 'ymaw Tupàn henataromo iapo mehe nehe. Emugeta ko pape nerahy haw rupi nehe. Tuwe wenu Tupàn Tuweharupi Wiko Ma'e ize'eg paw rupi wà nehe, newe heremimume'u kwer paw rupi wà nehe. Tuwe teko nerenu wà nehe. Tuwe tawhu Zuta ywy rehe har wanuwi ur ma'e kwer nerenu wà nehe no. <sup>7</sup> Aze ru'u nezewe uze'eg putar Tupàn pe wà nehe. Aze ru'u weityk putar wemiacpo ikatu 'ym ma'e wà nehe. Ta'e

Tupàn Tuweharupi Wiko Ma'e wikkahy a'e xe. Wikkahy tuwe wemiaihu wanupe, a'e izupe.

<sup>8</sup> Na'e Maruk umugeta Tupàn Tuweharupi Wiko Ma'e ize'eg tàpuzuhu huwake katu pe kury, heze'eg rupi katete kury. <sup>9</sup> Zeoaki Zuzi ta'yr Zuta ywy rehe har wanuwihawete romo heko mehe 9 haw zahy rehe 5 haw kwarahy rehe teko uzapo mai'u 'ymaw Tupàn Tuweharupi Wiko Ma'e henataromo wà kury. Zeruzarez pe wiko ma'e paw uzapo wà. Tawhu Zuta ywy rehe har pe har paw uzapo wà no. <sup>10</sup> Na'e Maruk umugeta heremimume'u kwer pape rehe imuapyk pyrer paw kury. Teko paw wenu imugeta mehe wà. Uzapo a'e imugeta haw tàpuzuhu huwake Zemari Xàpà ta'yr tuwihawete ze'eg imuapykar heko haw pe. A'e ipupyaikaw namuite kwaw Tupàn Hàpuzuhu ikenaw ipyahu ma'e wi a'e. Teko upuner a'e pupyaikaw wi katu haw ywate har pe uhemaw rehe wà.

### *Umugeta pape tuwihaw wanenataromo*

<sup>11</sup> Mikai Zemari ta'yr Xàpà hemimino wenu Maruk Tupàn Tuweharupi Wiko Ma'e ze'eg pape rehe imuapyk pyrer imugeta mehe. <sup>12</sup> Na'e Mikai uwezyw tuwihawete heko haw pe. Oho tuwihawete ze'eg imuapykar heko haw pe. Tuwihaw paw uzemono'og a'e pe wà: Erizàm tuwihawete heruze'egar, Nerai Xemai ta'yr, Ewnàtà Aki-mor ta'yr, Zemari Xàpà ta'yr, Zeneki Anani ta'yr, amog-ller tuwihaw paw wà. <sup>13</sup> Mikai umume'u Maruk teko wanupe hemimugeta kwer paw a'e pe har wanupe. <sup>14</sup> Na'e tuwihaw omono kar Zeuni Netani ta'yr Xeremi hemimino Kuzi hemimino ta'yr Maruk pe kury. Emume'u ko ma'e izupe nehe, i'i izupe wà. — Ezur xe pape teko wanupe neremimugeta kwer herur pà nehe, ere izupe nehe, i'i izupe wà.

Na'e Maruk upyhyk pape tuwihawete hàpuzuhu pe oho  
pà kury. <sup>15</sup> A'e pe har uze'eg izupe wà.

— Aze ikatu newe nehe, eapyk pe pe pape imugeta pà  
urewe nehe, i'i izupe wà. Na'e Maruk umugeta wanupe  
kury. <sup>16</sup> A'e ma'e paw henu re ume'e uzehezehe ukyze pà  
wà kury, Maruk pe uze'eg pà wà kury.

— Ximume'u ko ma'e tuwihawete pe nehe kury, i'i  
uzeupeupe wà.

<sup>17</sup> Na'e upuranu hehe wà.

— Emume'u amo ma'e urewe. Màràzàwe tuwe ere-  
muapyk a'e ma'e paw. Aipo Zeremi umuapyk kar newe.

<sup>18</sup> — Pitàitàigatu ze'eg Zeremi umuapyk kar ihewe  
a'e. Amuapyk a'e ze'eg pitàitàigatu ko pape rehe ihe, i'i  
Maruk.

<sup>19</sup> Na'e uze'eg wi izupe wà.

— Ne nehe, Zeremi nehe no, pezeàmim nehe. Pe-  
mume'u zo pezeàmimaw amo wanupe nehe i'i izupe wà.

### *Tuwihawete weityk pape tata rehe a'e*

<sup>20</sup> Tuwihaw wezar a'e pape ipupyaikaw pyrer Erizàm  
tuwihawete ze'eg imuapykar heko haw pe wà. Na'e  
oho ipupyaikaw pyrer tuwihawete heko haw pe wà kury.  
Umume'u a'e ma'e paw izupe wà. <sup>21</sup> Na'e tuwihawete  
omono kar Zeuni a'e pape ipiaromo kury. Oho ipupyaikaw  
pyrer Erizàm heko haw pe. Werur pape a'e wi tuwi-  
hawete Zeoaki pe imugeta pà, tuwihaw izywyr har nànàn  
imugeta pà no. <sup>22</sup> Huwixàg a'e 'ar rehe. Tuwihawete  
wiko wàpuzuhu tuwixàg mehe har pe. Wapyk tata  
huwake. <sup>23</sup> Zeuni umugeta a'e pape iko izupe. Ipehegwér  
imugeta mehe tuwihawete omonohok a'e pape takihe  
pupe, ipehegwér tata pupe heityk pà. Uzapo nezewé haw  
ipehegwér nànàn. Te a'e pape paw uzeapo tanimuk romo  
kury. <sup>24</sup> A'e pape umume'u iaiw ma'e uezapo ma'e ràm.  
Nezewé rehe we ni tuwihawete, ni tuwihaw hehe we har

a'e ma'e paw henu arer wà no, nukyze kwaw wà. Nuexak kar pixik kwaw wemiapo kwer rehe uzemumikahy haw wà. <sup>25</sup> Na'iruz uze'eg tuwihawete pe a'e 'ym mehe wà: Ewnàtà, Nerai, Zemari. — Emunyk zo tata a'e pape rehe nehe, i'i izupe wà. Nezewe rehe we nuzekaiw kwaw waze'eg rehe. <sup>26</sup> Uze'eg amo wanupe: wa'yr Zerameew, Xerai Azariew ta'yr, Xeremi Amineew ta'yr. — Pepyhyk Zeremi ze'eg imuapykar peho nehe ty wà, i'i wanupe. — Pepyhyk Zeremi peho nehe no, i'i wanupe. Na'urepyhyk kwaw wà. Ta'e Tupàn Tuweharupi Wiko Ma'e uremim a'e xe.

### *Amo pape no*

<sup>27</sup> Tuwihawete Zeoaki wapy pape heze'eg Maruk pe imuapyk kar pyrer hereko har. A'e re Tupàn Tuweharupi Wiko Ma'e uze'eg ihewe. <sup>28</sup> — Epyhyk amo pape kury, i'i ihewe. — Emuapyk wi ze'eg pape tuwihawete hemiapy kwer rehe arer 'aw pape rehe nehe kury, i'i ihewe. <sup>29</sup> — Emume'u ko ma'e tuwihawete pe kury. — Tuwihawete Zeoaki, ereapy a'e pape nezehe nepuranu pà. — Mawiron wanuwhawete ur putar ko ywy imumaw pà a'e nehe. Uzuka putar teko hehe har wà nehe no. Uzuka putar ma'ea'yr hehe we har wà nehe no, i'i Zeremi a'e ze'eg pape rehe imuapyk pà. Màràzàwe tuwe uze'eg nezewe, ere nezeupe. <sup>30</sup> A'e rupi ihe Tupàn Tuweharupi Wiko Ma'e amume'u ko ma'e newe ihe kury, tuwihawete Zeoaki. — Ni amo nezuapyr nuiko kwaw tuwihawete romo Tawi haikweromo har romo a'e wà nehe. Nemàno re we-ityk putar neretekwer katu pe wà nehe. 'Aromo upyta putar kwarahy rehe nehe. Pyhaw zuwiri tàtà ma'e ukyr putar hehe nehe no. <sup>31</sup> Azepyk putar nerehe ihe nehe, nezuapypyr wanehe ihe nehe no, tuwihaw nerehe we har wanehe ihe nehe no. Ta'e pezapo ikatu 'ym ma'e paw rupi pe xe. Ne, teko Zeruzarez pe har wà no, Zuta ywy

rehe har wà no, napezekaiw kwaw heze'eg rehe. A'e rupi amu'ar kar putar iaiw haw heremimume'u kwer penehe ihe nehe, ere tuwihawete pe nehe, i'i Tupàn ihewe

<sup>32</sup> Na'e apyhyk amo pape Maruk pe imono kar pà ihe kury. — Emuapyk heze'eg hehe nehe, a'e izupe. Umuapyk heremimume'u kwer paw hehe. Umuapyk ze'eg pape tuwihawete Zeoaki hemiapy kwer rehe arer paw hehe. Amume'u amo ae ma'e a'e ma'e zàwenugar izupe. Umuapyk a'e ma'e paw a'e pape rehe no.

## 37

### *Zeneki wenoz ma'e Zeremi pe*

<sup>1</sup> Namukononozor Mawiron wanuwihawete umuigo kar Zeneki Zuzi ta'yr Zuta ywy rehe har wanuwihawete romo kury, Zoaki Zeoaki ta'yr hekuzaromo kury. <sup>2</sup> Nezewe rehe we ni Zeneki, ni tuwihaw wà, ni teko wà, ni amo nuweruzar kwaw Tupàn ze'eg wà. Ihe Tupàn ze'eg imume'u har Zeremi ihe, amume'u a'e ze'eg wanupe ihe.

<sup>3</sup> Tuwihawete Zeneki umur kar amo awa ihewe wamuze'eg kar pà wà kury: Zukaw Xeremi ta'yr, Xaxeto Xoponi Mazez ta'yr. Uze'eg nezewe ihewe wà. — Aze ikatu newe, Zeremi, eze'eg Tupàn pe urepyro àwàm henoz pà izupe nehe, i'i ihewe wà. <sup>4</sup> Nahemono kwaw zemunehew paw pe a'e rihi. Ata e aha teko teko wainuinuromo ihe. <sup>5</sup> A'e 'ar mehe zauxiapekwer Ezit ywy rehe har uhem waneko haw wi wà. Amo umume'u wanur àwàm oho Mawiron pe har Zeruzarez izywyr har wanupe wà. Henu mehe Mawiron oho a'e wi wà kury. <sup>6-7</sup> Na'e Tupàn Tuweharupi Wiko Ma'e Izaew wazar uze'eg ihewe kury. — Emume'u ko ma'e Zeneki Zuta wanuwihawete pe nehe kury, i'i ihewe. — Zauxiapekwer Ezit ywy rehe har nepyro haw rehe ur ma'e uzewyr putar Ezit pe wà nehe kury. <sup>8</sup> A'e mehe Mawiron uzàmàtyry'ym wi putar 'aw tawhu wà wà

nehe. Upyhyk putar wà nehe. Umunyk putar tata hehe wà nehe no.<sup>9</sup> Ihe Tupàn Tuweharupi Wiko Ma'e amume'u ko ma'e peme ihe kury. — Pezeruzar zo temu'emaw rehe nehe. — Mawiron nuzewyr kwaw wà nehe, peze zo pezeupeupe nehe. Uzewyr putar wà nehe.<sup>10</sup> Aze mo peityk zauxiapékwer Mawiron pe har peàmàtyry'ymar pe wà, aze mo xo zauxiapékwer ikutuk pyrer zo wikuwe wà, aze mo u'aw wàpuzràn pupe wà, nezewe rehe we mo napezepyro iwer mo. Nezewe rehe we a'e awa upu'äm mo wà. Umunyk mo tata 'aw tawhu rehe wà, a'e peme, i'i wanupe.

### *Zauxiapékwer weraha Zeremi zemunehew paw pe wà*

<sup>11</sup> Zauxiapékwer Mawiron uhem Zeruzarez wi wà, ta'e zauxiapékwer Ezit ywy rehe har uhem etea'i wà xe.<sup>12</sup> A'e 'ar mehe ihe Zeremi ahem Zeruzarez wi Mezàmi ywy rehe heho pà ihe. Ta'e hepurupyhyk wer amo ywy pehegwer rehe ihe xe. Heru umur a'e ywy ihewe umàno mehe.<sup>13</sup> Ukenawhu Mezàmi her ma'e pe hehem mehe zauxiapékwer wanuwhihaw Zeri her ma'e Xeremi ta'yur Anani hemimino hemupytu'u kar a'e kury. — Erezàn echo Mawiron wamyrypar romo nereko pà kury, i'i ihewe.

<sup>14</sup> — Neremu'em, a'e izupe. — Nàzàn kwaw Mawiron wamyrypar romo hereko pà ihe, a'e izupe. Zeri na'ipurenu wer kwaw herehe. Hepyhyk tuwhihaw wanupe hereraha pà.<sup>15</sup> Tuwhihaw wikwahy ihewe wà. Hepete-petek kar wà. A'e re hemunehew kar Zonata tuwhihawete ize'eg imuapykar hàpuz me wà. Uzapo hàpuz purumune-hew paw romo a'e 'ym mehe wà.<sup>16</sup> Hemono kar ywykwar pupe wà. Amumaw 'ar tetea'u a'e pe hereko pà.

<sup>17</sup> Amo 'ar mehe tuwhihawete Zeneki omono kar zauxiapékwer hepiaromo wà kury. Tàpuzuhu pe hehem mehe upuranu herehe amo wanuwi utyryk pà kury.

— Zeremi, aipo Tupàn Tuweharupi Wiko Ma'e umume'u amo ze'eg newe, i'i. — Umume'u a'e, a'e izupe.

— Nemono putar Mawiron wanuwhawete ipo pe a'e nehe, a'e izupe. <sup>18</sup> Na'e apuranu Zeneki rehe. — Ma'e ikatu 'ym ma'e azapo nekutyr ihe. Aipo azapo ikatu 'ym ma'e tuwhaw wanenataromo. Aipo azapo ikatu 'ym ma'e teko wanenataromo. Màràzàwe tuwe hemono kar pe zemunehew paw pupe. <sup>19</sup> Amogwer newe Tupàn ze'eg imume'u har hemu'em ma'e a'e wà, umume'u Mawiron wanuwhawete neàmàtyry'ym 'ym àwàm wà, ko ywy iàmàtyry'ym 'ym àwàm wà. Ma'e pe wanekon a'e Tupàn ze'eg imume'u har wà kury. <sup>20</sup> Ko ma'e ainoz newe kury. Ezapo heremiapo kàràm nehe. Hemono kar zo pe Zonata neze'eg imuapykar hàpuz me nehe. Aze azewyr a'e pe nehe, amàno putar a'e pe nehe, a'e izupe.

<sup>21</sup> A'e rupi tuwhawete Zeneki hemono kar zauxia-pekwer waneko haw pe. Tuweharupi umur typy'ak typy'ak iapo haw parer wà. Te upaw typy'ak tawhu pe har. Xo a'e 'ar mehe upytu'u imur ire ihewe wà. Nezewe apyta zauxiapekwer waneko haw pe.

## 38

### *Umunehew kar Zeremi yzygwar pupe wà*

<sup>1</sup> Amo 'ar mehe amo awa herenu teko wanupe heze'eg mehe wà: Xepaxi Mâtà ta'yr, Zenari Pazur ta'yr, Zukaw Xeremi ta'yr, Pazur Mawki ta'yr. <sup>2</sup> — Nezewe Tupàn Tuweharupi Wiko Ma'e uze'eg a'e, a'e wanupe. — Tawhu pupe upyta ma'e ràm umàno putar zeàmàtyry'ymawhu pupe wà nehe, ma'uhez haw wi wà nehe, ma'eahy haw wi wà nehe. Aze amo uhem tawhu wi Mawiron wanupe uzemono pà wà nehe, zauxiapekwer nuzuka kwaw wà nehe. Wikuwe putar wà nehe, i'i Tupàn a'e, a'e wanupe.

<sup>3</sup> Tupàn Tuweharupi Wiko Ma'e umume'u amo ma'e peme no.

— Azeharomoete amono putar 'aw tawhu Mawiron wanuwiyawete pe ihe nehe. Upyhyk putar nehe. Weityk putar nehe, i'i Tupàn a'e, a'e wanupe.

<sup>4</sup> Na'e tuwihaw uze'eg tuwihawete pe wà kury.

— Ezuka kar 'aw awa nehe. Nezewe ize'eg mehe ozo'ok zauxiapekwer tawhu pupe har wakàgaw wanuwi. Teko paw ukyze wà no. 'Aw awa na'ipurupytywà wer kwaw zanerehe. Iaiw haw teko nànàn àràm uputar iko, i'i izupe wà.

<sup>5</sup> Tuwihawete Zeneki uze'eg wanupe kury.

— Ikatu. Pezapo penemimutar Zeremi pe nehe. Napuner kwaw pemupytu'u kar haw rehe wyzài ma'e iapo re nehe, i'i wanupe.

<sup>6</sup> Na'e hepyhyk wà kury, amo yzygwar zauxiapekwer waneko haw pe har pupe hemunehew kar pà wà kury. Tuwihawete ta'yr Mawki a'e yzygwar izar romo hekon a'e. Hemuezyw kar kyhàhàm pupe wà. Naheta kwaw 'y ipupe. Xo to'om zo heta. Azepokok to'om pupe.

<sup>7-8</sup> Amo awa wa'yr haw rehe upuner 'ym ma'e Ezio ywy rehe arer Emene-Merek her ma'e uma'erekò tuwihawete hàpuzuhu pupe a'e. Amo umume'u yzygwar pupe hereityk awer oho izupe wà. Na'e uhem oho tòpuzuhu wi tuwihawete pe uze'eg pà. A'e 'ar mehe tuwihawete wenu teko wanemiacpo imume'u haw ukenawhu Mezàmi her ma'e pe a'e. Uze'eg Emene-Merek nezewe kury.

<sup>9</sup> O tuwihawete hezar, a'e awa wanemiacpo kwer na'ikatu kwaw. Weityk Zeremi yzygwar pupe wà. Umàno putar uma'uhez romo azeharomoete a'e nehe. Ta'e naheta kwaw temi'u tawhu pupe xe, i'i izupe. <sup>10</sup> Na'e tuwihawete uze'eg izupe kury. — Eraha 30 awa xe wi ne wà nehe. Enuhem kar Zeremi yzygwar wi imàno 'ym

mehe we nehe, i'i izupe. <sup>11</sup> Na'e Emene-Merek weraha a'e awa ma'e imonokatu haw tāpuzuhu pe har pe a'e wà kury. Upyhyk amo pàn izemàner ma'e amo kamir izemàner ma'e rehe we wà. Umuezyw a'e pàn kyhàhàm pupe hereko haw yzygwar pupe wà, ihewe uze'eg pà wà. <sup>12</sup> — Zeremi, emono ko pàn nezywawyrromo nehe. Nezewe mehe kyhàhàm nanemuahy kwaw nehe, i'i ihewe. Aruzar ize'eg. <sup>13</sup> Na'e herenuhem kyhàhàm pupe yzygwar wi wà kury. A'e re apyta zauxiapekwer waneko haw pe.

*Zeneki upuranu Zeremi rehe*

<sup>14</sup> — Aiko tāpuzuhu hukenaw na'iruz haw pe ihe. Perur Zeremi ihewe nehe, i'i tuwihawete Zeneki. Hereraha izupe wà. — Zeremi, i'i ihewe. — Apuranu putar nerehe nehe kury. Ezumim zo ma'e ihewi nehe, i'i.

<sup>15</sup> Awazar ize'eg izupe.

— Aze amume'u ze'eg azeharomoete har newe nehe, hezuka putar pe nehe. Aze ureruze'eg ihe nehe, nerenu kwaw heze'eg nehe, a'e izupe.

<sup>16</sup> Na'e tuwihawete Zeneki umume'eahy wemiapo ràm ihewe kury. Amogwer nuenu kwaw ize'eg mehe wà.

— Amume'eahy nezuka 'ym àwàm newe Tupàn Tuweharupi Wiko Ma'e zanemuigo kar har henataromo ihe kury. Noromono kwaw awa nerehe ipuruzuka wer ma'e wanupe nehe no, i'i ihewe. <sup>17</sup> Na'e aze'eg tuwihawete Zeneki pe kury.

— Tupàn Tuweharupi Wiko Ma'e upuner wera'u ma'e Izaew wazar uze'eg nezewe a'e. — Tuwihawete Zeneki. Aze erezemono tuwihaw Mawiron wanuwihawete rehe har wanupe nehe, nanezuka kar kwaw wà nehe. Nuwapy kwaw 'aw tawhu wà nehe. Ereikuwe putar nehe. Neànàm wikiwe putar wà nehe no. <sup>18</sup> Aze nerezemono kwaw wanupe nehe, amono putar 'aw tawhu Mawiron wanupe

ihe nehe. Wapy putar tata pupe wà nehe. Nerezepyro kwaw wanuwi nehe, i'i Tupàn newe, a'e izupe.

<sup>19</sup> Tuwihawete Zeneki uwazar heze'eg ihewe. — Amo Zutew wiko Mawiron wamyrypar romo wà kury. Akyze wanuwi ihe. A'e rupi Mawiron hemono putar a'e Zutew wanupe wà nehe. Aze ru'u uzapo putar iaiw ma'e heretekwer pe hemuahy tetea'u kar pà wà nehe, i'i ihewe.

<sup>20</sup> — Nanemono kwaw a'e Zutew wanupe wà nehe. Eruzar Tupàn Tuweharupi Wiko Ma'e ize'eg newe heremimume'u kwer nehe. A'e mehe nekatu putar nehe. Nanezuka kwaw wà nehe. <sup>21</sup> Aze nerezemono kwaw wanupe nehe, iaiw ma'e uzeapo putar newe nehe. Tupàn Tuweharupi Wiko Ma'e wexak kar a'e ma'e ihewe. <sup>22</sup> Weraha putar kuzà Zuta wanuwhawete hàpuzuhu pe har paw rupi wà nehe, tuwihaw Mawiron wanuwhawete rehe har wanupe wà nehe. Nezewe uze'eg putar oho mehe wà nehe.

— Tuwihawete imyrypar ikatu wera'u ma'e hemu'em izupe ipyhyk pà wà.  
Umunehew upy to'om pupe.  
A'e rupi imyrypar weityk xe kury, i'i putar wà nehe.

<sup>23</sup> Amume'u amo ma'e izupe kury.  
— Tuwihawete Zeneki, Tupàn omono putar teko tetea'u Mawiron wanupe wà nehe: neremireko paw wà, nera'yr paw wà no. Nerezepyro kwaw wanuwi nehe. Mawiron wanuwhawete nereraha putar wemipyhyk kwer romo a'e nehe. Umumaw putar 'aw tawhu tata pupe a'e nehe no, a'e izupe. <sup>24</sup> Na'e Zeneki uzapo kar amo ma'e ihewe kury.

— Zeremi, emume'u zo ko ze'eg amo wanupe nehe. Aze eremume'u nehe, nezuka putar wà nehe. <sup>25</sup> Aze tuwihaw ukwaw newe heze'eg awer wà nehe, upuranu

putar nerehe wà nehe. — Ma'e rehe ereze'eg tuwihawete pe, i'i putar newe wà nehe. — Aze eremume'u neze'eg awer paw nehe, nuruzuka kwaw ure nehe, i'i mua'u putar newe wà nehe. <sup>26</sup> Aze uzeapo nezewe haw nehe, eze'eg nezewe wanupe nehe. — Aenoz ma'e aha tuwihawete pe ihe, ere wanupe nehe. — Hemono kar wi zo Zonata hàpuz me nehe, ta'e àmàno putar a'e pe ihe nehe xe, a'e izupe, ere wanupe nehe, i'i ihewe.

<sup>27</sup> Na'e tuwihaw paw ur herehe upuranu pà wà kury. Awazar waze'eg wanupe tuwihawete ze'eg rupi katete. Nahezuka kwaw wà. Ta'e nuenu kwaw izupe heze'eg awer azeharomoete har wà xe. <sup>28</sup> Apyta zauxiapekwer waneko haw pe te Zeruzarez heitykaw 'ar rehe.

## 39

### *Mawiron ywy rehe har upyhyk Zeruzarez wà*

<sup>1</sup> Zeneki Zuta ywy rehe har wanuwiawete romo heko mehe 9 haw kwarahy rehe 10 haw zahy rehe Mawiron wanuwiawete Namukononozor ur wemiruze'eg zauxiapekwer nànàn Zeruzarez tawhu iàmàtyry'ym pà a'e kury.

<sup>2</sup> Zeneki tuwihawete romo heko mehe 11 haw kwarahy rehe 4 haw zahy rehe 9 haw 'ar mehe uzapo ikwaruhu pàrirogawtàtà rupi teixe àwàm romo wà kury.

Zauxiapekwer wixe tawhu pe hupi wà kury, ipyhyk pà wà kury.

<sup>3</sup> Zeruzarez ipyhyk mehe tuwihaw Mawiron wanuwiawete rehe we har paw ur uwenaw rehe wapyk pà wà kury, ukenawhu Myter pe har her ma'e huwake wà kury.

Na'aw amo waner xe wà:

Neregaw-Xarezer, Xagar-Nemo, Xerexeki, amo ae Nerugaw-Xarezer.

<sup>4</sup> Tuwihawete Zeneki a'e, hemiruze'eg zauxiapekwer paw a'e wà no, wexak uezapo ma'e kwer a'e wà.

Na'e uezagaw tawhu wi uhem pà pyhaw wà kury.

Uhem oho pe tuwihawete ima'etymaw rupi har rupi wà.

Oho ukenawhu mokoz pàrirogaw imuzemogaw rupi wà no.

Uzàn oho Zotàw ywyàpyznaw ikutyr wà.

<sup>5</sup> Nezewe rehe we zauxiapekwer Mawiron uzàn wanaik-weromo wà.

Upyhyk Zeneki ywytyr heta 'ymaw Zeriko huwake har rehe wà.

Weraha tuwihawete Namukononozor pe wà.

Namukononozor wiko tawhu Himina her ma'e pupe a'e 'ar mehe a'e.

Amat ywy rehe tuz.

A'e pe wahem mehe Namukononozor umume'u Zeneki pe wemiapo ràm a'e kury.

<sup>6</sup> Himina pe Mawiron wanuwhawete uzuka kar Zeneki ta'yr wanu henataromo a'e wà.

Uzuka kar tuwihaw Zuta ywy rehe har a'e pe a'e wà no.

<sup>7</sup> Na'e ukutuk kar Zeneki heha zauxiapekwer wanupe kury.

Uzàpixipixi kar kyhàhàmtàtà itamorog iapo pyrer pupe no, Mawiron pe heraha kar pà wanupe no.

<sup>8</sup> A'e ma'e izeapo mehe we zauxiapekwer umunyk tata tuwihawete hàpuzuhu rehe wà, teko wanàpuz rehe wà no.

Weityk pàrirogawtàtà Zeruzarez izywyr har wà no.

<sup>9</sup> Nemuzàrànà zauxiapekwer Mawiron paw wanuwhaw a'e, weraha teko tawhu pupe hezar pyrer paw Mawiron pe a'e wà kury.

Amo Zutew izepyro wer umàno haw wi uzemurypyapar pà Mawiron wanehe wà.

Nezewe rehe we tuwihaw weraha a'e Zutew Mawiron pe  
a'e wà no.

<sup>10</sup> Xo amo teko hemetarer 'ym ma'e wezar Zuta ywy rehe  
wà.

Naheta kwaw ma'etymaw wanupe.

A'e rupi tuwihaw omono uwà tyw wanupe.

Omono ywy wanupe no.

*Umuhem kar Zeremi wà*

<sup>11</sup> Namukononozor Mawiron wanuwhawete uze'eg Ne-  
muzàràñà pe herehe a'e kury.

<sup>12</sup> — Echo Zeremi ipiaromo nehe.

Ezekaiw katu hehe nehe.

Epuraraw kar zo ma'erahy izupe nehe.

Ezapo hemimutar izupe nehe, i'i izupe.

<sup>13</sup> Na'aw tuwihaw zauxiapekwer waneko haw wi  
hemuhem kar arer waner xe wà:

Nemuzàràñà: Nemuzàràñàmà tuwihaw ikàg ma'e,  
Neregaw-Xarezer tuwihaw ikàg ma'e, amogwer  
tuwihaw Mawiron wanuwhawete rehe we har  
paw wà.

<sup>14</sup> Hemono Zenari Àikà ta'yr Xàpà hemimino pe.

Hereraha weko haw pe.

Nezewe aiko Zeruzarez pe teko wainuinuromo.

*Zeremi umume'u Tupàn ze'eg Emene-Merek pe*

<sup>15</sup> Zauxiapekwer waneko haw pe hepyhyk mehe we  
Tupàn Tuweharupi Wiko Ma'e uze'eg ihewe a'e.

Eze'eg Emene-Merek Exio ywy rehe har pe nehe, i'i.

<sup>16</sup> Tupàn Tuweharupi Wiko Ma'e upuner wera'u ma'e  
Izaew wazar uze'eg nezewe a'e, ere izupe nehe, i'i  
ihewe.

— Amume'u ko ma'e kwehe mehe ihe.

Narur kwaw ikatu haw 'aw tawhu pe nehe.

Arur putar imumaw paw izupe nehe, a'e kwehe mehe.

Azapo putar a'e ma'e heze'eg awer rupi katete ihe nehe.  
A'e ma'e iapo mehe ereiko putar xe hexak pà nehe.

<sup>17</sup> Nezewe rehe we ihe Tupàn Tuweharupi Wiko Ma'e oromonokatu putar ihe nehe.

Erekyze amo wanuwi ne.

Noromono kwaw a'e teko wanupe ihe nehe.

<sup>18</sup> Urupyro putar ihe nehe.

Ereikuwe putar nehe, ta'e erezeruzar herehe ne xe.

Ihe Tupàn Tuweharupi Wiko Ma'e aze'eg kwez kury, i'i Emene-Merek pe.

## 40

### *Zeremi, Zenari kury*

<sup>1</sup> Nemuzàràñà hemuhem kar hepyhykaw wi tawhu Hama pe hemuigo kar pà. A'e mehe Tupàn Tuweharupi Wiko Ma'e uze'eg wi ihewe kury. Zauxiapekwer uzàpix-ipixi teko Zeruzarez pe har wà, Zuta ywy rehe wà no. Uzypyrog waneraha pà Mawiron pe wà. Heàpixipixi wà no. <sup>2</sup> Tuwihaw amo tuwihaw wanuwiaw herenoz a'e kury. — Tupàn Tuweharupi Wiko Ma'e nezar umume'u ko ywy imumaw pàwàm a'e. <sup>3</sup> Uzapo ma'e uze'eg rupi katete kwez kury. A'e ma'e paw uzeapo a'e, ta'e neremiaihu uzapo ikatu 'ym ma'e Tupàn Tuweharupi Wiko Ma'e henataromo a'e wà xe. Nuweruzar kwaw uzar wà. <sup>4</sup> — Anuhem kyhàhàmtàtè nepoapy wi kury. Nereiko kwaw ipyhyk pyr romo kury. Aze neho wer Mawiron pe herupi nehe, eho nehe. Azekaiw katu nerehe nehe. Aze nàñ kwaw nehe, eho zo nehe. Erepuner wyzài taw ko ywy rehe har pe nereko haw rehe nehe. Eho neremimutar pe taw newe ikatu wera'u ma'e pe nehe.

<sup>5</sup> Nakwaw kwaw heremiapo ràm. A'e rupi naze'eg kwaw izupe. A'e rupi Nemuzàràñà uze'eg ihewe kury.

— Ezewyr Zenari Àikà ta'yr Xàpà hemimino ipyr nerekò pà nehe. Mawiron wanuwihawete umuigo kar Zenari tawhu Zuta ywy rehe har wanuwihaw romo a'e. Ereponer ipyr nerekò pà nehe, teko wamyter pe nerekò pà nehe. U, ereponer wyzài taw neremimutar pe neho haw rehe nehe, i'i ihewe. Umur temi'u ihewe. Umur e amo ma'e hekuzar ma'e ihewe no. A'e mehe hemono kar a'e wi.<sup>6</sup> A'e rupi aha Zenari ipyr Mipa pe hereko pà kury. Aiko teko Zuta ywy rehe upyta ma'e kwer wainuinuromo a'e pe kury.

*Zenari wiko tuwihaw romo*

<sup>7</sup> Amo zauxiapekwer kaiwer pe har a'e wà, wanuwihaw a'e wà no, nuzemono kwaw Mawiron wanupe wà. — Mawiron wanuwihawete umuigo kar Zenari Àikà ta'yr Zuta wanuwihaw romo a'e. Uzekaiw putar Mawiron pe oho 'ym ma'e nànàna'e nehe no, i'i amo a'e zauxiapekwer wanupe. Xo hemetarer 'ym ma'e upyta a'e ywy rehe wà. <sup>8</sup> Na'e amo tuwihaw oho Mipa pe Zenari pe uze'eg pà wà kury, wemiruze'eg zauxiapekwer wanupi kury. Na'aw waner xe wà: Izimaew Netani ta'yr, Zoànà Karea ta'yr, Xerai Tanumet ta'yr, Epai Neto pe har ta'yr wà, Zenani Maaka pe har.<sup>9</sup> Uze'eg Zenari wanupe.

— Amume'uhay ko ma'e peme. Pekyezo zo Mawiron wanuwi nehe. Napeneityk kwaw wà nehe. Peiko ko ywy rehe nehe. Pema'ereko Mawiron wanuwihawete pe nehe. A'e mehe peneko haw ikatu putar peme nehe.<sup>10</sup> Ihe apyta putar Mipa pe nehe. Aiko putar penekuzaromo har tuwihawete henataromo nehe. Pepuner ma'e'a kwer ipo'o haw rehe imono'ogaw rehe nehe. Pepuner itykwer imonokatu haw rehe nehe no, uri kawer imonokatu haw rehe nehe no. Pepuner tawhu penemipyhyk kwer pupe pepyta haw rehe nehe no, i'i wanupe.

<sup>11</sup> Nezewegatete amo umume'u Mawiron wanuwihawete hemiapo kwer Zutew amo ywy rehe har wanupe

wà: Moaw ywy rehe har wanupe, Amon ywy rehe har wanupe, Enom ywy rehe har wanupe, amo ywy rehe har wanupe. — Umuigo kar amo Zutew Zuta ywy rehe a'e là, i'i wanupe là. — Umuigo kar Zenari wanuwhaw romo a'e no, i'i wanupe là. <sup>12</sup> Na'e Zutew imuhàmuhàz pyrer uhem oho weko haw nànàn là kury. Uzewyr Zuta ywy rehe là. Oho Mipa pe Zenari heko haw pe là. Uzapo win tetea'u là. Omono'og ma'e'a kwer tetea'u là no.

*Zenari umàno a'*

<sup>13</sup> A'e re Zoànà Karea ta'yr a'e, Zauxiapekwer Mawiron wanupe uzemono 'ym ma'e kwer wanuwhaw a'e là no, oho Mipa pe Zenari heko haw pe là kury. <sup>14</sup> Uze'eg izupe là.

— Maari Amon wanuwhawete nezuka kar Izimaew Netani ta'yr pe a'e. Aipo erekwaw nezuka kar awer, i'i izupe là. Zenari nuzeruzar kwaw waze'eg rehe. <sup>15</sup> Na'e Zoànà umume'u ko ma'e izupe amogwer wanupe imume'u 'ym pà kury. — Tuwe azuka Izimaew nehe. Ni amo nukwaw kwaw izuka arer nezewe mehe là nehe. Màràzàwe tuwe erezezuka kar izupe. Aze nezuka nehe, Zutew nerehe we uzemono'og ma'e uhàuhàz putar là nehe. Nezewe mehe iaiw haw u'ar putar teko Zuta ywy rehe upyta ma'e kwer wanehe nehe.

<sup>16</sup> Uwazar Zenari ize'eg izupe.

— Ezuka zo Izimaew nehe. Neremu'em iko hehe neze'eg mehe, i'i izupe.

## 41

<sup>1</sup> A'e kwarahy rehe 7 haw zahy rehe Izimaew Netani ta'yr Erizàm tuwhawete iànàm hemimino a'e, oho Mipa pe Zenari huwàxi pà a'e, 10 awa wanupi a'e. Paw rupi a'e pe wiko mehe uezhezehe we umai'u mehe <sup>2</sup> Izimaew a'e, 10 awa hehe we har a'e là no, upyhyk utakihepuku Zenari izuka pà a'e là kury. Nezewe iapo mehe uzuka

Mawiron wanuwhawete a'e ywy rehe har wanuwhaw romo hemimuigo karer a'e wà.<sup>3</sup> Uzuka Zutew Zenari rehe we har Mipa pe har paw a'e wà no. Uzuka zauxiapekwer Mawiron pe har a'e pe wiko ma'e wà no.

<sup>4</sup> Iku'egwer pe Zenari izuka awer ikwaw 'ym mehe we <sup>5</sup> 80 awa uhem a'e pe wà. Ur Xikez wi Xiro wi Xamari wi wà. Upin wamutaw wà. Umunehew kamir imu'i pyrer wà no. Uzekixi wetekwer rehe wà no. Werur arozràn Tupàn Tuweharupi Wiko Ma'e pe hàpuzuhu pe wà. Werur yhyk izupe wà no. <sup>6</sup> Na'e Izimaew uhem uzai'o pà Mipa wi a'e awa wanuwàxi pà kury. Wanuwake uhem mehe uze'eg wanupe. — Peixe Zenari hexak pà nehe, i'i wanupe.

<sup>7</sup> Tawhu pupe waneixe mehe Izimaew a'e, awa hehe we har a'e wà no, uzuka a'e awa a'e wà kury. Weityk wanetekwer yzygwar pupe wà.

<sup>8</sup> 10 awa uze'eg Izimaew pe wà.

— Urezuka zo pe nehe. Heta temi'u kaiwer pe imim pyrer urewe: arozràn xirik, arozràn xewar, uri kawer, hair, i'i izupe wà. A'e rupi nuzuka kwaw wanehe we har wazàwe wà.<sup>9</sup> Izimaew weityk wemizuka kwer wanetekwer yzygwar pupe wà. Oho ete yzygwar. Kwehe mehe tuwhawete Az ukyze Izaew wanuwhawete wi a'e. A'e rupi uzapo a'e yzygwar oho ete ma'e a'e. Nezewa mehe, iàmàtyry'ym mehe heta tetea'u ma'e 'y teko wanupe. Izimaew umynehem a'e yzygwar awa izuka pyrer wanetekwer pupe.<sup>10</sup> A'e re Izimaew oho Amon ywy kutyr kury. Weraha amo teko wemipyhyk kwer romo wà: tuwhawete ta'yr wà, teko Mipa pe har paw wà. Zauxiapekwer wanuwhaw Nemuzàràñà wezar Zenari a'e teko wanuwhaw romo a'e 'ym mehe a'e.

<sup>11</sup> Amo umume'u Izimaew hemiapo kwer iaiw ma'e oho Zoàñà Karez ta'yr pe kury, hehe we har wanupe no.

<sup>12</sup> Na'e Zoàñà omono'og wemiruze'eg zauxiapekwer a'e

wà kury. Oho Izimaew iàmàtyry'ym pà wà kury. Uhem wanuwake yzygwar uhua'u ma'e Zimeàw pe har huwake wà. <sup>13</sup> Izimaew hemipyhyk kwer wexak Zoàñà wà kury. Wexak zauxiapekwer hehe we har wà no. Wanexak mehe hurywete wà. <sup>14</sup> Na'e uwak uzàn pà Zoàñà kutyr wà kury. <sup>15</sup> Nezewe rehe we Izimaew a'e, amo 8 awa hehe we har a'e wà no, uhem uzàn pà Zoàñà wi wà, Amon ywy rehe oho pà wà.

<sup>16</sup> Na'e Zoàñà a'e, zauxiapekwer wanuwihaw hehe we har a'e wà no, uzemono'og teko Izimaew Mipa wi wemipyhyk kwer romo hemiraha wanehe we wà kury: zauxiapekwer wà, kuzà wà, kwarer wà, awa wa'yr haw rehe upuner 'ym ma'e wà. Zenari izuka re Izimaew weraha a'e teko a'e wà. Zoàñà uzemono'og wanehe we kury. Zoàñà upyro amo teko Izimaew wi Zimeàw pe wà. Uzemono'og a'e teko a'e wà kury. <sup>17</sup> Paw rupi oho a'e wi wà kury. Upytu'u Zerut-Kimà pe Merez huwake wà. Iho wer Ezit pe Mawiron <sup>18</sup> wanuwi uhem pà wà. Ukyze wanuwi wà. Ta'e Izimaew uzuka Zenari a'e xe. Ta'e Mawiron wanuwihawete umuigo kar Zenari tuwihaw romo a'e xe.

## 42

### *Zeremi uze'eg Tupàn pe*

<sup>1</sup> Na'e amo teko ur ihewe uze'eg pà wà kury: zauxiapekwer wanuwihaw paw wà, Zoàñà Karea ta'yr, Azari Ozai ta'yr, teko hemetarer katu ma'e wà, hemetarer 'ym ma'e wà no. <sup>2</sup> — Zeremi, aze ikatu newe nehe, eruzar urereminoz nehe. Eze'eg Tupàn Tuweharupi Wiko Ma'e pe urerehe nehe, ko ywy rehe hezar pyrer wanehe nehe. Izypy mehe urereta tetea'u. Ko 'ar rehe na'urekàg kwaw. Erexak urereta 'ymaw. <sup>3</sup> Eze'eg Tupàn Tuweharupi Wiko Ma'e nezar pe nehe. — Exak kar wanape ràm wanupe

nehe, ere izupe nehe. — Emume'u wanemiapo ràm wanupe nehe, ere izupe nehe.

<sup>4</sup> — Ikatu, a'e wanupe. — Aze'eg putar Tupàn Tuweharupi Wiko Ma'e pezar pe nehe. A'e re amume'u putar hemimutar peme nehe. Nazumim kwaw ma'e pewi nehe.

<sup>5</sup> Na'e uze'eg wi ihewe wà.

— Tuwe Tupàn Tuweharupi Wiko Ma'e uzepyk urerehe nehe, aze nureruzar kwaw ize'eg urewe imur pyràm paw nehe, newe imume'u pyràm paw nehe. <sup>6</sup> Aze ize'eg ikatu urewe nehe, ureruzar putar. Aze na'ikatu kwaw urewe nehe, nezewe rehe we ureruzar putar nehe no. Ureruzar putar Tupàn Tuweharupi Wiko Ma'e urezar nehe. Eze'e'eg putar izupe urerehe nehe. Aze ureruzar nehe, urerekohaw ikatu putar nehe, i'i ihewe wà.

### *Tupàn uwazar Zeremi ize'eg izupe*

<sup>7</sup> 10 'ar pawire Tupàn Tuweharupi Wiko Ma'e uze'eg ihewe. <sup>8</sup> Na'e ainoz tuwihaw wamuwà ihe wà kury: Zoànà Karea ta'yr, zauxiapekwer wanuwihaw paw wà, teko hemetarer katu ma'e wà, hemetarer 'ym ma'e wà no. <sup>9</sup> Aze'eg wanupe.

— Eze'eg Tupàn Tuweharupi Wiko Ma'e Izaew wazar pe urerehe nehe, peze ihewe. Na'aw ize'eg xe kury. <sup>10</sup> — Aze peneko wer wiwi ko ywy rehe nehe, apumukàg putar ihe nehe. Napumumaw kwaw no. Apuzutym putar ywyra ài nehe. Napozo'ok kwaw nehe. Purumumaw pawer penehe heremimu'ar kwer hemuzemumikahy kar a'e. <sup>11</sup> Pekyze zo Mawiron wanuwihawete wi nehe. Ta'e aiko penehe we ihe xe. Apupyro putar nehe. Apunuhem putar ipuner haw wi nehe. Ihe Tupàn Tuweharupi Wiko Ma'e aiko ko ma'e imume'u har romo ihe <sup>12</sup> Apupuhareko putar nehe. Apupuhareko kar putar izupe nehe no.

— Emuigo kar a'e teko a'e ywy rehe wà nehe, a'e putar izupe nehe, i'i Tupàn peme.

<sup>13-15</sup> Pe Zuta ywy rehe upyta ma'e kwer pe, peruzar Tupàn Tuweharupi Wiko Ma'e nehe. Peiko ko ywy rehe nehe. — Zaiko putar Ezit ywy rehe nehe, peze zo izupe nehe. — Naheta kwaw zeàmàtyry'ymawhu a'e pe nehe, peze zo nehe. — Ureàmàtyry'ymar nur kwaw urekutyr a'e pe wà nehe, peze zo nehe. — Na'urema'uhez kwaw a'e pe nehe, peze zo nehe. Aze peze'eg nezewe nehe, Tupàn Tuweharupi Wiko Ma'e upuner wera'u ma'e Izaew wazar uze'eg putar nezewe peme a'e nehe. — Aze peneko wer Ezit ywy rehe nehe, <sup>16</sup> pexak putar zeàmàtyry'ymawhu nehe. Pekyze izuwi. Pekyze ma'uhez haw wi no. A'e ma'uhez haw oho penaikweromo a'e nehe no. Pemàno putar Ezit ywy rehe nehe. <sup>17</sup> Ezit ywy rehe heko wer ma'e umàno putar zeàmàtyry'ymawhu pe wà nehe, ma'uhez haw pupe wà nehe, ma'eahy haw pupe wà nehe. Ni amo nuikuwe kwaw wà nehe. Ni amo nuzepyro kwaw iaiw haw penehe u'ar ma'e ràm wi wà nehe, i'i Tupàn peme, a'e wanupe.

<sup>18</sup> Tupàn Tuweharupi Wiko Ma'e Izaew wazar uze'eg nezewe a'e.

— Aze peho Ezit pe nehe, Hekwahy haw u'ar putar penehe nehe. Hekwahy haw u'ar teko Zeruzarez pe har wanehe. Nezewegatete u'ar putar penehe nehe no. Iaiw ma'e romo peiko putar nehe. Teko ipytuhegatu putar penexak mehe wà nehe. Amogwer upuka putar penehe wà nehe. Uze'egaiw amo rehe imume'eahy mehe umume'u putar pener wà nehe. Napexak wi pixik kwaw ko ywy nehe, i'i Tupàn peme, a'e wanupe.

<sup>19</sup> Aze'eg wi wanupe kury.

— Tupàn Tuweharupi Wiko Ma'e uze'eg nezewe peme. Pepyta Zuta ywy rehe nehe. Peho zo Ezit pe nehe. A'e

rupi amume'u ko ma'e peme kury. <sup>20</sup> Pezawy peiko. A'e rupi pepuner te pemàno haw rehe nehe. — Eze'eg Tupàn Tuweharupi Wiko Ma'e Zanezar pe nehe, peze ihewe. — Eze'eg Tupàn Tuweharupi Wiko Ma'e pe urerehe nehe. A'e re emume'u ize'eg paw urewe nehe, ureremiapo ràm imume'u pyr nehe. A'e mehe uruzapo putar nehe, peze ihewe. <sup>21</sup> Kutàri amume'u a'e ma'e paw kwez ihe kury. Nezewe rehe we naperuzar kwaw Tupàn Tuweharupi Wiko Ma'e Zanezar peiko. Napezapò kwaw ihewe hemimume'u karer. <sup>22</sup> A'e rupi pema'enukwaw ko ma'e rehe nehe. Peho wer Ezit ywy pe. Peneko wer hehe nehe. Pemàno putar zeàmàtyry'ymawhu pupe a'e pe nehe, aze ru'u, ma'uhez haw pupe nehe, aze ru'u, ma'eahy haw pupe a'e pe nehe.

## 43

### *Weraha Zeremi Ezit ywy rehe wà*

<sup>1</sup> Amume'u Tupàn Tuweharupi Wiko Ma'e wazar hemiapo karer paw teko wanupe. <sup>2</sup> Imume'u pawire Azari Ozai ta'yr a'e, Zoànà Karea ta'yr a'e no, awa wiko wera'u ma'e paw wà no, uze'eg ihewe wà kury. — Neremu'em Zeremi, i'i ihewe wà. — Tupàn Tuweharupi Wiko Ma'e Zanezar numume'u kar kwaw a'e ma'e newe. — Peho zo Ezit pe nehe, Peiko zo hehe nehe, ni'i kwaw. <sup>3</sup> Maruk Neri ta'yr nemomor iko urekutyr a'e. Nezewe mehe uremono putar Mawiron wapo pe nehe. Urezuka putar wà nehe, aze ru'u, urereraha putar Mawiron pe wà nehe, i'i ihewe wà.

<sup>4</sup> Nezewe Zoànà a'e, zauxiapekwer wanuwhaw a'e wà no, teko paw wà no, na'ipureruzar wer kwaw Tupàn Tuweharupi Wiko Ma'e hemiapo karer rehe wà. — Pepyta Zuta ywy rehe nehe, i'i wanupe. Na'ipyta wer kwaw wà. <sup>5</sup> Na'e Zoànà a'e, zauxiapekwer wanuwhaw a'e wà no, weraha teko Zuta ywy rehe wiko ma'e Ezit pe wà. Weraha

teko Zuta ywy rehe har paw wà. Weraha amo ywy rehe uhàuhàz ma'e kwer Zuta ywy uzewyr ma'e kwer wà: <sup>6</sup> awa wà, kuzà wà, kwarer wà, kuzàtài wà, tuwihawete tazyr wà. Tuwihaw Nemuzàràñà wezar amo teko Zenari ipo pe. Weraha a'e teko paw wà. Weraha Maruk wà. Hereraha a'e wà no. <sup>7</sup> Nezewe nuweruzar kwaw Tupàn wà. Oho Ezit pe wà. Uhem tawhu Tapinez pe wà.

<sup>8</sup> Tupàn uze'eg ihewe Tapinez pe.

<sup>9</sup> Zeremi, heta amo ywyzuwa 'aw tawhu pe har wanuwhaw hàpuzuhu henataromo. Epyhyk amo itahu a'e ywyzuwa pupe izutym pà nehe. Tuwe amo Zutew nerexak nezewe iapo mehe wà nehe. <sup>10</sup> A'e re emume'u ko heze'eg wà nehe. — Ihe Tupàn Tuweharupi Wiko Ma'e upuner wera'u ma'e Izaew wazar amur kar putar heremiruze'eg Namukononozor Mawiron wanuwhawete ihe nehe. Umuapyk putar wenawhu 'àg ita neremitygwer i'aromo nehe. Umuapyk putar wàpuzràn i'aromo nehe no. <sup>11</sup> Namukononozor ur putar nehe. Weityk putar Ezit nehe. Ma'eahy haw pupe umàno ma'e ràm umàno putar ma'eahy haw pupe wà nehe. Uzepyhyk kar ma'e ràm uzepyhyk kar putar uzeraha kar pà wà nehe no. Zeàmàtyry'ymawhu pupe umàno ma'e ràm umàno putar zeàmàtyry'ymawhu pupe wà nehe. <sup>12</sup> Apy putar tupàn Ezit ywy rehe har wanàpuzuhu ihe nehe. Amunyk kar putar tata Mawiron wanuwhawete pe a'e tupàn wanehe ihe nehe. Aze ru'u, araha kar putar izupe wà nehe. Àràpuhàràñ rehue uzekaiw ma'e uzuka kyw ukamir rehe har imukatu pà a'e. Nezewegatete Mawiron wanuwhawete umukatu putar Ezit ywy a'e nehe no. Weityk putar nehe. Wiko putar izar romo uhem mehe nehe. <sup>13</sup> Weityk putar watupàn wanagapaw Erio tawhu pe har Ezit ywy rehe har nehe. Wapy putar tupàn Ezit ywy rehe har wanàpuzuhu nehe no, i'i Tupàn ihewe.

## 44

*Mumurana haw Zutew Ezit rehe wiko ma'e wanupe*

<sup>1</sup> Tupàn uze'eg ihewe Zutew Ezit ywy rehe wiko ma'e nànàn a'e: Miginow pe har wà, Tapinez pe har wà, Men pe har wà, kwarahy ihemaw awyze har kutyr har wà.  
<sup>2</sup> Tuweharupi wiko ma'e upuner wera'u ma'e Izaew wazar uze'eg nezewe a'e.

— Pexak iaiw haw Zeruzarez rehe heremimu'ar kwer, amogwer tawhu Zuta ywy rehe har wanehe heremimu'ar kwer no. Te kutàri upyta heityk pyrer romo. Ni amo nuiko kwaw wapupe wà. <sup>3</sup> A'e ma'e uezapo ta'e teko a'e tawhu pe wiko ma'e uzapo ikatu 'ym ma'e wà xe. Hemuikwahy kar a'e wà. Uzuka ma'ea'yr amo tupàn wanenataromo wà. Wekar amo tupàn oho wà. A'e 'ym mehe ni a'e wà, ni peà, ni peipy wà, napemuwete kwaw a'e tupàn pe wà. <sup>4</sup> Tuweharupi amono kar heremiruze'eg heze'eg imume'u har peme ihe wà. — Pezapo zo a'e iaiw ma'e nehe, ta'e iroahy Tupàn pe xe, i'i peme wà. <sup>5</sup> Napezekaiw wer kwaw waze'eg rehe. Naperuzar kwaw. Napepureityk wer kwaw a'e iaiw ma'e iapo haw rehe. Pezuka wiwi ma'ea'yr tupàn a'ua'u wanenataromo pe wà. <sup>6</sup> A'e rupi amu'ar kar hekwahy haw tawhu Zuta ywy rehe har wanehe, pe Zeruzarez rupi har wanehe no. Amunyk tata wanehe. Amumaw kar ihe wà. — Iaiwahy, i'i teko ko 'ar rehe wanexak mehe wà.

<sup>7</sup> A'e rupi ihe Tupàn Tuweharupi Wiko Ma'e upuner wera'u ma'e Izaew wazar apuranu penehe ihe kury.

— Màràzàwe tuwe pezapo agwer ikatu 'ym ma'e uhua'u ma'e peiko pezeupe. Aipo pepuruzuka wer awa wanehe kuzà wanehe. Aipo pepuruzuka wer kwarer wanehe kuzà wamemyra'i wanehe. Aipo napemuigo kar kwaw ni pitài. <sup>8</sup> Màràzàwe tuwe hemuikwahy kar tupàn a'ua'u pezar imuwtete haw pupe. Pezuka ma'ea'yr amo tupàn

wanenataromo xe Ezit ywy rehe peneko haw ipyahu ma'e rehe. Aipo pezapo a'e ma'e peiko pezezuka kar pà. Aipo pemupuka kar putar teko ywy nànànar pezehe nehe. Uze'egaiw amo rehe imono mehe umume'u putar pener wà nehe.<sup>9</sup> Peipy wà, Zuta ywy rehe har wanuwhawete wà no, wanemireko wà no, pe no, penemireko wà no, uzapo ikatu 'ym ma'e tawhu Zuta ywy rehe har pupe wà, pe Zeruzarez taw myteromo har rehe wà no. Aipo peneharaz a'e ma'e wi.<sup>10</sup> Nezewe rehe we te ko 'ar rehe napezemuigo kar kwaw ikàg 'ym ma'e romo herenataromo. Napezeruze'eg kwaw herehe. Naperuzar kwaw heze'eg peme heremimono kwer peipy wanupe heremimono kwer. Napezapo kwaw heremiapo karer.

<sup>11</sup> A'e rupi ihe Tupàn Tuweharupi Wiko Ma'e upuner wera'u ma'e Izaew wazar apumumaw putar ihe nehe. Amumaw putar teko Zuta ywy rehe har paw rupi ihe wà nehe.<sup>12</sup> Amo teko upyta Zuta ywy rehe wà. A'e re oho Ezit pe wiko pà a'e pe wà. Amumaw putar a'e teko ihe wà nehe. A'e paw wà nehe, hemetarer katu ma'e wà nehe, hemetarer 'ym ma'e wà nehe no, umàno putar Ezit ywy rehe wà nehe, zeàmàtyry'ymawhu pe wà nehe, ma'uhez haw pupe wà nehe no. — Iaiwahy, i'i putar teko wanexak mehe wà nehe. Teko upuka putar wanehe wà nehe. Uze'egaiw amo rehe imono mehe umume'u putar waner wà nehe.<sup>13</sup> Azepyk Zeruzarez rehe zeàmàtyry'ymawhu pupe ma'uhez haw pupe maeahy haw pupe ihe. Azepyk putar Ezit ywy rehe wiko ma'e wanehe nezewegatete ihe nehe no.<sup>14</sup> Zuta ywy rehe wiko ma'e kwer Ezit pe ur ma'e kwer nuzepyro kwaw wà nehe. Ni pitài nuikuwe kwaw wà nehe. Izewyr wer zepe Zuta ywy rehe wiko pà wà. Ni amo nupuner kwaw uzewyr haw rehe wà nehe. Màràmàràù uzàn ma'e kwer uzewyr putar a'e pe wà nehe, i'i Tupàn.

<sup>15</sup> Teko tetea'u ur ihewe uze'eg pà wà kury.

— Ureremireko uzuka ma'ea'yr amo tupàn wanupe wà, i'i amo awa uezupe wà. A'e awa paw ur wà. Kuzàgwer a'e pe har paw ur wà no. Zutew Ezit ywy rehe har kwarahy ihemaw awyze har kutyr har ur wà no. Uze'eg nezewe wà.

<sup>16</sup> — Nuruzekaiw kwaw neze'eg awer Tupàn Tuweharupi Wiko Ma'e her rehe arer rehe ure nehe. <sup>17</sup> Uruzapo putar ureremimume'u kwer paw rupi ure nehe. Uruzuka putar ma'ea'yr tupàn kuzà ywak rehe har wanuwhawete her ma'e pe nehe. Oromono putar win izupe nehe. Kwehe mehe ure, ureipy wà no, ureruwhawete wà no, ureruwhaw wà no, uruzapo nezewe haw tawhu Zuta ywy rehe har wapupe ure, pe Zeruzarez pe har rupi ure no. A'e 'ar rehe heta'te'u temi'u urewe. Urema'eme'egaw oho katu no. Ni amo ikatu 'ymaw nuzeapo kwaw urewe. <sup>18</sup> Na'e urupytu'u ywak rehe har wanuwhawete pe ma'ea'yr izuka re ure. Urupytu'u win imono re izupe. Urepytu'u mehe arer we teko urerehe we har umàno zeàmàtyry'ymawhu pe wà, ma'uhez haw pupe wà no, i'i ihewe wà.

<sup>19</sup> Kuzàgwer uze'eg nezewe ihewe wà. — Typy'ak hete katu ma'e iapo mehe uruzapo tuwhawete kuzà ywak rehe har hagapaw a'e typy'ak rehe ure. — Ikatuahy, i'i uremen urewe wà. Uruzuka ma'ea'yr henataromo wà. Oromono win izupe wà no. Nezewe haw iapo awer ikatu uremen wanupe, i'i ihewe wà.

<sup>20</sup> Waze'eg henu mehe amume'u ko ma'e teko wanupe, awa kwer wanupe no, kuzàgwer wanupe no.

<sup>21</sup> — Ma'e rehe pema'enukwaw peiko. Peà, peipy wà no, penuwihawete wà no, penuwihaw wà no, teko Zuta ywy rehe har wà no, uzuka ma'ea'yr a'e tupàn pe weko haw tawhu pe wà, Zeruzarez pe nahu rupi wà no. Aipo Tupàn Tuweharupi Wiko Ma'e nukwaw kwaw a'e tupàn ua'u pe ma'e izuka pyrer ma'e imono pyrer. Aipo heharaz izuwi.

<sup>22</sup> A'e rupi peywy uzeapo ywyxiguhu romo ko 'ar rehe. Ni amo nuiko kwaw a'e pe wà. Iaiw. Teko uze'egaiw amo rehe imono mehe umume'u a'e her. A'e ma'e uzeapo a'e, ta'e penemiapo iroahy wera'u Tupàn Tuweharupi Wiko Ma'e pe a'e xe. Pezapo ikatu 'ym ma'e. Pezapo izupe iro ma'e no. <sup>23</sup> A'e iaiw ma'e uzeapo. Te ko 'ar rehe uzeapo iko no. Ta'e pezuka ma'e amo tupàn wanenataromo pe wà xe. Pezapo ikatu 'ym ma'e Tupàn Tuweharupi Wiko Ma'e henataromo. Napeiko kwaw ipurumu'e awer rupi, ize'eg awer rupi, hemiapo karer rupi.

<sup>24-25</sup> Tupàn Tuweharupi Wiko Ma'e umume'u kar ma'e teko Zuta ywy rehe har Ezit ywy rehe wiko ma'e wanupe, kuzàgwer wanupe no. Amume'u wiwi a'e ma'e aha teko wanupe ihe. Na'aw hemimume'u kwer xe:

— Pe, penemireko wà no, pemume'eahy penemiapo ràm ywak rehe har wanuwhawete kuzà pe. — Uruzuka putar ma'ea'yr nerentataromo ure nehe. Oromono putar win newe nehe no, peze izupe. Pezapo tuwe penemimume'u kwer. Ikatu. Pezapo penemimume'eahy kwer nehe. Pezapo ma'e imume'eahy pyrer nehe. <sup>26</sup> Pe zutew Ezit ywy rehe wiko ma'e. Ihe Tupàn Tuweharupi Wiko Ma'e amume'eahy putar heremiapo ràm herer upuner ma'e rehe ihe nehe kury, peme ihe nehe kury. Aze pemume'eahy penemiapo ràm nehe, namume'u kar kwaw a'e ma'e herer rehe peme ihe nehe. — Amume'eahy ko ma'e hezar Tupàn Tuweharupi Wiko Ma'e her rehe ihe kury, peze zo nehe. <sup>27</sup> Narur kwaw turywete haw peme nehe. Arur putar zemumikahy haw nehe. Peà, Zuta ywy rehe arer Ezit ywy rehe wiko ma'e paw umàno putar zeàmàtyry'ymawhu wi wà nehe, ma'eahy haw pupe wà nehe no. Te umumaw putar wà nehe. <sup>28</sup> Amo uzepyro putar umàno haw wi wà nehe. Uzewyr putar Ezit wi Zuta pe wà nehe. Na'e Zuta rehe wikuwe wiwi ma'e Ezit

pe ur ma'e kwer ukwaw putar ze'eg uzeapo ma'e kwer wà nehe. Aze ru'u waze'eg, aze ru'u heze'eg. <sup>29</sup> Ihe Tupàn Tuweharupi Wiko Ma'e aexak kar putar ma'e peme ihe nehe kury. Nezewe mehe pekwaw putar ko ywy rehe penehe hezepyk àwàm nehe. Amume'u pemumaw pàwàm. Azapo putar heremimume'u kwer nehe. <sup>30</sup> Na'aw ma'e peme heremixak kàràm: Amono Zuta ywy rehe har wanuwhawete Zeneki ihe, Namukononozor Mawiron wanuwhawete pe ihe. Wiko iàmàtyry'ymar romo. Ipuruzuka wer hehe no. Nezewegatete amono putar Opira Ezit rehe har wanuwhawete iàmàtyry'ymar wapo pe ihe nehe no.

## 45

*Tupàn umume'u wemiapo ràm Maruk pe a'e*

<sup>1-2</sup> Zeoaki Zuzi ta'yr Zuta ywy rehe har wanuwhawete romo heko mehe 4 haw kwarahy rehe Maruk Neri ta'yr umuapyk Tupàn Tuweharupi Wiko Ma'e ize'eg ihewe imur pyrer pape rehe a'e. Na'aw ze'eg heremimume'u kwer Maruk ko pape rehe hemimuapyk kwer xe kury:

— Maruk. <sup>3</sup> — Napuner kwaw iapo haw rehe, ere iko. Tupàn Tuweharupi Wiko Ma'e umuhua'u kar hezemumikahy haw. Umuhua'u kar heremipuraraw. Hekene'o hekuhem ire. Napuner kwaw hepytu'u haw rehe, ere iko, a'e izupe.

<sup>4</sup> Na'e Tupàn Tuweharupi Wiko Ma'e umume'u kar uze'eg Maruk pe. Na'aw ize'eg awer xe:

— Amumaw heremiaapo kwer teko ihe. Amumaw putar ma'e ko ywy nànàn nehe. <sup>5</sup> Aipo pezereko katu kar ihewe. Nan. Napuerekó katu kwaw nehe. Amu'ar kar putar iaiw haw teko nànàn ihe nehe. Xo ne zo, wyzài ywy rehe nerekó mehe neremàno kwaw nehe. Ihe Tupàn Tuweharupi Wiko Ma'e aze'eg kwez kury.

## 46

*Namukononozor weityk Ezit ywy rehe har Karakemi tawhu pe wà*

<sup>1</sup> Tupàn Tuweharupi Wiko Ma'e uze'eg ihewe teko ywy nànànar wanehe. <sup>2</sup> Uze'eg ihewe Nek Ezit ywy rehe har wanuwhawete hemiruze'eg zauxiapekwer wanehe. Tuwhawete Namukononozor Mawiron pe har weityk a'e zauxiapekwer Karakemi tawhu pe Ewparat yryhu huwake a'e wà. A'e ma'e uzeapo Zeoaki Zuzi ta'yr Zuta ywy rehe har wanuwhawete romo heko mehe 4 haw kwarahy rehe. Tupàn Tuweharupi Wiko Ma'e uze'eg nezewe Ezit ywy rehe.

<sup>3</sup> Tuwhaw Ezit ywy rehe har uhapukaz nezewe wà.

— Pemuàgà'ym u'yw wi pemimaw nehe.

Peata zeàmàtyry'ymawhu pe nehe.

<sup>4</sup> Pemono zuru pe har kawaru rehe nehe. Peapyk wakupe pe nehe.

Peata pezeirogatu pà nehe. Pemunehew peàkàg imimaw tátà ma'e nehe.

Pemuaimé katu penu'ywpuku nehe. Pemunehew pepuxi'a imimaw tátà ma'e nehe no.

<sup>5</sup> Ma'e aeaxak teko ihe, i'i Tupàn.

Ezit ywy rehe har uzàn ukyze pà wà.

Uzàn wà, ta'e ukyzeahy wà xe.

Uzàn na'arewahy wà.

Nume'e kwaw waikwer amo wà nehe.

<sup>6</sup> Na'arewahy uzàn ma'e nupuner kwaw uzepyro haw rehe wà nehe.

Zauxiapekwer nupuner kwaw umàno haw wi uzepyro haw rehe wà.

Kwarahy heixe haw awyze har kutyr, yryhu Ewparat huwake uzepyapi u'ar pà wà.

<sup>7</sup> Mo uzeupir wà iko yrykawhu Niru zàwe a'e.

Nuzawy kwaw yrykawhu tynehem ma'e. 'Y upyk ywy uzeiwyr har.

<sup>8</sup> Ezit ywy a'e. Uzeupir Niru yrykaw ài a'e. Nuzawy kwaw yrykawhu ywy uzeiwyr har imuzeenar. — Azeupir putar ywy paw ipyk pà ihe nehe, i'i Ezit.

Amumaw putar tawhu ihe wà nehe. Azuka putar wapupe har ihe wà nehe no.

<sup>9</sup> Ezit ywy rehe har wà.

Pemono kar kawaru pe wà nehe.

Pemuzàn kar ywyramawa zeàmàtyry'ymawhu pe pe wà nehe.

Pemono kar zauxiapekwer a'e pe pe wà nehe:

Awa Exio ywy rehe har wà, Irim rehe har wà no, Uzemi-maw hereko har wà.

Awa Iru ywy rehe har wà, U'yw uwyratpar pupe imomor har wà.

<sup>10</sup> Tupàn Tuweharupi Wiko Ma'e upuner wera'u ma'e wiko ko 'ar izar romo a'e.

Kutàri uzepyk putar purehe nehe.

Kutàri uzepyk putar wàmàtyry'ymar wanehe nehe.

Itakihepuku u'u putar a'e wà nehe,

te na'ipuruzuka wer kwaw amo rehe wà nehe.

U'u putar wanuwykwer nehe,

te uhyk putar izupe nehe.

Kutàri upuner wera'u ma'e uzuka putar wemipyhyk ma'ea'yr ài a'e wà nehe,

Ywy kwarahy heixe haw awyze har kutyr har rehe Ew-parat yrykawhu huwake wà nehe.

<sup>11</sup> Teko Ezit ywy rehe har wà, peho Zireaz pe no.

Pekar muhàg peho nehe.

Pepuhàg paw na'ikatu kwaw.

Ta'e naheta kwaw pema'eahy haw wi pemukatu haw xe.

<sup>12</sup> Teko ywy tetea'u rehe har wenu waneitykaw imume'u  
haw wà.

Teko ywy nànànar wenu wanehapukaz mehe wà.

Amo zauxiapekwer uzepyapi amo rehe.

Mokoz u'ar ywy rehe wà.

*Namukononozor ur waàmàtyry'y'm pà*

<sup>13</sup> Namukononozor Mawiron ywy rehe har wanuwihawete ur Ezit iàmàtyry'y'm pà. Tur mehe Tupàn Tuweharupi Wiko Ma'e umume'u ko ma'e ihewe a'e.

<sup>14</sup> — Pemume'u ko ze'eg tawhu Ezit ywy rehe har nànànehe:

Miginow pe, Men pe, Tapinez pe.

— Pezemùàgà'y'm pezepyro àwàm rehe nehe.

Peàmàtyry'y'mar umumaw putar pema'e paw zeàmàtyry'y'mawhu pe wà nehe.

<sup>15</sup> Màràzàwe tuwe pezar tupàn ua'u upuner ma'e u'ar.

U'ar a'e, ta'e Tupàn Tuweharupi Wiko Ma'e weityk ywy rehe a'e xe, peze wanupe nehe.

<sup>16</sup> Zauxiapekwer Ezit ywy rehe har uzepyapi u'ar pà wà.

Uze'eg uzeupeupe wà.

— Zaha na'arewahy nehe.

Zazewyr zanerekohaw pe nehe, Zaneànàm wapyr nehe.

Nezewo mehe zazepyro putar zaneàmàtyry'y'mar watakihepuku wi nehe.

<sup>17</sup> Pemono ko her ipyahu ma'e Ezit wanuwihawete pe nehe.

Uze'eg ma'e wànoànog ma'e, i'i putar izupe wà nehe. —

Awa wàmàtyry'y'mar heitykaw rehe upuner 'ym ma'e, i'i putar izupe wà nehe.

<sup>18</sup> Ihe Tuwhiwete ihe, aiko ko ma'e imume'u har romo ihe.

Aiko Tupàn Tuweharupi Wiko Ma'e romo.

Tupàn Tuweharupi Wiko Ma'e herer romo ihe.  
 Upuner wera'u ma'e romo aiko.  
 Tamor aiha katu wera'u amogwer ywytyruhu wanuwi.  
 Ywytyr Karamew yryhu i'aromo hin a'e no.  
 Nezewegatete peàmàtyry'ym àràm ikàg wera'u pewi, Ezit  
 ywy rehe har wà.  
<sup>19</sup> Teko Ezit ywy rehe har wà.  
 Pezemuàgà'ym nehe, peneraha putar wemipyhyk kwer  
 romo wà nehe.  
 Tawhu Men uzeapo putar ywyxiguhu romo nehe.  
 Uzeapo putar heityk pyrer romo nehe. Naheta kwaw teko  
 ipupe wà nehe.  
<sup>20</sup> Ezit nuzawy kwaw tapi'ak kuzà ipuràg eteahy ma'e.  
 Meruhu kwarahy heixe haw awyze har kutyr har wi ur  
 ma'e kwer uxi'u oho.  
<sup>21</sup> Wanuwihawete omono temetarer amo zauxiapekwer  
 wanupe puràmàtyry'ymaw hekuzaromo.  
 Nezewe rehe we na'ipuruzukaiwahy kwaw wà. Nuzawy  
 kwaw tapi'ak ikyra katu ma'e wà. Na'ipuruzukaiw  
 kwaw wà.  
 Na'ikàg kwaw zeàmàtyry'ymawhu pe oho àwàm rehe.  
 Uzewyr uzàn pà wà.  
 Ta'e iaiw haw i'ar uhem wà xe.  
 Uhem wamumaw paw 'ar wà.  
<sup>22</sup> Ezit uzàn oho wà. Uze'eg moz ài wà.  
 Ta'e zauxiapekwer uhem waiko wà xe.  
 Waàmàtyry'ymar uzàmàtyry'ym wà itazy pupe wà.  
 Nuzawy kwaw zepe'aw imonohokar wà.  
<sup>23</sup> Zawaiw katu a'e ka'a pupe teixe haw.  
 Weityk a'e ywyra paw wà.  
 Heta tetea'u awa wà.  
 Teko nupuner kwaw wapapar haw rehe wà.  
 Waàmàtyry'ymar zauxiapekwer waneta haw uhua'u  
 wera'u tukur waneta haw wi.

<sup>24</sup> Teko Ezit ywy rehe har wiko ikàg 'ym ma'e romo wà kury.

Ta'e teko kwarahy heixe haw awyze har kutyr har weityk a'e wà xe.

Ihe Tupàn Tuweharupi Wiko Ma'e aze'eg kwez kury.

<sup>25</sup> Tupàn Tuweharupi Wiko Ma'e upuner wera'u ma'e Izaew wazar uze'eg kury.

— Azepyk putar Amon Tema wazar Ezit wazar rehe ihe nehe. Azepyk putar wazar wanehe nehe, wanuwiawete wanehe nehe no. Azepyk putar Ezit ywy rehe har wanuwiawete rehe nehe. Azepyk putar hehe uzeruzar ma'e wanehe paw rupi nehe no. <sup>26</sup> Mawiron wanuwiawete Namukononozor a'e, hemiruze'eg zauxiapekwer a'e wà no, ipuruzuka wer wanehe a'e wà. Amono putar wanupe ihe wà nehe. Nezewe rehe we amo 'ar pawire teko wiko putar Ezit ywy rehe wà nehe. Ihe Tupàn Tuweharupi Wiko Ma'e aze'eg kwez kury.

### *Tupàn upyro putar wemiaihu a'e wà*

<sup>27</sup> Heremiruze'eg Zako izuapyapyr wà, Pekyze zo nehe.

Teko Izaew wà, pepytuhegatu zo no.

Apupyro putar a'e teko ywy muite har wanuwi ihe nehe.

Peiko uma'erekò e ma'e a'e ywy rehe. Apupyro putar a'e wi nehe.

Pezewyr putar peywy pe peneko katu pà nehe.

Ni amo nuzapo kwaw ikatu 'ym ma'e peme wà nehe.

Ni amo napemukyze kar kwaw wà nehe.

<sup>28</sup> Aiko putar penehe we pepyro pà nehe.

Apumuhàz ywy tetea'u rehe ihe.

Amumaw putar teko a'e ywy rehe har paw ihe wà nehe.

Napumumaw kwaw nehe.

Napezepyro kwaw hezepykaw wi nehe.

Nezewe rehe we penehe hezepyk mehe nazepykahy kwaw  
nehe.  
Ihe Tupàn Tuweharupi Wiko Ma'e aze'eg kwez kury.

## 47

*Tupàn uze'eg Piri ywy rehe har wanehe Zeremi pe*

<sup>1</sup> Ezit ywy rehe har wanuwihawete uzàmàtyry'ym Kaz tawhu oho. A'e 'ym mehe we Tupàn Tuweharupi Wiko Ma'e uze'eg ihewe Piri ywy rehe har wanehe.

<sup>2</sup> — Pexak nehe.

Ywy kwarahy heixe haw awyze har kutyr har rehe uzeupir 'y iko.

A'e wi uwyrık putar yrykawhu ài tyhu haw 'ar rehe zàwenugar ài.

Upyk putar ywy nehe.

Upyk putar ywy rehe har paw wà nehe no:

Tawhu wà, wapupe har wà no.

Uhapukaz upyro àwàm henoz pà wà nehe.

Ko ywy rehe har paw heiheihem putar wahy haw pupe wà nehe.

<sup>3</sup> Kawaru wapy uwànoànog putar wà nehe. A'e teko wenu putar wànoànog mehe wà nehe.

Wenu putar ywyramawa zeàmàtyry'ymawhu pe har wà nehe no.

Wànoànog putar wà nehe.

Awa nuzewyr kwaw wa'yr wapiaromo wà nehe. Ta'e wazywa na'ikàg kwaw wà xe. U'ar putar wà nehe.

<sup>4</sup> Uhem Piri ywy rehe har waiwy imumaw paw 'ar kury.

Xir tawhu pe har wà, Xitom pe har wamyrypar wà no, omono kar putar uze'eg umyrypar wanupe wà nehe. —

Urepytywà pe nehe ty wà, i'i putar wanupe nehe.

Uhem a'e 'ar kury. A'e 'ar mehe napytywà kar kwaw wamyrypar wanupe ihe wà nehe.

Ihe Tupàn Tuweharupi Wiko Ma'e amumaw putar Piri  
ywy rehe har ihe wà nehe.

Amumaw putar Kereta ryrypypo'o wi ur ma'e kwer ihe wà  
nehe no.

<sup>5</sup> Teko Kaz tawhu pe har uzemumikahy wà.

Akerom tawhu pe har nuze'eg kwaw wà.

Piri ywy rehe har ywy rehe upyta ma'e kwer wà, Mèràñ  
'ar umumaw putar uzai'o pà wà nehe.

<sup>6</sup> Pehapukaz nezewe.

— Tupàn itakihepuku, Ma'e 'ar mehe erepytu'u puruzuka  
re nehe.

Ezewyr neapirer pe nehe.

Epyta a'e pe nepytu'u pà nehe, peze peiko.

<sup>7</sup> Mèràzàwe tuwe takihepuku hereko har upytu'u putar  
nehe.

Azapo kar ima'erekohaw izupe ihe.

— Ezàmàtyry'ym Akerom tawhu nehe, a'e izupe.

— Ezàmàtyry'ym teko ryryhu iwyr wiko ma'e ne wà nehe,  
a'e izupe.

## 48

### *Moaw heitykaw*

<sup>1</sup> Tupàn Tuweharupi Wiko Ma'e upuner wera'u ma'e  
Izaew wazar umume'u ko ma'e Moaw rehe har rehe.

— Pepuhareko teko Nemo tawhu pe har pe wà nehe.

Ta'e zauxiapekwer umumaw a'e tawhu a'e wà xe.

Upyhyk Kiriataim wà no.

Weityk hàpuzuhu tàtà ma'e imumew pà wà.

Umuigo kar teko a'e pe har ikàg 'ym ma'e romo wà no.

<sup>2</sup> Moaw ikàgaw ipuràgaw upaw.

Ezemon tawhu pe waàmàtyry'ymar umume'u wemiapo  
ràm waiko wà.

— Ximumaw Moaw izuapyapyr zane wà nehe, i'i uzeupe-upé wà.

Zauxiapekwer tetea'u wata putar oho Mazimen tawhu kutyr wà nehe.

Xo ze'eg 'ymaw zo heta putar a'e pe nehe.

<sup>3</sup> Teko Oronaim pe har uhapukaz wà.

— Umumew paw rupi wà.

Umumaw paw rupi wà.

<sup>4</sup> Moaw ywy uzeapo heityk pyrer romo.

Kwarearer uzai'o waiko wà.

<sup>5</sup> Pezeapyaka wazozokaw rehe

Iruwi tawhu piar rupi nehe.

Peinu ma'eahy haw wi wanehapukaz haw

Oronaim tawhu piar rupi nehe no.

<sup>6</sup> Xinu teko nezewe wanehapukaz mehe wà.

— Na'arewahy nehe.

Pezàn pezepyro pà mào haw wi nehe.

Pezàn zumen hehaite ma'e ywyxiguhu rehe har ài nehe, i'i wà.

<sup>7</sup> Moaw izuapyapyr wà, pezeruzar pekàgaw rehe penemetarer rehe.

Ko 'ar rehe peàmàtyry'ymar wiko putar pezar romo a'e wà nehe.

Weraha putar tupàn pezar Kemoz her ma'e a'e wà nehe, peywy wi a'e wà nehe.

Weraha putar penuwihawete ta'yr wà nehe no, xaxeto penehe we har a'e wà nehe no.

<sup>8</sup> Ni pitài tawhu nuzepyro kwaw uzemumaw pàwàm wi nehe.

Umumaw putar ywyàpyznaw rehe har wà nehe. Umumaw putar ywyapypew rehe har wà nehe no.

Ihe Tupàn Tuweharupi Wiko Ma'e aiko ko ma'e imume'u  
har romo.

<sup>9</sup> Pemuàgà'ym amo ita Moaw wanetekwer watym àwàm  
rehe har nehe.

Ta'e na'arewahy amo umumaw putar waiwy wà nehe xe.  
Umuaiw putar tawhu waneko haw wà nehe no.

Ni amo nuiko kwaw a'e pe wà nehe.

<sup>10</sup> Aze amo nuzapokatu kwaw Tupàn pe uma'erekò haw  
wà nehe, Tupàn omono putar uze'egaiw a'e teko  
wanehe nehe.

Aze amo omonokatu utakihepuku wà nehe, aze nuzuka  
kwaw teko ipupe wà nehe, Tupàn omono putar  
uze'egaiw a'e teko wanehe nehe no.

### *Tawhu Moaw ywy rehe har wamumaw paw*

<sup>11</sup> Tupàn Tuweharupi Wiko Ma'e uze'eg a'e kury.

— Teko Moaw ywy rehe har wiko uzàmàtyry'ym 'ym  
pà tuweharupi wà. Ni amo zauxiapekwer nueraha kwaw  
waiwy wi ipyhyk pyrer romo wà. Moaw nuzawy kwaw  
win imonokatu pyrer. Teko numumyz kwaw a'e win wà.  
Nuzakook pixik kwaw hyru wi amo hyru ràm pe wà. Hete  
katu haw nuhem kwaw izuwi. Tuweharupi ikatu i'u mehe.

<sup>12</sup> Uhem amo 'ar iko kury. A'e 'ar mehe amono kar  
putar teko Moaw wanupe ihe nehe. Uzakook putar win  
ai wà nehe. Ukauka putar hyru win heityk pà ywy rehe  
wà nehe. <sup>13</sup> Na'e Moaw izuapyapyr upytu'u putar utupàn  
Kemoz rehe uzeruzar ire wà nehe. Nuzawy kwaw Izaew  
wà nehe. Izaew upytu'u utupàn Metew rehe uzeruzar ire  
wà no.

<sup>14</sup> Awa Moaw rehe har wà. — Uruiko zauxiapekwer  
ipuruzukaiwahy ma'e romo ure, peze pezehe.

— Uruiko zauxiapekwer ukyze 'ym ma'e romo ure, peze pezehe. Màràzàwe tuwe peze'eg nezewé.

<sup>15</sup> Amo zauxiapekwer umumaw putar Moaw wà nehe. Umumaw putar tawhu Moaw ywy rehe har wà nehe no.

Uzuka putar kwàkwàmo ikatu wera'u ma'e wà nehe.

Ihe tuwihawete ihe, aiko ko ma'e imume'u har romo ihe. Tupàn Tuweharupi Wiko Ma'e Ikàg Wera'u Ma'e herer romo ihe.

<sup>16</sup> Jaiw haw ko ywy rehe u'ar ma'e ràm uhem iko a'e. Imumaw pàwàm uezapo putar na'arewahy nehe kury.

<sup>17</sup> Pe Moaw wanuwake wiko ma'e, pepuhareko pe wà nehe.

Wakàgaw ikwaw par wà, pepuhareko pe wà nehe.

— Wapuner katu haw upaw kwez kury.

Wapuràg eteahy haw wakàgaw ukàzym, peze nehe.

<sup>18</sup> Pe Nimon pe wiko ma'e wà.

Pewezyw tuwihaw henaw wi nehe.

Peapyk ywy rehe ywyku'i rehe nehe.

Moaw imumaw pàràm wiko xe.

Umumaw putar wanàpuzuhu imuàtà pyrer nehe.

<sup>19</sup> Aroer pe wiko ma'e wà, Pepyta pe iwyr teko wanàrò pà nehe.

Pepuranu wanehe nehe.

— Ma'e uezapo aipo kury, peze wanupe nehe.

<sup>20</sup> Uwazar putar peze'eg peme wà nehe.

— Moaw ywy u'ar a'e.

Pezai'o hehe nehe. Ta'e zauxiapekwer umumaw a'e wà xe.

Peze'eg peho teko Aroron pe har yrykawhu izywyr har wanupe nehe.

— Umumaw Moaw ywy wà, peze wanupe nehe.

<sup>21</sup> Umumaw tawhu ywyapypepaw rehe har wà: Orom, Zaza, Mepaat, <sup>22</sup> Nimon, Nemo, Mete-Zirimatai,

<sup>23</sup> Kiriataim, Mete-Gamu, Mete-Meàw, <sup>24</sup> Keriot, Mozira. Umumaw tawhu Moaw ywy rehe har paw wà, muite har wà, pe pe har wà no. <sup>25</sup> Ukamik Moaw ipuner haw wà. Umumaw wakàgaw wà. Ihe Tupàn Tuweharupi Wiko Ma'e amume'u ko ze'eg kwez ihe kury.

*Tupàn umumaw Moaw wakàgaw a'e*

<sup>26</sup> Uze'eg wi Tupàn Tuweharupi Wiko Ma'e kury.

— Pemuka'u kar Moaw pe wà nehe. Ta'e nahere-ruzar kwaw a'e wà xe. Moaw uwauwak putar uhuhuk awer rehe wà nehe. Amogwer upuka putar wanehe wà nehe. <sup>27</sup> Moaw, erepuka teko Izaew wanehe. Aipo nema'enukwaw nepuka awer rehe. Ererekohy Izaew ne wà. Nuzawy kwaw imunar ma'e tetea'u wainuinuromo imunehew pyrer newe wà.

<sup>28</sup> Pe Moaw ywy rehe wiko ma'e wà, pehem tawhu peneko haw wi nehe. Peiko peho ita myter pe nehe. Peiko pykahu ài nehe. Uzapò waity ywytyr iapy'amahy haw izywyr wà. Peiko wazàwe nehe. <sup>29</sup> Moaw izuapyapyr wiko wiko wera'u ma'e romo wà. Urenu waneko haw. — Zanekàg wera'u amo wanuwi zane. Zanekatu wera'u amo wanuwi no. Zanepuràg eteahy wera'u amo wanuwi. Azeharomoete naheta kwaw amo teko zanezàwenugar wà, i'i wà. Amo umume'u waze'eg urewe wà. <sup>30</sup> Ihe Tupàn Tuweharupi Wiko Ma'e akwaw waneko wera'u haw ihe. — Ikatuahy, i'i ikatu 'ym ma'e pe wà, upaw ma'e ràm pe wà. <sup>31</sup> A'e rupi azai'o putar teko Moaw nànàñ ihe nehe. Azai'o putar teko Kir-Erez pe har wanehe nehe no. <sup>32</sup> Azai'o putar teko Zazer pe har wanehe nehe. Azai'o wera'u putar teko Ximima pe har wanehe nehe. Tawhu Ximima, ereiko uwà tyw ài ne. Neràkà oho Yryhu Umàno Ma'e Kwer her ma'e i'aromo. Oho Zazer tawhu pe. Ko 'ar rehe neàmàtyry'ymar umumaw arozràñ penemitygwer

wà kury, uwà penemitygwer wà no. <sup>33</sup> Turywete haw a'e, turyw eteahy haw a'e no, ukàzym ywy ikatu ma'e wi Moaw wi a'e wà. Nuzapo kwaw win wà kury. Naheta kwaw iapo har wà. Naheta kwaw urywete haw rehe uhapukaz ma'e wà.

<sup>34</sup> Teko Ezemon tawhu pe har wà, Ereaw pe har wà no, uhapukaz wà. Te Zaxa pe har upuner wanehapukaz haw henu haw rehe wà. Zoar pe har wenu wà. Oronaim pe har wà, Ekirat pyahu pe har wà no, upuner henu haw rehe wà. Te Niri yrykaw typaw no. <sup>35</sup> Teko Moaw izuapyapyr wapy wemimono ywytyr apyr utupàn wanenataromo wà. Uzuka ma'ea'yr wanupe wà. Amupytu'u kar putar wazuka re ihe wà nehe. Ihe Tupàn Tuweharupi Wiko Ma'e aiko ko ma'e imume'u har romo ihe.

<sup>36</sup> A'e rupi hepy'a uzai'o Moaw rehe, tekо Kir-Erez pe har wanehe no. Aiko xi'äm purutymaw pe ipy har ài. Ta'e wama'e paw upaw a'e wà xe. <sup>37</sup> Upin u'aw uzemumikahy haw hexak kar pà wà. Omonohok wamutaw wà no. Paw rupi uzekixi opo rehe wà. Umunehew ma'eryru pàn iànàm ma'e iapo pyrer ukamir romo wà. <sup>38</sup> Xo zai'o haw zo heta tàpuz nànàn, katu pe tàpuz huwake no. Ta'e azuhaw Moaw ywy'a iputar 'ym zàwenugar ài ihe xe. <sup>39</sup> Amumaw Moaw ihe wà. Pehapukaz nehe. Iaiw haw u'ar Moaw rehe. Ywy uzeapo heityk pyrer romo. Ywy huwake har paw uze'eg uryweteahy hehe wà. Ihe Tupàn Tuweharupi Wiko Ma'e aze'eg kwez kury.

*Moaw nupuner kwaw uzewàhemaw rehe zepykaw wi wà*

<sup>40</sup> Ihe Tupàn Tuweharupi Wiko Ma'e amume'uahy ko ma'e uzeapo ma'e ràm ihe.

— Teko amo ywy rehe har uzàmàtyry'ym Moaw wà a'e wà nehe. Wiràhu u'ar wemiar rehe upepozaz pà a'e. Nezewegatete a'e tekо u'ar putar Moaw rehe wà nehe no.

<sup>41</sup> Upyhyk putar tawhu paw wà nehe, tàpuzuhu imuàtà

pyrer paw wà nehe no. Kuzà umemyrah y ma'e ukyze a'e. Nezewegatete zauxiapekwer Moaw ukyze putar a'e wà nehe no. <sup>42</sup> Umumaw putar Moaw a'e wà nehe. Nuzewyr kwaw wà nehe. Nuiko wi kwaw teko imono'og pyr romo wà nehe. Ta'e heàmàtyry'ym a'e wà xe. <sup>43</sup> Kyze haw wàro Moaw wà. Ywykwar watym àwàm wàro wà no. Puruzuka haw wàro wà no. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>44</sup> Ukyze haw rehe uzàn ma'e u'ar putar ywykwar purutymaw pupe wà nehe. Ywykwar wi uhem ma'e kwer uzepyhyk kar putar oho puruzuka haw pupe wà nehe. Ta'e amume'u Moaw imumaw pàwàm 'ar kwez ihe xe. <sup>45</sup> Amogwer uzàn ukene'o pà wà. Uzeagaw zepe uzepyro pà Ezemon tawhu pupe wà nehe. Xeom wiko Ezemon pe har wanuwihawete romo amo 'ar mehe. A'e teko nuzepyro kwaw Ezemon pupe wà. Ta'e ukaz iko kury xe. Tata wapy ywyzaw. Wapy ywytyruhu apyr Moaw ywy rehe har no. Moaw uzamutar zepe puràmàtyry'ymaw wà. <sup>46</sup> Uzemumikahy teko Moaw izuapyapyr wà. Zauxiapekwer amo ywy rehe har uzuka teko Kemoz imuwete har wà. Weraha wana'yr ipyhyk pyrer romo wà. Weraha wanazyr wà no. <sup>47</sup> Nezewe rehe we amuigo wi kar putar teko ikàg ma'e romo izypy mehe arer zàwenugar ài nehe. Na'aw Tupàn ze'eg Moaw rehe imume'u pyrer xe a'e.

## 49

*Tupàn uzepyk Amon izuapyapyr wanehe*

<sup>1</sup> Tupàn Tuweharupi Wiko Ma'e umume'u ko ze'eg Amon wanehe a'e.

— Ma'e pe awa Izaew izuapyapyr wanekon wà. Tupàn omono a'e ywy wanupe waneko haw romo a'e. Aipo ni amo nupyro kwaw a'e ywy zauxiapekwer wanuwi wà nehe. Tupàn ua'u Morok upyhyk Kaz izuapyapyr

waiwy wanuwi a'e. Màràzàwe tuwe upyhyk kar izupe wà. Màràzàwe tuwe imuwete har oho a'e ywy rehe wiko pà wà. <sup>2</sup> Uhem amo 'ar iko kury. A'e 'ar mehe ainu kar putar zeàmàtyry'ymawhu iànoànogaw Hama tawhu pe har wanupe nehe. Zauxiapekwer umumew putar a'e tawhu Amon izuapyapyr waneko haw wà nehe. Tata umumaw putar taw waneko haw wà nehe no. Upyhyk a'e ywy Izaew izuapyapyr wanuwi wà. Izaew upyhyk wi putar uiwy a'e teko wanuwi wà nehe no. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>3</sup> Pehapukaz nehe, teko Ezemon pe har wà. Zauxiapekwer weityk Az tawhu wà. Pezai'o nehe, kuzà Hama pe har wà. Pemunehew ma'eryru pàn iànàm ma'e iapo pyrer pezai'o pà nehe. Pezàn e ko rupi nehe, kwe rupi nehe no. Zauxiapekwer weraha putar Morok pezar wemipyhyk kwer romo wà nehe, xaxeto wanehe we tuwiyaw wanehe we wà nehe. <sup>4</sup> Teko uzeruzar 'ym ma'e wà. Màràzàwe tuwe pemume'u pekàgaw. Pepuner haw upaw etea'i kury. Màràzàwe tuwe pezeruzar pekàgaw rehe. — Ni amo nazaneàmàtyry'ym kwaw wà nehe kury, ta'e ukyze zanewi wà xe, peze peiko. Màràzàwe tuwe. <sup>5</sup> Ma'ema'e wi amu'ar kar putar purumukyzeahy haw penehe nehe. Paw rupi pezàn putar izuwi nehe. Pezàn putar pezepyro pà màño haw wi nehe. Nupyta kwaw amo zauxiapekwer wamono'ogar romo wà nehe. Ihe Tupàn Tuweharupi Wiko Ma'e upuner wera'u ma'e aiko ko ma'e imume'u har romo ihe.

<sup>6</sup> Amo 'ar mehe amuigo kar putar Amon izuapyapyr ikàg ma'e romo izypy mehe arer zàwe ihe wà nehe. Ihe Tupàn Tuweharupi Wiko Ma'e aze'eg kwez kury.

### *Tupàn uze'eg Enom wakutyr*

<sup>7</sup> Tupàn Tuweharupi Wiko Ma'e upuner wera'u ma'e umume'u ko ma'e Enom ywy rehe uzeapo ma'e ràm kury.

— Aipo teko Temà tawhu pe har he'o wà. Aipo waneruze'egar nukwaw kwaw waneruze'egaw wà kury. Aipo wama'ekwaw paw upaw wanuwi. <sup>8</sup> Nenà pe har wà, pewak pezàn pà nehe. Pezàn pezeàmim pà nehe. Azuka putar Ezau izuapyapyr ihe wà nehe. Ta'e wanehe hezepykaw 'ar uhem kwez kury xe. <sup>9</sup> Uwà ipo'o mehe teko wezar amo i'yw rehe wà. Imunar ma'e zaneràpuz pupe uhem mehe xo wemimutar zo weraha wà. <sup>10</sup> Apyhyk Ezau izuapyapyr wanemetarer paw wanuwi ihe. Amumaw wazeàmimaw no. Nezewe mehe nupuner kwaw uzeàmimaw rehe wà nehe kury. Zauxiapekwer umumaw teko Enom izuapyapyr wà, waànàm wà no, wanuwake wiko ma'e wà no. Ni amo nuzepyro kwaw wà. <sup>11</sup> Pezar tu 'ym ma'e peinuromo har herehe we pe wà nehe. Azekaiw putar wanehe nehe. Kuzà imen umàno ma'e kwer peinuromo har upuner herehe uzeruzar haw rehe wà nehe.

<sup>12</sup> Tupàn Tuweharupi Wiko Ma'e uze'eg wi kury.

— Te ikatu 'ym ma'e iapo 'ymar upuraraw ma'erahy wà. Aipo pe napepuraraw kwaw ma'erahy pe nehe no. Azeharomoete pepuraraw putar nehe. <sup>13</sup> — Iaiw ma'e, i'i putar teko Mozira tawhu pe hexak mehe wà nehe. Uzeapo putar teko heta 'ymaw romo nehe, a'e kwehe mehe ihe. Amogwer uze'eg uryweteahy hehe wà nehe. Uze'egaiw amo rehe imono mehe umume'u putar her wà nehe. Teko a'e tawhu izywyr har upaw putar wà nehe. Nuzewyr kwaw wà nehe. Ihe Tupàn Tuweharupi Wiko Ma'e aze'eg kwez kury. <sup>14</sup> Na'e aze'eg ihe kury. — Tupàn Tuweharupi Wiko Ma'e umur uze'eg ihewe. Omono kar amo uze'eg imume'u har teko ywy nànànar wanupe. Na'aw a'e ize'eg xe:

— Pemono'og zauxiapekwer pe wà nehe. Pezàmàtyry'ym Enom peho pe wà nehe. <sup>15</sup> Tupàn Tuweharupi

Wiko Ma'e neapo putar tekò ikàg 'ym ma'e romo a'e nehe, Enom. Ni amo nuzeruze'eg kwaw nerehe wà nehe. <sup>16</sup> Peneko wera'u haw hemu'em peme a'e. — Amo ukyze zanewi a'e wà, peze zo pezeupe nehe. Peiko itakwaruhu pupe ywytyruhu apyr. Peiko ywate wiràhu ài. Nezewe rehe we Tupàn Tuweharupi Wiko Ma'e peneityk putar a'e nehe. Ihe Tupàn Tuweharupi Wiko Ma'e aze'eg kwez kury.

<sup>17</sup> Tupàn Tuweharupi Wiko Ma'e uze'eg wi kury.

— Puruzuka haw iaiw wera'u ma'e u'ar putar Enom wanehe a'e nehe. Huwake ukwaw ma'e ipytuhegatu putar ukyzeahy pà hexak mehe wà nehe. <sup>18</sup> Kwehe iaiw ma'e uezapo Xotom tawhu pe Komor tawhu pe a'e. Tupàn umumaw a'e tawhu amo tawhu wanuwake har inuromo a'e wà. Uzapo putar nezewegatete haw Enom pe nehe no. Ni amo nuiko kwaw a'e pe wà nehe. Ni måràn 'ar numumaw kwaw a'e pe wiko pà wà nehe. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>19</sup> Amo zàwàruhu irìaw uhem ka'a Zotàw yrykawhu izywyr har wi a'e. Uzeupir ywy ka'api'i ikatu ma'e pe no. Nezewegatete amuzàn kar putar Enom waiwy wi ihe wà nehe no. Na'e awa heremixak ràm wiko putar a'e ywy rehe har wanuwihaw romo a'e nehe. Mo upuner herehe wà. Mo nukyze kwaw ihewi wà. Mo heàmàtyry'ym putar wà nehe. Ma'enugar tuwihow upuner hereitykaw rehe wà. <sup>20</sup> A'e rupi pezekaiw katu tekò Enom izuapyapyr wanupe heremiapo ràm rehe nehe. Ihe Tupàn Tuweharupi Wiko Ma'e ihe. Peinu Temà tawhu pe har wanupe heremiapo ràm nehe no. Zauxiapekwer umutyk putar te kwarer wà nehe, te tua'uhez ma'e wà nehe no. Teko paw ukyzeahy putar hexak mehe wà nehe. <sup>21</sup> Enom i'ar mehe ywy uryryryryrz putar iànoànog mehe nehe. Te Yryhupiràg izywyr har wenu putar wà nehe

no. <sup>22</sup> Zauxiapekwer uzàmàtyry'ym putar Mozira tawhu wà nehe. Nuzawy kwaw wiràhu upepozaz ma'e ywate wi wemiar ipyhyk pà u'ar ma'e. A'e 'ar mehe zauxiapekwer Enom izuapyapyr ukyze putar kuzà imemyrahy ma'e ài wà nehe.

*Tupàn uzepyk Namaz pe har wanehe*

<sup>23</sup> Tupàn Tuweharupi Wiko Ma'e umume'u ko ze'eg Namaz tawhu pe har kury.

— Amat tawhu pe har wà, Arupaz tawhu pe har wà no, ukyze waiko a'e wà, ta'e wenu ikatu 'ym ma'e uezapo ma'e kwer imume'u haw wà xe. Wakye haw ukamikamik ryhyu ài a'e wà. Nupytu'u kwaw wà. <sup>24</sup> Teko Namaz tawhu pe har na'ikàg kwaw wà. Uwak uzàn pà wà ta'e ukyze katu wà xe. Tynehem ma'erahy pupe wà. Nuzawy kwaw kuzà imemyrahy ma'e wà. <sup>25</sup> 'Aw tawhu hurywete kwehe mehe a'e. Teko weityk wà kury. <sup>26</sup> A'e 'ar mehe zauxiapekwer uzuka putar kwàkwàmo wà nehe, uzuka awa zauxiapekwer wà nehe no, nahu rupi wà nehe. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>27</sup> Apy putar Namaz tawhu ipàrirogawtàtà ihe nehe. Tata umumaw putar Menanaz hàpuzuhu a'e nehe no.

*Tupàn uzepyk Kenar, Azor wanehe kury*

<sup>28</sup> Tupàn Tuweharupi Wiko Ma'e umume'u ko Kenar izuapyapyr wanupe uezapo ma'e ràm a'e kury, Azor tawhu pe har wanuwihaw wanupe uezapo ma'e ràm a'e no. Mawiron wanuwihawete Namukononozor weityk a'e tawhu a'e wà.

— Pehem peho Kenar tawhu pe har waàmàtyry'ym pà nehe. Teko kwarahy ihemaw kutyr har romo wanekon wà. Pemumaw pe wà nehe. <sup>29</sup> Pepyhyk wanàpuzràn nehe, waneimaw pe wà nehe no, pàn wanàpuzràn huken rehe imuzaiko pyrer nehe no, wanàpuzràn pupe har paw nehe

no. Pepyhyk waneimaw kawaru kupewa'a pe wà nehe, nezewé peze'eg pà nehe: Teko ywy nànànar ukyze wà, peze wanupe nehe.

<sup>30</sup> Teko Azor pe har wà, ko ma'e amume'u teko peme kury. Pezàn peho muite nehe kury. Pezeàmim nehe no. Mawiron wanuwihawete Namukononozor a'e, peàmàtyry'ym àwàm imume'u har a'e, umume'u ko ma'e kury. <sup>31</sup> — Zaha ty wà. — Zanekàg, i'i a'e teko uezueupepe wà. — Ni amo nazanereityk kwaw wà nehe, i'i wà. Xiàmàtyry'ym zane wà nehe kury. Waneko haw tawhu muite amo tawhu wanuwi tuz a'e. Naheta kwaw ukenawhu. Naheta kwaw iwàpytygatu haw, i'i wemiruze'eg wanupe. Ihe Tupàn Tuweharupi Wiko Ma'e aiko ko ma'e imume'u har romo ihe.

<sup>32</sup> — Pepyhyk waneimaw kawaru kupewa'a pe wà nehe. Pepyhyk waneimaw tapi'ak paw pe wà nehe no. Teko u'aw iàpinar romo wanekon wà. Amuhàmuhàz putar a'e teko ywy nànàn ihe wà nehe. Amu'ar kar putar iaiw haw tetea'u wanehe ihe nehe no. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>33</sup> Azor uezapo putar ywyxiguhu romo nehe. Nuzeapo pixik kwaw ywy ikatu ma'e romo nehe. Teko nuiko kwaw a'e pe wà nehe. Xo awarahu zo wiko putar a'e pe wà nehe.

### *Tupàn uzepyk Eràw ywy rehe har wanehe a'e*

<sup>34</sup> Zeneki wiko Zuta wanuwihawete romo kury. Nan kwehe tete Tupàn Tuweharupi Wiko Ma'e uze'eg ihewe Eràw ywy rehe kury. <sup>35</sup> Tupàn Tuweharupi Wiko Ma'e upuner wera'u ma'e uze'eg kury.

— U'yw pupe puruzywà har umuigo kar Eràw ywy upuner ma'e romo wà. Azuka putar a'e zauxiapekwer paw ihe wà nehe. <sup>36</sup> Amur kar putar ywytu ywy nànàn Eràw ikutyr ihe nehe. Teko izuapyapyr uhàuhàz putar

ywy nànàn uzàn pà wà nehe no. Te wiko putar ywy nànà-gatu wà nehe. <sup>37</sup> Amukyze kar putar Eràw izuapyapyr waàmàtyry'ymar wanuwi ihe wà nehe, wanehe ipuruzuka wer ma'e wanuwi ihe wà nehe. Hekwahy haw uhua'u ma'e rehe amumaw putar ihe wà nehe. Amono kar putar zauxiapekwer tetea'u wakutyr ihe wà nehe, te upaw wà nehe. Ihe Tupàn Tuweharupi Wiko Ma'e aiko ko ma'e imume'u har romo ihe. <sup>38</sup> Amumaw putar Eràw wanuwhawete ihe wà nehe, wanuwhaw ihe wà nehe no. Amuapk kar putar herenaw a'e pe nehe. <sup>39</sup> Nezewe rehe we amuigo kar wi putar teko ikàg ma'e romo izypy mehe arer zàwenugar romo ihe wà nehe no. Ihe Tupàn Tuweharupi Wiko Ma'e aze'eg kwez kury.

## 50

### *Zauxiapekwer weityk Mawiron wà*

<sup>1</sup> Tupàn Tuweharupi Wiko Ma'e umume'u ko uze'eg Mawiron ywy rehe a'e kury, a'e pe har wanehe a'e no.

<sup>2</sup> Pemume'u ko ze'eg ywy nànàn nehe.

Pemume'u teko nànàn nehe.

Pemume'u uzeapo romo ma'e kwer  
imuhàmuhàz pà nehe.

Pezumim zo puruwi nehe.

Mawiron u'ar a'e.

Watupàn Mew-Marunuk ipuner haw uhem izuwi.

Maranugar haw upyk tupàn a'ua'u Mawiron pe har wà.

Wanagapaw purumuuhuhuk ma'e tynehem kyze haw pupe  
wà.

<sup>3</sup> Amo teko kwarahy heixe haw awyze har kutyr har ur Mawiron iàmàtyry'ym pà wà.

Mawiron uzeapo putar ywyxiguhi romo nehe.

Teko wà, ma'ea'yr wà no, uzàn putar oho a'e wi wà nehe.

Ni amo nuiko kwaw a'e pe wà nehe.

*Izaew uzewyr uiwy pe wà*

<sup>4</sup> Tupàn Tuweharupi Wiko Ma'e uze'eg kury.

— A'e 'ar ihem mehe teko Izaew ywy rehe har wà, Zuta ywy rehe har wà no, uzewyr putar uzai'o pà herekar pà wà nehe. <sup>5</sup> — Ma'e pe Xiàw piar a'e, i'i putar upuranu pà wà nehe. Na'e ur putar xe kutyr wà nehe. — Zaze'eg putar Tupàn Tuweharupi Wiko Ma'e pe nehe, i'i putar wà nehe. — Xiapo katu putar zaneze'egaw upaw pixik 'ym ma'e hehe we nehe, i'i putar wà nehe. <sup>6</sup> Teko heremiaihu nuzawy kwaw àràpuhàràñ ywytyr rehe ukàzym ma'e wà. Wanehe uzekaiw ma'e nuzekaiw katu kwaw wanehe wà. Wata àràpuhàràñ ài amo ywytyr wi amo pe wà. Heharaz weko awer wi wà. <sup>7</sup> Wanuwàxi har paw uzàmàtyry'ym wà. Waàmàtyry'ymar uze'eg nezewe wà. — Uzapò ikatu 'ym ma'e Tupàn henataromo wà. A'e rupi, waàmàtyry'ym mehe naxiapo kwaw ikatu 'ym ma'e zane. Aze mo uzeruzar katu Tupàn Tuweharupi Wiko Ma'e rehe uwipy wazàwe wà, ikatu mo.

Nuzeruzar kwaw wà, i'i wà.

<sup>8</sup> Izaew izuapyapyr wà, pezàn Mawiron wi nehe. Peiko oho ma'e ràm ipy romo nehe. <sup>9</sup> Ta'e amukàg kar putar amo ywy rehe har kwarahy heixe haw awyze har kutyr har ihe wà nehe. Azàmàtyry'ym kar putar Mawiron a'e teko wanupe ihe wà nehe. A'e teko umuzehyrogatu kar putar zauxiapekwer Mawiron tawhu huwake wà nehe. Na'e weityk putar wà nehe, ipyhyk pà wà nehe. Zauxiapekwer a'e ywy rehe har ukwaw katu ma'e izywà haw uzemi'i kar ma'e ikatu ma'e ài wà, iawy pixik 'ymar ài wà. <sup>10</sup> Upyhyk putar temetarer paw Mawiron wi wà nehe. Weraha putar wemimutar paw a'e wi wà nehe no. Ihe Tupàn Tuweharupi Wiko Ma'e aze'eg kwez kury.

*Mawiron heitykaw*

<sup>11</sup> Uze'eg wi Tupàn Tuweharupi Wiko Ma'e kury.

— Teko Mawiron ywy rehe har wà. Peraha temetarer heywy rehe har paw rupi. Ko 'ar rehe penurywete, Penurywete tuwe. Peiko tapi'aka'yr ka'api'i rehe wata ma'e ài. Peze'eg kawaru hehaite ma'e ài. <sup>12</sup> Nezewe rehe we tawhu peneko haw uzeapo putar ikàg 'ym ma'e romo a'e nehe. Imaranugar putar nehe. Uzeapo putar ywy ikàg 'ym wera'u ma'e romo a'e nehe. Uzeapo putar ywyxiguhu uxinig ma'e kwer romo nehe. Naheta kwaw 'y a'e pe nehe. <sup>13</sup> Aikwahy putar ihe nehe. A'e rupi zauxiapekwer umumew putar Mawiron wà nehe. Ni amo teko nuiko kwaw a'e pe wà nehe. A'e pe ukwaw ma'e ràm ipytuhegatu putar a'e tawhu pe uzeapo ma'e kwer hexak mehe wà nehe.

<sup>14</sup> U'yw pupe puruzywà ma'e wà, peze'yrogatu Mawiron waàmàtyry'ym pà nehe. Pemàmàn tawhu izywyr nehe. Pezywà penu'yw nànàn nehe. Ta'e uzapo ikatu 'ym ma'e hekutyr a'e wà xe. Aiko Tupàn Tuweharupi Wiko Ma'e romo ihe. <sup>15</sup> Pehapukaz zeàmàtyry'ymawhu pe har imume'u pà nehe, tawhu izywyr nehe. Mawiron uzemono kwez wà kury. Uzapo wixe àwàm pàrirogawtàtà rupi wà. Na'e weityk wà. Ihe Tupàn Tuweharupi Wiko Ma'e azepyk teko Mawiron wanehe ihe. Pezepyk wanehe nehe no. Ta'e upuraraw kar ma'erahy amo wanupe a'e wà xe. <sup>16</sup> Pezutym kar zo ma'e Mawiron ywy rehe har wanupe waiwy rehe nehe. Pepo'o kar zo arozràn wanupe nehe. Amo ae ywy rehe arer a'e ywy rehe wiko ma'e ukyze putar wàmàtyry'ymar zauxiapekwer wanuwi wà nehe. A'e rupi uzewyr putar weko awer pe wà nehe.

*Izaew uzewyr putar uiwy pe wà nehe*

<sup>17</sup> Tupàn Tuweharupi Wiko Ma'e uze'eg kury.

— Teko Izaew izuapyapyr nuzawy kwaw àràpuhàràñ hawitu ma'e wà. Zàwàruhu iriàw oho wanaikweromo wamuhàmuhàz pà wà. Izypy mehe Axir wanuwiyawete uzàmàtyry'ym Izaew wà. A'e re Namukononozor Mawiron wanuwiyawete uxi'uxi'u wàkàgwer wà. <sup>18</sup> A'e rupi ihe Tupàñ Tuweharupi Wiko Ma'e upuner wera'u ma'e Izaew wazar azepyk putar tuwiyawete Namukononozor rehe ihe nehe, hemiruze'eg wanehe ihe nehe no, Axir wanuwiyawete rehe hezepyk awer zàwegatete ihe nehe no. <sup>19</sup> Aruzewyr putar tekо Izaew waiwy pe ihe wà nehe. U'u putar Karamew ywytyr Màxà ywy rehe har rehe hezuz ma'e wà nehe. U'u wemimutar paw Eparai ywy rehe har wà nehe, Zireaz ywy rehe har wà nehe no. <sup>20</sup> A'e 'ar ihem mehe Izaew ywy rehe har uzapo putar xo ikatu ma'e zo a'e wà nehe. Zuta ywy rehe har nezewegatete wà nehe no. Aze amikuwe kar amo ihe nehe, nazepyk kwaw hehe ihe nehe. Ihe Tupàñ Tuweharupi Wiko Ma'e aze'eg kwez kury.

### *Tupàñ uze'eg Mawiron imumaw paw rehe*

<sup>21</sup> Tupàñ Tuweharupi Wiko Ma'e uze'eg kury.

— Pezàmàtyry'ym teko Meratai pe har pe wà nehe, Pekoz pe har pe wà nehe no. Pemumaw tuwe pe wà nehe. Pezapo heremiapo kar paw nehe no. <sup>22</sup> Teko wenu zauxiapekwer wazeàmàtyry'ym mehe a'e ywy rehe wà. Heta ma'e imumaw paw tetea'u. <sup>23</sup> Mawiron uzukazuka ywy paw inupàñupà pà. Ko 'ar rehe inupà haw uzekazeka kwez kury. Teko ywy nànànar ipytuhegatu Mawiron pe izeapo awer hexak mehe wà. <sup>24</sup> Ne Mawiron ere'ar hepuruza haw pupe ikwaw 'ym pà ne. Nepyhyk nemumaw pà wà, ta'e heàmàtyry'ym pe ne xe. <sup>25</sup> Ihe Tupàñ Tuweharupi Wiko Ma'e upuner wera'u ma'e awàpytmawok hepuruza haw imonokatu haw ihe. Anuhem a'e wi. Ta'e aikwahy ihe xe. Heta amo heremiapo

ràm Mawiron pe. <sup>26</sup> Peàmàtyry'ym kwe rupi nehe, ko rupi nehe no. Pezuhaw arozràn imonokatu haw nehe. Pemono wanemetarer amo i'aromo ywytyr romo iapo pà nehe. Nuzawy kwaw arozràn ywytyr romo iapo pyrer. Pemumaw a'e ywy nehe. Pemuhem kar zo mào haw wi nehe. <sup>27</sup> Pezuka zauxiapekwer a'e pe har paw rupi pe wà nehe. Mawiron pe har uzemumikahy putar wà nehe. Uhem wanehe hezepyk àwàm 'ar kvez kury.

<sup>28</sup> Amo teko oho uzàn pà Mawiron wi wà, Xiàw pe uhem pà wà. Apuner wanexakaw rehe ihe. — Tupàn Tuweharupi Wiko Ma'e Zanezar uzepyk Mawiron wanehe a'e, ta'e uzapo iaiw ma'e hàpuzuhu pe a'e wà xe, i'i waiko wà.

<sup>29</sup> — Pezàmàtyry'ym Mawiron nehe, peze u'yw pupe puruzywà ma'e wanupe nehe. Aze amo ukwaw ma'ezywà haw u'yw pupe ywyrapar pupe wà nehe, pemono kar a'e pe pe wà nehe. Pemàmàn tawhu izywyr nehe. Pemuhem kar zo amo pe wà nehe. Tuwe Mawiron umekuzar wemi-apo kwer paw wà nehe. Uzapo iaiw ma'e amo wanupe wà. Pezapo nezewegatete haw wanupe nehe no. Ta'e uze'eg nezewe ihewe a'e wà xe. — Uruiko wera'u newi ure, i'i ihewe wà. Tupàn Ikatuahy Ma'e Izaew wazar romo aiko ihe. <sup>30</sup> A'e rupi zauxiapekwer uzuka putar kwàkwàmo nahu rupi wà nehe. Zauxiapekwer amo ae ywy rehe har uzuka putar zauxiapekwer Mawiron pe har paw a'e 'ar mehe a'e wà nehe. Ihe Tupàn Tuweharupi Wiko Ma'e aiko ko ma'e imume'u har romo ihe.

<sup>31</sup> Mawiron, ereiko wera'u amo wanuwi ne. A'e rupi ihe pezar upuner wera'u ma'e apuàmàtyry'ym penereko ihe kury. Penehe hezepykaw 'ar uhem kvez kury. <sup>32</sup> Pe teko wiko wera'u ma'e pe, pezepyapi putar pe'ar pà nehe. Ni amo naapeptywà kwaw pepu'äm wi mehe a'e wà nehe. Amunyk putar tata tawhu peneko haw rehe ihe nehe.

Tawhu izywyr har paw uzemumaw putar nehe.

<sup>33</sup> Tupàn Tuweharupi Wiko Ma'e upuner wera'u ma'e uze'eg kury.

— Izaew wà, Zuta wà no, upuraraw ma'erahy waiko wà. Wapyhyk arer ume'egatu wanehe wanuwake wiko pà wà. Na'ipurumuhem kar wer kwaw wanehe wà.

<sup>34</sup> Nezewe rehe we wamuhem kar àràm ikàg a'e. Tupàn Tuweharupi Wiko Ma'e upuner wera'u ma'e her romo a'e. Upyro putar a'e wà nehe, waiwy pe waneruzewyr kar pà a'e wà nehe. Xo xiroxiroahy haw werur putar teko Mawiron wanupe nehe.

<sup>35</sup> Uze'eg Tupàn Tuweharupi Wiko Ma'e kury.

— Tuwe Mawiron umàno nehe.

Tuwe teko a'e pe har umàno wà nehe no.

Tuwe wanuwihaw umàno wà nehe.

Tuwe ma'e kwaw katu har wainuromo har umàno wà nehe no.

<sup>36</sup> Tuwe wainuromo har uzeapo ma'e ràm imume'u har umàno wà nehe. Tuwe hemu'em ma'e umàno wà nehe. Tuwe iranaiwahy ma'e umàno wà nehe no.

Tuwe wainuromo har zauxiapékwer umàno wà nehe.

Ukyzeahy waiko wà kury.

<sup>37</sup> Pemumaw waneimaw kawaru pe wà nehe.

Pemumaw ywyramawa zeàmàtyry'ymawhu pe har nehe no.

— Peiko heremiruze'eg romo nehe, i'i zauxiapékwer ikàg 'ym ma'e wanupe. Tuwe a'e zauxiapékwer umàno wà nehe.

Pemumaw wanemetarer wanuwi nehe.

Pepyhyk wanemetarer heraha pà wanuwi nehe.

<sup>38</sup> Àmàn ikyr 'ymawhu ur putar waiwy rehe nehe.

Te rykawhu typaw putar nehe.

Mawiron ywy wereko tupàn a'ua'u purumukyze kar haw wà.

A'e tupàn a'ua'u umuigo kar wemiruze'eg iranaiwahy ma'e romo a'e wà.

<sup>39</sup> Miar wiko putar wà Mawiron tawhu pe wà nehe: Zàwàruhu ywyxiguhu pe har wà, awarahu wà, wiràmiri izipiw ma'e wà. Teko nuiko pixik kwaw a'e pe wà nehe. Tuweharupi upyta putar teko heta 'ymaw romo nehe. <sup>40</sup> Kwehe mehe amumaw Xotom tawhu Komor tawhu rehe we ihe. Amumaw tawhu a'e tawhu waiwyr har ihe wà no. Teko nuiko pixik kwaw a'e pe wà nehe. Ihe Tupàn Tuweharupi Wiko Ma'e aiko ko ma'e imume'u har romo ihe.

<sup>41</sup> Amo teko ur iko muite wi wà.

Ur ywy kwarahy heixe haw awyze har kutyr har wi wà.

Teko ikàg ma'e romo wanekon wà.

Tuwihawete tetea'u uzemuàgà'ym waiko zeàmàtyry'ymawhu rehe wà.

<sup>42</sup> Heta tetea'u ywyrapar wanupe. Heta tetea'u takihepuku wanupe no.

Puruzuka haw ikatu wanupe. Nupurupuhareko kwaw wà.

Ur kawaru kupe pe wà.

Waànoànogaw nuzawy kwaw yryhu wikwahy ma'e iànoànogaw.

Uzemuàgà'ym kwez Mawiron iàmàtyry'ym àwàm rehe wà.

<sup>43</sup> Amo umume'u uzeapo ma'e kwer Mawiron wanuwihawete pe wà.

Izywa ipyw henu mehe.

Ma'erahy a'e, ma'eahy haw a'e no, wiko tuwhawete izar romo kury.

Nuzawy kwaw kuzà umemyr izexak kar haw 'ar mehe.

<sup>44</sup> Zàwàruhu iriàw uhem ka'a wi yrykawhu Zotàw izywyr. Na'e uezupir ywy ka'api'i ikyr katu ma'e heta haw pe no. Nezewegatete ihe Tupàn Tuweharupi Wiko Ma'e azur putar Mawiron wamuzàn kar pà waneko haw tawhu wi ihe wà nehe no. Na'e tuwihaw heremixak ràm wiko putar a'e teko wanuwihawete romo nehe. Mo ikàg hezàwe wà. Mo nukyze kwaw ihewi heàmàtyry'ym pà. Ma'enugar tuwihaw upuner herenataromo. <sup>45</sup> A'e rupi pezekaiw katu heze'eg rehe nehe. Ihe Tupàn Tuweharupi Wiko Ma'e amume'u Mawiron pe heremiapo ràm ihe. Azapo putar iaiw ma'e a'e pe har wanupe nehe. Herenu pe imume'u mehe nehe. Te kwarer zauxiapekwer umutyk putar waneraha wà nehe. A'e ma'e imume'u haw henu har ukyzeahy putar wà nehe. <sup>46</sup> Mawiron wànoànog putar u'ar mehe nehe. Ywy uryrryryrz putar nehe. Teko amo ae ywy rehe har wenu putar wanehapukaz mehe wà nehe.

## 51

### *Tupàn uez'eg wi Mawiron wanehe*

<sup>1</sup> Uze'eg Tupàn Tuweharupi Wiko Ma'e kury.

— Amur kar putar ywytu puruzuka ma'e Mawiron ikutyr ihe nehe, a'e pe har wakutyr ihe nehe. <sup>2</sup> Amur kar putar teko amo ywy rehe har a'e pe a'e ywy imumaw kar pà wanupe nehe. Nuzawy kwaw ywytu ka'a ruwer uxinig ma'e muite heraha har. Wamumaw paw 'ar ihm mehe zauxiapekwer ywy nànànar uzàmàtyry'ym putar wà nehe. Uzapo putar ywy ywyxiguhu teko heta 'ymaw romo wà nehe. <sup>3</sup> Pezywà kar zo zauxiapekwer Mawiron pe har wanupe pe wà nehe. Pemunehew kar zo wapuxi'a imimaw wanupe nehe. Pezuka kwàkwàmo pe wà nehe. Pepytu'u zo wazuka re nehe. Pezuka zauxiapekwer paw pe wà nehe. <sup>4</sup> Zauxiapekwer ukutuk putar a'e wà nehe. Umàno putar weko haw tawhu pe nahu rupi wà nehe. <sup>5</sup> Ihe

Tupàn Tuweharupi Wiko Ma'e upuner wera'u ma'e napuir kwaw Izaew wanuwi ihe. Naityk kwaw Zuta ihe wà. Teko Mawiron uzapo ikatu 'ym ma'e herenataromo a'e wà. Aiko Tupàn ikatuahy ma'e Izaew wazar romo ihe.<sup>6</sup> Pezàn Mawiron wi nehe. Aze pepuner pezepyro haw rehe nehe, pezepyro nehe. Pezezuka kar zo zauxiapekwer wanupe Mawiron wanemiapo kwer ikatu 'ym ma'e hekuzaromo nehe. Ihe azepyk putar wanehe ihe nehe kury. Hezepyk àwàm nuzawy kwaw wanemiapo kwer nehe. Uhyk putar nehe.<sup>7</sup> Mawiron nuzawy kwaw kanek ipuku ma'e or iapo pyrer hepo pe har a'e. Teko ywy nànànar uka'u ipor i'u mehe wà. U'u win ipupe har uzemue'o kar pà wà.<sup>8</sup> Na'arewahy Mawiron u'ar. Uzemumew. Pezai'o hehe nehe. Pekar muhàg ikutuk awer pe nehe. Nezewe mehe ikatu putar ru'u nehe.<sup>9</sup> Amo ywy rehe arer a'e pe wiko ma'e uze'eg nezewe wà.

— Urepurupytwà wer zepe Mawiron rehe. Nurupuner kwaw. Zahem zaha izuwi nehe, zanerekò awer nànàn zanezewyr pà nehe. Tupàn uzepyk Mawiron rehe ukàgaw paw rupi a'e. Umumaw tuwe, i'i wà.

<sup>10</sup> Tupàn Tuweharupi Wiko Ma'e uze'eg kury. — Heremaihu uhapukaz nezewe uze'eg pà wà. Tupàn Tuweharupi Wiko Ma'e wexak kar zanekatu haw. Zaha Zeruzarez tawhu pe Tupàn Tuweharupi Wiko Ma'e Zanezar hemiapo kwer imume'u pà teko a'e pe har wanupe nehe, i'i wà.<sup>11</sup> Tupàn Tuweharupi Wiko Ma'e ipurumumaw wer Mawiron rehe a'e, a'e rupi uma'erekò Mez wanuwhawete wapy'a pupe a'e. A'e rupi uzàmàtyry'ym oho wà kury. Nezewe mehe uzepyk putar wanehe nehe, ta'e umumew hàpuzuhu a'e wà xe. Nezewe haw tuwhaw uzapo kar wà.

— Pemuaimé penu'yw nehe. Pemuàgà'ym pemimaw nehe no.<sup>12</sup> Pezàmàtyry'ym kar Mawiron ipàrirogawtàtà

zauxiapekwer wanupe nehe. Pemukàg kar ume'egatu ma'e pe wà nehe. Pemono awa ume'egatu ma'e romo pe wà nehe no. Pezumim awa teko wazuka àràm romo pe wà nehe no. Tupàn Tuweharupi Wiko Ma'e uzapo wemimume'u kwer. Umume'u ikatu 'ym ma'e Mawiron wanupe wemiapo ràm. Uzapo no. <sup>13</sup> Heta tetea'u yrykawhu Mawiron ywy rehe. Heta tetea'u temetarer no. Nezewe rehe we uhem i'ar kury. Amonohok waneko haw inemo ài. <sup>14</sup> Tupàn Tuweharupi Wiko Ma'e upuner wera'u ma'e umume'u wemiapo ràm wekuwe haw rehe a'e. — Arur putar awa tetea'u Mawiron iàmàtyry'ym pà ihe wà. Uhem putar tukur tetea'u wazàwe wà nehe, ywàkun zàwenugar romo wà nehe. Uhapukaz putar wà nehe, ta'e weityk putar tawhu wà nehe xe.

### *Zegar haw Tupàn ikatu haw rehe har*

<sup>15</sup> Tupàn Tuweharupi Wiko Ma'e uzapo ywy upuner haw rupi.

Uma'ekwaw paw rupi uzapo ywy.

Uma'e kwaw katu haw rupi umuzaiko ywak tàpuzràn ài.

<sup>16</sup> Aze Tupàn Tuweharupi Wiko Ma'e omokororo kar, 'y ywak rehe har okororo.

Umuzeupir kar ywàkun ywy iahykaw wi.

Uzapo àmàn iweraw paw.

Umuhem kar ywytu imono ipyta haw wi no.

<sup>17</sup> A'e ma'e hexak mehe zaiko iranaiw ma'e romo. Ma'e kwaw par 'ym romo zaiko.

Tupàn a'ua'u hagapaw iapo har uzemumikahy wemiapo kwer rehe wà.

Ta'e uzapo tupàn a'ua'u a'e wà xe.

Nuikuwe kwaw wà.

<sup>18</sup> A'e tupàn a'ua'u nuzawy kwaw heityk pyrer.

Purupe temu'emaw romo wanekon wà.

Tupàn Tuweharupi Wiko Ma'e ur putar wanehe uzepyk pà nehe. A'e 'ar mehe umumaw putar a'e wà nehe.

<sup>19</sup> Tupàn Zako izar nuiko kwaw nezewe a'e.  
 A'e ae uzapo ma'e paw rupi a'e wà.  
 Wexaexak Izaew wemiaihu romo wà.  
 Tupàn Tuweharupi Wiko Ma'e upuner wera'u ma'e her romo a'e.

*Mawiron wiko Tupàn ipurunupà haw romo*

<sup>20</sup> Tupàn Tuweharupi Wiko Ma'e uze'eg kury.  
 — Mawiron, ereiko hepurunupà haw romo ne.  
 Ereiko hetakihepuku romo hepuruzuka haw romo.  
 Apei'ai'ág tekoywy tetea'u rehe har nepupe ihe wà.  
 Amumaw tuwihaw ihe wà. Amumaw wanemiruze'eg ihe wà no.  
<sup>21</sup> Akamik kawaru nepupe ihe wà. Akamik waku'az har ihe wà no.  
 Azukazuka ywyramawa.  
 Azuka waneruata har ihe wà no.  
<sup>22</sup> Azuka awa nepupe ihe wà. Azuka kuzà nepupe ihe wà no.  
 Apei'ai'ág tua'uhez ma'e ihe wà. Apei'ai'ág kwàkwàmo ihe wà no.  
 Akamik awa ihe wà. Akamik kuzàwaza ihe wà no.  
<sup>23</sup> Amuku'i àràpuhàràñ ihe wà. Amuku'i wanehe uzekaiw ma'e ihe wà no.  
 Apei'ai'ág uma'ereko ma'e ihe wà. Apei'ai'ág waneimaw tapi'ak ywy iwykawyka haw imutykar ihe wà no.  
 Akamik tuwihaw ihe wà. Akamik tuwihaw ikàg ma'e ihe wà no.

*Tupàn uzepyk Mawiron wanehe a'e*

<sup>24</sup> Uze'eg Tupàn Tuweharupi Wiko Ma'e kury.  
 — Mawiron ywy rehe har a'e wà, uzapo ikatu 'ym ma'e tetea'u Zeruzarez pe wà. Amekuzar kar putar wanemiapo

kwer ihe nehe, wanupe ihe nehe. Pexak putar hezepyk mehe nehe. <sup>25</sup> Mawiron. Ereiko ywytyruhu ywy paw imumaw par romo ne. Ihe Tupàn Tuweharupi Wiko Ma'e aiko neàmàtyry'ymar romo ihe. Urupyhyk putar nehe. Urumumew putar nehe no. Urumuigo kar putar tanimuk romo ihe nehe. <sup>26</sup> Teko nupyhyk pixik kwaw ita nerehe har tàpuz ipyahu ma'e iapo pà wà nehe. Ereiko putar ywyxiguhu romo tuweharupi nehe. Ihe Tupàn Tuweharupi Wiko Ma'e aiko ko ma'e imume'u har romo ihe.

<sup>27</sup> — Pemono kar zauxiapekwer iàmàtyry'ym kar pà wanupe nehe. Pezupy pexi'äm ma'e 'ak kwer iapo pyrer nehe. Nezewé mehe teko wenu putar wà nehe. Pemuàgà'ym teko ywy tetea'u rehe har pe wà nehe, Mawiron iàmàtyry'ym kar pà wanupe pe wà nehe. Peze'eg Ararat ywy rehe har wanupe nehe, Mini ywy rehe har wanupe nehe no, Azkenaz ywy rehe har wanupe nehe no. Pexak amo awa zauxiapekwer wanuwihaw romo imuigo kar pà nehe. Perur kawaru tetea'u pe wà nehe. Tuwe waneta haw nuzawy kwaw tukur tetea'u waneta haw nehe. Tuwe nuzawy kwaw ywàkun nehe. <sup>28</sup> Pemuàgà'ym Mez wanuwihawete pe wà nehe, wanuwihaw pe wà nehe no, Zauxiapekwer wanuwihaw pe wà nehe no, ywy nànànar a'e tuwhiaw wanemiruze'eg pe wà nehe no. Pezàmàtyry'ym kar Mawiron wanupe pe wà nehe. <sup>29</sup> Ywy uryryryryz wenaw wi uhem a'e, ta'e Tupàn Tuweharupi Wiko Ma'e uzapo wemimume'u kwer iko a'e xe. Uzapo putar Mawiron ywyxiguhu romo nehe. Ni amo teko nuiko kwaw a'e pe wà nehe. <sup>30</sup> Zauxiapekwer Mawiron ywy rehe har upytu'u amo zauxiapekwer waàmàtyry'ym ire wà. Upyta wàpuzuhutàtà pupe wà. Wakàgaw uhem wanawi. Nuzawy kwaw kuzà wà. Amo ukauka tawhu hukenawhu wà. Tàpuz ukaz wà no. <sup>31</sup> Ze'eg heraha

har tetea'u uhem oho Mawiron wanuwiawete pe uzeapo ma'e kwer imume'u pà wà. — Zauxiapekwer wixe tawhu pupe ma'ema'e wi a'e wà. <sup>32</sup> Waàmàtyry'yamar upyhyk yrykawhu ahaw paw paw rupi wà. Umunyk tata tåpuzuhutàtà wanehe wà no. Zauxiapekwer Mawiron ukyzeahy wà. <sup>33</sup> Nan kwehe tete waàmàtyry'yamar ukixikixi putar wà nehe. Ukamikamik putar arozràn ài wà nehe no, waiwy rehe wà nehe no. Tupàn Tuweharupi Wiko Ma'e upuner wera'u ma'e Izaew wazar uze'eg kwez kury.

<sup>34</sup> Mawiron wanuwiawete upei'ài'ág Zeruzarez a'e.

A'e re u'u.

Wenuhem teko paw a'e wi wà. Wenuhem ma'e paw no.

Nuzawy kwaw 'y y'a wi uzeakook ma'e. Nuzawy kwaw àzàg tawhu i'u arer.

Weraha wemimutar paw.

Weityk ikurer.

<sup>35</sup> Emume'u ko ma'e teko Xiàw pe har wanupe nehe.

— Mawiron uzapo puruzuka haw tetea'u zanewe a'e wà.

Tuwe wapuruzuka haw uzewyr katu uzar wanupe nehe, ere wanupe nehe.

Eze'eg wi teko Zeruzarez pe har wanupe nehe no.

— Mawiron upuraraw kar ma'erahy zanewe a'e wà.

Tuwe Tupàn uzepyk wanehe a'e ma'erahy hekuzaromo nehe, ere wanupe nehe.

### *Tupàn upytywà Izaew wà*

<sup>36</sup> Nezewe uze'eg Tupàn Tuweharupi Wiko Ma'e teko Zeruzarez pe har wanupe.

— Apupytywà putar ihe nehe. Azepyk putar peàmàtyry'yamar wanehe nehe. Amutypaw putar yzygwar Mawiron pe har ihe nehe. Amutypaw putar yrykawhu a'e pe har ihe nehe no. <sup>37</sup> Na'e Mawiron wiko putar ywytyr ita iapo pyrer romo nehe. Miar ipuruzukaiwahy ma'e wiko

putar a'e pe wà nehe. Teko ukyzeahy putar hexak mehe wà nehe. Ni amo nuiko kwaw a'e pe wà nehe. Mawiron rehe ume'e ma'e paw ukyze putar wà nehe. Ta'e ukwaw putar a'e pe uezapo ma'e kwer a'e wà xe. <sup>38</sup> Mawiron pe har paw okororo zàwàruhu iriàw ài wà. Uzemuakyr zàwàruhua'yr ài wà no. <sup>39</sup> Aipo ume'e a'e wà. Azapo putar mynykawhu wanupe nehe. Amuka'u kar putar ihe wà nehe. Amurywete kar putar ihe wà nehe no. Na'e uker putar wà nehe. Nume'e pixik kwaw a'e re wà nehe. <sup>40</sup> Araha putar wamàno àwàm pe àràpuhàràna'yr ài ihe wà nehe, àràpuhàràn hawitu ma'e awa ài ihe wà nehe no, àràpuhàrànete ài ihe wà nehe no. Ihe Tupàn Tuweharupi Wiko Ma'e aze'eg kwez ihe kury.

### *Mawiron heitykaw*

<sup>41</sup> Uze'eg wi Tupàn Tuweharupi Wiko Ma'e kury.

— Mawiron ikatu teko ywy nànànar wanupe. Nezewe rehe we zauxiapekwer upyhyk heityk pà wà kury. — Iaiw, i'i teko amo ae ywy rehe har wà, hexak mehe wà. <sup>42</sup> Yryhu oho Mawiron rehe. Upyk ykotok puruzuka ma'e pupe. <sup>43</sup> Umumew tawhu paw wà. Nuzawy kwaw ywyxiguhu 'y hereko har 'ym. Ni amo nuiko kwaw a'e pe wà. Ni amo nukwaw kwaw huwake wà. <sup>44</sup> Azepyk putar Mew Mawiron watupàn rehe ihe nehe. Imunar hema'e rehe a'e. Amuzewyr kar putar a'e ma'e ihe nehe. Teko ywy nànànar upytu'u putar imuwete re a'e wà nehe.

— Mawiron ipàrirogawtàtà u'ar kwez kury. <sup>45</sup> Teko Izaew ywy rehe har wà, pezàn a'e wi nehe. Pitàitàigatu uezepyro putar hekwahy haw tata zàwenugar wi wà nehe. <sup>46</sup> Pekàg wiwi nehe. Pekyze zo uezapo ma'e kwer imume'u haw henu mehe nehe. Kwarahy nànàn teko umume'u amo ae ma'e wà. Umume'u amo tuwihawete amo ae tuwihawete iàmàtyry'ymaw wà no. <sup>47</sup> Nezewe uhem he'ar iko. A'e 'ar

mehe azepyk putar tupàn a'ua'u Mawiron pe har wanehe ihe wà nehe. A'e ywy rehe wiko ma'e imaranugar putar wà nehe, ta'e zauxiapekwer weityk a'e teko a'e wà xe. Uzuka putar paw rupi wà nehe no. <sup>48</sup> Mawiron u'ar putar nehe. Teko kwarahy heixe haw awyze har kutyr har umumaw putar wà nehe. A'e 'ar mehe ywak rehe har paw a'e wà nehe, ywy rehe har paw a'e wà nehe no, uzegar putar urywete haw rehe a'e wà nehe. <sup>49</sup> Mawiron uzuka teko ywy nànàn a'e wà. Ko 'ar rehe u'ar a'e, ta'e uzuka Izaew tetea'u a'e wà xe. Ihe Tupàn Tuweharupi Wiko Ma'e aze'eg kwez kury.

*Tupàn uze'eg zuta ywy rehe har Mawiron pe wiko ma'e wanupe*

<sup>50</sup> Uze'eg Tupàn Tuweharupi Wiko Ma'e kury. — Heremaihu Mawiron pe wiko ma'e wà. Pehem pemàno haw wi. Peata nehe kury. Pepyta zo ma'e hàro pà nehe. Peiko muite peneko haw wi. Nezewe rehe we pema'enukwaw herehe nehe. Aiko pezar romo ihe. Pema'enukwaw Zeruzarez rehe nehe no. <sup>51</sup> Nezewe peze'eg ihewe.

— Uremaranugar ta'e amo uze'eg zemueteahy urerehe wà xe. Amo ywy rehe har wixe katuahy haw tåpuzuhu pe har pupe wà. A'e rupi uremuigo kar ikàg 'ym ma'e romo wà, peze peiko. <sup>52</sup> A'e rupi amume'u ko ma'e ihe kury. Uhem he'ar iko. A'e 'ar mehe azepyk putar tupàn a'ua'u Mawiron pe har wanehe ihe nehe. Ikutuk pyrer a'e ywy rehe imuhàz pyrer ikuhem putar wà nehe. <sup>53</sup> Aze mo Mawiron upuner ywak rehe uzeupir haw rehe wà, aze mo upuner tåpuzuhu tàtà a'e pe iapo haw rehe wà, nezewe rehe we mo amono kar teko a'e pe ihe wà. — Pemumaw pe wà nehe, a'e mo wanupe. Ihe Tupàn Tuweharupi Wiko Ma'e aze'eg kwez kury.

*Mawiron imumaw paw*

<sup>54</sup> Uze'eg wi Tupàn Tuweharupi Wiko Ma'e.

— Peinu teko Mawiron pe har wanehapukaz mehe pe wà nehe.

Uzai'o waiko wà, ta'e zauxiapekwer umumaw a'e ywy a'e wà xe.

<sup>55</sup> Amumaw Mawiron teko ihe.

Amupytu'u kar ize'eg ire ihe.

Zauxiapekwer ipupe wixe ma'e a'e wà, Nuzawy kwaw ykotok ipuruzukaiwahy ma'e wà.

Uzàmàtyry'y'm a'e pe har uhapukazahy pà wà.

<sup>56</sup> Ur Mawiron imumaw pà wà.

Upyhyk zauxiapekwer a'e pe har wà.

Omonohok waywyrapar wà. Omonohok wanu'yw wà no.

Ihe Tupàn Tuweharupi Wiko Ma'e aiko ikatu 'ym ma'e rehe uzepyk ma'e romo ihe.

Azepyk putar Mawiron rehe ihe nehe, ta'e iaiw a'e wà xe.

<sup>57</sup> Amuka'u putar wanuwhihaw ihe wà nehe:

Ma'e kwaw katu har wà, Wanuwhihaw wà, Wainuromo har zauxiapekwer wà.

Uker putar wà nehe.

Nume'e pixik kwaw wà nehe.

Ihe tuwhawete aiko ko ma'e imume'u har romo ihe.

Tupàn Tuweharupi Wiko Ma'e upuner wera'u ma'e herer romo ihe.

<sup>58</sup> Zauxiapekwer umumew putar Mawiron ipàrirogawtàà iànàgatu wera'u ma'e a'e wà nehe.

Tata umumaw putar ukenawhu aiha wera'u ma'e nehe no.

Teko wama'erekò haw paw iaiw.

Teko ywy nànànar wanemiapo kwer ukaz putar nehe.

Tupàn Tuweharupi Wiko Ma'e upuner wera'u ma'e uze'eg kwez kury.

*Zeremi omono kar uze'eg pape rehe imuapyk pyrer Mawiron pe wiko ma'e wanupe*

<sup>59</sup> Xerai Neri ta'yr Mazez hemimino wiko tuwihaw tuwihawete Zeneki ipytywà har romo a'e. Zeneki Zuta wanuwhawete romo heko mehe 4 haw kwarahy rehe Xerai uzypyrog Mawiron pe oho pà kury. Na'e azapo kar amo ma'e izupe. <sup>60</sup> Amuapyk Mawiron imumaw pàwàm amo pape rehe ihe. Amume'u amogwer izupe uezapo ma'e ràm a'e pape rehe imuapyk pà ihe no. <sup>61</sup> Na'e aze'eg Xerai pe kury.

— Mawiron tawhu pe nehem mehe emugeta nerahy haw rupi ko pape rehe imuapyk pyrer paw teko wanupe nehe. <sup>62</sup> A'e re eze'eg nezewe nehe. — O Tupàn Tuweharupi Wiko Ma'e. — Amumaw putar 'aw tawhu ihe nehe, ere. — Ni amo wikuwe ma'e nupyta kwaw xe a'e wà nehe, ere. — Ni teko wà, ni ma'ea'yr wà, ere. — 'Aw tawhu uezapo putar ywyxiguhu romo tuweharupi nehe, ere, ere izupe nehe. <sup>63</sup> Ko pape teko wanupe imugeta re ezàpixipixi amo ita hehe nehe. Na'e eityk Ewparat yrykawhu pupe nehe. <sup>64</sup> Na'e eze'eg nezewe wanupe nehe. — Nezewe haw uezapo putar Mawiron pe nehe. Uzeapypyk putar nehe. Nuzeupir pixik kwaw nehe. Ta'e Tupàn werur putar imumaw paw hehe a'e nehe xe, ere wanupe nehe, a'e izupe.

Zeremi ize'eg upaw xe kury.

## 52

### *Zeruzarez tawhu heitykaw*

<sup>1</sup> Zeneki wereko 21 kwarahy Zuta ywy rehe har wanuwhawete romo wiko mehe a'e. Umumaw 11 kwarahy Zeruzarez pe tuwihawete romo wiko pà. Amutaw ihy her romo a'e. Amo Zeremi tazyr romo hekon. A'e Zeremi uzapo weko haw Irimina tawhu pupe a'e. <sup>2</sup> Tuwihawete

Zeneki uzapo ikatu 'ym ma'e Tupàn Tuweharupi Wiko Ma'e henataromo. Nuzawy kwaw tuwihawete Zeoaki. <sup>3</sup> Tupàn Tuweharupi Wiko Ma'e wikkahy teko Zuta ywy rehe har wanupe, Zeruzarez pe har wanupe no. A'e rupi weraha kar zauxiapekwer wanupe wanemipyhyk kwer romo wà. Zeneki upytu'u Mawiron wanuwhawete heruzar ire. Uzàmàtyry'ym. <sup>4</sup> Zeneki Zuta ywy rehe har wanuwhawete romo heko mehe 9 haw kwarahy rehe 10 haw zahy rehe 10 haw 'ar mehe Namukononozor Mawiron wanuwhawete ur wemiruze'eg zauxiapekwer paw wanupi a'e kury, Zeruzarez iàmàtyry'ym pà a'e kury. Uzapò uker haw katu pe tawhu huwake wà. Uzapò tåpuza-  
ha tawhu izywyr wà, hehe umàmàn pà wà. <sup>5</sup> Umumaw mokoz kwarahy a'e pe upytu pà wà. Zeneki umumaw 11 kwarahy wanuwhawete romo wiko pà kury. <sup>6</sup> A'e kwarahy rehe 4 haw zahy rehe 9 haw 'ar mehe ma'uhez haw uhua'u tawhu pupe kury. Naheta kwaw temi'u teko wanupe. <sup>7</sup> Mawiron uzapo wixe àwàm pàrirogawtâtà rupi wà. Na'e zauxiapekwer Zutew a'e wà kury, uzeagaw uzàn pà tawhu wi pyhaw a'e wà kury. Zauxiapekwer Mawiron pe har umàmàn tawhu nànà. Nezewe rehe we ipupe har izàn wer wà. Oho pe tuwihawete ima'etymaw rupi har rupi wà. Heta ukenawhu mokoz pàrirogawtâtà wamyter pe. Oho a'e ukenawhu rupi wà. Uzàn oho ywyàpyznaw Zotàw rykawhu izywyr har ikutyr wà. <sup>8</sup> Zauxiapekwer Mawiron uzàn oho tuwihawete Zeneki haikweromo wà. Upyhyk ywytyr heta 'ymaw Zeriko izywyr har rehe heko mehe wà. Zauxiapekwer tuwihawete rupi uzàn ma'e paw weityk uzar wà kury. <sup>9</sup> Mawiron weraha Zeneki tuwihawete Namukononozor pe wà. Namukononozor wiko Himina tawhu Amat ywy rehe har pe a'e 'ar mehe. A'e pe Namukononozor umume'u izupe wemiapo ràm kury. <sup>10</sup> Himina pe wiko mehe we Mawiron wanuwi-

hawete uzuka kar Zeneki ta'yr wanu henataromo wà, zauxiapekwer wanupe wà. Uzuka kar Zuta ywy rehe har wanuwhiaw a'e wà no. <sup>11</sup> Na'e ukutuk kar Zeneki heha wanupe kury. Uzàpixipixi kyhàhàm tâtà morog iapo pyrer pupe, Mawiron pe heraha kar pà. Zeneki upyta zemunehew paw Mawiron pe har pupe. Te umànò ipupe.

*Tupàn hàpuzuhu heitykaw*

<sup>12</sup> Namukononozor Mawiron wanuwhiawete romo heko mehe 19 haw kwarahy rehe 5 haw zahy rehe 10 haw 'ar mehe Nemuzàràñà tuwhiwete heruze'egar a'e, hemiruze'eg zauxiapekwer wanuwhiaw a'e, wixe Zeruzarez pupe a'e kury. <sup>13</sup> Wapy Tupàn Hàpuzuhu. Wapy tuwhiwete hàpuzuhu no. Wapy tuwhiwaw paw wanàpuzuhu no. <sup>14</sup> Hemiruze'eg zauxiapekwer weityk tawhu ipàrirogawtâtà wà. <sup>15</sup> Na'e Nemuzàràñà weraha teko tetea'u ipyhyk pyrer romo Mawiron pe a'e wà kury: tawhu pupe hezar pyrer wà, Mawiron wamyrypar romo uezapo ma'e kwer wà no, uma'ereko ma'e ma'e iapo katu haw kwaw par wà no.

<sup>16</sup> Wezar teko hemetarerer 'ym ma'e Zeruzarez pupe wà. Umuma'ereko kar uwà tyw pe wà, ko pe wà no.

<sup>17</sup> Mawiron ukauka tâpuzuhu izyta morog iapo pyrer wà. Ukauka ywyramawa tâpuzuhu izywyr har wà no. Ukauka 'yryruhu morog iapo pyrer wà no. Na'e weraha a'e morog paw Mawiron pe wà kury. <sup>18</sup> Weraha tanimuk ma'ea'yr hapy haw pe har heraha haw wà. Weraha hyru wà no. Weraha zepinaw tatainy ihàm imonohokaw wà no. Weraha kawaw ma'ea'yr huwykwer imono'ogaw wà no. Weraha yhyk zàwenugar hapy haw wà no. Weraha ma'e morog iapo pyrer Tupàn imuwete haw rehe har paw wà no. <sup>19</sup> Weraha ma'e or iapo pyrer paw wà no. Weraha ma'e parat iapo pyrer paw wà no: Kawaw pixika'i ma'e, kawaw tanimuk heraha haw, kawaw ma'ea'yr huwykwer

imono'ogaw, tanimuk hyru, tatainy henaw, yhyk zàwenu-gar hyru, win Tupàn pe imono pyr hyru. <sup>20</sup> Kwehe mehe tuwihawete Xàrumàw uzapo ma'e tetea'u morog iapo pyrer tàpuzuhu pupe har a'e: mokoz izyta, ywyramawa, 'y hyruhu, 12 tapi'ak hagapaw a'e 'yryru ikokaw romo wà. Teko nupuner kwaw a'e ma'e ipuhuz haw ipapar haw rehe wà. <sup>21-22</sup> A'e mokoz izyta uzezuawygatu wà. Pitàitàigatu aiha haw heta 8 met. Pitàitàigatu heta 5,35 met aze amo oho izywyr. Naheta kwaw morog wapupe. Morog iànàmaw heta 10 xenxim. Izyta apyr pitàitàigatu heta ipeao morog iapo pyrer. Iaiha haw heta 2,20 met. Ipeao nànàn heta tetea'u ma'ywa homà hagapaw, imumuràgaw romo. Awa uma'ema'e morog a'e ma'e paw iapo pà wà. <sup>23</sup> Pitàitàigatu imumuràgaw izyta wanehe har rehe heta 100 homà hagapaw wà. Teko upuner 96 homà hagapaw wanexakaw rehe ywy rehe upu'äm mehe wà.

### *Zauxiapekwer weraha Zuta ywy rehe har Mawiron pe wà*

<sup>24</sup> Nemuzàràñà zauxiapekwer wanuwihow a'e, weraha amo tuwihaw ipyhyk pyrer romo wà: Xerai xaxeto wanuwihowete, Xoponi xaxeto wanuwihow Xerai ivy pe har, amogwer na'iruz tàpuzuhu pe har wanuwihow ikàg ma'e wà. <sup>25</sup> Weraha amo awa tawhu wi a'e wà: zauxiapekwer wanuwihow kwer, 7 tuwihawete ipytywà har a'e pe wikuwe ma'e wà, tuwihaw awa zauxiapekwer romo wamuigo kar har, amo 60 awa ikàg ma'e wà. <sup>26</sup> Nemuzàràñà weraha a'e teko paw Mawiron wanuwihowete pe wà. Himina tawhu pe tuwihawete hekon a'e. <sup>27</sup> Amat ywy rehe tuz a'e tawhu. A'e pe wahem ire tuwihawete upetek kar a'e awa paw rupi wà. Na'e uzuka kar wà no. Nezewé weraha teko Zuta ywy rehe har ipyhyk pyrer romo uiwy wi wà. <sup>28</sup> Na'aw Namukononozor hemiraha kwer waneta haw xe: Tuwihawete romo wiko mehe 7 haw kwarahy rehe Namukononozor weraha 3.023 teko uzeupi Mawiron

pe wà. <sup>29</sup> 18 haw kwarahy rehe weraha 832 teko Zeruzarez wi wà. <sup>30</sup> 23 haw kwarahy rehe Nemuzàràñà weraha 745 teko wà. Aze ximono'og paw rupi zane wà, weraha 4.600 teko wà.

<sup>31</sup> Mawiron wanuwhawete romo uezapo haw kwarahy rehe Emiw-Meronak ikatu Zoaki Zuta ywy rehe har wanuwhawete pe. Umuhem kar zemunehew paw wi. Ummumaw 37 kwarahy 11 zahy 5 'ar ipyhyk pyrer romo wiko pà. <sup>32</sup> Emiw-Meronak ikatu Zoaki pe. Heta amo tuwhawete Mawiron pe ipyhyk pyrer romo wà. Umuigo kar Zoaki a'e tuwhawete wanuwhaw romo a'e kury. <sup>33</sup> Wenuhem kar ikamir zemunehew paw pe arer izupe wà. Umunehew kar ikamirete izupe wà. — Erepuner nemai'u haw rehe tuwhawete ipyr tuweharupi nerekewe mehe nehe, i'i izupe wà. <sup>34</sup> Tuweharupi hekuwe mehe we tuwhawete omono temetarer izupe. Upuner uma'e ime'eg kar haw rehe a'e temetarer pupe a'e kury. Upaw kwez kury.

Tupàn ze'eg

Bible without Deuterocanon in Guajajára (BR:gub:Guajajára)  
copyright © 2007 Wycliffe Bible Translators, Inc.

Language: Guajajára

Translation by: Wycliffe Bible Translators, Inc.

Guajajára [gub], Brazil

Copyright Information

© 2007, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9788531109713

The Bible without Deuterocanon

in Guajajára

© 2007, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-03-30

---

PDF generated using Haiola and XeLaTeX on 29 Jan 2022 from source files dated 30 Nov  
2021  
0aad8539-54cc-5543-91cd-25f61502645a